



This is a digital copy of a book that was preserved for generations on library shelves before it was carefully scanned by Google as part of a project to make the world's books discoverable online.

It has survived long enough for the copyright to expire and the book to enter the public domain. A public domain book is one that was never subject to copyright or whose legal copyright term has expired. Whether a book is in the public domain may vary country to country. Public domain books are our gateways to the past, representing a wealth of history, culture and knowledge that's often difficult to discover.

Marks, notations and other marginalia present in the original volume will appear in this file - a reminder of this book's long journey from the publisher to a library and finally to you.

### Usage guidelines

Google is proud to partner with libraries to digitize public domain materials and make them widely accessible. Public domain books belong to the public and we are merely their custodians. Nevertheless, this work is expensive, so in order to keep providing this resource, we have taken steps to prevent abuse by commercial parties, including placing technical restrictions on automated querying.

We also ask that you:

- + *Make non-commercial use of the files* We designed Google Book Search for use by individuals, and we request that you use these files for personal, non-commercial purposes.
- + *Refrain from automated querying* Do not send automated queries of any sort to Google's system: If you are conducting research on machine translation, optical character recognition or other areas where access to a large amount of text is helpful, please contact us. We encourage the use of public domain materials for these purposes and may be able to help.
- + *Maintain attribution* The Google "watermark" you see on each file is essential for informing people about this project and helping them find additional materials through Google Book Search. Please do not remove it.
- + *Keep it legal* Whatever your use, remember that you are responsible for ensuring that what you are doing is legal. Do not assume that just because we believe a book is in the public domain for users in the United States, that the work is also in the public domain for users in other countries. Whether a book is still in copyright varies from country to country, and we can't offer guidance on whether any specific use of any specific book is allowed. Please do not assume that a book's appearance in Google Book Search means it can be used in any manner anywhere in the world. Copyright infringement liability can be quite severe.

### About Google Book Search

Google's mission is to organize the world's information and to make it universally accessible and useful. Google Book Search helps readers discover the world's books while helping authors and publishers reach new audiences. You can search through the full text of this book on the web at <http://books.google.com/>

NYPL RESEARCH LIBRARIES



3 3433 06824555 8














Gierbert

ZFH







DE  
S U B L I M I  
IN  
EVANGELIO  
C H R I S T I  
JUXTA DIVINAM  
VERBI INCARNATI  
OECONOMIAM.

---

AUCTORE *Gerbert*  
MARTINO GERBERTO


MONASTERII ET CONGREGATIONIS S. BLASII IN  
SILVA NIGRA ABBATE S. Q. R. I. P.

---

TOMUS I.

---

TYPIS SAN-BLASIANIS 1793.





VENERABILIBUS, RELIGIOSIS;  
DILECTISSIMIS IN CHRISTO  
PATRIBUS  
CAPITULARIBUS  
MONASTERII  
AC  
CONGREGATIONIS  
D. BLASII  
IN SILVA NIGRA  
D. D. D.  
MAURITIUS ABBAS.







# PARÆNETICA

A D

E O S D E M.

**N**on una mihi ratio fuit, ut præsens  
Opusculum *de sublimi in Evangelio Chris-  
ti iuxta Verbi incarnati æconomiam*, quod  
MARTINI II. Abbatis nostri nuperri-  
me defuncti posthumum est, Vestro potis-  
simum Nomini dicarem. Inprimis enim

immortalis memoriæ præsul statim, ut manus operi admovit, id consilii ceperat, anno proxime imminente sacerdotii sui iubilæo, expleturus. Pietatis ergo officium erat, ut, qui vestris suffragiis in dignitatem succedere compulsus sum, ultimæ Eius voluntati, quasi testamento relictæ ac consignatæ obtemperem: gratitudinis vero, ut Antistitis de congregatione nostra innumeris nominibus quam optime meriti, memoriam in animis vestris nunquam delendam perennemque reddere fatagam; id haud facilius, ut mihi quidem videbatur, effecturus, quam si ultima Patris optimi ad cælum properantis verba oculis vestris obiicerem, vulnere nondum obducto, quod transitus omnium cordibus infixit. Deinde ipsum gravissimum munus, quod in humeros meos devolvistis, eiusmodi est, ut digne a me administrari non posse existimaverim, nisi primas curas eo converterem, ut quantum vos diligam, quantumve singulos vestrum Christo lucrifacere cupiam, publico ex testimonio intelligeretis. Eum enim in scopum sublimem singula libri dogmata collineare, instituta fedula lectione facile percipietis, quamquam piissimus Author, ut erat modestissimus atque ab omni ostentatione

alienus, stylo plumbeo in scheda separata scripserit, se *animo potius aliorum, qui in studio magis versati sunt, diligentiam stimulandi*, præsens opus elucubrasse, *quod ego tandem senex, modeste pergit, cum iam Deus signa mortis appropinquantis apoplectico insultu leviori quidem mihi dedisset, excolere cœpi, ceteris studiis et occupationibus sepositis, quibus per totam fere vitam sum distractus.*

Piissimus itaque Pater noster, quum deinceps filiorum animos se verbis excitare ad sacratiora studia haud posse prævideret, scriptis id agere atque adeo monitis perennibus constituit; probe gnarus, non aliud æque litterarum genus repurgandis, excolendis ac elevandis hominum mentibus magis esse aptum, atque continuam sacrae scripturae lectionem meditationemque: quam unam fere veterum monachorum, ascetarumque fuisse occupationem perbene nostis, qui dum pura simplicique mente ad eam accesserunt, tantum inde tulere fructum, ut non modo cum morum sanctitate tum scientiæ laude in Ecclesia Dei tanquam luminaria magna inclaruerint, sed plurimi etiam in hierarcharum adlecti ordinem hæresum confutatione ac

morum reformatione vineam Domini egregie colere atque ampliare quiverint. Quod dum studium medio præsertim ævo languescere cœpit, mirum non est, scolasticas tricas, spinosas quæstiones, vanasque altercationes unacum disciplinæ relaxatione fuisse invectas, iis fimillimas, a quibus ut sibi caveat Titus, gentium Apostolus monuit. Tit. III. 9.

Id vero ad nos propius, hoc præsertim tempore attinet, utpote in partem sollicitudinis pastoralis vocatos, atque ad curam animarum gerendam destinatos: A quo gravissimo officio quum pauci nostrum eximantur, necessum prorsus est, ut singuli in sacrarum litterarum studio dies noctesque sese exerceant, atque ita salvatoris nostri, non propria dogmata, non se ipsos, sed Jesum Christum et hunc crucifixum ovibus sibi commissis prædicare discant, quas tamdiu, ut cum Paulo loquamur, parturire tenentur, donec Christus formetur in eis: Nam *omnis scriptura divinitus inspirata utilis est ad docendum, ad arguendum, ad corripiendum, ad erudiendum in iustitia, ut perfectus sit homo Dei, ad omne opus bonum instructus.* II. Timoth. III. 16. 17. Quod præsertim

de Evangelio paucis enuntiat S. Paulus:  
*Non erubescō, inquiens, Evangelium. Virtus enim Dei est ad salutem omni credenti.*  
Rom. I. 16.

Jam vero Confratres Venerandissimi!  
oculos animosque vestros in præsens  
temporū communem calamitatem atque  
summa pericula convertite, e quibus non  
solum Ecclesiæ, sed reipublicæ etiam ex-  
trema quævis imminet. Ea namque,  
pro dolor! vivimus tempora, de quibus  
Princeps Apostolorum, *venient, inquit, in novissimis diebus in deceptione illusores, iuxta proprias concupiscentias ambulantes, dicentes, ubi est promissio aut adventus eius? ex quo enim patres dormierunt, omnia sic perseverant ab initio creaturæ*, II. Pet. III. 3. 4. Quæ in cœtum pseudophilosophorum aperte quadrant, quos inde a duobus iam sæculis, iusto irati Numinis iudicio, orcus evomuit, lue sua pestifera omnem ætatem ac sexum utrumque inficientes; a qua D. Paulum Colossenses his præmonuisse arbitror: *Videte, ne quis vos decipiat per Philosophiam, et inanem fallaciam.* Coloss. II. 8.

Parum sibi præstitisse viderentur huius furfuris homines, si hæresim tantum

stabilirent, aut schismate Ecclesiam scinderent. Ipsum Atheismum publicis in Conventibus celebrant, laudesque impias avidissime captant, quas misera atque feducta plebecula plausibus detestandis in scelestos præcones ubertim accumulat. Tempia Deo vivo et vero sacra in mausolæa sceleratorum conversa dolemus, sacerdotes suo muneri fideles crudelissime aut trucidatos, aut in antra tenebricosa et foetida coniectos, ultra limites patriæ projectos, sine certa iam sede *circumeuntes egentes, angustiatos, afflictos, quibus dignus non erat mundus*, Heb. XI. 37. 38. Spoliatur Ecclesia auctoritate legitima, hierarchæ, a Spiritu sancto ut eam regerent, constituti, suis exuuntur iuribus, divina humanaque permiscentur, atque dum frænâ laxantur criminibus, ipsa regna dehiscunt et corruunt.

Frustra malo ingruenti aggerem humana ratio opponit, folaque superest religio, quæ vulneri vix non desperato medeatur. Ac profecto, Divinum salvatorem Apostolos suos haud aliis armis, quam Evangelii dogmatibus instructos in universum qua late patet orbem, densissimis idololatriæ tenebris ac criminum fæ-

ce sepultum, ablegasse novimus; miramurque brevi temporis spatio renovatam fuisse faciem terræ; illapsis cœlestis doctrinæ radiis, tyranni quamvis obstrepent ac sævirent, philosophi disceptarent, riderent, argutarentur. Nempe, *quæ stulta sunt mundi, elegit Deus, ut confundat sapientes, et infirma mundi elegit Deus, ut confundat fortia, et ignobilia et contemtibilia elegit Deus, et ea, quæ non sunt, ut ea quæ sunt, destrueret, ut non gloriatur omnis caro in conspectu eius.* I. Cor. I. 27.

Eadem igitur arma iterum capessenda sunt, quibus Apostoli orbem universum sub fuave Jesu Christi iugum miserunt, ac scite tractanda. Hoc quidem opus, hic labor est. Verum non desunt subsidia, multis sumtibus a MARTINO nostro undique comparata, quibus in secretiora Divini Verbi adyta penetrare poteritis, assiduam exercitationem nisi abhorreatis.

Neque vos deterreat sacrarum litterarum sublimis dicendi ratio atque Divina prorsus in sententiis maiestas, vel ab ipsis christianæ religionis iuratis hostibus celebrata (vid. J. J. Rousseau in Emil.)



habent enim amœnam quamdam, Deo dignam, mortalibusque non adsequendam simplicitatem coniunctam, quæ alliciat. Spes fructus amplissimi Vos erigat, quem nec ærugo nec tineæ corrumpet. Simile nimirum est Verbum Dei grano sinapis, quod quamvis minimum, in arborem tamen temporum decursu excrescit, atque ramis exporrectis vago volucrum cætui asylum præbet. Contemnatur licet, derideaturque, fieri sane non potest, quin fructus demum uberrimos ferat, tam Ecclesiæ, quam reipublicæ salubres, præcipue in cordibus teneræ iuventutis satum.

Cessabunt mala, quibus premimur, quæque irreligiosa et effrænis sentiendi, scribendique libido in mundum invexit, redibit pax aurea et morum probitas, suum cuique tribuetur, iam ipsis fummis principibus in id intentis, ut religioni debitus exhibeatur honor, ac hierarcharum iura postliminio revocentur.

Verum quum *neque qui plantat, sit aliquid, neque qui rigat, sed qui incrementum dat Deus*, I. Cor. XIV. 7.; atque *omne datum optimum, et omne donum perfectum*

*desursum fit, descendens a patre luminum, Jacob. I. 17. Divini illius spiritus, qui sacrorum librorum scriptores divinitatis suæ radiis illustravit, illapsum precibus ferventissimis exposcite. Si quis enim vestrum indiget sapientia, rursus ait S. Jacobus ibid. v. 5. etc., postulet a Deo, qui dat omnibus affluenter, et non improperat; et dabitur ei. Postulet autem in fide, nihil hæsitans; qui enim hæsitat, similis est fluctui maris, qui a vento movetur et circumfertur. Non ergo æstimet homo illé, quod accipiat aliquid a Domino. Quod ultimum ne fiat, vestraque frustretur oratio, vehementer vos exhortor obtestorque, ut Divinum volumen non profana quadam manu tractetis, aut vana sciendi prurigine incitati ad sacrorum oraculorum lectionem accedatis, sed iusto ordine ac ea omnino animi simplicitate et submissione sacras paginas meditemini, quam Divini spiritus gratia requirit, et sancta mater Ecclesia in sacra synodo Tridentina sess. LV. vobis commendat in Canone a MARTINO nostro in præfatione citato.*

Quæ cum præstiteritis Confratres dilectissimi! etiam pro me preces conti-

nuas ardentesque ad Coelum mittite, ut  
Divini spiritus gratia perlustratus, eius-  
que inflammatus amore in lege Domini  
diu noctuque meditando boni pastoris of-  
ficio plene perfungar, atque una vobis-  
cum, qui ovium mearum præcipua pars  
estis, eo pertingam, ubi unum erit ovi-  
le, et unus pastor; qui omnium laborum  
nostrorum unicus finis esto.

Dabam in D. Blasii. VIII. Id. Junii  
A. R. S. MDCCXCIII.

---

PRÆ

---

## PRÆFATIO AUCTORIS.

**N**ullo non tempore S. Scriptura abusi sunt hæretici; ludibrio eam habuerunt, exploseruntque christiani nominis hostes, a fide alieni, vel apostatæ. Hi cum sint a SS. Patribus refutati; eorum tamen antiqua crambes recocta est ætate hac posteriori. Nec unquam tantopere debachatum est, quam præsentī sæculo hoc, quod tanta luce perfusum hodie ubique buccinatur, ingeminantque sibi suffeni illi, quibus nihil accommodatius est illis Christi verbis (Luc. XI. 35.): *Vide, ne lumen, quod in te est, tenebræ sint*; queis Christus Pharisæos perstringit, qui indignati, quod se in mundum venisse diceret (Jo. IX. 39. etc.): *ut, qui non vident, videant; et qui vident, cæci fiant*, eum interpellare ausi sunt, ac dicere: *Nunquid et nos cæci sumus?* quibus ille: *Si cæci essetis, non haberetis peccatum; nunc vero dicitis: Quia videmus, ideo peccatum vestrum manet.* Eo autem res hodie deducta est, ut fuerint, quibus omnia sic iam esse intellectui humano perspicua reddita sunt visa, ut brevi saltem revelationis lux sit futura supervacanea. Horret dicere animus, in quas delapsi sint eiusmodi hominum portenta blasphemias, quas quidem suo nomine non omnes evomere sunt ausi: dum interim nihil religioni ducitur, impune talia luci publicæ dari, nec profanari solum, verum etiam despectui, irrisui, ac ludibrio exponi Verbum divinum, atque prostitui exemplo pessimo indicioque luctuoso, quam male, ac perverse cuiusque arbitrio, atque libi-

dini S. Scripturæ interpretatio fuerit relicta, cum econtra religiose ac saluberrime S. synodus Tridentina sess. IV. „ad coërgenda petulantia ingenia decernit, ut nemo suæ prudentiæ innixus, in rebus fidei, et morum ad ædificationem doctrinæ christianæ pertinentium S. Scripturam ad suos sensus contorquens, contra eum sensum, quem tenuit, et tenet sancta mater Ecclesia; cuius est iudicare de vero sensu, et interpretatione scripturarum sanctarum, aut etiam contra unanimum consensum Patrum ipsam scripturam sacram interpretari audeat.“

Ad hanc amussim, ac regulam instituimus sequens de sublimi (decerptis concinnatisque ex Evangelio Christi flosculis) syntagma, mutuato quidem a scriptore gentili Dionysio Longino ex parte titulo, qui vero in suo libello *περὶ ὑψους λόγου* de sublimi genere orationis ipso exemplo ex prima statim scripturæ sacræ pagina est usus. Postquam enim sect. VII. seu cap. IX. (quod alii primum statuunt, quæ præcedunt introductionis loco habentes) inter alia exemplo Neptuni, quem Homerus magnifice in undis procedentem describit τὸ περὶ τὰς νηήσεις ἀψόρητον βόλον, quod est in ipsa mente, seu cogitatione sublimi, oculis exposuisset, ad rem ex primo Genesis capite, quo Moyses opus sex dierum creationis describit, in exemplum affert verba hæc: *Fiat lux, et facta est: Fiat terra, et facta est.* Quæ maiorem in textu originali emphasin habent, a P. Carl. Lanceloto S. Mauriano in novissima Longini editione Ratisbonæ an. 1775. facta in versione gallica sic expressa: *Que la lumière soit, et la lumière fut: que la terre paroisse, et la terre parut.*

Ad dirimendam controversiam, quæ circa τὸ  
 ψος, seu sublime huius loci inter Dan. Huet-  
 um, et Nicl. Boileau, qui Longinum cum no-  
 s gallice edidit, mota est, quamque post mor-  
 em utriusque J. Clericus est prosecutus, facere  
 otest ipsa inscriptio Longini *de sublimi genere*  
*rationis*. Hocque est, quod Huetius, eiusque  
 yperaspites J. Clericus maxime contra τὸ ὑψος  
 uius loci urget ex toto contextu nimirum ora-  
 onis; ac dicendi genere prorsus simplici, quod  
 bi Moyses in sua narratione proposuerat. Et  
 cet Huetius inter quatuor τὸ ὑψος genera in  
 ocibus scilicet, earumque compositione perio-  
 ica, cogitationibus, et rebus, ultimum non  
 tique diffiteatur in rerum creatione; quia tamen  
 ilum orationis attendit, adduci non potuit, ut  
 iblime in loco quæstionis agnosceret: dum ta-  
 ien Dionysius ubi de prima tunc agit speciē  
 iblimis in cogitatione περὶ νοητικῶς, postquam  
 dixisset, sublimitatem esse tanquam imaginem,  
 uæ animi magnitudinem referat; inde fieri as-  
 erit, *ut interdum etiam admiremur nudam abs-*  
*ue voce, et per se sententiam ob illam ipsam*  
*empe animi magnitudinem, ut verbi gratia Aia-*  
*is in Necya silentium magnum, et quavis ora-*  
*one sublimius.*

Non is quidem ego sum, qui cum Boileau  
 mnia quatuor sublimis genera in verbis Moy-  
 s ad tuendum fuscipiam. Quis tamen divinum  
 lud τὸ θεῖον in narratione de creatione rerum  
 d nutum divini Numinis tam nativa simplicitate  
 Moyse expressum non admirabundus adoret,  
 t cum Psalmista exultans in Domino exclamet:  
*Verbo Domini cæli firmati sunt, et spiritu oris*  
*ius omnis virtus eorum: . . quoniam ipse dixit,*  
*facta sunt, ipse mandavit, et creata sunt.*

Sublime porro hoc in divinis rebus extollit potius, quam deprimat stili, sermonisque simplicitas, qua non solum res maximas in sacris scripturis expressas legimus, tam veteris, quam novi testamenti, verum etiam a Christo in apostolis piscatoribus adoptatam stupemus tanta præstitisse in tam subita conversione orbis. „Hinc ergo, ut cum S. Jo. Chrysost. Hom. II. in Jo. T. VIII. p. 10. etc. loquar, et omni ex parte liquet, nihil humanum ab ipso, sed divina, et coelestia esse dogmata, quæ a divina illa anima ad nos pervenerunt. Neque enim verborum strepitum, non dictionis fucum, neque noninum, verborumque ornatum, et compositionem superfluum, vel inutilem videbimus, hæc quippe procul sunt ab omni philosophia; sed vim invictam, et divinam, et rectorum dogmatum immensam virtutem, innumerabiliumque bonorum largitatem.“

Dionys. Longino, qui ipse in definiendo sublimi non satis sibi convenit, ac fluctuat, Cæcilius *περὶ ὕψους* deperditus autor *serpere humi visus est infra subiecti tatiis dignitatem*, ut mox in exordio sermonis loquitur Longinus, quod *ταπεινότερον* P. Lancelotus in nota non tam de sermone, seu stilo putat intelligendum, quam de ipsa natura rerum perperam mentientium nomen *τὸ ὕψος*. Nihil non agit Lancelotus in præfatione ipso Longini libello longiore, ut divinam prorsus eidem affingat, ad ipsum Deum efferendo intentionem mentis, qui

Os homini sublime dedit, cælumque tueri  
Jussit, et erectos ad fydera tollere vultus:  
Ac si in illa magnitudine animi statuatur sublime,

qua immortalī anima præditus homo, atque ad divina natus ultra res creatas, ac caducas animo sese effert. Quo quidem exemplo Longinus sect. V. seu cap. VII. utitur: „Sciendum charissime, Terentianum suum alloquitur, quod quemadmodum in communi vita nihil est magnum, cuius contemptus magnum quid reputetur, ut verbi gratia divitiæ, honores, decora regna, et quæcunque Hercle alia tragicum fastum extrinsecus adhibitum multum præferunt, non utique prudenti viro bona eximia videantur, quorum despectus bonum non mediocriter censeatur. In maiore igitur admiratione et pretio iis, qui hæc ipsa possident, illi sunt, qui quum hæc ipsa habere possunt, qua sunt animi magnitudine, tamen despiciunt. Ita de elatis, et sublimibus in poëmatibus, et orationibus statuentum, videndumque, quamdam magnitudinis phantasiam præferentia, (cui sæpe adhærescit temere quippiam afflictum) si interim explicentur, inflata, et inania deprehendantur, quæ contemnere, quam mirari, et suspicere generosius fit.“ Demum sect. XXXII. „eos, quorum exemplis utitur laudans, a peccandi immunitate longe quidem remotos tantos viros agnoscit, nihilominus tamen omnes, quod caducum, et mortale est, superare, atque quod ad alia quidem attinet, eos, a quibus usurpantur, arguunt homines tantum, sublimitas vero proxime ad Dei evehit maiestatem.“ Nisi temerarium sit, spectata rerum sublimitate, non sermonis tantum huic adplicari posse videantur illa, ad iuvenem verba Jesu Christi, *non es longe a regno Dei*, qui regnum suum ut in hac etiamnum vita constitueret, in mundum venit, denuncians nobis, atque constituens τὸ ὕψος subline illud.



*tudinis.* In monte nempe, quando transfiguratus fuit Christus, putavitque tunc bonum esse sibi, cupiens tabernacula figere Petrus nesciens quid diceret. Etenim Christum in gloria sua videre non est huius vitæ, ubi in fide ambulamus, non in specie, *videmusque nunc per Speculum in ænigmate.* I. Cor. XIII. 12. Ut autem scintillæ quædam divinæ lucis oculos mentis nostræ perstringant, vero spiritu in lege Domini meditemur cum Psalmista die ac nocte, ut cum eo dicere possimus: *Mirabilia testimonia tua, ideo scrutata est ea anima mea. Declaratio sermonum tuorum illuminat, et intellectum dat parvulis.* Id quod maxime dici potest de sublimi in Evangelio Christi, cuius specimina quædam dabimus, præmissa adumbratione quadam divinæ Evangelii Christi Verbi incarnati œconomix. Nemo vero mihi dicam scribat de notione  $\tau\acute{\epsilon}\lambda\epsilon\iota\sigma\iota\varsigma$  in Evangelio Christi, ubi omnia  $\theta\epsilon\iota\alpha$  sunt ac sublimia, quæ si minus assecutus sum, mea culpa est. Mea autem qualiscunque est opera, scientia est sanctorum, SS. paginarum et SS. Patrum, quorum in hoc opere vestigia lego.

---



D I V I N A  
EVANGELII CHRISTI,  
VERBI INCARNATI  
ŒCONOMIA.

---

*Evangelium virtus Dei non in persuasibilibus  
humanae sapientiae verbis.*

I. „**P**aulus servus Jesu Christi, vocatus apostolus, segregatus in evangelium Dei, quod ante promiserat per prophetas suos in scripturis sanctis de Filio suo, qui factus est ei ex femine David secundum carnem, qui prædestinatus est Filius Dei in virtute secundum spiritum sanctificationis ex resurrectione mortuorum Jesu Christi Domini nostri. a) “ Est hæc summa evangelii Christi, per quem mox addit apostolus, se accepisse „ gratiam, et apostolatam, ad obediendum fidei in omnibus gentibus pro nomine eius b). “ Nam, ut pau-

a) Rom. I. 1.

b) Ib. 5.

lo post de se testatur: „Græcis et Barbaris, sapientibus et insipientibus debitor sum; ita (quod in me) promptum est et vobis evangelizare. Non enim erubesco evangelium: virtus enim Dei est in salutem omni credenti, Judæo primum et Græco a): “ Quæ omnia explicatius edisserit, quomodo sit debitor sapientibus et insipientibus, in exordio Epistolæ primæ ad Corinthios idem „Paulus vocatus Apostolus Jesu Christi per voluntatem Dei... Non in Sapientia verbi, ut non evacuetur crux Christi. Verbum enim crucis pereuntibus quidem stultitia est: iis autem, qui salvi fiunt, id est nobis, Dei virtus est b). “

Homines simplices et rudes elegit Deus ad prædicandum evangelium Filii sui Christi crucifixi, non in sapientia verbi σοφία λόγος cum facundia rhetorica, *sublimate sermonis aut sapientia c)*, quam reprobatur: „Scriptum est enim: Perdam sapientiam sapientium, et prudentiam prudentium reprobabo. Ubi sapiens? Ubi scriba? Ubi conquisitor huius sæculi? d) “ scilicet inter præcones evangelii Christi: quales esse solebant apud Græcos philosophi, apud Judæos scribæ et doctores: ubi conquisitor συζητητής rerum huius sæculi disquisitor, sophista ac disputator peritus ac subtilis? *Nonne stultam facit Deus sapientiam huius mundi? e)* dum nempe rudes et imperitos huius sæculi elegit ad prædicandum evangelium Christus, quem misit Deus, ille vero apostolos; in mundum, ut

a) Rom. I. 14. b) I. Cor. I. i. c) Ib. 17. d) Ib. I. 19. e) Ib. 20. 26.

oblivione sepultam de Deo rebusque divinis doctrinam revocarent, atque humani generis per Christum crucifixum redemptionem annuntiarent: „Nam, pergit Apostolus, quia in Dei sapientia non cognovit mundus per sapientiam Deum: placuit Deo per stultitiam prædicationis salvos facere credentes: quoniam et Judæi signa petunt, et Græci sapientiam quærunt a).“

Utrisque equidem satisfactum fuisset, si recte sapere voluissent. Ab exordio statim prædicationis suæ innumera Christus apud Judæos patravit miracula; sed illi offensi Christi humili statu ipsum non agnoverunt, cum Messiam regem expostularent, qui eos in libertatem vindicaret, e Romanorum potestate ereptos; cumque Christus se e cælo missum diceret, e cælo petebant miraculum tunc adhuc cum in cruce penderet, male intellectis verbis illis, *Eli, Eli, lamma sabachthani*, Eliam eum vocare e cælo putarunt, qui liberaret eum. At Christo in cruce mortuo spe frustrati sunt; Græci etiam, qui nil nisi humana sapiebant, σοφίαν, stultum reputarunt, in crucifixum credere, quem illis prædicabant apostoli: „Nos autem prædicamus Christum crucifixum: Judæis quidem scandalum, gentibus autem stultitiam; ipsis autem vocatis Judæis, atque Græcis Christum Dei virtutem, et Dei sapientiam b).“ S. Justinus philosophus et martyr in oratione ad Græcos n. 5. eos, ut se huius

a) I. Cor. 1. 21.      b) Ib. 23.

*incomparabilis sapientiæ participes* reddant, hortatus, „quippe, ait, cum per Verbum vis quædam in animam pervadat (o gravium affectuum fugatorium instrumentum! o ignis animæ insiti extincorium magisterium!) quæ nos non efficiat poetas, non philosophos reddit, neque oratores excellentes, sed docens, ex morti obnoxiiis immortales, et deos ex mortalibus facit: accedite Græci, docemini, estote ut ego, quoniam et ego eram ut vos. Hæc me ceperunt, et doctrinæ vis enthea, et verbi efficacia.“ Est hæc divina Evangelii Christi œconomia per verbum divinum carofactum: „Ex ipso autem vos estis in Christo Jesu, qui factus est nobis sapientia a Deo, et iustitia et sanctificatio et redemptio a),“ quam a Christo pro nobis crucifixo sumus consecuti admirabili simplicitate sermonis, procul omni eloquentiæ apparatu, ab evangelistis manifestata, et ab Apostolis in universo mundo denunciata, non in sapientia humana aut virtute, viribusque humanis, Christo et eius Apostolis in hoc mundo abiectis et infirmis, vi omni ac robore destitutis, ab omnibus despectis et usque ad mortem persecutiones sustinentibus, dum Christum crucifixum prædicant: „Non enim, ut de se prosequitur Apostolus b), iudicavi me scire aliquid inter vos, nisi Jesum Christum, et hunc crucifixum. Et ego in infirmitate, et timore, et tremore multo fui apud vos: et sermo meus, et prædicatio mea non in persuasibilibus humanæ sapientiæ verbis, sed in ostensione spiritus, et vir-

a) *I. Cor. I. 30.*

b) *Ib. II. 2. etc.*

tutis.“ Est hæc virtus omni credenti evangelium Christi. Sic „virtute magna reddebant apostoli testimonium resurrectionis Jesu Christi Domini nostri, et gratia magna erat in omnibus illis a).“

Gentiles, qui Christum in carne non viderant, quæve miracula patrauerat, nec audierunt ex ore eius divinam doctrinam, persuadendi erant ac convincendi signis, quæ eos secutura, ille promiserat, qui Evangelium essent prædicaturi, atque edocendi ante omnia de eo, quod est caput divinæ Evangelii Christi Verbi incarnati œconomix, scilicet resurrectio Christi ex mortuis, quam et in se credentibus gloriosam aliquando in resurrectione carnis promisit in gloria æterna in cœlis. „Loquimur, ait Apostolus b), Dei sapientiam in mysterio, quæ abscondita est, quam prædestinavit Deus ante sæcula in gloriam nostram.“ Sic eodem Athenis in Areopago occasionem arripit ex inscriptione simulacri: *IGNOTO DEO: quod ergo, ait c), ignorantes colitis, hoc ego annuntio vobis.* Finem illis creati a Deo humani generis ob oculos ponit, „Quærere Deum, si forte attrectent eum, aut inveniant, quamvis non longe sit ab unoquoque nostrum. In ipso enim vivimus, et movemur, et sumus: sicut et quidam vestrorum poetarum dixerunt: ipsius enim et genus fumus.“ Sic a simulacrorum cultu avertens eos, ad Christum, diemque resurrectionis universæ convertit, „in quo Deus iudicaturus est orbem in æquitate,

a) *Act. IV. 33.* b) *I. Cor. II. 7.* c) *Act. XVII. 23.*

in viro, in quo statuit, fidem præbens omnibus, fuscitans eum a mortuis.“ Persuaserant sibi σοφοι Athenienses, *novorum demoniorum* seu deorum annuntiatorem esse Paulum: *quia Jesum, et resurrectionem annunciabat eis a*). Hæc nempe erat eorum theologia, qua humana divinis, poetarum fabulis miscebant, ut de Homero Cicero loquens non longo adeo ante Christum tempore opportunum pandebat desiderium: „Humana Homerus ad deos transtulit, divina mallet ad nos.“ Sic Paulus Ignotum Deum annuntiat Atheniensibus, qui cultu veri Dei oblivione dato, cultum deorum, fabulis poetarum celebratorum sunt fecuti. Sic D. Petrus: „Non enim, ait, doctas fabulas fecuti, notam fecimus vobis Domini nostri Jesu Christi virtutem et præsentiam, sed speculatores facti illius magnitudinis *b*).“ Est hoc sublime in Evangelio Christi: divina Evangelii Christi, Verbi incarnati, æconomia, propositum hic nobis argumentum.

---

## VERBUM DEI INCARNATUM.

II. **R**espicit modò citato loco D. Petrus transfigurationem Christi in monte, qua cum eo Moyses et Elias sunt *visi in maiestate* præsentibus Petro, Jacobo et Joanne *c*), qui cæteris evangelistis posterior Evangelium conscribens omnium publi-

*a*) Act. XVII. 18.

*b*) II. Petr. I. 16.

*c*) Luc. IX. 21.

missime veluti aquila evolavit, „ita ut, sunt S. Augustini verba a), hos videas quodammodo in terris cum Christo homine conversari; illum autem transscendisse nebulam, qua tegitur omnis terra, et pervenisse ad liquidum cœlum, unde acie mentis acutissima atque firmissima videret in principio verbum apud Deum, per quod facta sunt omnia, et ipsum agnosceret carnem factum, ut habitaret in nobis: et quod acceperit carnem, non quod fuerit mutatus in carnem.“ Sicut igitur Moyses mundi creationem in tempore factam enarraturus inquit: *In principio creavit Deus etc.* Sic S. Joannes generationem Verbi divini ante omnia tempora, æternam adeo sine principio, pandens: *In principio*, ait, *erat verbum*. Infinito transscendit S. Joannis ἐν ἀρχῇ ἦν Moysis בראשית ברא Hoc enim ens contingens, existens ab alio, a Deo creatum; illud increatum Ens a se, id est ὁ ὢν prout LXXII. intt. illud Exodi III. 14. *Ego sum, qui sum: Εγω εἰμι ὁ ὢν* interpretantur.

„Scribendi Evangelii, iuxta S. Hilarium b), non aliam sanctus Joannes prætulit causam, quam ut omnes crederent Jesum esse Christum Filium Dei.“ Scripsit nempe S. Joannes Evangelium suum postquam iam variæ hæreses, atque Gnosticorum catervæ exortæ essent, quas S. Irenæus lib. V. contra hæreses persequitur. Is lib. III. recapitulans ea potissimum, quæ ad demon-

a) *De consensu Evang. l. I. c. 4.*

b) *Lth. VI. de Trinit. n. 41.*



strandam Verbi incarnati divinitatem pertinent ab evangelistis dicta, cap. XI. voluisse S. Joannem testatur, „per evangelii annuntiationem auferre eum, qui a Cerintho insemminatus erat hominibus, errorem, et multo prius ab his, qui dicuntur Nicolaitæ, qui sunt vulsio eius, quæ falso cognominatur scientia:“ Gnosis nimirum, unde Gnostici, qui inter varios suos æonas etiam Christo locum dabant, .quem quidem mundo statuebant priorem, inferiorem tamen Deo ente supremo et perfectissimo, quod ab æterno in pleromate sit. Ens hoc teste S. Irenæo „principalitatem dicebant, quæ est super universa, et ante adventum Æonis Christi incognita.“ Hos aliosque cum recensuisset S. Martyr errores, quos corrigere, seu ut loquitur S. Martyr „circumscribere παραγράφειν, volens discipulus Domini, et regulam veritatis constituere in Ecclesia, quia est unus Deus omnipotens, qui per Verbum suum omnia fecit, et visibilia et invisibilia: significans quoque, quoniam per Verbum, per quod Deus perfecit omnia in hoc et salutem his, qui in conditione sunt, præstitit hominibus, sic inchoavit in ea, quæ est secundum evangelium doctrina: *In principio erat Verbum*,“ ὁ λόγος, .quem etiam Gnostici inter præcipuos æonas reponebant, evangelista autem Verbum hoc non solum apud Deum dicit, sed Deum esse Verbum, quod *erat iam in principio apud Deum* Deo coæternum. „Omnia per ipsum facta sunt, et sine ipso factum est nihil, quod factum est. In ipso vita erat, et vita erat lux

hominum. “ Apud Gnosticos etiam ζωή vita, φῶς lux inter æonum reputabantur ordines, Deo inferiores seu emanationes mutuas; S. Joannes vero hæc omnia in una verbi hypostasi ipsumque Deum esse asseverat. „ In mundo erat, et mundus per ipsum factus est, et mundus eum non cognovit. Lux in tenebris lucet – resplendentibus radiis divinitatis in operibus naturæ, providentiæ et gratiæ, – et tenebræ eam non comprehenderunt, philosophi excæcati in operibus naturæ, et providentiæ; Judæi in operibus gratiæ frustra misso S. Joanne præcursore Domini, ut testimonium perhiberet de lumine, ut omnes crederent per illum . . . In propria venit, et sui, – Judæi nimirum peculiaris Dei populus – eum non receperunt. Quot quot autem receperunt eum – five ex Judæis, five aliis undique gentibus, – dedit eis potestatem filios Dei fieri, his, qui credunt in nomine eius, qui non ex sanguinibus, neque ex voluntate carnis, neque ex voluntate viri, – quales se Judæos gloriabantur ex semine Abraham oriundos, sed – ex Deo nati sunt, – per Christum, qui est Verbum caro factum, quod – habitavit in nobis, et vidimus gloriam eius, gloriam quasi unigeniti a Patre plenum gratiæ et veritatis. “ Huc mentes nostras efferens D. Paulus Hebr. III. 1. etc., ad novi testamenti præ veteri præstantiam divinamque Evangelii Christi Verbi incarnati œconomiam ob oculos ponendam, nos eiusdem participes, „ Fratres sancti, affatur, vocationis cœlestis participes, considerate apostolum, et pontificem

confessionis nostræ Jesum: qui fidelis est ei, qui fecit illum, sicut et Moyses in omni domo eius. Amplioris enim gloriæ iste præ Moyse dignus est habitus, quanto ampliorem honorem habet domus, qui fabricavit illam, “ mundi nimirum huius per Verbum facti fabricam, dum omnia per ipsum facta sunt, et sine ipso factum est nihil, quod factum est.

Dum igitur sic S. Joannes divinas nobis pandit origines Verbi incarnati, per quod omnia facta sunt, ex cæteris Evangelistis, qui ab humanis Christi natalibus auspicantur, S. Lucas genealogiam Christi prosecutus usque ad primam illam rerum, generisque humani originem: *Qui fuit Adam, qui fuit Dei a)*, humanos Christi natales cum divinis, quibus ex Patre natus est ante omnia sæcula, coniungit; S. Matthæus vero Christi genealogiam ab Abraham, cui promissio primum facta est, in femine eius benedicendas esse omnes gentes, repetit. Uterque vero horum evangelistarum, quod divinam Evangelii Christi Verbi incarnati attinet œconomiam in his natalibus, uno ore conformiter enarrat; „Christi autem, sunt verba Matthæi I. 18. generatio sic erat: cum esset desponsata mater eius Maria Joseph, antequam convenirent, inventa est in utero habens de Spiritu Sancto:“ id quod latius apud Lucam I. 26. seqq. enarratur. Qui quidem pauca quædam Matthæo narranti Magorum adorationem, et

a) *Luc. III. 38.*

fugam in Ægyptum, superaddit de vita Christi abscondita in sua pueritia, non semel testimonio matris Jesu Mariæ firmata; narrationi quoque de nativitate S. Joannis hæc iungit: „Puer autem crescebat, et confortabatur spiritu; et erat in desertis usque ad diem ostensionis suæ ad Israel a). “ Atque ab hac epocha S. Marcus prætermissis omnibus prioribus a cæteris evangelistis commemoratis, Evangelium suum exorsus, ac primis mox verbis luculentissime divinam Evangelii Christi verbi incarnati œconomiam testatus, inquit: *Initium Evangelii Christi Filii Dei.*

Audent vero obstrepere petulantia hominum ingenia huic in una Christi persona divinæ cum humana natura hypostaticæ unioni, atque in dubium vocare mysterium ceu a captu alienum, cuius tamen minime abhorrens in hypostatica conjunctione rationalis animæ cum corpore exemplum habet homo in seipso, nisi *comparatus iumentis insipientibus, et similis factus illis b)* esse velit: in eo etiam animal brutum et ingratiissimum is ille, qui ideo Verbum incarnatum hominemque factum negat, quod indignam maiestati Dei hanc intimam coniunctionem esse, effutire non erubescat, qua nulla maior humano generi accidere potuit dignatio: quaque dum divinæ naturæ sumus consortes effecti simul etiam felicitatis eius participes, regnique æterni in cœlis cum Deo iure donati sumus, *heredes quidem Dei, cohæredes*

a) *Luc. I. 80.*

b) *Psalm. XLVIII. 13.*

*autem Christi*, nos quidem indigni prorsus ac immerentes, mala imo ac dira quævis merentes, „Deus autem, qui dives est in misericordia, propter nimiam charitatem suam, qua dilexit nos, et cum essemus mortui peccatis, convivificavit nos in Christo (cuius gratia estis salvati) et conresuscitavit, et consedere fecit in cœlestibus in Christo Jesu, ut ostenderet in sæculis supervenientibus abundantes divitias gratiæ suæ in bonitate super nos in Christo Jesu a).“

## JOANNES PRÆCURSOR DOMINI.

III. Intelleximus iam ex Joanne Evangelista b), fuisse hominem missum a Deo, „cui nomen erat Joannes. Hic venit in testimonium, ut testimonium perhiberet de lumine etc.“ quo nimirum sibi omnia responderent ad divinam hanc præordinatam œconomiam. S. Augustinus quæstionem instituens cur præter Christum Dominum unius S. Joannis Baptistæ celebretur in Ecclesia nativitas: „Videtur, inquit c) Joannes interiectus quidam limes testamentorum duorum, veteris et novi. Nam cum esse, ut dixi quodammodo limitem Dominus ipse testatur, dicens: *Lex et propheta usque ad Joannem Baptistam.* Sustinet ergo personam vetustatis, et præconium novitatis: propter personam vetustatis de fenibus nascitur; prop-

a) Eph. II. 4.

b) Jo. I. 16.

c) Serm. VI. in nativ. S.

Jou. u. 1. T. V. pag. 1176.

ter personam novitatis in visceribus matris propheta declaratur. Nondum enim natus ad sanctæ Mariæ adventum exultavit in utero matris. Jam ibi designatus erat: cuius præcursor esset, ostenditur, antequam ab eo videretur. Divina sunt hæc, et mensuram humanæ fragilitatis excedunt. Hoc quod factum est, refer ad significationem rerum, et vide magnum mysterium. Zacharias tacet, et amittit vocem, donec Joannes nasceretur præcursor Domini, et aperiret vocem. “ Et mox testimonium illud Christi de S. Joanne præcursore suo versans: *Inter natos mulierum non surrexit maior Joanne Baptista*, „si hoc, inquit S. Doctor, homine nullus erat maior homo, qui maior est illo, plus est, quam homo. Magnum testimonium Christi de se ipso, fed lippientibus, et infirmis oculis parum de se testificatur dies. Infirmi oculi diem expavescunt, lucernam ferunt. Ideo præmisit lucernam dies venturus. *Paravi*, inquit, *lucernam Christo meo*; Joannem Salvatori præconem, iudici præcursorem venturo, futuro amicum sponso. Quis ergo testimonium huic perhibeat diei latenti in quadam nube carnis? Da lucernam et testetur diem. “ Nempe hic venit in testimonium, ut testimonium perhiberet de lumine. Ex Luca Evangelista discimus, patrem eius Zachariam sacerdotem fuisse, cui, „cum sacerdotio fungeretur in ordine vicis suæ ante Deum, secundum consuetudinem sacerdotii sui etc. apparuit angelus Domini stans a dextris altaris incensi. “ Ei ad conspectum angeli exterrito de-

nuntiavit ille, uxorem Elisabethi parituram filium Joannem hunc.

Est hæc nova divini cum hominibus epocha commercii in divina Christi Verbi incarnati œconomia, dum a sæculis iam ora obmutuerant prophetarum. En subito divina omnia et cœlestia! Apparet angelus de cœlo, Zacharias ad rem insolitam turbatur; fit mutus in pœnam incredulitatis suæ, dum audit ex uxore sua sterili nasciturum filium; ubi etiam angelus nomen suum Gabriel denuntiat, idem qui pridem Danieli apparuit *a*), Christumque Messiam venturum eidem præ cæteris prophetis omnium apertissime prænuntiavit. Quod vero angelus Zachariæ de nascituro filio prædixerat, repletum eum spiritu sancto adhuc ex utero matris suæ, multos filiorum Israel conversum ad Dominum Deum suum, haud obscure significat; Dominum hunc *Deum ipsorum* illum ipsum esse, quem Ioannes præcederet in spiritu et virtute Eliæ, „ ut convertat corda patrum in filios, et incredulos ad prudentiam iustorum, parare Domino plebem perfectam: *b*)“ prout a Malachia propheta prædictum fuerat: „ Ecce ego mittam vobis Eliam prophetam, antequam veniat dies Domini magnus, et horribilis. Et convertet cor patrum ad filios et cor filiorum ad patres eorum: ne forte veniam, et percutiam terram anathemate *c*).“ Quæ posteriora verba haud obscure designant, Joannem fore præcursorem Do-

*a*) Dan. VIII. 18. etc.    *b*) Luc. I. 17.    *c*) Malach. IV. 6.

mini Dei Israel in spiritu et virtute Eliæ ad avertendum, ne forte veniat, et percutiat terram anathemate, quod est in secundo futurum adventu, de quo Christus, „Filius hominis, ait, cum venerit, putasne fidem inveniet in terris?“ Circa divinam scilicet Evangelii Christi Verbi incarnati œconomiam. A qua fide, cum essent, qui deflecterent, iam S. Joannes antichristos vocaverat, in suis epistolis.

## CHRISTI ANNUNCIATIO.

IV. Idem qui Zachariæ in templo, post sex menses a Deo missus, Mariæ quoque apparuit angelus Gabriel a), ad mysterium Incarnationis Verbi divini peculiariter electus. Sed vide, quam reverenter futuram Spiritus Sancti sponsam, atque matrem unigeniti Filii Dei salutat! „Et ingressus ad eam angelus dixit: Ave gratia plena, Dominus tecum, benedicta tu in mulieribus b).“ Ad salutationem Mariæ autem postea cognatâ eius Elisabeth „repleta Spiritu S. exclamavit voce magna, et dixit: Benedictus fructus ventris tui.“ Quare nemo iam virginis modestiæ male vertet, quod in suo cantico haud oblita, atque, quid ex se, et quid ex gratia esset contestata, dicit: „Quia respexit humilitatem ancillæ suæ; ecce enim! ex hoc beatam me dicent omnes generationes.“ Postquam nimirum turbatæ cogitantique, qualis esset

a) Luc. I. 26.

b) Ib. 28.



ista salutatio, timorem angelus excusserat: „Ne timeas, ait, Maria, invenisti enim gratiam apud Deum: ecce concipies in utero, et paries filium, et vocabis nomen eius Jesum. Hic erit magnus, et filius Altissimi vocabitur: et dabit illi Dominus Deus sedem David Patris eius, et regnabit in domo Jacob in æternum, et regni eius non erit finis.“ Cum esset iam viro, cui nomen erat Joseph de domo David a), ex eadem secundum legem familia regia Davidis, obscura tunc paupere et abiecta desponsata virgo: cumque non spe prolis se accepisse virum, ex angelo quærens Deo devota virgo, quomodo fiet istud, quoniam virum non cognosco? b) esset contestata, nihil tamen de angeli annuntiatione dubitans in cantico suo exclamat: „Fecit potentiam in brachio suo; dispersit superbos mente cordis sui. Deposuit potentes de fede, et exaltavit humiles. Esurientes implevit bonis, et divites dimisit inanes. Suscepit Israel puerum suum, recordatus misericordiæ suæ.“ Jam tunc utero suo conceperat, de quo ad eam angelus c) dixit: „Spiritus Sanctus superveniet in te, et virtus Altissimi obumbrabit tibi: ideoque et quod nascetur ex te sanctum, vocabitur Filius Dei. Et ecce Elisabeth cognata tua: et ipsa concepit filium in senectute sua, et hic mensis sextus est illi, quæ vocatur sterilis: quia non erit impossibile apud Deum omne verbum.“

a) Luc. I. 27.

b) Ib. 34.

c) Ib. 35.

Ecce hic omnia præter rerum, ac naturæ ordinem, atque divina: præprimis vero Christi conceptio a Spiritu S. divina Verbi incarnati œconomia. Cuius mysterii ignarus Mariæ sponſus *Joseph vir eius, cum esset iustus et nollēt eam traducere a)*, ac diffamare, vellētque eam occulte dimittere, celante mysterium virgine, ac in corde suo conservante, adest iterum: „Ecce angelus Domini, apparuitque in somnis ei dicens: Joseph fili David! noli timere accipere Mariam coniugem tuam: quod enim in ea natum est, de Spiritu Sancto est. Pariet autem filium, et vocabis nomen eius Jesum: ipse enim salvum faciet populum suum a peccatis eorum.“ Ubi animadvertē perspicuam nominis Jesu interpretationem; quod vero multis luculenter circumscribit nato S. Joanne præcursore Domini *Zacharias pater eius repletus Spiritu Sancto b)* in suo cantico, simul etiam munus filii sui Joannis futuri prophetæ prophēticæ effatus: „Et tu puer propheta Altissimi vocaberis: præibis enim ante faciem Domini parare vias eius ad dandam scientiam salutis plebi eius, in remissionem peccatorum eorum c).“ Dominum suum hunc ipsum vocat perinde ac uxor eius Elisabeth et ipsa *repleta Spiritu Sancto d)*, dum novo miraculo, „ut audivit salutationem Mariæ, exultavit infans in utero eius . . . Et unde hoc mihi, ait, ut veniat mater Domini mei ad me? Ecce enim, ut facta est vox salutationis tuæ in auribus meis, exultavit infans in utero meo: et beata quæ cre-

a) *Matth. I. 19.*    b) *Luc. I. 67.*    c) *Ib. 76.*    d) *Ib. 41.*

didisti, quoniam perficientur ea quæ dicta sunt tibi a Domino. “ Quasi carpens Zachariam virum incredulum voci angeli, ei in templo hæc prænuntiantis, et idcirco muti usque in diem, quo hæc facta sunt, quando nimirum „apertum est illico os eius, et lingua eius, et loquebatur benedicens Deum. Et factus est timor super omnes vicinos eorum: et super omnia montana Judææ divulgabantur omnia verba hæc a). “ Eccui vero non stuporem iniiciat rerum mirandarum una quasi ferries, congeriesque, divina Evangelii Christi Verbi incarnati, iam antequam nasceretur, æconomia?

## CHRISTUS NATUS.

V. „**F**actum est autem in diebus illis, exiit edictum a Cæsare Augusto, ut describeretur universus orbis b). “ Non poterat Evangelista expressius determinare tempus adventus Messiae iuxta prophetiam patriarchæ Jacob c): „Non auferetur sceptrum de Juda, et dux de femore eius, donec veniat qui mittendus est, et ipse erit exspectatio gentium. “ Non semel equidem Israelitæ in servitutem redacti fuerant, dispersæ etiam manserant captivæ deductæ reliquæ tribus præter tribum Juda, quæ in Judæa superstes post captivitatem Babyloniam etiam nonnunquam fuerat servitute pressa, sed necdum venerat, qui foret exspectatio gentium Messias Christus Jesus: quo brevi nasci-

a) *Luc. I. 64.*    b) *Luc. II. 1.*    c) *Gen. XLIX. 10.*

turo *descriptio prima facta a præsidente Syria Cy-  
rino*, cui ditioni atque adeo descriptioni et  
Judæa suberat in provinciam redacta. „Et ibant  
omnes, ut profiterentur singuli in suam civitatem.  
Ascendit autem et Joseph a Galilæa de civitate  
Nazareth in Judæam in civitatem David, quæ vo-  
catur Bethlehem; eoquod esset de domo et fami-  
lia David, ut profiteretur cum Maria desponsata  
sibi uxore prægnante.“ En luculentum testimo-  
nium atque publicum de Christo Jesu nascituro  
ex stirpe illa, domo et familia, ex qua iuxta pro-  
phetarum vaticinia erat oriturus Messias, in Beth-  
lehem Juda civitate David. „Factum est autem,  
cum essent ibi, impleti sunt dies, ut pareret. Et  
peperit filium suum primogenitum a),“ ut nimi-  
rum ille esse commonstraretur, quem virgo con-  
ceptum de Spiritu S. genuisset, non quod deinceps  
alium genuerit; *et pannis eum involvit, et reclina-  
vit eum in præsepio, quid non erat ei locus in diver-  
sorio.* Hiccinne est magnus ille virgini matri ab  
angelo annuntiatus, qui filius Altissimi vocabitur?  
cui daturus est *Dominus Deus sedem David patris eius?*  
*et regnabit in domo Jacob in æternum, et regni eius non  
erit finis b) ?*

Eis paradoxa hæc sunt, qui cum Judæis expec-  
tantibus liberationem ab imperio Romanorum,  
restituendum regnum Israel terrenum sibi somni-  
ant; dum Christo nato pannis involuto, et reclina-

a) *Luc. II, 6.*    b) *II, I, 32.*

nato in præsepio, non est locus in diversorio, in hoc mundo: regnatura autem in domo Jacob in æternum, cuiusve regni non erit finis, non potest esse regnum de hoc mundo finem habituro. Quod igitur Christus palam coram Pilato edixit a), regnum suum non esse de hoc mundo, hic elinguis adhuc in stabulo velut extra commercium humanum positus, iacens in præsepio proficitur. Quodque in horto dicit Christus de legionibus angelbrum b), et iterum Pilato de iisdem ministris pro se certaturis, si regnum suum esset de hoc mundo; id exhibetur nato Domino ad demonstrandum eum regem cælorum. En œconomiam divinam Evangelii Christi pastoribus denunciati! Adsunt nuncii e cœlo (cuius regni cœlestis nimirum non erit finis) ad pastores in regione eadem vigilantes: adest splendor, cui nil in terris par esse potest: *Et ecce! angelus Domini stetit iuxta illos, et claritas Dei circumfulsit illos c)*, evangelizatque eis angelus gaudium magnum, *quod erit omni populo non tantum Judaico, sed omnibus gentibus, quibus aliquando idem erit evangelizandum gaudium magnum*, quod hic pastoribus annuntiatur, „quia natus est vobis hodie Salvator, qui est Christus Dominus in civitate David. Et hoc vobis signum: invenietis infantem pannis involutum, et positum in præsepio.“ Paucioribus quidem, sed significantioribus verbis, quam nasciturus Zachariæ sacerdoti, ac ipsi virgini Mariæ, denunciatur pastori- bus iam natus *Salvator, qui est Christus Dominus*.

a) Jo. XIX. 36. b) Matth. XXVI. 53. c) Luc. II. 9.

Atque etiam „subito facta est cum angelo multitudo militæ cœlestis laudantium Deum, et dicentium: Gloria in Altissimis Deo, et in terra pax hominibus bonæ voluntatis:“ quia nimirum pacificator, mediator inter Deum et hominem natus est in Bethlehem Juda civitate David,

Ex Bethlehem etiam oriundus, thronum suum in monte Sion, regiamque in Jerusalem constituit David. Sic post resurrectionem suam a mortuis expleto redemptionis nostræ opere in Jerusalem ad apostolos suos *accedens Jesus locutus est eis, dicens: data est mihi omnis potestas in cœlo et in terra; cunctes ergo docete omnes gentes; quod nimirum angelus evangelizavit, gaudium magnum, quod erit omni populo, quia natus est vobis hodie Salvator*, Jesus nimirum, quod idem est ac Salvator. Ad hoc nempe data est Christo Jesu omnis potestas in cœlo et in terra, ut salvaret populum suum a peccatis eorum in terra; ascendensque ad Patrem suum, et Patrem nostrum, Deum suum, et Deum nostrum, intrans in gloriam suam eandem nobis (cum eius spe, quam in statu innocentie habebamus; excidissemus per peccatum) redderet in cœlis, hæredibus quidem Dei, cohæredibus autem Christi Salvatoris nostri. Fuerunt tum Maria, tum etiam Joseph ab angelo cœlesti nuncio, ut ita dicam, a latere iussi hoc infanti indere nomen, quod et factum est, „postquam consummati sunt dies octo, ut circumcideretur puer, vocatumque est nomen eius Jesus, quod vocatum est ab angelo, priusquam in utero

conciperetur a).“ Matri dictum erat: *Vocabis nomen eius Jesum. Hic erit magnus et Filius Altissimi vocabitur etc.* Joseph autem matris sponso dicitur: *Vocabis nomen eius Jesum: ipse enim salvum faciet populum suum a peccatis eorum.* Divina Evangelii Christi Verbi incarnati œconomia!

## A MAGIS ADORATUS.

VI. **V**ides ubique cœlestium nunciorum ministerium, divina humanis temperata. Ab angelo etiam responso accepto in somnis, ne redirent ad Herodem, Magi per aliam viam reversi sunt in regionem suam b), quæ creditur esse Aram seu Mesopotamia, unde venerint Jerosolymam dicentes: „Ubi est, qui natus est rex Judæorum? Vidimus enim stellam eius in Oriente, et venimus adorare eum c):“ quam nimirum orituram ex Jacob Balaam prædixerat d). Primitiæ erant hi Magi gentium, quibus salus ex Judæis, salvatoreque regnatura in domo Jacob, sedeque David advenire debebat. Regem hunc Christum fore Messiam nec Herodes dubitabat, eumque in Bethlehem Judæ nasciturum a principibus sacerdotum et scribis populi edoctus erat. Eo dum iam pergunt Magi, ecce stella, quam viderant in Oriente, quæve disparuerat in Jerusalem seu Judæa, ubi lucem eam tenebræ non comprehenderunt, antecede-

a) Luc. II. 21.

b) Matth. II. 12.

c) Ib. 2.

d) Num. XXIV. 17.

eos, usque dum veniens staret *supra*, ubi erat puer. Animadvertite hic divinam evangelii Christi Verbi incarnati œconomiam in his gentium, ad quas aliquando Evangelium deferendum, primitiis! „Videntes autem stellam gavisii sunt gaudio magno valde. Et intrantes domum invenerunt puerum cum Maria matre eius, et procidentes adoraverunt eum, et apertis thesauris suis obtulerunt ei munera, aurum, thus, et myrrham.“ De adorationis vocabulo in scripturis æquivoco etiam certi et asserti nihil statui posse videtur, cum natum tantum regem Judæorum quærant; regibus autem deferre munera fuisse consuetum in Oriente, Persis præsertim seu Parthis scriptura nos Genes. XXXII. 14. etc. Gen. XLIII. 11. 15. I. Reg. X. 27. et alibi docet; munerum tamen thuris præsertim nonnisi divinitati adoleri soliti ratio altius, ut suo loco videbimus, hic evehere animi sensum postulat, ipsaque illa, quam hic conservatam intelligimus traditionem a primis parentibus inde acceptam de redemptore generis humani seu salvatore mundi: quem Judæi sub nomine Messie regem suum exspectabant; ex historia autem Magorum palam fit iuxta prophetiam patriarchæ Jacob, eum aliarum etiam gentium in suo adventu fuisse expectationem, eundem, qui pastoribus per angelos fuit annuntiatus, gentibus per stellam designatum. „Jam tunc ergo, sunt verba S. Leonis P. a), cœli enarraverunt gloriam Dei, et in omnem terram sonus veritatis exivit, quando et pastoribus

a) *Serm. II. de Epiph. c. 1.*



exercitus angelorum Salvatoris editi annuntiator apparuit, et Magos ad eum adorandum prævia stella perduxit: ut a solis ortu usque ad occasum veri regis generatio, et regna Orientis per Magos discerent, et Romanum imperium non lateret. Nam et sævitia Herodis, volens primordia suspecti sibi regis extinguere, huic dispensationi nesciens serviebat: ut dum atroci intentus facinori, ignotum sibi puerum indiscreta infantium cæde persequitur, annuntiatum cœlitus dominatoris ortum insignior ubique fama loqueretur; quam promptiorem ad narrandum, diligentioreque faciebat, et supernæ significationis novitas, et cruentissimi persecutoris impietas." Revocat etiam huc deinceps S. pontifex fugam Christi in Ægyptum, ubi ad eius præsentiam corruisse idola, quis non facile sibi in animum inducat? Congruam omnino divinæ Evangelii Christi Verbi incarnati œconomix rem. Certe eius adventu idololatria evanuit, quod S. Athanasius in lib. de Incarnatione Verbi Dei ceu caput omnium ac maxime mirandum extollit, ubi, ut postea animadvertit, Dei verbum cum corpore, apparuit, et suum Patrem notum nobis fecit, tunc dæmonum quidem fallaciæ evanescere et desinere cœperunt, homines autem verum Patris Deum Verbum intuentes, idola relinquunt, ac verum Deum agnoscunt. Id porro certo indicio est, Christum Deum Verbum et Dei virtutem esse. Cum enim cessent, quæ humana sunt, et Christi verbum constanter perseveret, nemo non videt, ea quæ finem habent temporalia esse; eum autem, qui perpetuo permanet, Deum Deique filium verum, unigenitum Verbum esse.

## CHRISTI INFANTIA, ÆTATISQUE PROFECTUS.

VII. **P**ortenderat stella Magis præluceus lumen illud ad revelationem gentium Jesum salutare illud Dei, quod paravit ante faciem omnium populorum, de quo Simeon homo iste iustus et timoratus, exspectans consolationem Israel, et Spiritus Sanctus erat in eo a), spiritu prophetico iam tunc eum prædixit positum esse in ruinam, et resurrectionem multorum in Israel, et in signum, cui contradicetur, Mariam allocutus, nec obscure ignominiosam mortem Christi in cruce, cui mater mærens adstipit, vaticinatus: *Et tuam, ait, ipsius animam pertransibit gladius etc.* Anna quoque prophetissa, et hæc ipsa hora superveniens, confitebatur Domino: et loquebatur de illo omnibus, qui exspectabant redemptionem Israel. Quæ verba innuunt non sine numine, cum esset prophetissa, ipsa hora eam supervenisse: velut Evangelista de Simeone narrat eum „responsum accepisse a Spiritu Sancto, non visurum se mortem, nisi prius videret Christum Domini. Et venit in spiritu in templum, cum inducerent puerum Jesum parentes eius, ut facerent secundum consuetudinem legis pro eo. “ Ubique apparet *ὁ σωτὴρ τοῦ κόσμου* homo Deus, humana et divina in infante Jesu; ubique mirabilia; ac miracula. „Omnis ætas, commentatur S. Ambrosius in hunc S. Lucæ locum b), et uterque sexus; eventorumque miracula fidem adstruunt. Virgo generat, sterilis parit, mutus loquitur, Elisabeth pro-

a) Luc. II. 25. etc.

b) L. II. c. 2. n. 58. etc.

divina nimirum sese œconomia humanæ conditioni accommodante, addit unum hoc Evangelista: *Et mater eius conservabat omnia verba hæc in corde suo. Et Jesus proficiebat sapientia, et ætate, et gratia apud Deum et homines a).*

## BAPTISMUS JOANNIS, ET CHRISTI.

VIII. **H**æc vero omnia prætereunt silentio cæteri præter Lucam Evangelistæ: tacent quoque voces angelorum, quorum in eius infantia audivimus, vidimusque ministeria tam frequentia, vaticinia etiam ac prophetias; donec anno quinto decimo imperii Tiberii Cæsaris etc. factum est verbum Domini super Joannem Zachariæ filium in deserto b). Atque hinc Marcus Evangelista auspicatus, sic infit c): „Initium Evangelii Jesu Christi Filii Dei, sicut scriptum est in Isaia propheta: Ecce! ego mitto angelum meum ante faciem tuam, qui præparabit viam tuam ante te; Vox clamantis in deserto: parate viam Domini, rectas facite semitas eius d).“ Quem sibi prophetæ locum ipse Joannes suum facit, dum prædicare in deserto Judææ incipit, „dicens e): Pœnitentiam agite; appropinquavit enim regnum cœlorum. Hic est enim, qui dictus est per Isaiam prophetam dicentem: Vox clamantis in deserto: Parate viam Domini: rectas facite semitas eius.“ Et cum Judæi ab Jerosolymis mit-

a) *Luc. II. 51.*

b) *ib. III. 1.*

c) *Marc. I. 1.*

d) *Isai. XL. 3.*

e) *Matth. III. 2.*

terent ad eum *a)*, ut interrogarent eum, quis esset, „ut responsum, aiunt, demus his: qui miserunt nos? Quid dicis de teipso? Ait: Ego vox clamantis etc. Et qui missi fuerant, erant ex Phariseis. Et interrogaverunt eum, et dixerunt ei: Quid ergo baptizas, si tu non es Christus, neque Elias, neque propheta? Respondit eis Joannes dicens: Ego baptizo in aqua: medius autem vestrum stetit, quem vos nescitis,“ Christum indigens, cuius baptismum, quomodo a suo distinxerit, reliqui tres Evangelistæ testantur *b)*: „Ego quidem baptizo vos in aqua in pœnitentiam: qui autem post me venturus est, fortior me est, cuius non sum dignus calceamenta portare: ipse vos baptizabit in Spiritu Sancto et igni. Cuius ventilabrum in manu sua: et permundabit aream suam: et congregabit triticum suum in horreum, paleas autem comburet igni inextinguibili.“

Concordant hæc cum prophetia Simeonis paulo ante allata, positum esse Christum in ruinam, et in resurrectionem multorum in Israel. Quæ vero idem Simeon in suo cantico de vocatione gentium habet, S. Joannes admirabili allegoria Judæis, simulque reprobationem eorum indicat *c)*: „Ne velitis dicere intra vos: Patrem habemus Abraham: dico enim vobis, quoniam potens est Deus de lapidibus istis fuscitare filios Abrahæ. Jam enim securis ad radicem arborum posita est: omnis ergo arbor, quæ non facit fructum bonum, excidetur, et in ignem mittetur.“

*a)* Jo. I. 19.    *b)* Matth. III. 11.    *c)* Ps. 9.

Narrat deinde Evangelista, quomodo Jesus a Galilæa venerit in Jordanem ad Joannem, ut baptizaretur ab eo a), ubi non iam angeli, sed singulæ, divinissima Evangelii Christi Verbi incarnati œconomia, comparent SS. Trinitatis personæ, in quorum nomine Christus postea baptismum suum instituit, dum apostolos suos ad prædicandum Evangelium in universum mundum misit: „Baptizatus autem, sunt verba Evangelistæ b), Jesus confestim ascendit de aqua, et ecce aperti sunt ei cœli, et vidit spiritum Dei descendentem sicut columbam, et venientem super se. Et ecce vox de cœlis dicens: Hic est filius meus dilectus, in quo mihi complacui.“ En paternam de unigenito Filio suo vocem, in quo homine facto solo sibi complacere potuit, iamiam genere humano per Christum baptizando in Spiritu Sancto et igni: qui Spiritus Dei hic in specie columbæ apparet: idem quo suum Joannes a baptismo Christi distinguit, quem instituens Christus post resurrectionem suam, „Data est mihi, inquit c), omnis potestas in cœlo et in terra. Euntes ergo docete omnes gentes: baptizantes eos in nomine Patris, et Filii, et Spiritus Sancti.“ Qui est baptismus in nomine Jesu d), quo baptizandi erant, baptizati in Joannis baptisate.

An experimentum paternæ in baptismo, de Filio suo dilecto vocis capere voluit fatanas? dum

a) *Matth. III. 13.*  
d) *Act. XIX. 5.*

b) *Ib. 16.*

c) *Ib. XXVIII. 18.*

egressus a Jordane Jesus secedens in desertum a) „ieiunasset quadraginta diebus et quadraginta noctibus [et nihil manducavit in diebus illis b)] accedens tentator dixit ei: si filius Dei es, dic ut lapides isti panes fiant. Qui respondens dixit: scriptum est: Non in solo pane vivit homo, sed in omni verbo, quod procedit de ore Dei.“ An hic respexit Christus ad vocem de Verbo divino unigenito Filio Dei, dum baptizaretur a Joanne cœlitus factam? Certe cum in secundo aggressu idem diceret satan: *Si filius Dei es, mitte te deorsum*, responsio Christi, *Non tentabis Dominum Deum tuum*, et ad tentationem tertiam, *Dominum Deum tuum adorabis, et illi soli servies*, Christum etiam Filium Dei respiciebat, qui una voce *Vade satana*, eum divina virtute fugavit: *ut in nomine Jesu omne genu flectatur cœlestium, terrestrium et infernorum c)*, postquam consummata omni tentatione, *Ecce angeli accesserunt, et ministrabant ei*. Habemus hic confessionem *cœlestium* in ministerio angelorum, *terrestrium* in Magis, Simeone, et Anna, imprimis vero S. Joanne; *infernorum*, dæmonum hic et alias experimentum capientium divinitatis eius, delectorum suo in humanum genus imperio.

a) *Matth. IV. 2.*b) *Luc. IV. 2.*c) *Phil. II. 10.*

## JOANNIS BAPTISTÆ, ET ALIORUM TESTIMONIUM DE DIVINITATE CHRISTI.

**I**X. Id vero omni contentione egit apud suos auditores Christi præcursor, ut eius divinam originem apud eundem Evangelistam Joannem eodem argumento, quo Evangelista in exordio Evangelii fui a nobis supra num. II. expenso, atque ipse Chrisus postea Iudæis verbis illis: „antequam Abraham fieret, EGO SUM, QUI SUM a), ὁ ὢν, Jehova, demonstret b): testimoniumque perhibet de ipso, et (ter idem ingeminans) clamat dicens: Hic erat, de quo dixi: Qui post me, venturus est, ante me factus est ἐμπροσθέν μου γέγονεν, quia prior me erat. Et de plenitudine eius nos omnes accepimus, gratiam pro gratia: quia lex per Moysen data est, gratia et veritas per Jesum Christum facta est. Deum nemo vidit unquam, unigenitus Filius, qui est (QUI EST c), ὁ ὢν, Jehova) in finu Patris (quem credimus, ac profitemur in symbolo Filium Dei unigenitum, ex Patre natum ante omnia sæcula etc. Qui propter nos homines, et propter nostram salutem descendit de cœlis) ipse enarravit.

Postquam hoc modo S. Præcursor omnia illa infinita gratiarum per divinam Evangelii Christi Verbi incarnati œconomiam humano generi allata bona, et collata dona denuntiasset; d) altera die vidit Joannes Jesum venientem ad se, et dicit: Ecce

a) Ex. III. 14. b) Jo. I. 15. c) Ex. III. 14. d) Jo. I. 29.

*agnus Dei, ecce qui tollit peccatum mundi*, redemptionis nostræ pretium per vitam et mortem Christi solutum ob oculos ponens: idque repetit, dum post hanc alteram, adhuc a) „altera die iterum stabat Joannes, et ex discipulis eius duo. Et respiciens Jesum ambulantiem, dicit: Ecce Agnus Dei. Et audierunt eum duo discipuli loquentem, et secuti sunt Jesum . . . Erat autem Andreas frater Simonis Petri unus ex duobus, qui audierant a Joanne, et secuti fuerant eum. Invenit hic primum fratrem suum Simonem, et dicit ei: Invenimus Messiam (quod est interpretatum, Christus) et adduxit eum ad Jesum. Intuitus autem eum Jesus, dixit: Tu es Simon filius Jona: tu vocaberis Cephas, quod interpretatur Petrus.“

Vides hic Christum, cum primum sibi discipulos consociat, de fundamento sollicitum, super quod ædificaturus esset Ecclesiam suam, accepta postea a Petro confessione, quod esset Christus Filius Dei. Quam laudans in Petro confessionem Christus: *Beatus es*, inquit b), *Simon Bar-Jona, quia caro et sanguis non revelavit tibi, sed pater meus, qui in cælis est*. Qui nimirum Pater cælestis Filio suo testimonium reddidit mox in baptismo c) et postea in transfiguratione singulariter Petro, Jacobo et Joanni, elapsa voce de cælo d): *Hic est Filius meus dilectus, in quo mihi bene complacui: ipsum*

a) Jo. 1. 35.

b) Matth. XVI. 17.

c) Ib. III. 17.

d) Ib. XVII. 9.



*audite. Testatus hanc rem Petrus in secunda sua Epist. I. 18. etc. Et hanc vocem nos audivimus de cælo allatam, cum essemus cum ipso in monte sancto: et habemus firmiorem propheticum sermonem, non foris tantum voce insonante, sed intus revelante.*

Christus de divinitate sua alterum mox post Joannem præcursores testimonium *a)* acceperat a Nathanaele, quem Philippus, et tunc ipse a Christo vocatus, adduxerat: „Rabbi tu es Filius Dei: tu es rex Israel: Respondit Jesus, et dixit ei: Quia dixi tibi: Vidi te sub ficu, credis; maius his videbis. Et dicit ei: Amen, Amen dico vobis, videbitis cælum apertum, et angelos Dei ascendentes et descendentes supra filium hominis.“ Dum Nathanael vocat Christum Filium Dei, ipse se vocat Christus filium hominis, cum esset utrumque Deus et homo. Tantum vero abest, ut responsio Christi excludat confessionem Nathanaelis de eius divinitate, ut contra eo illam adstruat argumento, quo postea D. Paulus ad eandem Hebræis demonstrandam Christi divinitatem est usus *b)*: „Et cum iterum introducit primogenitum in orbem tetræ, dicit: Et adorent eum omnes angeli Dei. Et ad angelos quidem dicit: Qui facit angelos suos spiritus, et ministros suos flammam ignis. Ad Filium autem: Thronus tuus Deus in sæculum sæculi etc.“

Ita vero per totum Evangelium se Deum simul et hominem Christus exhibet, ac demonstrat; ut

*a) Jo. I. 49.*

*b) Hebr. I. 6.*

qui Filium Dei negat Christum, eum blasphemiae arguat cum Judæis lapides fustollentibus, ut lapidarent eum, quod dixisset: *Ego et Pater unum sumus* a): In animum sibi inducere non poterant hominem simul esse Christum et Deum. Palam vero est de vero naturali Deo, Filioque Dei rem esse, atque in mente habuisse Judæos, esseque argumentum a minori ad maius, quò Judæos stringit Christus b): „Nonne scriptum est in lege vestra: quia ego dixi dii estis? Si illos dixit deos, ad quos sermo Dei factus est, et non potest solvi scriptura: quem Pater sanctificavit (uniendo hypostatice humanam in Christo cum divina naturam) et misit in mundum (qui est in sinu Patris: qui descendit de cælo, Filius hominis, qui est in cælo) vos dicitis: Quia blasphemas: quia dixi, Filius Dei sum.“ Idem itaque est, quod Christus dixerat: *Ego et Pater unum sumus*, et quod modo dicit *Filius Dei sum, quem misit in mundum*: quod etiam Martha profitetur c): *Quia tu es Christus Filius Dei vivi, qui in hunc mundum venisti. E sinu Patris, dum quod in principio erat Verbum; et Verbum erat apud Deum; et Deus erat Verbum, idem ipsum carum factum est; et habitavit in nobis.* Quæ omnia nisi in sensu naturali vera fuissent, Christus de se dici ac prædicari permittere haud potuisset sine blasphemia, ac longe maiori impostura, quam illa de qua post mortem illum impetabant: *Quia seductor ille dixit adhuc vivens: Post tres dies resurgam.*

a) Jo. X. 30.    b) Ib. 34.    c) Jo. XI. 27.

## CHRISTUS SE UBIQUE DEUM OMNISCIMUM IN EVANGELIO DEMONSTRAT.

X. **I**nter eos discipulos, quibus se ad mare Tiberiadis post resurrectionem manifestavit Christus, fuit Nathanael, qui, ut modo vidimus Christum post Joannem baptistam primus fuit professus Filium Dei; eoquod, antequam eum vidisset, Christus, quis et qualis esset etiam intus in corde, ei manifestavit: quod folius Dei est καρδιωγνώστης. „Ecce a), dicebat Christus de eo, vere Israelita, in quo dolus non est. Dicit Nathanael: unde me nosti? Respondit Jesus, et dixit ei: Prius quam te Philippus vocaret, cum esses sub ficu, vidi te.“ Intellexit ergo Nathanael Christo etiam perspecta esse quæ procul sunt remota: cuiusmodi vero testimoniis et argumentis totum referendum est Evangelium, palamque fit, sive locum sive tempus spectes, Christo omnia pervia fuisse sicut nobis præsentia, ita illi sive absentia, sive futura; non quædam tantum singillatim sicut prophetis: neque, quemadmodum illi, Christus, cum esset ipse Dominus, usus fuit verbis: *Hæc dicit Dominus*. Est hoc nobis præsertim invictum evangelicæ veritatis argumentum, qui præsentes ad miracula Christi non fuimus, incredulis maxime illis, qui, quod non viderunt, credere tergiversantur, dum in lectione evangelica uno veluti obtutu seu complexu præ oculis cernunt, Christum, quamdiu inter homines est conversatus, de ab-

a) Jo. I. 47.

sentibus et futuris ad remotissima usque tempora usque ad consumationem sæculi ita locutum fuisse, ut nos cæteri de præsentibus.

Cuiusmodi insigne mox specimen dedit Christus, dum post nuptias in Cana Galilææ primum processit ad prædicandum Hierosolymas ad primum pascha, e templo vendentes et ementes expellens, dictitantibus autem Judæis *a)*: „Quod signum ostendis nobis, quia hæc facis? Respondit Jesus, et dixit eis: Solvite templum hoc, et in tribus diebus excitabo illud.“ Hic ad resurrectionis dominicæ respicitur mysterium; quod tamen coram illis non fore manifestandum, cum in excæcatione sua perseverarent, postea quando iterato post tot ac tanta, signum petebant e cælo, Christus eis significat Matth. XVI. 4. „Generatio mala, inquit, et adultera signum quærit; sed signum non dabitur ei, nisi signum Jonæ prophætæ. Et relictis illis abiit.“ Non hic, sicut in primo sermone Christus totum redemptionis nostræ opus in passione, morte et resurrectione sua expressit, ut, postquam perfecta res fuit, agnovissent eius discipuli, quibus solis se Christus post resurrectionem suam reddidit conspicuum. „Cum ergo, ait Evangelista *b)*, resurrexisset a mortuis, recordati sunt discipuli eius, quia hoc dicebat: et crediderunt scripturæ, et sermoni, quem dixit Jesus.“ Subdit Evangelista, multos, cum esset tunc Hierosolymis in pascha, credidisse in nomine

*a)* Jo. II. 18.

*b)* Ib. 22.

eius, „videntes signa, quæ faciebat. Ipse autem Jesus non credebat semetipsum eis, eo quod ipse nosset omnes, et quia opus ei non erat, ut quis testimonium perhiberet de homine: ipse enim sciebat, quid esset in homine a).“ Id quod proprium est soli Deo scrutatori renum et cordium.

Talem se identidem Christus ostendit: veluti scribis et Pharisæis observantibus eum, *Si in sabbato curaret, ipse vero sciebat cogitationes eorum b)*: Apud Pharisæum pransus c), dubitantem animo, an mulierem peccatricem ungentem ac lacrymis pedes rigantem agnosceret, *quæ et qualis esset: dum, Pharisæo item sinistram cogitationem, quod baptizatus seu lotus non esset ante prandium gravissime animo exemerat.* Non sic quidem, sed longe insigniori modo se talem Christus ostendit Nicodemo, qui venit ad eum nocte, seque discipulum Christi non nisi post mortem palam ostendit; Christus autem sciens quid esset in homine, quod nimirum sincerus ac fidus non solum iam esset, sed etiam perseveraturus esset, haud offensus scandalo crucis, eidem mysterium initiationis per baptismum et redemptionis per divinam Evangelii Christi Verbi incarnati unigeniti Filii Dei œconomiam pandit: „Nemo, inquit, ascendit in cælum, nisi qui descendit de cælo, filius hominis, qui est in cælo. Et sicut Moyses exaltavit serpentem in deserto, ita exaltari oportet filium ho-

a) Jo. II. 23. 24. 25.

b) Luc. VI. 7.

c) Ib. VII. 39.

minis (in cruce) ut omnis, qui credit in illum non pereat, sed habeat vitam æternam. Sic enim Deus dilexit mundum, ut Filium suum unigenitum daret, ut omnis, qui credit in eum, non pereat, sed habeat vitam æternam etc.“ Quæ vero successu tandem temporis erant implenda, ut nos coram in orbe christiano intuentes credimus. Mulier vero illa Samaritana credidit contestata civibus a): „Venite et videte hominem, qui dixit mihi omnia, quæcunque feci; nunquid ipse est Christus? Cumque b) mansisset ibi Christus duos dies: multo plures crediderunt in eum propter sermonem eius. Et mulieri dicebant; Quia iam non propter tuam loquelam credimus; ipsi enim audivimus, et scimus, quia hic est vere Salvator mundi.“ Christus autem arrepta hac occasione edixit suis discipulis, quod nos deinceps factum, mundo ad Christum converso coram cernimus: *Ecce dico vobis, levate oculos vestros, et videte regiones, quia albae sunt iam ad messem c).* Dum nempe afferentibus discipulis cibum dixerat Christus; *Meus cibus est, ut faciam voluntatem eius, qui misit me, ut perficiam opus eius:* prædicando nimirum Evangelium regni Dei, quod appropinquare denunciabat Judæis incredulis signa postulantibus. Hoc Christus regulo illi in *Cana Galilææ, ubi fecit aquam vinum d)* exprobrat postulanti, ut Capharnaum descenderet, et sanaret filium eius, incipiebat enim mori. *Dixit ergo Jesus ad eum: Nisi signa et prodigia videritis, non creditis.* Christus vero, dum dicit regulo:

a) Jo. III. 29.

b) Ib. 40.

c) Ib. 35.

d) Ib. IV. 46.

*Vade, filius tuus vivit a)* divina, quæ ageret ipse Filius Dei, etiam absens procul ostendebat: uti etiam centurioni *b)*, qui indignum se profitebatur, ut intraret Christus in domum eius, in fanando puero, et Syrophœnissæ in filia. Quibus in casibus miraculum in distans, cum cognitione rerum absentium, ut nos præsentia intuemur, coniunctum est. Sic procul adhuc a domo Jairi, cum interim mortua esset filia, quam sanitati restituendam flagitabat, *Noli*, ait patri *c)*, *timere, crede tantum et salva erit.* Id quod adhuc multo luculentius in Lazaro patuit, cum sorores mitterent ad Jesum *d)* dicentes: *Domine, quem amas, infirmatur.* Audiens autem Jesus, dixit eis: *infirmas hæc non est ad mortem, sed pro gloria Dei, ut glorificetur Filius Dei per eam.* Unde et mansit ibi duobus diebus, et postea quatrduanum demum resuscitavit ad vitam a morte, quam discipulis adhuc in itinere constitutus, quod hic unice spectamus ad demonstrandam Christi unigeniti Filii Dei omniscientiam, aperuit his verbis: „Tunc ergo Jesus dixit eis manifeste: Lazarus mortuus est. Et gaudeo propter vos, ut credatis, quoniam non eram ibi.“ Quod intererat quam maxime, ut cum primis Apostoli in fide firmarentur, id non solum miraculis factum, verum etiam eo, in quo nunc versamur argumento, quod ad nostram inconcussam reddendam fidem palmare est, qui coram intuemur ad amussim omnia impleta esse, quæ a Christo Apostolis suis, quos in universum orbem missurus

*a) Matth. VIII. b) Ib. XV. c) Luc. VIII. 50. d) Jo. XI.*

erat, fuerunt prædicta. Sic Christus apud tres Evangelistas Matthæum, Marcum, et Joannem Mariam de effuso pretioso unguento super caput suum excusans, et propinquæ mortis se præscium ostendit, et quod nos impletum videmus facti huius memoriam conservatum iri in universo mundo. „Prævenit, sunt verba Christi Marci XIV, 8. ungere corpus meum in sepulturam. Amen dico vobis: ubicunque prædicatum fuerit Evangelium istud in universo mundo, et quod fecit hæc, narrabitur in memoriam eius.“

Vel hinc enimvero, quod a Christo in Evangelio omnia et singula adimpleta esse ad præsentem usque diem palam intelligamus, indubitata etiam ipsorum miraculorum, quæ facta esse narrantur, cum cæteris, quibus constat Evangelium, veritatibus omnibus, redditur fides, ibi omnium maxime conspicua, certa, et asserta, ubi facta vaticinia præsertim cum miraculis sunt coniuncta. Sic dum primum vocat Apostolos a), cum per totam noctem laborantes nihil cepissent, Petrus autem in verbo eius laxando rete piscium tam copiosam multitudinem conclusisset, ut rumperetur rete eorum, stupor autem eos circumdedit, ad miraculum hoc, ait ad Simonem Jesus b): *Noli timere, ex hoc iam homines eris capiens: uti simul etiam Andreæ c): Venite post me, faciam vos fieri piscatores hominum.* Quales Apostoli facti sint piscatores hominum, totus mundus testis est, factus christia-

a) *Matth. IV.*    b) *Ib. v. 10.*    c) *Ib. 20.*



nus. Similis miraculosa post resurrectionem fuit piscatio in mari Tiberiadis a); post eam vero Petro, testimonio amoris præcipui, oves suas et agnos pascendos commisit, prout dudum ei promiserat: *Et ego dico tibi, quia tu es Petrus, et super hanc petram ædificabo Ecclesiam meam, et portæ inferi non prævalebunt adversus eam.* Quod ut ante bis mille annos prædictum fuit et constitutum a Christo, hactenus semper experta, stat inconcussa Ecclesia super petram ædificata, morte D. Petri dedicata, quam ei Christus prædixerat, dum, ut modo meminimus, post resurrectionem oves et agnos pascendos commisit: *Cum esses iunior, cingebas te, et ambulabas, quo volebas: cum autem senueris, extends manus tuas etc.* in cruce nimirum, exemplo magistri suspensus Romæ, ubi, Tertulliano teste b); *Petrus passioni dominicæ adæquatur.* Calicem etiam Domini bibit cum fratre S. Joannes, qui hæc narrat, a morte tamen, prout utrumque prædictum fuerat a Christo, præservatus in oleum igneum demersus, nihil passus, prout l. c. porro commemorat Tertullianus,

Cum primum mitteret Christus Apostolos suos dans eis virtutem et potestatem super omnia dæmonia, et ut languores curarent, ac omnem infirmitatem; ait ad illos c): *Nihil tuleritis in via, neque virgam, neque peram, neque panem, neque pecuniam, neque duas tunicas habeatis.* De experimento autem huius rei capto cum adhuc cum Christo essent ipsi.

a) Jo. XXI.    b) De Præscript. n. 36.    c) Luc. IX.

ante passionem interrogati testantur a): *Quando misi vos sine saculo, et pera, et calceamentis, nunquid aliquid defuit vobis? At illi dixerunt: Nihil.* Porro passim quoque apud alios Evangelistas ab eis omnem sollicitudinem quarumcunque rerum in crastinum abesse pluribus inculcat idque variis inductionibus et exemplis. Sic etiam singillatim misit septuaginta duos discipulos binos ante faciem suam b). *Reversi sunt autem septuaginta duo cum gaudio dicentes: Domine etiam demonia subiiciuntur nobis in nomine tuo c).* Tollit etiam postea eandem, quam iam memoravimus, sollicitudinem: *Nolite solliciti esse animæ vestræ quid manducetis, neque corpori quid induamini etc. d)* Quod utique homo præstare non poterat, aut promittere illis præsertim, quos in universum mundum missurus erat inter infensissimos hostes, et acheronta commotum.

Hæc vero omnia, quæ eos dira maneant, eis prædixit e): „Ecce ego mitto vos sicut oves in medio luporum. Estote ergo prudentes sicut serpentes, et simplices sicut columbæ. Cavete autem ab hominibus. Tradent enim vos in conciliis, et in synagogis suis flagellabunt vos; et ad præsides et reges ducemini propter me in testimonium illis, et gentibus. Cum autem tradent vos, nolite cogitare, quomodo aut quid loquamini; dabitur enim vobis in illa hora, quid loquamini. Non enim vos estis, qui loquimini, sed spiritus Patris vestri, qui

a) *Luc. XXII. 35.*

b) *Luc. X.*

c) *Ib. 17.*

d) *Luc. XII.*

e) *Matth. X. 16.*

loquitur in vobis. Tradet autem frater fratrem in mortem, et pater filium: et insurgent filii in parentes, et morte eos afficient: et eritis odio omnibus propter nomen meum, qui autem perseveraverit usque in finem, hic salvus erit.“ Ad hanc vero perseverantiam atque constantiam in adversis quibusvis, quando iam illa reipsa eis acciderunt, ipsa recordatio, quod hæc magister eis prædixerit, excitabat animum roborabatque. Quapropter eos, dum iam super se ipsum ventura essent, quæ sæpe eis prædixerat, proximus passioni ac morti, suo eos animat exemplo memoria eorum refricata a): „Mementote sermonis mei, quem ego dixi vobis. Non est servus maior domino suo. Si me persecuti sunt, et vos persequentur. Si sermonem meum servaverunt, et vestrum servabunt.“ Et paulo post b): „Hæc locutus sum vobis, ut non scandalizemini. Absque synagogis facient vos: sed venit hora, ut omnis, qui interficit vos, arbitretur, se obsequium præstare Deo.“ Statim hoc discipuli Domini post mortem Christi, ut ex actibus Apostolorum palam fit, experiri cœperunt, quos, dum vixit tutos præstitit, etiam in horto, cum caperetur: alias etiam non solum non passus, ut quidquam eis deesset, verum etiam ceu filios sponsi vitæ austeritate ea eximens, qua usi sunt discipuli S. Joannis eo adhuc vivente: quæsitus aliquando eam ob rem „Quare discipuli Joannis ieiunant frequenter c), et obsecrationes faciunt, similiter et Phariseorum, tui autem edunt et bi-

a) *Jo. XV. 20.*b) *ib. XVI. 1.*c) *Luc. V. 33.*

bunt? Quibus ipse ait: Nunquid potestis filios sponsi, dum cum illis est sponsus, facere ieiunare? Venient autem dies, cum ablati fuerit ab illis sponsus, tunc ieiunabunt in illis diebus.“ Sunt hi dies illi, de quibus aliquando Christus discipulos allocutus, *Venient, inquit a), dies, quando desideretis videre unum diem filii hominis, et non videbitis. Sed enim illi, prædicatione hac iterato facta in memoriam revocata, læti, hæc sibi reputantes gloriæ, fuscipiebant, fustinebantque mala mox a morte Christi: Quoniam digni habiti sunt pro nomine Jesu contumeliam pati b).*

Indignus autem erat Judas. Sciebat ab initio Jesus, qui essent non credentes, et quis traditurus eum esset, quod iam tunc futurum prædixerat c): Nonne ego vos duodecim elegi: et ex vobis unus diabolus est? Nihilominus patienter eum tulit, quod ne cæteris offensioni esse posset, in ultimæ cœnæ, *Ego scio, inquit d), quos elegerim, sed ut adimpleatur scriptura: Qui manducat mecum panem, levabit contra me calcaneum suum. Ammodo dico vobis, priusquam fiat ut cum factum fuerit credatis, quia ego sum. Sic etiam in horto dormientibus discipulis, Venit, inquit e), hora: Ecce filius hominis tradetur in manus peccatorum. Surgite, eamus: ecce, qui me tradet, prope est. Tum vero accepto iam a proditore osculo, Jesus itaque sciens omnia, quæ ventura erant super eum, processit etc. f).* Promptus tunc adhuc sequebatur cum discipulis

a) Luc. XVII. 22. b) Act. V. 41. c) Jo. VI. d) Ib. XIII. 18.  
e) Marc. XIV. 41. f) Jo. XVIII. 4.

aliis Petrus, ea animositate, qua Christo responderat paulo ante in cœna prædicenti a): „Omnes vos scandalum patiemini in me in ista nocte. Scriptum est enim: Percutiam pastorem, et dispergentur oves gregis. Postquam autem resurrexero, præcedam vos in Galilæam. Respondens autem Petrus ait illi: Et si omnes scandalizati fuerint in te, ego nunquam scandalizabor. Ait illi Jesus: Amen dico tibi, quia in hac nocte, antequam gallus cantet, ter me negabis.“ Sequēbatur quidem Petrus in atrium summi sacerdotis cum Joanne dum cæteri *discipuli relicto eo fugerunt* b); iam scandalum passi in horto, quod *ipsa hora*; cum illuc pergeret Christus, illis iterato prædixerat c): „Ecce venit hora, et iam venit, ut dispergami unusquisque in propria, et me solum relinquatis: et non sum solus, quia Pater mecum est. Hæc locutus sum vobis, ut in me pacem habeatis. In mundo pressuram habebitis; sed confidite, ego vici mundum.“

Jam prius in hoc ultimo sermone ad hanc fiduciam animaverat in tanto tam necessariam discrimine, ne a Patre derelictum magistrum in animum inducerent: „Non creditis, iterato ait d), quia ego in Patre, et Pater in me est? Alioquin propter opera ipsa credite. Amen, amen dico vobis: Qui credit in me, opera, quæ ego facio, et ipse faciet, et maiora horum faciet: quia ego

a) *Matth. XXVI. 31.*

d) *Ib. XIV. 11. etc.*

b) *Ib. 56.*

c) *Jo. XVI. 32.*

ad Patrem vado. Et quodcunque petieritis Patrem in nomine meo hoc faciam: ut glorificetur Pater in Filio. Si quid petieritis me in nomine meo, hoc faciam.“ Nil adeo, et tam frequenter Christus quam fiduciam in petendo ac orando certa obtinendi spe instillat in Evangelio. Prædicit etiam in hoc ultimo sermone Jo. XVI. 26. *In illo die in nomine meo petetis: et non dico vobis, quia ego rogabo Patrem pro vobis: ipse enim Pater amat vos, quia vos me amastis, et credidistis, quia ego a Deo exivi.* Iterum hic testimonium dilectionis ex opere, uti loco mox citato Jo. XIV. 15. statuit. „Si diligitis me, mandata mea fervate. Et ego rogabo Patrem, et alium Paraclitum dabit vobis, ut maneat vobiscum in æternum: Spiritum veritatis, quem mundus non potest accipere, quia non videt eum, nec scit eum: vos autem cognoscetis eum: quia apud vos manebit, et in vobis erit. Non relinquam vos orphanos, veniam ad vos.“ Quæ, quæso, et quanta sunt hæc promissa, de quibus ne dubitare possent, in proximo adimplenda, *Et nunc, subdit a), dixi vobis prius, quam fiat: ut cum factum fuerit, credatis, tribus nimirum mox post diebus, dum Christus resurgens Mariæ Magdalænæ primum, et cæteris mulieribus se videndum præbuit, quæ sunt iussæ cito euntes dicere discipulis eius, quia surrexit: et ecce præcedit vos in Galileam, ibi eum videbitis. Ecce prædixi vobis b), in ultima nimirum cæna, ut modo vidimus, et alias, re etiam cæteris Judæis infensissimis hostibus nota, Pilato*

a) Jo. XIV. 29.

b) Matth. XXVIII. 7.

custodes ad sepulchrum postulantibus: *Quia seductor ille dixit adhuc vivens post tres dies resurgam a*). Omne vero desiderium superant, quibus Christus resurrectionem suam a Maria Magdalena fratribus suis, ut primum hic vocat discipulos suos, voluit nunciari. „Vade autem ad fratres meos, et dic eis *b*): Ascendo ad Patrem meum, et Patrem vestrum, Deum meum, et Deum vestrum.“ Quod et factum, ut prædictum fuerat, postquam Christus præbuit se ipsum vivum post passionem suam in multis argumentis, per dies quadraginta apprensus eis, et loquens de regno Dei. Et convescens, præcepit eis ab Jerosolymis ne discederent, sed exspectarent promissionem Patris, quam audistis, inquit, per os meum: Quia Joannes quidem baptizavit vos aqua, vos autem baptizabimini Spiritu Sancto, non post multos hos dies, nempe cum complerentur dies pentecostes,“ ut impleta res narratur Act. II. Ascendente autem Christo in cælum *c*), „Ecce duo viri astiterunt iuxta illos in vestibus albis, qui et dixerunt: Viri Galilæi, quid statis aspicientes in cælum; hic Jesus qui assumptus est a vobis in cælum, sic veniet, quem admodum vidistis eum euntem in cælum.“

Est hoc quod Christus Matth. XXVI. 64. Marc. XIV. 62. cum staret coram synedrio iudicandus edixit proxime ante passionem suam, quam toties secundum singulas circumstantias prædixerat apud Matthæum XVI. 21. postquam Petro

*a*) Matth. XXVII. 63.    *b*) Jo. XX. 17.    *c*) Ib. 10.

primatum Ecclesiæ concesserat: Apud Marcum IX. 44. post transfigurationem in monte: Apud Lucam IX. 32., cum essent in via ascendentes Ierosolymam: Apud Joannem XII. 1. XIII. 1. biduo ante ultimum pascha: *Sciens Jesus, quia venit hora eius, ut transeat de mundo: ad quod parandum mittit Petrum et Joannem: „Ite in civitatem, inquit, et occurret vobis homo lagenam aquæ baiulans, sequimini eum, et quocunque introierit, dicite domino domus, quia magister dicit: ubi est refectio mea, ubi Pascha cum discipulis meis manducem? Et ipse vobis demonstrabit cœnaculum grande stratum; et illic parate nobis. Et abierunt discipuli eius, et invenerunt sicut dixerat illis, et paraverunt pascha a):* “ Quemadmodum paucos ante dies ante solemnem suum ingressum in Jerusalem duos ex discipulis suis misit, „et ait illis b): Ite in castellum, quod contra vos est, et statim introeuntes illuc, invenietis pullum ligatum; super quem nemo adhuc hominum fedit: solvite illum et adducite. Et si quis vobis dixerit: Quid facitis? Dicite: quia Domino necessarius est: et continuo illum dimittet huc. “ Uti articulatim omnia; prout prædictum a Christo fuerat in via procul adhuc acciderunt:

Impletum ex parte tunc fuerat, quod Christus prædixerat urbi Jerusalem c), „Quoties volui congregare filios tuos, quemadmodum gallina congregat pullos suos sub alas, et noluisti? Ecce relinquetur vobis domus vestra deserta. Dico enim

a) *Marc. XIV. 13.*    b) *Lk. XI. 2.*    c) *Matth. XXIII. 37.*



vobis, non me videbitis a modo, donec dicatis: Benedictus, qui venit in nomine Domini.“ Quod futurum in secundo adventu speratur sincerius acclamandum, quam in solemni illo ingressu acclamatum fuit a turbis: Jesus autem „ut appropinquavit, videns civitatem flevit super illam dicens: Quia si cognovisses et tu, et quidem in hac die tua, quæ ad pacem tibi: nunc autem abscondita sunt ab oculis tuis. Quia venient dies in te, et circumdabunt te inimici tui vallo: et circumdabunt te, et coangustabunt te undique, et ad terram prosternent te et filios tuos, qui in te sunt: et non relinquent in te lapidem super lapidem: eoquod non cognoveris tempus visitationis tuæ a).“ Quæ, cum cæteris Judaicæ gentis fati spatio quadraginta annorum tunc adimpletis, memoria hominis bis mille propemodum annorum decursu oculis nostris obversantur; habent vero Judæi testem omni exceptione maiorem de *bello Judaico* illo, cui ipse adfuit, fassus divina id genti fuæ accidisse nemesis, prout obduratis illis toties Christus prædixerat in parabolis et palam „Dixit ergo iterum eis Jesus b): Ego vado, et quæretis me, et in peccato vestro moriemini. Quo ego vado, vos non potestis venire . . . Dixi ergo vobis, quia moriemini in peccatis vestris, si enim non credideritis, quia ego sum, moriemini in peccato vestro.

Quod mox subsequitur ad spem illam quoque referri queat, quæ superest, fore aliquando, ut

a) *Luc. XIX. 41.*

b) *Jo. VIII. 21.*

et Judæi participes sint reddendi redemptionis per crucem: „Dixit ergo eis Jesus a): Cum exaltaveritis filium hominis, tunc cognoscetis, quia ego sum, et a me ipso facio nihil, sed sicut me docuit Pater, hæc loquor.“ Parallelus est hic locus cum illo apud eundem Evangelistam b): „Nunc iudicium est huius mundi: nunc princeps huius mundi eiicietur foras. Et ego si exaltatus fuero a terra, omnia traham ad meipsum. Hoc autem dicebat, significans, qua mortē esset moriturus.“ Animam nimirum suam positurus pro ovibus suis pastor bonus, ut de se dixerat c): „Ego sum pastor bonus. Bonus pastor animam suam dat pro ovibus suis . . . . Et alias oves habeo, quæ non sunt ex hoc ovili: et illas oportet me adducere; et vocem meam audient, et fiet unum ovile et unus pastor.“ Maximum hoc omnium est inter Christi vaticinia, quod cernimus iam in aliis ovibus, gentilibus impletum: dum adhuc perstat Judaica perfidia perinde etiam a Christo prædicta: „Cum videritis Abraham, et Isaac, et Jacob, et omnes prophetas in regno Dei, vos autem expelli foras. Et venient ab Oriente, et Occidente, et Aquilone et Austro, et accumbent in regno Dei. Et ecce sunt novissimi, qui erunt primi, et sunt primi, qui erunt novissimi d).“ Sunt hæc a Christo tunc prædicta, quando nec minima spes affulgere poterat stupendi illius eventus, quem tam celeri cursu perfectum in conversione gentium stupuit orbis a

a) Jo. VIII. 28. b) Ib. XII. 31. etc. c) Jo. X. 11. d) Luc. XIII. 28.

rudibus piscatoribus, quos Christus in cruce, postquam latroni *Hodie mecum eris in paradiso*, promisset, *sciens, quia omnia consumata sunt*, mortuus, ante passionem pollicitus, non relicturum se orphanos, quales erant ab omnibus derelicti, post resurrectionem suam, misit in universum mundum a) *prædicare Evangelium omni creaturæ. Qui crediderit, et baptizatus fuerit salvus erit, qui vero non crediderit, condemnabitur. Signa autem eos, qui crediderint, hæc sequentur etc.* Modo audivimus, Christum in se credenti promisisse; opera, quæ ego facio, et ipse faciet, et maiora horum faciet, ut acta non solum apostolorum, sed alia etiam deinceps ecclesiastica docent. Additur Matth. XXVIII. 20. *Et ecce ego vobiscum sum usque ad consumationem sæculi.* Quæ est promissio consolationis plena contra spem in spem b) data apostolis in eorum etiam successoribus hactenus perennans, quin autem usque ad consumationem sæculi perennatura sit, ambigendi quis locus esse possit? nobis, qui in Christum credimus, spe ac fiducia unice salutari: qui dum cernimus hæc et alia omnia, quæ in Evangelio tot et tanta sunt prædicta ac promissa, omnia et singula ad apicem esse completa, indubitata credimus fide, quæ adhuc supersunt, in hac et altera æterna vita fore implenda, quod universam attinet divinam Evangelii Christi Verbi incarnati œconomiam c): „Ut omnes honorificent Filium, sicut honorificant Patrem, qui non honorificat Filium, non honorificat Patrem, qui mi-

a) Marc. XVI. 15.

b) Rom. IV. 18.

c) Jo. V. 23.

sit illum. Amen, amen dico vobis, quia qui verbum meum audit, et credit ei, qui misit me, habet vitam æternam, et in iudicium non venit, sed transit a morte in vitam.

Nullam Christus prætermisit occasionem, ut Judæos terreret, quæ eis imminerent, prædicens. Cum ei nunciaretur de Galilæis, quorum sanguinem miscuit Pilatus cum sacrificiis eorum Luc. XIII. 2. *Respondens dixit eis: Putatis, quod hi Galilæi præ omnibus Galilæis peccatores fuerint, quia talia passi sunt? Non, dico vobis: sed nisi pœnitentiam habueritis, omnes simul peribitis.* Sic interrogatus a discipulis de cæco nato Jo. IX. 2. *Rabbi, quis peccavit, hic, aut parentes eius, ut cæcus nasceretur? Respondit Jesus: Neque hic peccavit, neque parentes eius: sed ut manifestentur opera Dei in illo.* Quæ sunt folius omniscii Dei. Qualem se etiam in futuris conditionatis ostendit Matth. XI. de Tyrïis et Sidoniis etc. simulque se futurum iudicem. Apud Joannem modo citatum testatus Patrem omne iudicium dedisse Filio *Amen, amen, pergit, dico vobis, quia venit hora, et nunc est, quando mortui audient vocem Filii Dei: et qui audierint, vivent.* Possunt hæc intelligi sive singulariter de iis, qui resurgente Christo simul erant resurrecturi, sive complexim de resurrectione illa, de qua postea Christus a) : *Hæc est autem voluntas eius, qui misit me, ut omne, quod dedit mihi, non perdam ex eo, sed resuscitem illud in novissimo die.* Quando nempe b) *Filius hominis*

a) Jo. VI. 39.

b) Matth. XVI. 27.

*venturus est in gloria Patris sui cum angelis suis: et tunc reddet unicuique secundum opera eius.* Hic se vocat Christus Filium hominis, apud Joannem, ut modo vidimus Filium Dei, ad cuius vocem mortui vivent; sed mox subdit de se Filio Dei: *Et potestatem dedit ei iudicium facere, quia Filius hominis est a).* Unde illustrantur, concilianturque cum præsenti themate nostro, Christum se ubique Deum omniscium demonstrare in Evangelio, quæ apud Marcum (quem Matthæi pedisequum, et breviatorem S. Augustinus, Irenæus Petri interpretem vocat) leguntur b): *De die autem illo vel hora nemo scit, neque angeli in cælo, neque Filius, nisi Pater*, ut ad verbum etiam habetur apud Matthæum; tantum quod hic omisso Filio habeat *nisi solus Pater*. Caveamus vero ne vel imprudentes hic cum Judæis ad ea verba, *Pater meus usque modo operatur, et ego operor c)*, offendamus, rem ex responsione Christi edocti: „Amen dico vobis: non potest Filius a se facere quidquam, nisi quod viderit Patrem facientem; quæcunque enim ille fecerit, hæc et Filius similiter facit. Pater enim diligit Filium, et omnia demonstrat ei opera, ut vos miremini. Sicut enim Pater suscitavit mortuos, et vivificat: sic et Filius, quos vult, vivificat. Neque enim Pater iudicat quemquam, sed omne iudicium dedit Filio.“ Pertinent hæc ad ea, quæ adhuc implenda, de quibus, cum innumera alia prædicta iam fuerint impleta, dubium superesse non potest: atque eorum veritas, quæ in Evangelio prædicta iam im-

a) Jo. V. 27.

b) Marc. XIII. 32.

c) Jo. V. 16.

pleta sunt, aut implenda sunt successu temporum, fit assertior. Dumque eorum omnium, quibus totum Evangelium pertextum est, ac repletum, vaticiniorum de futuris impletionem coram intuemur, ac palpamus, de miraculis, quibus itidem Evangelium pertextum est ac repletum, nullum potest esse reliquum dubium: Si enim prædicta non fallunt, nec facta fallere possunt quamcunque mirabilia sint, nec veritates aliæ ac mysteria quantumcunque captum nostrum excedunt, eodem ore prolata, fermone contexta, calamo conscripta, ac fide probata.

---

PRIMUM MIRACULUM CHRISTI, QUO  
DISCIPULIS MANIFESTAVIT GLORIAM SUAM;  
JUDÆIS SIGNUM JONÆ PROMISSUM.

XI. **J**am meminimus ex Melitone contra Marcionem (qui Christum verum hominem esse negabat) cum ex ipsius post baptismum actionibus eius quidem divinitas elucescat, idemque ante baptismum suam humanitatem iam demonstrasset, „non esse necessarium his, quos ratio non fugit, ex actionibus Christi post baptismum adstruere, et demonstrare animæ et corporis eius, et humanæ naturæ nobiscum convenientis veritatem, et ab omni fictione remotionem. Nam quæ post baptismum a Christo gesta sunt, maxime miracula, latentem eius divinitatem potissimum mundo comprobabant, et confirmabant: cum enim Deus

simul et homo perfectus esset, duas naturas suam nobis patefecit: divinitatem quidem per miracula triennio illo post baptismum patrata: humanitatem vero suam triginta illis annis baptismum antegressis, quibus carnis vilitas tegebat, et abscondebatur divinitatis signa, tametsi revera Deus esset sempiternus. " Contra Marcionis contribules Manichæos etiam facit, quod S. Augustinus T. IX. in Joan. hic animadvertit, Dominum, invitatus cum venisset ad nuptias, *etiam excepta mystica significatione confirmare voluisse, quod ipse fecit nuptias. Futuri enim erant, de quibus dixit apostolus, prohibentes nubere, et dicentes, quod malum essent nuptiæ, et quod diabolus eas fecisset: cum idem Dominus dicat in Evangelio, interrogatus utrum liceat homini uxorem suam dimittere; quod Deus coniunxit homo non separet.* Hoc non agitur, dum sponte a nuptiis abstinetur, atque continentiam Deo vovent, qui, quos Christus laudat, *seipsos castraverunt propter regnum cælorum.* Rem quoque Christus proprio suo et virginis matris suæ exemplo comprobata imitandam a), quibus datum est, proposuerat.

Necdum, quando Nathanael Jesum Filium Dei, promissum Messiam, regem Israel professus fuerat, Christus miraculum aliquod fecerat, nec tamen temere fidem adhibuerat Nathanael, quippe, cui Christus arcana cordis soli Deo pervia patefecerat; aliorum vero discipulorum, quos iam vocaverat, secum ad nuptias in Cana Galilææ deduc-

a) Matth. XIX. 11.

rum fidem aqua in vinum mutata firmavit a): *Hoc fecit initium signorum Jesus in Cana Galilææ: et manifestavit gloriam suam, et crediderunt in eum discipuli eius.* Palam hinc fit, antequam ullum edidisset miraculum, Christum discipulos congregasse. Arguit vero S. Hieronymus in cap. 9. Matthæi Porphyrium et Julianum apostatam dictitantes, quasi irrationabiliter quemlibet vocantem hominem sint secuti apostoli. Etsi vero S. Doctor etiam ad miracula ab apostolis visa provocet, subdit tamen, quod perinde ad divinam Evangelii Christi Verbi incarnati œconomiam facit: *Certe fulgor ipse, et maiestas divinitatis occulta, quæ etiam in humana facie relucebat, ex primo ad se videntes trahere poterat aspectu.*

Singularis equidem erat hæc divina Evangelii Christi, œconomia, ut miraculis manifestaret gloriam suam, ostenderetque a cœlesti Patre suo missionem, quam cœpit, cum prope esset pascha Judæorum non multis post diebus, cum ex Cana descendissent Capharnaum ipse et mater eius b), et fratres eius, et discipuli eius, cum quibus quasi in comitatu regio ex stirpe David in regiam suam ascendit Jerosolymam, quæ ipsius effato est *civitas magni regis* c), Messiaë nimirum, ubi accipere sibi regnum, et reverti advenerat, opus redemptionis nostræ consummaturus. Cum primum illuc venit, ingressus templum domum Patris sui, summa, quis esset, mox demonstrat potestate; dum „in-

a) Jo. II. 11.    b) Ib. 12.    c) Matth. V. 35.



---

venit in templo vendentes boves, et oves, et columbas, et nummularios sedentes. Et cum fecisset quasi flagellum de funiculis, omnes eiecit de templo, oves quoque et boves, et numulariorum effudit æs, et mensas subvertit. Et his, qui columbas vendebant, dixit: Auferte ista hinc, et nolite facere domum Patris mei domum negotiationis,“ ostendens se cœlestis Patris filium. „Recordati sunt vero discipuli eius, quia scriptum est: Zelus domus tuæ comedit me. Responderunt ergo Judæi, et dixerunt ei: Quod signum ostendis nobis, quia hæc facis? Respondit Jesus, et dixit eis: Solvite templum hoc, et in tribus diebus excitabo illud. Dixerunt ergo Judæi: Quadraginta et sex annis ædificatum est templum hoc, et tu in tribus diebus excitabis illud? Ille autem dicebat de templo corporis sui. Cum ergo resurrexisset a mortuis, recordati sunt discipuli eius; quia hoc dicebat, et crediderunt scripturæ et sermoni, quem dixit Jesus<sup>a)</sup>.“ Observandum vero, Christum innumeris aliis apud Judæos inclaruisse miraculis, ad quæ illi omnia obdurarunt animum. Spes est tamen nobis in scripturis haud obscure facta, eos saltem aliquando ante resurrectionem universæ carnis, cuius chirographum in Christi resurrectione habemus, cum discipulis ipsius recordaturos, *quia hoc dixit, et credituros scripturæ, et sermoni, quem dixit Jesus*, conversosque Christum Messiam suum agnituros.

Est hoc ipsum signum de quo alibi, cum quidam ex scribis et Pharisæis idem iterum pete-

rent a): „Magister, volumus a te signum videre: Qui respondens ait illis: Generatio mala et adultera signum quærit; et signum non dabitur ei, nisi signum Jonæ prophetæ. Sicut enim fuit Jonas in ventre Ceti tribus diebus et tribus noctibus; sic erit Filius hominis in corde terræ tribus diebus et tribus noctibus.“ De resurrectione sua nihil dicit; imo postea cum iterum Pharisei et Sadducæi signum peterent, idemque de Jona diceret, mox subdit Evangelista: *Et relictis illis abiit b)*; quia nimirum Christus resurgens se Judæis incredulis conspicuum non exhibuit, dum non magis præcipuo huic resurrectionis suæ signo fidem adhibituri erant (ut in parabola de divite et Lazaro Christus futurorum conscius Judæis insinuavit) quam aliis innumeris, quæ quamdiu in hac vita fuit, patrauit, tunc etiam iam, quando, quod ex S. Joanne attulimus, ad eos primum Jerosolymis munus prædicationis suæ fuit auspicatus, locutus est; addit enim Evangelista c): „Cum autem esset Jerosolymis in pascha in die festo, multi crediderunt in nomine eius, videntes signa eius, quæ faciebat. Ipse autem Jesus non credebat semetipsum eis, eoquod ipse nosset omnes; et quia opus ei non erat, ut quis testimonium perhiberet de homine: ipse enim sciebat, quid esset in homine;“ nempe (quod soli Deo scrutanti corda et renes proprium est) καρδιόγνωσις.

a) Matth. XII. 38.

b) Ib. XVI. 4.

c) Jo. II. 23.

**CHRISTUS NICODEMO (UT S. JOANNES  
BAPTISTA JUDÆIS) DIVINITATEM, UBIQUE VERO  
SE DEUM ET HOMINEM MANIFESTAT.**

**XII.** **E**x horum numero, qui in parabola de seminante *temporales* vocantur, *qui non habent radicem in se a)*, qui videntes signa credidisse sunt visi, quibus autem Jesus non credebat semetipsum eis, non erat Nicodemus homo ex Pharisæis *b)*, qui venit ad Jesum nocte persuasus ex signis, quæ faciebat, eum a Deo venisse, sed adhuc humi ferpebat in elementis legis Mosaicæ ad altiora de divina Evangelii Christi Verbi incarnati æconomia efferendus, cum quid esset renasci non caperet: Respondit Jesus: Amen, amen dico tibi, nisi quis renatus fuerit ex aqua et Spiritu Sancto, non potest introire in regnum Dei. At Nicodemus de regno Dei cum Judæis adhuc carnaliter sapiebat; unde capere non poterat regenerationem filiorum Dei, *qui non ex sanguinibus c)* etc. Sed ex Deo nati sunt, quibus nimirum dedit potestatem filios Dei fieri Verbum, quod caro factum est, et habitavit in nobis: Atqui hic est, qui descendit de cælo, Filius hominis, qui est in cælo *d)*, quem se Christus Nicodemo manifestavit. Est hæc, quam Salomon vocat scientiam sanctorum Prov. XXX. 4. quam se ignorare fatetur: Quis, pergit, ascendit in cælum, atque descendit? Quis continuit Spiritum in manibus suis? Quis colligavit aquas quasi in vestimento? Quis suscitavit omnes terminos terræ? Quod nomen est

a) Matth. XIII. 21.

b) Jo. III. 1.

c) Ib. I. 12.

d) Ib. III. 13.

eius, et quod nomen Filii eius si nosti? Per quem nempe omnia facta sunt, quod, ut Evangelium suum S. Joannes auspicatur: *In principio erat Verbum, et Verbum erat apud Deum, et Deus erat Verbum*, iuxta ac primus S. Joannes Baptista testimonium reddidit Christo, Deum neminem vidisse unquam, unigenitum Filium, *qui est in sinu Patris a)*, ipsum enarrasse: quod in ultimo testimonio antequam ab Herode carceri, necique daretur, Joannes dilucide confirmavit, explicavitque insigni paraphrasi verborum Christi, divinitus accepta revelatione: cum nunquam mutuo conversati legantur Christus et Joannes. Sic vero Joannes *b)*: „Qui desursum venit, super omnes est. Qui est de terra, terra est, et de terra loquitur: qui de cælo venit, super omnes est. Et quod vidit, et audivit, hoc testatur: et testimonium eius nemo accipit. Qui accepit eius testimonium, signavit, quia Deus verax est. Quem enim misit Deus, verba Dei loquitur: non enim ad mensuram dat Deus spiritum. Pater diligit Filium; et omnia dedit in manu eius. Qui credit in Filium, habet vitam æternam: qui autem incredulus est Filio, non videbit vitam, sed ira Dei manet super eum.“ Nempe ut Christus Verbum incarnatum Nicodemo manifestat divinam Evangelii sui œconomiam: *Sic enim Deus dilexit mundum, ut Filium suum unigenitum daret: ut omnis, qui credit in eum non pereat, sed habeat vitam æternam c)*.

a) Jo. I. 18.

b) Ib. III. 31.

c) Ib. 16.

Locum hic iterum habet, quod modo de Judæis Christum lapidare volentibus, *de blasphemia*, diximus. Quod agitant omnes, qui, dum Christum Filium Dei, quem ipse se profitetur, esse negant, cum Judæis blasphemant, blasphemum et impostorem cum christiani nominis hostibus Celso, Porphyrio, Juliano, cæteris, faciunt. Quod dum quidem in tanta luce christianismi dicere palam abhorrent cum Socinianis ingens hodie incredulorum turma, sibi ipsis haud constantes sunt, si quid in Evangelio Christi, eius doctrina morum e. g. quam supra astra extollunt, suspiciunt, ac reverentur in Filio hominis Christo, nisi simul unigenitum Filium Dei confiteantur; qualem nempe se Deum et hominem ubique exhibuit, ac demonstravit, cum primum *cæpit Jesus facere et docere*, ut undique cum humilitate conditionis humanæ resplendeat maiestas divina in Christo. Qui dum a se disci voluit, *quia mitis sum et humilis corde*, ut homo, simul passim et ubique sic se exhibet, ut nisi simul esset Deus, falleret exemplum ipsum mitis et humilis corde, proderetque se ac undique manifestaret, sit venia verbo, ostentatio.

Ita enim totum contextum est Evangelium, ut Deus simul et homo ubique compareat Filius Dei, qualem se ipse passim declarat, ac haberi vult, adorari se passus ab eo, cui cæco nato lumen restituit, petens ab eo, ut Filium Dei se agnosceret: *Tu credis in Filium Dei? Respondit ille, et dixit:*

*Quis est, Domine, ut credam in eum? Et dixit ei Jesus: et vidisti eum, et qui loquitur tecum, ipse est. At ille ait: Credo, Domine. Et proci-dens adoravit eum a). Atqui vero hoc Christus ex scriptura veteris testa-menti soli Deo competere Satanæ tentanti edixit b): Vade Satana: Scriptum est enim: Dominum Deum tuum adorabis, et illi soli servies. Tunc reliquit eum diabo-lus, et ecce angeli accesserunt, et ministrabant ei.*

Ex quo ipso hoc angelorum ministerio paulo ante D. Paulum divinitatem Christi probantem audivimus. Ne quis autem argutetur, esse quoque in ministerium hominum angelos, argumentum prosecutus apostolus, atque præoccupans hanc ob-jectionem: „Ad quem autem c) [pergit ad Psal. CIX. provocans, quem ipsum de se interpretatur Matth. XXII. Christus] angelorum dixit aliquan-do: Sede a dextris meis, quoadusque ponam, ini-micos tuos scabellum pedum tuorum? Nonne omnes sunt administratorii spiritus, in ministerium missi propter eos, qui hæreditatem capient salutis. Propterea abundantius oportet observare nos ea, quæ audivimus, ne forte pereffluamus. Si enim qui per angelos dictus est sermo, factus est firmus, et omnis prævaricatio, et inobedientia accepit iu-stam mercedis retributionem, quomodo nos effu-giemus, si tantam neglexerimus salutem? “ Per-tinent hæc ad discrimen veteris ac novi et æterni (*Non enim angelis subiecit Deus orbem terræ futurum, de quo loquimur d)* testamenti per Christum Je-  
a) Jo. IX. 35, etc. b) Matth. IV. 10, etc. c) Hebr. I. 13. d) Ib. II. 5.

sum d), „Propter passionem mortis gloriæ et honore coronatum: ut gratia Dei, pro omnibus gustaret mortem. Decebat enim eum, propter quem omnia, et per quem omnia, qui multos filios in gloriam adduxerat, auctorem salutis eorum per passionem consummare.“

### CHRISTUS EVANGELIUM PRÆDICAT POTENS SERMONE ET OPERE.

XIII. **U**trique sermoni et Christi cum Nicodemo, et S. Joannis ad suos discipulos in eo concordat fermo Christi cum Samaritana, ut se Messiam Samaritanis (quem Israelitæ eundem cum Judæis expectabant) manifestaret, necdum vero omnem perspectam habebant divinam illam Evangelii Christi Verbi incarnati œconomiam, qua *sic Deus dilexit mundum, ut filium suum unigenitum daret: Qui est in sinu Patris b).*

A muliere Samaritana ad fontem Jacob sedens petierat Jesus bibere, ut ansam inde arriperet, aquam salutis ei propinadi: *Si scires, inquit c), donum Dei, et quis est, qui dicit tibi: da mihi bibere, tu forsitan petisses ab eo, et dedisset tibi aquam vivam.* Illa naturalem aquam cogitans, rata Christum Judæum fontem illum Jacob contemnere, „Nunquid, ait d), tu maior es patre nostro Jacob, qui dedit nobis puteum, et ipse ex eo bibit, et filii

a) *Hebr. I. 8.*    b) *Jo. III. 16.*    c) *Ib. IV. 10.*    d) *Ib. 12.*

eius, et pecora eius? Respondit ei Jesus, et dixit ei: Omnis qui bibit ex aqua hac, sitiet iterum: qui autem biberit ex aqua, quam ego dabo ei, non sitiet in æternum: sed aqua, quam ego dabo ei, fiet in eo fons aquæ salientis in vitam æternam.“ Cum illa dari sibi peteret hanc aquam, animadvertit, quomodo Christus mulierem, et mox Samaritanos, ut se Messiam esse crederent, induxerit, cum agnoscerent iam eum prophetam. Edocta a Christo primum mulier, venisse tempus, quando neque in monte hoc, neque in Hierosolymis, cultu nempe ad unum restricto locum, adorabitis Patrem, ad Messiam provocat, qui dicitur Christus: cum ergo venerit ille, nobis annuntiabit omnia. Dicit ei Jesus: ego sum, qui loquor tecum; Messias nimirum, quo se præcise nomine nunquam Judæis tam aperte manifestaverat. Nullum hic intercedit miraculum, sed quod æque est ad divinam Evangelii Christi œconomiam demonstrandam, propheticus quem in Christo deprehenderat, spiritus, ut cederet mulier verbis eius, dicentis, se esse Messiam: (dum vicissim Philippo postea descendenti in civitatem Samariæ prædicanti Christum intenderent a) turbæ his, quæ a Philippo dicebantur, unanimiter audientes, et videntes signa quæ faciebat); Reliquit ergo hydriam suam mulier, et abiit in civitatem, et dicit illis hominibus: Venite, et videte hominem, qui dixit mihi omnia, quæcunque feci: nunquid ipse est Christus? ... ex civitate autem illa

a) Act. VIII. 4. etc.



multi crediderunt in eum Samaritanorum, propter verbum mulieris testimonium perhibentis: Quia dixit mihi omnia, quaecunque feci.“ Cum autem ibi rogatus Christus mansisset duos dies, „multo plures crediderunt in eum propter sermonem eius. Et mulieri dicebant: Quia iam non propter tuam loquelam credimus: ipsi enim audivimus, et scimus, quia hic est vere Salvator mundi.“ Vide, quam subito Samaritani ex prædicatione Christi perspectam habuerint divinam Evangelii Christi œconomiam in salutem omnium, non Judaicæ tantum gentis, ex qua oriundus erat Messias expectatio gentium. Evangelista non memorat, an Christus, uti mulieri Samaritanæ ita etiam concivibus eius per propheticum spiritum Salvatorem mundi se demonstraverit (dum nulla facti miraculi fit mentio) an vero insita sermonibus suis Verbi divini virtute seu fulgore ipso, et maiestate divinitatis occultæ, ut paulo ante ex S. Hieronymo notavimus. Si enim, subdit is, *in magnete lapide, et succinis hæc esse vis dicitur, ut annulos, et stipulam, et vestucas sibi copulent; quanto magis Dominus omnium creaturarum ad se trahere poterat, quos vocabat.*

Digressum ex Samaria (relicta etiam civitate Nazareth, cui testimonium perhibuit, *quia propheta in sua patria honorem non habet* a) in Galilæam, exceperunt Christum Galilæi, cum omnia vidissent, quæ fecerat Jerosolymis in die festo. Venit igitur, et habitavit in Capharnaum maritima civitate in fini-

a) Jo. IV. 44.

bus Zabulon et Nephtalim, Gentilibus quasi e regione lucem Evangelii ostentans a), „ut adimpleretur, quod dictum est per Isaiam prophetam: Terra Zabulon, et terra Nephtalim, via maris trans Jordanem, Galilæa Gentium, populus qui fedebat in tenebris, vidit lucem magnam: et sedentibus in regione umbræ mortis, lux orta est eis. Exinde cœpit Jesus prædicare Evangelium, et dicere: Pœnitentiam agite, appropinquavit enim regnum cœlorum. Idem paucis commemorat Lucas IV. 31. *Et descendit in Capharnaum civitatem Galilææ, ibique docebat in Sabbatis. Et stupebant in doctrina eius, quid in potestate erat sermo ipsius.* Narrat S. Marcus, Jesum Sabbatis ingressum synagogam docuisse eos b). „Et stupebant super doctrina eius: erat enim docens eos quasi potestatem habens, et non sicut scribæ. Et erat in synagoga eorum homo in spiritu immundo, et exclamavit dicens: Quid nobis et tibi Jesu Nazarene? Venisti, perdere nos? Scio, qui sis, Sanctus Dei. Et comminatus est ei Jesus dicens: obmutesce, et exi de homine. Et discerpens eum spiritus immundus, et exclamans voce magna exiit ab eo. Et mirati sunt omnes: ita ut conquirerent inter se dicentes: Quidnam est hoc? Quænam doctrina hæc nova? Quia in potestate etiam spiritibus immundis imperat, et obediunt ei? Et processit rumor eius statim in omnem regionem Galilææ.

a) *Matth. IV. 14, etc.*

b) *Marc. I. 21, etc.*

Est hæc virtus Dei in Evangelio Christi, de qua discipuli illi, quibus in Emaus ambulanti-  
bus post mortem resurgens occurrit Christus, quærit-  
que, qui sint sermones, quos conferrent ad invi-  
cem a)? *Et dixerunt, de Jesu Nazareno, qui fuit vir  
propheta potens in opere et sermone coram Deo, et omni  
populo.* Hanc apostoli Petrus et Andreas fratres  
expertum sunt virtutem Dei, dum a Christo vocati b)  
„protinus relictis retibus secuti sunt eum. Et pro-  
gressus inde pusillum vidit Jacobum Zebedæi, et  
Joannem fratrem eius, et ipsos componentes retia  
in navi. Et statim vocavit illos. Et relicto patre suo  
Zebedæo in navi cum mercenariis, secuti sunt eum.“  
Sicut modo vidimus, memoratur Christus in sy-  
nagoga Judæorum docens eos, quasi potestatem habens,  
quam etiam sentiens virtutem Dei ibi præsens dæ-  
moniacus exclamat, *Quid nobis et tibi Jesu Nazarene?  
venisti perdere nos.* Et Luca perhibente c) „factum  
est in una dierum, et ipse sedebat docens. Et  
erant Pharisei fedentes, et legis doctores, qui  
venerant ex omni castello Galilææ, et Judææ, et  
Jerusalem: et virtus Domini erat ad sanandum  
eos,“ nempe, ut postea alia occasione narratur d):  
„Qui venerant, ut audirent eum, et sanarentur a  
languoribus suis. Et qui vexabantur a spiritibus im-  
mundis, curabantur. Et omnis turba quærebat, eum  
tangere: quia virtus de illo exibat, et sanabat om-  
nes.“ Sed iam hæc sunt articulatus edisserendi.

a) *Luc. XXIV. 17. etc.*b) *Marc. I. 18.*c) *Luc. V. 17.*d) *Ibid. VL. 18.*

## POTESTAS IN DÆMONES.

XIV. Subdit Marcus I. c. vespere, cum sol occidisset, allatos ad eum esse omnes male habentes, et dæmonia habentes a): *Et erat omnis civitas congregata ad ianuam. Et curavit multos, qui vexabantur variis languoribus, et dæmonia multa eiiciebat, et non sinebat ea loqui, quoniam sciebant eum. Qua eadem de re Lucas b): Exhibant autem dæmonia a multis, clamantia et dicentia: Quia tu es Filius Dei: et increpans non sinebat ea loqui: quia sciebant ipsum esse Christum: quoniam nempe erat destructurus eorum regnum.*

Quod vero ex apostolo iam meminimus, dedisse Patrem Filio suo nomen, quod est super omne nomen, ut in nomine Jesu omne genu flectatur cœlestium, terrestrium et infernorum, apud Marcum legimus Spiritus immundos, dum illum videbant, procidisse ei, et clamasse c) *dicentes: Tu es Filius Dei. Et vehementer comminabatur eis, ne manifestarent illum. Sic modo memoratus dæmoniacus clamat; Scio, qui sis, Sanctus Dei d). Sævissimus vero ille homo in Spiritu immundo, ut Marcus narrat e), „qui domicilium habebat in monumentis, et neque catenis iam quisquam poterat eum ligare etc. et semper die et nocte in monumentis, et in montibus erat clamans, et coniciens se lapidibus. Videns autem Jesum a longe, cucurrit;*

a) *Marc. I. 32.*

b) *Luc. IV. 41.*

c) *Marc. III. 11.*

d) *Ib. I. 24.*

e) *Ib. V. 3.*

et adoravit eum: et clamans voce magna dixit: Quid mihi, et tibi Jesu Fili Dei Altissimi? Adjuro te per Deum, ne me torqueas.“ Matthæus duos memorat, qui clamaverunt dicentes a): „Quid nobis, et tibi, Jesu Fili Dei? Venisti huc ante tempus torquere nos? Erat autem non longe ab illis grex multorum porcorum pascens. Dæmones autem rogabant eum dicentes: Si eiicis nos hinc, mitte nos in gregem porcorum. Et ait illis: Ite. At illi exeuntes abierunt in porcos, et ecce impetu abiit totus grex per præceps in mare; et mortui sunt in aquis.“ Qui post hæc dæmones, qui tot et tanti eiecti a Christo memorantur in Evangelio, in morbos, dæmoniacosque et in maniacos transformant, porcis stolidiores esse oportet, obtusos nempe materialismo sensus habentes.

Maior nihilominus fuit perversitas cæcitasque Pharisæorum, qui blasphemabant in Beelzebub principe dæmoniorum Christum eiicere dæmonia. Videri poterat inde collusionem finxisse eos, quod dæmonia Christum Filium Dei clamarent non femel; at semper, quod singulariter notandum, dum id calumniabantur Judæi, qui dæmonium habebat, erat mutus, veluti Matth. IX. 32. „Obtulerunt ei hominem mutum, dæmonium habentem. Et eiecto dæmonio, locutus est mutus, et miratæ sunt turbæ dicentes: Nunquam apparuit sic in Israel. Pharisæi autem dicebant: In principe dæmoniorum eiicit dæmones.“ Et Matth. XII. 22. Cum

a) Matth. VIII. 19.

iterum turba convenisset ac tanta, ut non possent neque panem manducare *a*); hinc forte quidam pertæsi sui commensales exierunt tenere eum: „dicebant enim (ipsi furibundi) quoniam in furorem versus est. Oblatus est ei tunc dæmonium habens cæcus et mutus, et curavit eum, ita ut loqueretur, et videret. Et stupebant omnes turbæ et dicebant: Nunquid hic est Filius David? Pharisei autem audientes dixerunt: Hic non eiicit dæmones, nisi in Beelzebub principe dæmoniorum: “ qui verumtamen ab exordio prædicationis suæ, postquam Satanam sese tentantem divina virtute depulisset, eum toties (aliquando etiam legionem dæmonum) ex obsessis deiiciens adesse se ad Satanæ regnum destruendum tam luculenter, eiiciendo dæmones tam potenter et frequenter, demonstravit, ipsis Phariseis invicto hoc ob oculos posito argumento *b*): „Jesus autem sciens cogitationes eorum, dixit eis: Omne regnum divisum contra se, desolabitur: et omnis civitas, vel domus divisa contra se, non stabit. Et si Satanas Satanam eiicit, adversus se divisus est: quomodo ergo stabit regnum eius? Et si ego in Beelzebub eiicio dæmones, filii vestri, (qui eandem a me potestatem habent) in quo eiiciunt? Ideo ipsi iudices vestri erunt,“ fessuri aliquando super fedes duodecim iudicantes duodecim tribus Israel: *Si autem ego in Spiritu Dei eiicio dæmones, igitur pervenit in vos regnum Dei*: foras nimirum projecto principe huius mundi Satana. Quem vero cum bonis perinde ac malis spiritibus ex rerum natura

*a*) Marc. II. 20.

*b*) Matth. XII. 25.

prorsus tollunt hodierni materialistæ cum Sadducæis, a Pharisæorum sibi visi blasphemia in Spiritum sanctum immunes, qui dicebant Christum in principe dæmoniorum eiicere dæmonia: in materialistarum autem hodie tantopere multiplicatorum gratiam, ut in errore firmentur, nunc conquiescere velle videtur in obsessis corporibus Satan, alias per regna, et populos nationum furias exercens.

## CHRISTI MIRACULA.

XV. Jam supra ex Matthæo retulimus, quosdam de Scribis et Pharisæis signum a Christo videre voluisse. Juxta Lucam a) *tentantes, signum de cælo querebant ab eo*. Quod alia item occasione apud Matthæum b) eundem, et apud Marcum c) habetur: accessisse nempe ad eum Pharisæos et Sadducæos, et cœpisse conquirere cum eo, rogassèque illum, *ut signum de cælo ostenderet eis, tentantes eum*; ac si alia signa omnia meræ illusiones, collusionesque essent; quibus missionem suam tam luculenter demonstratum ibat; non femel ingratum ad tanta eis præstita beneficia hoc obiiciens Judæis: veluti cum lapides tollerent, ut eum lapidarent, quod unum se cum Patre professus esset; cum eum provocassent, ut palam eis diceret, si esset Christus d)? Respondit eis Jesus: *Loquor vobis, et non creditis: Opera quæ ego facio in nomine Patris mei,*

a) Luc. XI. 29.

b) Matth. XVI. 1.

c) Marc. VIII. 11.

d) Jo. X. 24.

*hæc testimonium perhibent de me. Et postea: Multa bona opera ostendi vobis ex Patre meo, propter quod eorum opus me lapidatis?* Est hæc divina Evangelii Christi œconomia Verbi incarnati Filii æterni Patris, quem Judæi Deum suum agnoscebant, Christus vero se eius Filium miraculis, operibus scilicet Patris sui veri Dei, demonstrabat, unum cum Patre: *Si non facio opera Patris mei, nolite credere mihi. Si autem facio: et si mihi non vultis credere, operibus credite, ut cognoscatis, et credatis, quia Pater in me est, et ego in Patre.* Etsi vero nihilominus cum vellent comprehendere; multi tamen, cum exisset e manibus eorum, vi argumenti percepta venerunt ad eum, et dicebant: *Quia Joannes quidem signum fecit nullum: Omnia autem, quæcunque dixit Joannes de hoc, vera erant. Et multi crediderunt in eum.* Erat S. Joannes propheta, qui Dei ipsius testimonio Deut. XVIII. 22. divinam sibi fidem conciliare debebat, vero eorum, quæ prædixit, eventu: Sic eorum veritatem, quæ de Christo Joannes prædixerat, fatentur, ut modo audivimus, ipsi Judæi; dum vicissim Joannes apud discipulos suos Christo fidem ex eiusdem miraculis conciliavit. Nempe a)

„Joannes cum audisset in vinculis opera Christi, mittens duos de discipulis suis, (ut eorum fidem firmaret, non suam), ait illi: Tu es, qui venturus es, an alium exspectamus? Et respondens Jesus ait illis: Euntes renuntiate Joanni, quæ vidistis, et audistis. Cæci vident, claudi ambulant, leprosi mundantur, furdi audiunt, mortui resur-

a) *Matth. XI. 2.*



gunt, pauperes evangelizantur: et beatus est, qui non fuerit scandalizatus in me.“ Offendebantur nimirum humili ac paupere Christi et discipulorum eius conditione, maiestatem regiam Messiae in folio David apud Hierosolymam in monte Sion desiderantes; cum econtra cernerent pauperes evangelizari, Christum nimirum ad prædicandum Evangelium concursantem turbas et abiectam plebem sequi, insuper et peccatores.

Statim postquam piscatores vocati, eum relictis retibus, secuti essent <sup>a)</sup>, *circuibat Jesus totam Galilaam, docens in synagogis eorum, et prædicans Evangelium regni non huius sæculi, non terreni perituri, sed cœlestis æterni, et sanans omnem languorem, et omnem infirmitatem in populo.* Et abiit opinio eius in totam Syriam, extra fines Judææ, quo aliquando per totum orbem prædicandum et disseminandum erat Evangelium hoc regni cœlestis, „et obtulerunt ei omnes male habentes, variis languoribus, et tormentis comprehensos, et qui dæmonia habebant, et lunaticos, et paralyticos, et curavit eos. Et secutæ sunt eum turbæ multæ de Galilæa, et Decapoli, et de Jerosolymis, et de Judæa, et de trans Jordanem.“ Cum idem Evangelista vespere quodam facto Christum omnes male habentes curasse narrasset: addit: *ut adimpleretur, quod dictum est per Isaiam prophetam dicentem: Ipse infirmitates nostras accepit, et agrotationes nostras portavit.* Factum hoc fuit in domo Petri, postquam focrum

<sup>a)</sup> Matth. IV. 23.

eius tangendo manum febris liberasset. Nec mysterio caret, quod mox antea promiserat se venturum, ut puerum Centurionis gentilis paralyticum curaret: *Ego veniam, et curabo eum.* Quasi vero œconomix Evangelii Christi ad solos Judæos missi haud ignarus Centurio respondit: *Domine non sum dignus, ut intres sub tectum meum, sed tantum dic verba, et sanabitur puer meus.* Dum nempe Christus apostolos ad prædicandum misit, præcepit eis a): *In viam gentium ne abieritis etc.* de se autem, *Non sum missus,* ait b), *nisi ad oves, quæ perierunt, domus Israel:* Ad apostolos locutus de muliere gentili, quæ petebat filiam a dæmone liberari, durius respondens, ait: *Non est bonum sumere panem filiorum, et mittere canibus.* Ut nempe fidem tentaret. „At illa dixit: *Etiam domine: nam et castellum edunt de micis, quæ cadunt de mensa dominorum suorum.* Tunc respondens Jesus ait illi: *O mulier, magna est fides tua: fiat tibi, sicut vis.* Et sanata est filia eius ex illa hora; „Sic de centurione sequentibus se dixit, miratus fidem illius „Amen dico vobis, non inveni tantam fidem in Israel: Dico autem vobis, quod multi ab Oriente et Occidente venient, et recumbent cum Abraham, et Isaac, et Jacob in regno cœlorum, filii autem regni eiicientur in tenebras exteriores, ibi erit fletus et stridor dentium. Et dixit Jesus centurioni: *Vade, et sicut credidisti, fiat tibi, et sanatus est puer in illa hora.*

a) *Matth. X. 5.*b) *Ib. XV. 24.*

Videmus hic tantum valuisse fidem etiam ethnicorum in Christum; e contra legimus modicam fidem in ipsis apostolis aliquando notasse Christum. Sic Matth. XVI. 7. de pane follicitis, miracula multiplicatorum panum in memoriam revocans: „Quid, ait, cogitatis intra vos modicæ fidei, quia panes non habetis? Nondum intelligitis, neque recordamini quinque panum in quinque millia hominum, et quot cophinos fumsistis? Neque septem panum in quatuor millia hominum, et quot sportas fumsistis?“ Pariter dum quondam cum discipulis erat in mari, motusque magnus factus esset a), „ita ut navicula operiretur fluctibus, ipse vero dormiebat. Et accesserunt ad eum discipuli eius, et fuscitaverunt eum dicentes: Domine salva nos, perimus. Et dixit eis Jesus: Quid timidi estis, modicæ fidei? Tunc surgens, imperavit ventis et mari, et facta est tranquillitas magna. Porro homines mirati sunt (mox videbimus in simili casu nautas Christum adorasse dicentes: *Vere Filius Dei es*) dicentes: Qualis est hic, quia venti et mare obediunt ei?“ Sic etiam dum imperasset Jesus dæmonio; „Obmutesce, et exi, subdit Evangelista b): Et factus est pavor in omnibus, et colloquebantur ad invicem, dicentes: Quod est hoc verbum, quia in potestate et virtute imperat immundis spiritibus, et exeunt? Et divulgabatur fama de illo in omnem locum regionis. Surgens autem Jesus de synagoga, introivit in domum Simonis. Socrus autem Simonis tenebatur magnis

a) Matth. VIII. 23.

b) Luc. IV. 35.

febribus. Et rogaverunt illum pro ea: et stans super illam imperavit febrī, et dimisit illam. “ Ubi S. Matth. XIV. 15. et XV. 32. narrat miraculum de fatiatis in deserto quinque panibus et duobus piscibus quinque millibus virorum, ut postea quatuor millibus septem panibus; hic Joannes dicit Christum tentasse Philippum, fidem nimirum illius exploraturus, interrogando a): *Unde ememus panes, ut manducent hi?* Christus autem Verbum Dei, per quod omnia conservantur, ut facta sunt, *Fecit*, ut S. Augustinus in hunc locum S. Joannis annotat, *quomodo Deus. Unde enim multiplicat de paucis granis segetes, inde in manibus suis multiplicavit quinque panes. Ipse enim sciebat quid esset factur.*

Conditio quasi sine qua non in miraculis Christi erat fides subiecti: qua fluctuante videre est ipsum Petrum apostolorum principem fluctuare cœpisse in mari: dum is cernens Christum ambulantes super mare iam plena fiducia accepta ab ipso facultate b) „descendens de navicula ambulabat super aquam, ut veniret ad Jesum. Videns vero ventum validum timuit: et cum cœpisset mergi, clamavit dicens: Domine, salvum me fac. Et continuo Jesus extendens manum, apprehendit eum, et ait illi: Modicæ fidei, quare dubitasti? Et cum ascendissent in naviculam, cessavit ventus. (navicula enim in medio maris iactabatur fluctibus, erat enim contrarius ventus). Qui autem in navicula erant, venerunt, et adoraverunt eum, dicentes:

a) Jo. 6. 5.

b) Matth. XIV. 26. seq.

Vere Filius Dei es.“ Quare dubitasti? ait, deficiente nimirum fide, de qua alibi Christus cum rogassent eum apostoli: *Adauge nobis fidem a)*, similitudinem accipiens a grano sinapis, quod est minimum ex seminibus, si, inquit, *habueritis fidem sicut granum sinapis, dicetis huic arbori moro: eradicare, et transplantare in mare, et obediet vobis.* Parallelus est locus Matth. XXI. 20. etc. cum mirarentur apostoli arborem, cui maledixerat Dominus, tam subito exaruisse: „Respondens autem Jesus, ait eis: Amen dico vobis, si habueritis fidem, et non hæsitaveritis, non solum de ficulnea facietis, sed et si monti huic dixeritis: Tolle, et iacta te in mare, fiet.“ Cum Christus in patria sua doceret sabbatob), „multi audientes admirabantur in doctrina eius, dicentes: Unde huic hæc omnia? Et quæ est sapientia, quæ data est illi; et virtutes tales, quæ per manus eius efficiuntur? Nonne hic est faber, filius Mariæ, frater Jacobi, et Joseph, et Judæ, et Simonis? Nonne et sorores eius hic nobiscum sunt? Et scandalizabantur in illo. Et dicebat illis Jesus: Quia non est propheta sine honore, nisi in patria sua, et in domo sua, et in cognatione sua. Et non poterat ibi virtutem ullam facere, nisi paucos infirmos impositis manibus curavit. Et mirabatur propter incredulitatem eorum.“ Ut vero hic Christus fatetur, non potuisse in Nazareth se virtutem ullam facere; ita homini illi, qui filium suum habentem spiritum mutum attulit, cum adhuc in fide vacillaret, dicens c): *Sed si quid potes, ad-*

a) *Luc. XVII. 6.*b) *Marc. VI. 2.*c) *Ib. IX. 21.*

*iuvā nos, misertus nostri, dicit: si potes credere, omnia possibilia sunt credenti. Et continuo exclamans pater pueri, cum lacrymis aiebat: Credo Domine: Adiuvā incredulitatem meam. Sic etiam duos cæcos interrogat. Creditis, quia hoc possum facere vobis? Dicunt ei: Utique Domine. Tunc tetigit oculos eorum dicens: Secundum fidem vestram fiat vobis a): statim vero erga leprosum illum, qui plenam contestatus fidem veniens adorabat eum dicens: Domine si vis, potes me mundare, extendens Jesus manum tetigit eum dicens: Volo: Mundare. Et confestim mundata est lepra eius b).*

Nihil adeo mirum est, quam fidem miraculorum Christi vacillare potuisse, quæ tantā, et tam frequentia erant, ac innumera, ubique locorum; paucis quidem illis missionis suæ annis patrata; discurrente illo per regionem, urbes, oppida et vicos cum apostolis ac concurrentibus undique populis? S. Marcus c) postquam narrasset miraculum quinque millium virorum fatiatorum quinque panibus et duobus piscibus in deserto, Jesus autem transfretantibus discipulis in Genesaret in mari ambulans ad eos laborantes per noctem in remigando ob ventum validum venisset, mox cessante vento, subdit d): „Et percurrentes universam regionem illam cœperunt in grabatis eos, qui se male habebant, circumferre, ubi audiebant eum esse. Et quocunque introibat in vicos, aut civitates, in platéis ponebant infirmos, et deprecabantur eum;

a) *Matth. IX. 28.*

b) *Ib. VIII. 2. etc.*

c) *Marc.*

*VI. 35.*

d) *Ib. 55.*

ut vel fimbriam vestimenti eius tangerent: et quotquot tangebant eum, salvi fiebant.“ Plena itaque apparet ubique fides, quam vero perfricta fronte detrectant increduli nostri inaudita pervicacia, ut miracula in rerum natura fieri posse negent. Apud Matthæum a), Marcum item et Lucam princeps accessisse memoratur adorans eum, et dicens b): „Domine, filia mea modo defuncta est; sed veni, impone manum tuam super eam, et vivet.“ Cumque surgens Jesus sequeretur eum et discipuli eius; eadem perfecta fide „ecce mulier, quæ sanguinis fluxum patiebatur duodecim annis, accessit retro, et tetigit fimbriam vestimenti eius. Dicebat enim intra se: si tetigero tantum vestimentum eius, salva ero. At Jesus conversus, et videns eam dixit: Confide filia, fides tua te salvam fecit. Et salva facta est mulier ex illa hora.“ Addit Marcus: „Et confestim siccatus est fons sanguinis eius: et sensit corpore, quia sanata esset a plaga. Et statim Jesus in semetipso cognoscens virtutem, quæ exierat de illo, conversus ad turbam aiebat: quis me tetigit? etc.“ De filia autem illa principis defuncta narrat Matthæus l. c. cum eiecta esset turba c), et tibicines (qui in eo etiam miraculi veritatem firmabant, quod deriderent Christum dicentem: *Non est mortua puella, sed dormit*) Jesum intrasse, et tenuisse manum eius, et surrexisse puellam. *Et exiit fama hæc in universam terram illam.* Addit Marcus V. 41. Christum tenentem manum puellæ dixisse: *Talitha cumi: quod est inter-*

a) Vid. Matth. XIV. 35.

b) Ib. IX. 18.

c) Ib. 25.

*pretatum: Puella surge. Et confestim surrexit puella, et ambulabat.* De filio viduæ in civitate Naim, qui iam a) *defunctus efferebatur filius unicus matris suæ*, narrat Evangelista, cum vidisset Dominus, misericordia motum super eam dixisse illi: „Noli flere. Et accessit et tetigit loculum (hi autem, qui portabant, steterunt) et ait: Adolescens tibi dico: surge. Et resedit, qui erat mortuus, et cœpit loqui. Et dedit illum matri suæ. Accepit autem omnes timor, et magnificabant Deum, dicentes: Quia propheta magnus surrexit in nobis: et quia Deus visitavit plebem suam. Et exiit hic sermo in universam Judæam de eò, et in omnem circa regionem.“ Lazarum quatrIduo iam sepultum resuscitaturus voce magna Jesus clamavit b): *Lazare veni foras. Et statim prodiit, qui fuerat mortuus.* Quid vero ad hoc omnium maximum miraculum haud procul a civitate Jerosolyma factum in Bethania! Unde etiam eius fama multos e civitate attraxerat; Pontifices autem et Phariseos movit ad novum de Christo, imo etiam Lazaro occidendo consilium. Non diffessi eius etiam alia miracula collato concilio dicebant: *Quid facimus, quia hic homo multa signa facit?* Alias porro, etiam dum nihil non egerunt, ut criminandi locum arriperent, per ipsa quoque fuerunt confusi miracula. Sic cum Christo in civitate sua paralyticum offerrent iacentem in lecto, et ipse videns fidem illorum diceret paralytico c): *Confide fili, remittuntur*

a) *Luc. VII. 12.*b) *Jo. XI.*c) *Matth. IX. 2.*



tibi peccata tua: quidam de Scribis dixerunt intra se: *Hic blasphemat.* Quia nimirum sciebant solius Dei esse, dimittere peccata. Unde apud Marcum et Lucam habetur: *Quis est hic, qui loquitur blasphemias? Quis potest dimittere peccata, nisi solus Deus?* Accessit hic novum divinitatis argumentum, quod apud omnes tres Evangelistas habetur, hæc eos cogitasse intra se. „Et cum vidisset Jesus cogitationes eorum, dixit: Ut quid cogitatis mala in cordibus vestris? Quid est facilius dicere: Dimittuntur tibi peccata tua, an dicere: Surge et ambula? Ut autem sciatis, quia filius hominis habet potestatem, dimittendi peccata, tunc ait paralytico: Surge tolle lectum tuum, et vade in domum tuam. Et surrexit abiit in domum suam. Videntes autem turbæ timuerunt, et glorificaverunt Deum, qui dedit potestatem talem hominibus.

Quid turbæ hic alibique ad tanta miracula dixerint aut egerint, narrant Evangelistæ, qui rem, ac si proletariæ essent, mira simplicitate et candore referunt, non extollendo aut ornando; dum invidi vero quidvis excogitant, ut carpendi ansam arriperent religionis etiam prætextu, hoc ipso miraculorum veritatem adstruunt, atque agnoscunt. Tale est illud, quod sabbato curaret. Quo ipso vero se veteri lege, Moyseque superiore ac Dominum sabbati demonstrabat, ut Pharisæis, discipulos carpentibus, quod sabbato spicas velarent, respondit a): *Dominus enim est Filius homi-*

a) *Matth. XII. 8.*

*nis etiam sabbati.* . Sic cum aliquando introisset Synagogam, essetque ibi homo habens manum aridam *a)*, „observabant eum, si sabbatis curaret, ut accusarent illum. Et ait homini habenti manum aridam: Surge in medium. Et dicit eis: Licet sabbatis bene facere; an male? animam salvam facere, an perdere? At illi tacebant. Et circumspiciens eos cum ira, contristatus super cæcitate cordis eorum, dicit homini: Extende manum tuam. Et extendit, et restituta est manus illi.“ Sic ex ipsa eorum pertinacia miraculorum fidem firmat ac veritatem, omnia incassum ad fovendam potius eorum pervicaciam, nostram autem roborandam fidem. Cum languido illi triginta octo annorum ad probaticam piscinam decumbenti diceret: *Surge, tolle grabatum tuum, et ambula: et statim sanus factus est homo ille: et sustulit grabatum suum, et ambulabat.* *Erat autem sabbatum in die illo:* Subdit Evangelista: *propterea persequiebantur Judæi Jesum, quia hæc faciebat in sabbato.* Et cum cæco nato visum restituisset, dicebant de Phariseis quidam *b)*: *Non est hic homo a Deo, qui sabbatum non custodit. Alii autem dicebant: quomodo potest homo peccator hæc signa facere? et schisma erat inter eos.* Sollicite percontabantur ab eo, qui cæcus fuerat, quomodo aperti sint oculi eius, responditque; *ille homo, qui dicitur Jesus, lutum fecit: et unxit oculos meos, et dixit mihi: Vade ad natatoria Siloe, et lava. Et abii, lavi, et video.* Quasi vero aliquid interesset, sabbato lavare:

*a) Marc. III. 1.    b) Jo. IX. 16.*

Cæcum illum in Bethsaida lentius curasse legitur Christus, qui apprehensa manu cæci a), „eduxit eum extra vicum: et exspuens in oculos eius impositis manibus suis interrogavit eum, si quid videret. Et aspiciens, ait: video homines velut arbores ambulantes. Deinde iterum imposuit manus super oculos eius, et cœpit videre. Et restitutus est, ita ut clare videret omnia: et misit illum in domum suam, dicens: Vade in domum tuam: et si in vicum introieris, nemini dixeris.“ Sic etiam cum furdum et mutum adduxissent, ut ei manum imponeret, et Jesus illum haud absimiliter remotum spūto et tactu fanasset, pariter præcepit illis, ne cui dicerent b): *quanto autem eis præcipiebat, tanto magis plus prædicabant. Et eo amplius admirabantur, dicentes: Bene omnia fecit: et surdos fecit audire, et mutos loqui.* Minus nobis hic ratio pervia est, nec nisi mysticam reddere cum sanctis Patribus valemus, cur operosius cæco huic visum, ac furdo mutoque auditum, et linguæ usum restituere voluerit? quam in Lazaro iam ante quatuor dies mortuo, et sepulto fati claram intuemur, eoquod in Bethaniam advenisset Christus, paucis inde post diebus ingressurus vicinam urbem Jerosolymam, ut consummaret opus redemptionis nostræ, adessentque frequentes ex urbe Judæi consolaturi Lazari forores, Mariam secuti obviam euntem Jesu c): „Jesus ut vidit eam plorantem, et Judæos, qui venerant cum ea plorantes, infremuit spiritu, et turbavit seipsum. Et dixit: Ubi posuistis

a) *Marc. VIII. 23.* b) *Marc. VII. 36. etc.* c) *Jø. XI. 33.*

eum? Dicunt ei: Domine veni, et vide. Et lacrymatus est Jesus. Dixerunt ergo Judæi: Ecce quomodo amabat eum. Quidam autem ex ipsis dixerunt: Non poterat hic, qui aperuit oculos cæci nati, facere, ut hic non moreretur? Jesus ergo rursum fremens in semetipso, venit ad monumentum: erat autem spelunca: et lapis superpositus erat ei. Ait Jesus: Tollite lapidem. Dicit ei Martha, soror eius, qui mortuus fuerat: Domine, iam fœtet, quatruiduanus est enim. Dicit ei Jesus: Nonne dixi tibi, quoniam si credideris, videbis gloriam Dei? Tulerunt ergo lapidem: Jesus autem elevatis fursum oculis, dixit: Pater, gratias ago tibi, quoniam audisti me: Ego autem sciebam, quia semper me audis, sed propter populum, qui circumstat, dixi: ut credant, quia tu me misisti.“ En causam, cur benignissimus Jesus tanto hic apparatu uti voluit: qui cum mortuæ, quam memoravimus, principis filiæ (reiectionis tibicinibus a), et turba tumultuante, derisui etiam se exponens, cum diceret, puellam non esse mortuam, sed dormire) manum apprehenderet, statim illa surrexit; quemadmodum etiam viduæ filium unicum a mortuis fuscitavit, cum ad sepulchrum deportaretur non nisi loculum tangendo, atque adolescenti dicendo, ut surgeret: sic imperavit ventis, et feбри, uti paralytico, ut tolleret grabatum: utrumque sanavit, solo voluntatis nutu absentibus quoque fanitatem restituit, præsentibus vero manus imponendo, tangendo, solo etiam tactu fimbriæ vesti-

a) *Matth. IX. 23. etc.*

menti sui; atque mira quævis patravit idem incarnatum, quod in principio creavit cælum et terram, Verbum divinum sola voce: *Fiat*, id quod fynonymum est cum illo ad leprosum dicto verbo: *Volo. Mundare*. Ex plurimis miraculis ea potissimum selegimus, quæ fama publica undique fuerunt pervagata, etiam id aliquando, ne fieret, prohibente Christo. Nunquam aut Christum suæ aut eius discipulos legimus magistri sui famæ facta extollendo velificasse, Evangelistis res, quas idcirco propriis eorum verbis referendas duximus, nude et simpliciter narrantibus, a prioribus tribus tunc consignatas post mortem Christi literis, ut a coævis potuissent falsi convinci, si falsa narrassent: ad unum dæmoniacum Gerasenum cum Christum sequi vellet, esseque cum eo, ipse, dum non admisit, *Vade, inquit a), in domum tuam ad tuos, et annuntia illis, quanta tibi Dominus fecerit, et misertus sit tui*.

#### AB ILLIS ASSERTA, QUIBUS EANDEM DEDIT POTESTATEM.

XVI. **N**eminem autem magis, quam seipsos fellissent, si falsa protulissent sive sermone apostoli, sive literis evangelistæ: ex quibus duo erant apostoli; alii duo ea scripserunt, quæ acceperunt ab iis, qui præsentibus adfuerunt, uti de se S. Lucas testatur, sic exorsus suum Evangelium: „Quoniam quidem multi conati sunt ordinare narratio-

a) *Marc. V.*

nem, quæ in nobis completæ sunt, rerum: sicut tradiderunt nobis, qui ab initio ipsi viderunt, et ministri fuerunt sermonis; visum est et mihi, assécuto omnia a principio diligenter, ex ordine tibi scribere, optime Theophile, ut cognoscas eorum verborum, de quibus eruditus es, veritatem. "Fuit is S. Pauli discipulus, qui in epistola ad Hebræos a) non solum ad eos provocat, qui præsentés ab initio Christo adfuerunt, verum etiam ad miracula, et Spiritus sancti dona, quibus instructi fuerunt: „Quomodo, ait, nos effugiemus, si tantam neglexerimus salutem? quæ cum initium accepisset enarrari per Dominum, ab eis, qui audierunt, in nos confirmata est, contestante Deo signis, et portentis, et variis virtutibus, et Spiritus sancti distributionibus secundum suam voluntatem." Præsentés Christo, et cum eo conversatos quod attinet, uti in tanta rerum copia, ferie et apparatu falli non potuerunt, multo minus alios fallere voluisse censendi sunt, siquidem Christo tam contumeliosam mortem in cruce perpesso, spe, qua illecti erant, fuissent frustrati, ac promissionibus ex illius resurrectione, quæ est caput omnium miraculorum, ac religionis christianæ colophon; ex qua omnia dependebant, et consequi necesse erant. Unde idem apostolus, *Quodsi*, ait b), *Christus non resurrexit, vana est fides vestra, adhuc enim estis in peccatis vestris. Ergo et qui dormierunt in Christo, perierunt. Si in hac vita tantum in Christo sperantes sumus, miserabiles sumus omnibus hominibus,*

a) Hebr. II. 3.

b) I. Cor. XV. 17.

Dum adhuc cum suis esset Christus a), „convocatis duodecim discipulis suis, dedit illis potestatem spirituum immundorum, ut eiicerent eos, et curarent omnem languorem, et omnem infirmitatem præcipiens illis: Euntes autem prædicate dicentes: Quia appropinquavit regnum cœlorum. Infirmos curate, mortuos suscite, leprosos mundate, dæmones eiicite.“ Etsi vero perfectam regni cœlorum seu Evangelii regni scientiam non habuerint, non potuerunt tamen tunc missi falli in iis, quæ ipsis tunc datæ sunt facultates, an eis fuus responderet effectus. Et revera postquam Marcus b) eandem apostolorum missionem memorasset, subdit, exeuntes eos prædicasse, ut pœnitentiam agerent, et multa dæmonia eiecisse, et unxisse oleo multos ægros, et fanasse. Sic Lucas cum narrasset, designasse Dominum alios septuaginta duos, et misisse ante faciem suam in omnem civitatem, et locum, quo erat ipse venturus, memorat paulo post, reversos esse septuaginta duos cum gaudio dicentes c): „Domine etiam dæmonia subiiciuntur nobis in nomine tuo. Et ait illis: Videbam Satanam sicut fulgur de cœlo cadentem. Ecce dedi vobis potestatem calcandi super serpentes, et scorpiones et super omnem virtutem inimici, et nihil vobis nocebit.“ Cum apostoli viderent quemdam in nomine Christi, ut S. Joannes referebat, eiicientem dæmonia, prohibuerunt eum d): *Jesus autem ait: Nolite prohibere eum: nemo est enim, qui*

a) *Matth. X. 1.*b) *Marc. VI. 12.*c) *Luc. X. 17.*d) *Marc. IX. 37.*

*faciat virtutem in nomine meo, et possit cito male loqui de me.* Legitur apud Matthæum a), accessisse Christum quemdam afferentem filium lunaticum, ut vocabant, dæmoniacum, quem prius abtulerat eius discipulis, et non potuerunt curare eum; hunc cum increpasset Jesus, „exiit ab eo dæmonium, et curatus est puer ex illa hora. Tunc accesserunt discipuli ad Jesum secreto, et dixerunt: quare nos non potuimus eiicere illam? dixit illis Jesus: propter incredulitatem vestram. Amen quippe dico vobis, si habueritis fidem sicut granum sinapis, dicetis monti huic, transi hinc illuc, et transibit, et nihil impossibile erit vobis.“ Montem Christus non legitur transtulisse, promisit tamen suis, eos maiora horum, quæ ipse fecerat, facturos miracula. Confirmavit autem hanc potestatem post resurrectionem suam; unde iam hæsitare non poterant, cum in Christo maximum omnium miraculum impletum conspicerent. Cum eos in universum mitteret orbem, prædicare Evangelium omni creaturæ, „Signa autem eos, aiebat b), qui crediderint, hæc sequentur: in nomine meo dæmonia eiicient: linguis loquentur novis: serpentes tollent: et si mortiferum quid biberint, non eis nocebit: super ægros manus imponent, et bene habebunt.“ Ubi illud etiam observandum, dicere Christum, signa hæc eos secutura, qui crediderint, non apostolos tantum, per quorum credituri erant alii prædicationem, quibus iam adhuc vivus hanc potestatem dederat, quasi delusi fuissent,

a) *Matth. XVII. 14.*

b) *Marc. XVI. 17.*



nec ipsi se continuis vitæ et mortis periculis exposuissent omnibus et ab omnibus destituti percurrentes orbem, nec eundem delusum a se credulum habuissent orbem; ut christianus fieret. Miracula discipulorum Christi, miraculis olim a Christo patratis fidem adstruebant, ac ipsa miracula sibi, dum illi, circa quos facta sunt, testes ævum tulerunt, distinctis per hoc veris a fictitiis miraculis, ut de miraculis Christi Quadratus in fragmento apologiæ ad Hadrianum Imp. apud Eusebium loquitur, miracula salvatoris nostri perdurasse, cum vera essent αἱ παρῆν, ἀληθῆ γὰρ ἦν.

## EVANGELICA VITÆ DISCIPULORUM CHRISTI OECONOMIA.

XVII. Consideremus vero securitatem illam, quam præstat Christus discipulis suis, quos dum miraptrandi his facultatibus, potestateque in dæmones instructos ad prædicandum mittit; undique elucescit divina Evangelii Christi etiam in suis apostolis œconomia. Nolite, ait ad eos a), possidere aurum, neque argentum, neque pecuniam in zonis vestris: non peram in via, neque duas tunicas; neque calceamenta, neque virgam: dignus est enim operarius cibo suo. Quæ pensatis temporum circumstantiis non minus miraculi habent, quam data illa tunc potestas patrandi miracula. Quid enim? Ecce ego, inquit b), mitto vos, sicut oves in medio luporum. Estote ergo pruden-

a) Matth. X. 9.

b) Ib. 16.

*tes sicut serpentes, et simplices sicut columbæ. Cui vero bono serpentina hæc prudentia et columbina simplicitas? ut nempe caverent sibi ab hominibus. Tradent enim vos in conciliis, et in synagogis suis flagellabunt vos: et ad præsides et ad reges ducemini propter me, in testimonium illis, et gentibus a). Qui hæc aliaque, quæ apud Evangelistam sequuntur, expertus cum primis fuerat D. Paulus apostolus, an non etiam famem et sitim, nuditatem ac frigus etc. est expertus? Sed propterea haud minus securus erat, quam cæteri apostoli, et discipuli Domini, ad quos dicebat Christus b): Quando misi vos sine saculo et pera, et calceamentis, nunquid aliquid defuit vobis? At illi dixerunt: Nihil. Quosve mira quadam et incomparabili rhetorica omni cura liberat: „Ne, ait c), solliciti sitis animæ vestræ, quid manducetis, neque corpori vestro, quid induamini. Nonne anima plus est, quam esca: et corpus plus, quam vestimentum? Respicite volatilia cœli, quoniam non ferunt, neque metunt, neque congregant in horrea: et Pater vester cœlestis pascit illa. Nonne vos magis pluris estis illis?“ Eundem in modum de statura hominis, de fœno agri inductione facta, tandem concludit argumentum d): „Quærite ergo primum regnum Dei et iustitiam eius: et hæc omnia adiicientur vobis. Nolite ergo solliciti esse in crastinum. Crastinus enim dies sollicitus erit sibi ipsi. Sufficit diei malitia sua.“*

a) *Matth. X. 17.*  
*VI. 25.*

b) *Luc. XXII. 35,*  
*d) Ib. 33.*

c) *Matth.*

Hanc quidem, ut iam ex D. Paulo, memoremus, experti sunt, et alii discipuli diei malitiam, ut nihilominus essent beati, et de divina providentia securi, ad quos Christus in eodem sermone in monte apud Lucam a) elevatis oculis (cum apud Matthæum singillatim loquatur: *Beati pauperes spiritu: quoniam ipsorum est regnum cælorum etc.* dicebat b): „Beati pauperes: quia vestrum est regnum Dei. Beati, qui nunc esuritis: quia saturabimini. Beati, qui nunc fletis: quia ridebitis. Beati eritis cum vos oderint homines, et cum separaverint vos, et exprobraverint, et eiecerint nomen vestrum tanquam malum propter filium hominis.“ Quæ sunt ipsa mala eisdem, cum ad prædicandum mitterentur, a proximis etiam necessariis perferenda prædicta c): *Tradet autem frater fratrem in mortem, et pater filium: et insurgent filii in parentes, et morte eos afficient: et eritis odio omnibus propter nomen meum etc.* suo autem exemplo eos animans, *Non est, inquit, discipulus super magistrum: nec servus super dominum suum. Sufficit discipulo, ut sit sicut magister eius; et servo, sicut dominus eius. Si patrem familias Beelzebub vocaverunt, quanto magis domesticos eius etc.* Quæ vero eos fata suo etiam exemplo manerent, porro aperiens, *Nolite, ait, timere eos, qui occidunt corpus, animam autem non possunt occidere; sed potius timete eum, qui potest et animam, et corpus perdere in gehennam. Nonne duo passeres asse. veneunt etc.* eadem comparatione, qua supra usus volatiliū cœli, ex quibus ingratus,

a) Luc. VI. 20.

b) Matth. V. 1.

c) Ib. X. 21.

usque genus ac contemptibilis fere sunt passeres; et unus, inquit, ex illis non cadet super terram: autem capilli omnes numerati sunt. Nolite ergo timere: multis passeribus meliores estis vos. A minimis iterum ad maiora, fermone assurgens, quæ in hac vita sunt chariora, maximoque in eo arctissimeque coniuncta: Nolite, inquit a), timere, quia pacem venerim mittere in terram: non pacem mittere, sed gladium. Veni enim separare pacem adversus patrem suum, et filiam adversus matrem suam, et nurum adversus socrum suam. Et inimicis hominis domestici eius. Neque vero sunt hæc verborum, nec tantum pro illis, quibus vixerant, sed actionum primævæ Ecclesiæ temporibus valde verum etiam deinceps atque hactenus in officio collisione tenenda: in qua utique quibus Christi discipulis ea, quæ ad Deum pertinent, præferenda sunt omnibus sunt in Christo præferenda, et tenenda pro Christo, prout sequitur b): Qui patrem aut matrem plus quam me, non est meus. Et qui amat filium aut filiam super me, non est meus dignus. Et qui non accipit crucem suam, et non sequitur me, non est meus dignus. Quis est nostrum, qui sequeatur me etiam aliorum Christi discipulorum ac apostolorum, cui gravior crux imposita fuerit, quam Christo ipsi, quisquis pro illo, sicut ille pro nobis, crucem suam dederit; ille pro nobis inimicis, nos sequatur pro illo, cum illo resurrecturi in vitam æternam c): Qui enim suam animam suam, perdet illam: et qui perdiderit suam animam suam propter me, inveniet eam.

Matth. X. 34.

b) Ib. 37.

c) Ib. 39.

Paradoxa sunt hæc secundum carnem sapientibus, et sæculi huius prudentia turgidis. Quare Christus ad cœlestem suum Patrem elevans vocem, „Confiteor tibi Pater, exclamat, Domine cœli et terræ, quia abscondisti hæc a sapientibus et prudentibus, et revelasti ea parvulis. Ita Pater, quoniam sic fuit placitum ante te. Omnia mihi tradita sunt a Patre meo. Et nemo novit Filium, nisi Pater: neque Patrem quis novit, nisi Filius, et cui voluerit Filius revelare.“ Quibus nimirum Deus ipse est merces illa magna nimis, quam veris filiis Abrahæ, qui non sunt secundum carnem *a)*, iuxta apostolum, promisit: qua pro mercede in vita æterna nihil potest esse durum, et grave in hac vita, quod gratia Evangelii Christi fit leve. Pergit enim: „Venite ad me omnes, qui laboratis, et onerati estis, et ego reficiam vos. Tollite iugum meum super vos, et discite a me, quia mitis sum et humilis corde: et invenietis requiem animabus vestris. Jugum enim meum suave est, et onus meum leve.“ Non reticuit, sed suis discipulis sæpe prædixit Christus, quæ ipsum manerent in hac vita perferenda usque ad mortem, mortem autem crucis *b)*: „Quia oporteret eum ire Jerosolymam, et multa pati a senioribus, et scribis, et principibus sacerdotum, et occidi, et tertia die resurgere.“ Ut nimirum suo exemplo, ac spe resurrectionis eos ad imitandum animaret. Dumque *c)* „assumens eum Petrus cœpit increpare illum dicens: Absit a te Domine: non erit

*a)* Rom. IX. 7.    *b)* Matth. XVI. 21.    *c)* Ib. 22. etc

tibi hoc. Qui conversus, dixit Petro: Vade post me Satana, scandalum es mihi: quia non sapis ea, quæ Dei sunt, sed ea, quæ hominum. Tunc Jesus dixit discipulis suis: si quis vult post me venire, abneget semetipsum, et tollat crucem suam, et sequatur me. Qui enim voluerit animam suam salvam facere, perdet eam: qui autem perdiderit animam suam propter me, inveniet eam. Quid autem prodest homini, si mundum universum lucretur, animæ vero suæ detrimentum patiatur? Aut quam dabit homo commutationem pro anima sua? Filius enim hominis venturus est in gloria Patris sui cum angelis suis, et tunc reddet unicuique secundum opera eius.“ Hæc Christus sex diebus antequam a) „assumpsit Petrum, Jacobum et Joannem fratrem eius, et duxit illos in montem excelsum seorsum, et transfiguratus est ante eos. Et resplenduit facies eius sicut sol: vestimenta autem eius facta sunt alba sicut nix. Et ecce apparuerunt illis Moyses, et Elias loquentes cum Jesu.“ Petrus quidem volebat *nesciens*, „quid diceret“, ibi tabernacula facere; quem vero maxime attinebant, quæ prius Christus monuerat de cruce post se tollenda, utpote qui eadem, qua ille, morte esset Deum clarificaturus.

a) *Matth. XVII.*

## APOSTOLICA AD CONSTITUENDAM ECCLESIAM MISSIO.

**XVIII.** **P**rædixerat hoc Petro Christus post resurrectionem suam *a)*, cum eidem oves et agnos pascendos commisisset; antea autem, dum ipsum Filium Dei confessus est, beatum edixerat *b)*: „Quia caro et sanguis non revelavit tibi, sed Pater meus, qui in cœlis est. Et ego dico tibi, quia tu es Petrus, et super hanc petram ædificabo ecclesiam meam, et portæ inferi non prævalebunt adversus eam. Et tibi dabo claves regni cœlorum. Et quodcunque ligaveris super terram, erit ligatum et in cœlis: et quodcunque solveris super terram, erit solutum et in cœlis.

Quam hic cum aliis prærogativis dedit Petro ligandi et solvendi potestatem singulariter, eandem etiam cæteris apostolis dedit *c)*, postquam paulo post Ecclesiæ suæ tribunal constituisset, professus, quod qui Ecclesiam non audierit, sit habendus sicut ethnicus et publicanus, *Amen dico vobis*, immediate addit, *quæcunque alligaveritis super terram, erunt ligata et in cælo: et quæcunque solveritis super terram, erunt soluta et in cælo*. Contulit illis Christus eandem remittendi peccata potestatem pretium redemptionis nostræ, quam cum, ut supra vidimus, ipse exerceret, blasphemasse Pharisæis visus est; eam autem sibi legitimam esse, miraculo demonstravit, perinde ac apostoli, accepta quoque utraque

*a)* Jo. XXI. 15.    *b)* Matth. XVI. 16.    *c)* Ib. XVIII. 17.

potestate et miraculorum, et remittendorum peccatorum. Nempe ut eis post resurrectionem suam dixerat a): *Pax vobis. Sicut misit me Pater, et ego mitto vos. Hac cum dixisset, insufflavit: et dixit eis: Accipite Spiritum sanctum: quorum remiseritis peccata, remittuntur eis; et quorum retinueritis, retenta sunt.* Jam præcursor Domini Joannes Baptista prædica-  
bat baptismum penitentiae, et post eum Christus b) *Evangelium regni Dei, dicens: Quoniam impletum est tempus, et appropinquavit regnum Dei: penitemini, et credite Evangelio, Evangelio, inquam, regni, ad-* quod conditi excideramus per peccatum, restituti per Christum in adoptionem filiorum Dei, filii regni, hæredes quidem Dei, cohæredes autem Christi, hominis illius nobilis in parabola, qui ad venerat e sinu Patris c) *accipere sibi regnum et re-* verti: quo iam accinctum, cum post resurrectionem videntes adorassent discipuli d), „accedens Jesus locutus est eis dicens: Data est mihi omnis potestas in cœlo et in terra. Euntes ergo docete omnes gentes, baptizantes eos in nomine Patris, et Filii, et Spiritus sancti. Docentes eos servare omnia, quæcunque mandavi vobis. Et ecce ego vobiscum sum omnibus diebus, usque ad consummationem sæculi.“ Necesse est igitur, ut perennent usque ad consummationem sæculi in Ecclesia, quæcunque a Christo apostolis datæ sunt prærogativæ, atque potestas ad constituendam Eccle-

a) Jo. XX. 21.      b) Marc. I. 14.      c) Luc. XIX. 12.

d) Matth. XXVIII. 17.



siam militantem regnum Christi in terris, eamque tutam præstandam contra visibiles et invisibiles hostes, dæmones, inquam, contra quos semper in Ecclesia exercita est potestas, nec unquam vena miraculorum exaruit iuxta promissionem Christi iam ex Marc. XVI. 17. notatam: „Signa autem eos, qui crediderint, hæc sequentur: In nomine meo dæmonia eiicient: linguis loquentur novis: serpentes tollent: et si mortiferum quid biberint, non eis nocebit: super ægros manus imponent, et bene habebunt. Et Dominus quidem Jesus postquam locutus est eis, assumptus est in cælum, et sedet a dextris Dei. Illi autem perfecti prædicaverunt ubique, Domino cooperante, et sermonem confirmante sequentibus signis.“ O divinam Evangelii Christi in vicaria quoque apostolorum potestate œconomiam!

---

## SERMO CHRISTI IN MONTE LEX EVANGELICA.

XIX. **C**hristus in sermone suo in monte Matth. V. VI. et VII. (velut Moyses in monte Sinai legem a Deo accepit) ipse nobis legem evangelicam promulgare voluit. Sed quam hic pleraque paradoxa sunt hominibus (qui quidem omnes beati esse desiderant) dum mox initio non solum beati dicuntur *pauperes, qui lugent, flet, qui esuriunt et sitiunt etc.* Verum etiam apud Lucam VI. 24. *Va dicitur divitibus, qui saturati estis, qui ridetis nunc:*

*cum benedixerint vobis homines.* Quod vero ad discipulos Christus in cælum elevatis oculis *beati pauperes, qui nunc esuritis, fletis etc.* dicit, ad hanc pertinet miseram vitam, ut gauderent in illa die, et exultarent æternum beati in cœlis. Nec mitibus, nisi in hac spe terra possidenda in Ecclesia militante regno Christi in terris promittitur, sicuti lugentibus consolatio, esurientibus saturatio, misericordibus misericordia, mundis corde Dei visio, pacificis, *quoniam Filii Dei vocabuntur.* Nec est ulla octo harum beatitudinum, quæ non eo sit referenda, ut per adoptionem filiorum Dei hæredes eius in vita æterna constituamur, in prima, cui convenit ultima quoad promissum cœlorum regnum: in secunda regnum Christi in terris: in tertia, vera et perfecta consolatio: in quarta, omnimoda desideriorum nostrorum repletio: in quinta, misericordia, quæ aufert omnia mala, et confert omnia bona: in sexta, possessio Dei summi boni: in septima, fors filiorum Dei: in octava, possessio, ut diximus, regni cœlorum. Sunt vero octo hæ beatitudines summa totius doctrinæ christianæ, recapitulanturque toto hoc sermone in monte.

Est hæc divina Evangelii Christi œconomia, cuius præcones apostoli futuri erant a), quos vocat sal terræ, mundi nimirum huius immundi putridi et insipidi; ut tamen sibi ipsis caveant, ne evanescat, seu infatuetur sal. Perinde etiam lucem

a) *Matth. V. 13.*

mundi vocat, et, *sic luceat*, ait, *lux vestra coram hominibus, ut videant opera vestra bona, non opera legis, quam aboliturus esset. Sed quid? Nolite putare, quia veni solvere legem, sed adimplere; nempe quod ea, quæ in veteri testamento tantum in figura contingebant ac typo, in Christo erant adimplenda; ea vero quæ legem moralem attinebant, ad maiorem perfectionem deducenda, et quæ corrupta atque detorta, restauranda; unde ait a): Dico enim vobis, quia nisi abundaverit iustitia vestra plus quam Scribarum et Phariseorum, non intrabitis in regnum cælorum. Tunc mox incipit collatione præceptorum veteris legis divinum illud: Ego autem dico vobis, insonare, datque Christus leges proprio suo nomine, ac divina Verbi incarnati auctoritate, quod Moyses et prophetæ faciebant nomine ac præcepto Dei dicendo: *Hæc dicit Dominus. Igitur, audistis, infit b), quia dictum est antiquis: Non occides: qui autem occiderit, reus erit iudicio. Ego autem dico vobis, quia omnis, qui irascitur fratri suo, reus erit iudicio etc.* Quid vero gravius ad inculcandum hoc veniæ mutux præceptum dici potuit, quam dum præcepit relinquere (quod præcipuum est nostrum erga Deum officium) munus ante altare, et prius reconciliari fratri: consentientemque esse adversario cito, uti ait, *dum adhuc in via es*, quandoquidem in oratione dominica benignissimum Numen hanc nobis debitorum compensationem clementissime indulsit, dum orare nos docet c): „Dimitte nobis debita nostra, sicut et nos*

a) *Matth. V. 20.*b) *Ib. 21.*c) *Ib. VI. 12. etc.*

dimittimus debitoribus nostris etc. Si enim dimiseritis hominibus peccata eorum: dimittet et vobis Pater vester cœlestis delicta vestra. Si autem non dimiseritis hominibus, nec Pater vester dimittet vobis peccata vestra.“ Hoc est, quod cavet, dum dixerat a): *ne forte tradat te adversarius iudici, et iudex tradat te ministro, et in carcerem mittaris. Amen dico tibi, non exies inde, donec reddas novissimum quadrantem*; in altera nimirum vita districto iudici trademur ad supplicium, reddendumque omne debitum cessante illa compensatione, quæ locum nunc habet, dum in via sumus. Id ipsum nos edocet parabola de fervo debitore b), qui cum ei dominus suus dimisisset debitum decem millium talentorum, ipse autem conservo suo nequidem longe minoris debiti remissionem, aut faltem solvendi dilationem concedere vellet, traditus est ab irato domino suo tortoribus, quoadusque redderet universum debitum. Ubi addit Christus c): *Sic et Pater meus cœlestis faciet vobis, si non remiseritis, unusquisque fratri suo de cordibus vestris.*

Pergit vero supra Christus d): *Audistis, quia dictum est antiquis: Non mœchaberis. Ego autem dico vobis: quia omnis, qui viderit mulierem ad concupiscendam eam, iam mœchatus est eam in corde suo.* Κίναιδος illos ex christianis, qui post tam apertam Christi evangelicam legem audent adhuc ad decalogum provocare ad excusanda alia præter mœchiam

a) Matth. V. 25. etc.

b) Ib. XVIII. 23.

c) Ib. 35.

d) Ib. V. 27.

impudicitiae peccata, confundit ex veteri testamento, novum tam planum et apertum conformiter ad Job XXXI. 1. : *Pepigi fœdus cum oculis meis, ut ne cogitarem quidem de virgine. Quam enim partem haberet in me Deus desuper, et hæreditatem omnipotens de excelsis? Si autem, sunt porro verba Christi, oculus tuus dexter scandalizat te, erue eum, et proiice abs te etc.* Nihil fortius ad absterrendum dici potest, quam eruere potius oculum, abscindere manum et pedem. Haud absimilis dictio comparativa ex rebus obviis, quæ nos ipsos contingunt, habetur paulo post. Cum enim, quod iuramentum attinet, perfectionem novæ præ veteri lege in eo constituisset Christus, quod ista prohibeat peierare, illa vero iubeat non *iurare omnino*, addita simplicitate sua perinde ac ingenuitate admirabili assertionum nostrarum regula: *Sit autem sermo vester, est, est; non, non: quod autem his abundantius est, a malo est*, quatenus nempe veritatis limites excedit.

Pergit Christus a): „Audistis, quia dictum est: Oculum pro oculo, et dentem pro dente. Ego autem dico vobis, non resistere malo; sed si quis te percusserit in dexteram maxillam tuam, præbe illi et alteram. Et ei, qui vult tecum iudicio contendere, et tunicam tuam tollere, dimitte ei et pallium. Et quicumque te angariaverit mille passus, vade cum illo et alia duo.“ Quanta, quæso, energia hic evangelica lex malum malo non red-

a) Matth. V. 38.

dere inculcat, dum potius iubemur, percutienti maxillam dexteram præbere alteram etc. quam vicem rependere, aut ulcisci. Nec vero hyperbolicum est, non contendere lacessitum, angariatum unum milliare vadere duo, percutienti maxillam præbere, cum exempla aut occasio adesse possint, ad iteram sic se patienter gerendi cum Christo: qui dum Malcho alteram maxillam non præbuit, in eo tamen tunc erat, ut dorsum flagellantibus, caput coronam spineam nectentibus, manus et pedes crucifigentibus præberet, atque hæc omnia ab inimicis pro nobis inimicis pateretur, et moretur in cruce.

Et sic quidem instituimur, quid nos exterius facere ac fustinere oporteat, id vero quod sequitur, animum simul intime afficit a)? „Audistis, quia dictum est: Diliges proximum tuum, et odio habebis inimicum tuum. Ego autem dico vobis: Diligite inimicos vestros, et benefacite his, qui oderunt vos: et orate pro persequentibus, et calumniantibus vos: ut sitis filii Patris vestri, qui in cælis est: qui solem suum oriri facit super bonos et malos, et pluit super iustos et iniustos.“ Quid magis repugnare, ac vim veluti ipsi naturæ inferre videtur, quam hæc tanta inimicorum dilectio? Quid vero ad dilectionem hanc a nobis obtinendam, non extorquendam dico, sed amice ac suaviter conciliandam, corque tenerrimo emolliendum affectu accommodatius esse potuit, quam

a) *Matth. V. 43.*

filii amica, qua nos dignatur, compellatio Patris sui cœlestis: *Ut sitis filii Patris vestri, qui in cœlis est*, quem nostrum tam sæpe alias in hoc fermone dicit Patrem? Quid huius cœlestis Patris compellatione ad commovenda viscera convenientius esse potuit? postquam præsertim ipse æterni Patris Filius exemplum nobis huius dilectionis dedisset in cruce pro inimicis orans, et cum adhuc essemus inimici, pro nobis moriens.

Ipsam orationis filiali animo auspicandæ formulam sic orditur a): *Pater noster*. Quæ dominica oratio tam simplici fermone paucisque verbis non solum omnia petitionum genera complectitur, verum etiam nihil non a Patre nostro, qui est in cœlis, petendum obtinendumque esse declarat, sive ad ipsius gloriam, ultimum omnium rerum finem in ipsius nomine sanctificando, eiusque voluntate facienda, sive ad nostra commoda et profectum huius et æternæ vitæ attineat. Plenam etiam postea nobis petendi, quærendique ac pulsandi fiduciam ingerit exemplo parentis naturalis, eiusmodi inductionibus b), quæ non possunt non commovere ac convincere mentem c); „Aut quis est ex vobis homo, quem si petierit filius suus panem, nunquid lapidem porriget ei? Aut si piscem petierit, nunquid serpentem porriget ei? Si ergo vos, pergit, cum sitis mali, nostis bona data dare filiis vestris, quanto magis Pater vester, qui in cœlis est, dabit bona petentibus se?“

a) *Matth. VI. 9.*    b) *Ib. VII. 7.*    c) *Ib. 9.*

Cum primum de oratione in hoc sermone loqui incipit, ad Patrem cœlestem mentem nostram elevat obtinendæ ab eo mercedis spe, a vanitate illam avertens hisce verbis a); „Et cum oratis, non eritis sicut hypocritæ, qui amant in synagogis et in angulis platearum stantes orare, ut videantur ab hominibus: amen dico vobis, receperunt mercedem suam. Tu autem, cum oraveris, intra in cubiculum tuum, et clauso ostio, ora Patrem tuum in abscondito: et Pater tuus, qui videt in abscondito, reddet tibi.“ Sic de ieiunio mox agens: „Tu autem, inquit b), cum ieiunas, unge caput tuum, et faciem tuam lava, ne videaris hominibus ieiunans, sed Patri tuo, qui est in abscondito: et Pater tuus, qui videt in abscondito, reddet tibi.“ Præ quibusvis locis, seu figuris rhetoricis eloquentiæ vim, sese insinuandi animo, attentionemque non solum movendi, sed etiam alte menti infixam retinendi, habent desumptæ ex rebus obviis similitudines Christo admodum familiares: veluti illa omnem eloquentiæ humanæ subtilitatem superat, ubi argumentum hoc de non captanda vana apud homines gloria et existimatione orditur, dum dicit ad eleemosynam facientem: *Noli tuba canere ante te. Nesciat sinistra tua, quid faciat dextera tua.* Dextera in scripturis in bonam partem, hic de bono opere, sinistra in malam partem accipitur, de sinistro fine in captanda aura vanæ gloriæ. Porro sic loquitur Christus c): „Attendite, ne iustitiam vestram faciatis

a) *Matth. VI. 5.*    b) *Ib. 17.*    c) *Ib. 1.*



coram hominibus, ut videamini ab eis: alioquin mercedem non habebitis apud Patrem vestrum, qui in cœlis est. Cum ergo facis eleemosynam, noli tuba canere ante te, sicut hypocritæ faciunt in synagogis, et in vicis, ut honorificentur ab hominibus. Amen dico vobis, receperunt mercedem suam. Te autem faciente eleemosynam, nesciat sinistra tua, quid faciat dextera tua, ut sit eleemosyna tua in abscondito, et Pater tuus, qui videt in abscondito, reddet tibi.“ Id genus est, quod postea dicit a): „Nolite thesaurizare vobis thesauros in terra: ubi ærugō et tinea demolitur, et ubi fures effodiunt, et furantur.“ Quæ vero sententia antithesi appositâ miram emphasim accipit b): „Thesaurizate autem vobis thesauros in cœlo, ubi neque ærugō, neque tinea demolitur, et ubi fures non effodiunt, nec furantur. Ubi enim thesaurus tuus, ibi est et cor tuum.“ Quibus admirabili nexu, quæ sequuntur cohærent, de lucerna actionum nostrarum c): „Lucerna corporis tui est oculus tuus; si oculus tuus fuerit simplex: totum corpus tuum lucidum erit etc.“ Item d): „Nemo potest duobus dominis servire: aut enim unum odio habebit, et alterum diliget: aut unum fustinebit, et alterum contemnet. Non potestis Deo servire et mammonæ. Ideo dico vobis, ne solliciti sitis animæ vestræ, quid manderetis etc.“

a) *Matth. VI. 19.*    b) *Ib. 20.*    c) *Ib. 22.*    d) *Ib. 24.*

Id vero, quod postea habet de angusta, quæ ducit ad vitam, porta, vim maximam ex illo accipit, quod alibi de divitibus dicit, quam difficile, imo apud homines impossibile fit, ut salventur a): *Facilius est, camelum per foramen acus transire, quam divitem intrare in regnum cælorum.* De camelo item, Scribas et Phariseos incessens, comparationem fumit, postquam eorum in iurando vanam observantiam notasset, de qua Christus quoque in sermone in monte cavet b): „Væ vobis Scribæ et Pharisei hypocritæ, qui decimatis mentham, et anethum, et cyminum, et reliquistis, quæ graviora sunt legis, iudicium, et misericordiam, et fidem: hæc oportuit facere, et illa non omittere. Duces cæci excolantes culicem, camelum autem glutientes.“ Non semel Scribæ et Pharisei duces cæci a Christo vocantur, apud Lucam vero singulariter, dum paucioribus sermonem in monte persequitur, in hoc Matthæo copiosior, quod beatitudinibus seu benedictionibus mox maledictiones, quibus deterreamur, adiungat oppositas c): „Verumtamen væ vobis divitibus, quia habetis consolationem vestram. Væ vobis, qui saturati estis: quia esurietis: Væ vobis, qui ridetis nunc: quia lugebitis, et flebitis. Væ cum benedixerint vobis homines: secundum hæc enim faciebant pseudo-prophetis patres eorum.“ Nos autem, edocti a Christo, non sic; beatos nos inter mala et miserrimas huius vitæ (unice vero solatio, quo carent, qui prosperis præsentis vitæ felices se putant)

a) *Matth. XIX, 24.* b) *Ib. XXIII, 23.* c) *Luc. VI, 24. etc.*

esse scientes; gaudere et exultare iubemur etiam, dum oderint nos homines, et persecuti fuerint, quos ipsos a suis diligere præcipit Christus: *Vobis, inquit a), dico qui auditis, diligite inimicos vestros, benefacite his, qui oderunt vos*, et quæ sunt alia charitatis officia, quæ pressius ibidem persequitur S. Lucas: tum post hæc „Dicebat autem, pergit b), illis et similitudinem: Nunquid potest cæcus cæcum ducere? nonne ambo in foveam cadunt? Non est discipulus super magistrum: perfectus autem omnis erit, si sit sicut magister eius. Quid autem vides festucam in oculo fratris tui, trabem autem, quæ in oculo tuo est, non consideras?“ Eandem hanc adæquatam prorsus humanæ temeritati inductionem (qua cynosura de nostris et aliorum defectibus arbitrium ferimus, atque plerumque nostra ultra etiam tenuitatem festucæ minuimus, aliena supra trabem amplificamus) Matthæus ex ore Christi referens, ut a iudicio aliorum temerario omnino nobis temperemus: „Nolite, inquit c), iudicare, ut non iudicemini: in quo enim iudicio iudicaveritis, iudicabimini, et in qua mensura mensi fueritis, remetietur vobis. Quid autem vides festucam in oculo fratris tui: et trabem in oculo tuo non vides?“

Quidquid vero desiderat Christus officiorum mutuæ inter nos homines charitatis, quæso, quam sublimi compendio, ac nativa simplicitate tatum illud in apophthegmate isto sermonis in monte

a) *Luc. VI. 27.*    b) *Ib. 39.*    c) *Matth. VII. 1.*

comprehenditur apud Lucam a) perinde ac apud Matthæum b): *Omnia ergo, quæcunque vultis, ut faciant vobis homines, et vos facite illis. Hæc est enim lex et propheta.* Demum eadem sermonis gratia, vi, ac vivis coloribus nobis cavet, atque attendere nos vult a falsis prophetis, qui, ut ait c), *veniunt ad vos in vestimentis ovium, intrinsecus autem sunt lupi rapaces: a fructibus eorum cognoscetis eos. Nunquid colligunt de spinis uvas, aut de tribulis ficus? Sic omnis arbor, bona fructus bonos facit: mala autem arbor malos fructus facit.* Hæc nobis in memoriam revocant malum illum in paradiso arboris fructum, unde in nos a protoparentibus naturæ malignitas derivatur. Alibi eandem comparisonem proverbio concludit d): *Aut facite arborem bonam, et fructum eius bonum: Aut facite arborem malam, et fructum eius malum. Siquidem ex fructu arbor cognoscitur, blasphemus illos incessens, qui eum in principe dæmoniorum eiicere dæmonia dicebant e): Progenies viperarum, quomodo potestis bona loqui, cum sitis mali? Ex abundantia enim cordis os loquitur. Bonus homo de bono thesauro suo profert bona; et malus homo de malo thesauro profert mala.*

Quod demum in fine sermonis in monte apud Matthæum additur f): *Non omnis, qui dicit mihi, Domine, Domine, intrabit in regnum cælorum: sed qui facit voluntatem Patris mei, qui in cælis est, ipse intrabit in regnum cælorum.* Id edisserens S. Lucas

a) *Luc. VI. 31.*b) *Matth. VII. 12.*c) *Ib. 15. etc.*d) *Ib. XII. 33.*e) *Ib. 34.*f) *Ib. VII. 21.*

conclusioni totius sermonis perinde ac similitudini de fructibus bonæ vel malæ arboris innectit a): „Bonus homo de bono thesauro cordis sui profert bonum; et malus homo de malo thesauro profert malum. Ex abundantia enim cordis os loquitur. Quid autem vocatis me, Domine, Domine, et non facitis, quæ dico? Omnis, qui venit ad me, et audit sermones meos, et facit eos: ostendam, cui similis sit etc.“ Sicque mirifice dictis concordat, respondetque omnino conclusio sermonis similitudine de viro sapiente, vel stulto ædificante super petram vel arenam, qua nihil congruentius esse possit b): „Omnis ergo, qui audit verba mea hæc, et facit ea, assimilabitur viro sapienti, qui ædificavit domum suam supra petram, et descendit pluvia, et venerunt flumina, et flaverunt venti, et irruerunt in domum illam, et non cecidit: fundata enim erat super petram. Et omnis, qui audit verba mea hæc, et non facit ea, similis erit viro stulto, qui ædificavit domum suam super arenam: et descendit pluvia, et venerunt flumina, et flaverunt venti, et irruerunt in domum illam, et cecidit, et fuit ruina illius magna.“ Ubi, quod iam alio exemplo notavi, mira energia sese synonyma repetitio oppositorum similitudinis membrorum attento animo insinuat, ut tenaciter inhæreat.

Subdit Evangelista c): *Et factum est, cum consummasset Jesus verba hæc, admirabantur turbæ super doctrina eius. Erat enim docens eos sicut potestatem*

a) *Luc. VI. 45. etc.*    b) *Matth. VII. 24. etc.*    c) *Ib. 28.*

*habens, et non sicut Scribæ eorum et Pharisei.* Quod iam notanter observavimus in toties repetitis verbis illis: *Ego autem dico vobis*, dum ea persequitur, quæ ad legem suam novam super veterem effe- rendam pertinent, ac eandem longo post se inter- vallo relinquendam, divinis additis suo nomine promissis de regno cœlorum possidendo, atque in eo copiosa mercede accipienda a beatis illis, qui Deum videbunt, Filiique Dei vocabuntur, cœlestis nimirum Patris, quem in hoc fermone semper, ut iam animadvertimus, nostrum vocat (*Pater vester cœlestis, qui in cœlis est*) sicque ab eo- dem præceptis salutaribus moniti, et divina institutione formati audemus dicere in oratione Dominica *Pater noster qui es in cœlis* cum Ecclesia in sacrationi litur- giæ parte, qua Christus Patri cœlesti incruento offertur sacrificio in lytrum redemptionis nostræ, adoptionisque in filios Dei, fratres unigeniti Filii Dei: dum cum ipso, qui assumpta humana natura factus est frater noster, communem accepimus, qui est in cœlis Patrem nostrum eundem, quem et Deum nostrum: quem enim vero post resurrectio- nem suam, per Mariam Magdalenam ad discipulos suos Christus misit lætissimum nuntium, omnem sensum nostrum et humanam spem superantem expectationemque vilis creaturæ a creatore suo: *Vade autem, inquit a), ad fratres meos, et dic eis: Ascendo ad Patrem meum, et Patrem vestrum: Deum meum, et Deum vestrum.* Quo haud scio, an

a) *Joan. XX. 17.*

ullus insignior ac sublimior in divina Evangelii Christi Verbi incarnati œconomia sit locus, a nobis uberius per decursum operis considerandus, iugiterque animo revolvendus.

---

APOPTHHEGMATA SINGULARIA AC  
PLACITA EVANGELII CHRISTI NON INITIATIS  
PARADOXA.

XX. Jam supra ex Marci cap. I. notavimus, cum primum prædicandi munus suscepisset Jesus docens in synagogis, stupuisse auditores super doctrina eius: *erat enim docens eos, quasi potestatem habens, et non sicut scribæ.* Quæ etiam apud Lucam a) eadem occasione leguntur, postquam retulisset, quid contigerit, dum iam antea venisset Nazareth, intrassetque secundum consuetudinem suam in Synagogam, surrexissetque legere tradito ei libro Isaïæ. „Et ut revolvit librum, invenit locum, ubi scriptum erat: Spiritus Domini super me: propter quod unxit me, evangelizare pauperibus misit me, sanare contritos corde, prædicare captivis remissionem, et cæcis visum, dimittere confractos in remissionem, prædicare annum Domini acceptum et diem retributionis (quibus tota redemptionis nostræ, Evangelii Christi, œconomia continetur). Et cum plicuisset librum, reddidit ministro, et sedit. Et omnium in Synagoga oculi erant intendentes in eum. Cœpit autem dicere ad illos: Quia hodie

a) Luc. IV. 32.

impleta est hæc scriptura in auribus vestris. Et omnes testimonium illi dabant: et mirabantur in verbis gratiæ, quæ procedebant de ore ipsius, et dicebant: Nonne hic est filius Joseph? At mox, cum in eos inveheretur, atque illis diceret, non esse acceptum prophetam in patria sua, conversa est admiratio in iram, ita ut eiicerent illum extra civitatem, ducerentque usque ad fupercilium montis, super quem civitas illorum exstructa erat, ut præcipitarent eum.

Erat porro Nazareth, quæ Christi credebatur patria, lapis offensionis, et petra scandali; humiles natales ac pauper conditio, prout scribæ illi, qui eum accedens sequi velle videbatur, dixit: *Vulpes foveas habent, et volucres cæli nidos, filius autem hominis non habet, ubi caput reclinet.* Alia omnia exspectabant Judæi a Messia suo domitore gentium, et dominatore orbis: quem non solum rem restitutum in Israel, verum etiam cumulaturum præstolabantur gentem omnium rerum affluentia, gloria, et divitiis, quarum ille contemptum, et abdicationem in suis discipulis postulabat. Unde cum adolescentem ad vendendum omnia, quæ haberet, dandumque pauperibus hortaretur, abiit is tristis: *erat enim habens multas possessiones.*

Quam vero admirabilem in modum ob oculos posuit, ordinem officiorum erga Patrem in cælis, et parentes in terra paucis verbis alteri illi, qui



fuit de discipulis suis, dicenti a): *Domine permitte me primum ire, et sepelire patrem meum. Jesus autem ait illi: Sequere me, et dimitte mortuos sepelire mortuos suos.* Id quod carnaliter sapientibus durius videtur, ut illud indulgentius, quod respondit discipulis Joannis b), „qui accesserunt ad eum dicentes: Quare nos, et Pharisei ieiunamus frequenter, discipuli autem tui non ieiunant? Et ait illis Jesus: Numquid possunt filii sponsi lugere, quamdiu cum illis est sponsus? Venient autem dies, cum auferetur ab eis sponsus, et tunc ieiunabunt. Nemo autem immittit commissuram panni rudis in vestimentum vetus: tollit enim plenitudinem eius a vestimento, et peior scissura fit. Neque mittunt vinum novum in utres veteres: alioquin rumpuntur utres, et vinum effunditur, et utres pereunt. Sed vinum novum in utres novos mittunt, et ambo conservantur.“ Nihil apposite magis ad discipulos S. Joannis præcursoris Domini dici potuit, inducique, quam similitudo illa et comparatio, quam ipse S. Joannes adhibuit, cum se non esse Christum profiteretur, sed missum ante illum c): *Qui habet sponsam, inquit, sponsus est: amicus autem sponsi, qui stat, et audit eum, gaudio gaudet propter vocem sponsi. Hoc ergo gaudium meum impletum est. Illum oportet crescere, me autem minui.* Quod vero dicit, Christum debere crescere, se autem minui, pertinet ad comparationem illam, quam Christus facit de panno et vino veteri et novo: cum S. Joannes Baptista veluti

a) *Matth. VIII. 21.*b) *Ib. IX. 14.*c) *Jn. III. 29.*

limes esset veteris testamenti, quod diminui oportebat, dum novum in Christo crescebat: eratque incrementum Ecclesiæ Christi, Synagogæ diminutio. Videatur equidem grave ac despicabile, discipulos suos vocari pannum rude ac vinum novum a pio magistro; a quo vero edocti erant discere suo exemplo mites esse et humiles corde.

Invasit eos non femel ambitio, contendebantque inter se, *quis eorum videretur esse maior*, affectabantque filii Zebedæi primum in regno suo locum. Videturque æmulatione quadam Petri factum, ut post solutum pro se et Petro didrachma, *in illa hora a)* accederent discipuli ad Jesum dicentes: *Quis putas maior est in regno cælorum?* At vide quam incomparabili inductione pueruli eos ad officium fensumque humilitatis revocet? Nempe „advocans Jesus parvulum, statuit eum in medio eorum, et dixit: Amen dico vobis, nisi conversi fueritis, et efficiamini sicut parvuli, non intrabitis in regnum cælorum. Quicumque ergo humiliaverit se sicut parvulus iste, hic est maior in regno cælorum. Et qui susceperit unum parvulum talem in nomine meo, me suscipit. Qui autem scandalizaverit unum de pusillis istis, qui in me credunt, expedit ei, ut suspendatur mola asinaria in collo eius, et demergatur in profundum maris.“ Est hæc de mola asinaria gravissima ad absterrendum elocutio, locus, ut ita dicam, rhetoricus Christo proprius,

a) *Matth. XVIII. 1. etc.*

non sophistarum conquisita eloquentia ad fucum faciendum aut ostentationem, sed opportuna rerum inductione ad commovendum edocendumque de rei veritate animum: qualis etiam illa, quæ mox sequitur: *si autem manus tua, et pes tuus scandalizat te; abscinde eum, et proiice abs te: bonum tibi est ad vitam ingredi debilem vel claudum, quam duas manus vel duos pedes habentem mitti in ignem æternum*: addita porro a nobis paulo ante notata in more Christo posita in rebus gravioribus repetitionis formula: *Et si oculus tuus scandalizat te, erue eum, et proiice abs te: bonum tibi est, cum uno oculo in vitam intrare, quam duos oculos habentem mitti in gehennam ignis*. Haud abludit, quod Christus respondit suis discipulis, dum Pharisæis dixerat, Moysen ad duritiam cordis permisisse uxorum repudia, discipuli autem dicerent: „Si ita est causa hominis cum uxore, non expedit nubere. Qui dixit illis: Non omnes capiunt verbum istud, sed quibus datum est. Sunt enim eunuchi, qui de matris utero sic nati sunt: et sunt eunuchi, qui facti sunt ab hominibus: et sunt eunuchi, qui se ipsos castraverunt propter regnum Dei, qui potest capere capiat.“

Tum illud, quo suos ad certam a Patre cœlesti quidvis, quod bonum, ac profuturum sit, obtinendi spem ac fiduciam inducit a): *Quis autem ex vobis patrem petit panem, nunquid lapidem dabit illi?* Ut iam ex Matthæo in sermone Christi in monte notavimus. Idem vero hoc refert Lucas, cum

a) *Luc. XI. 11.*

Christus quodam loco cessasset ab oratione, quidam autem ex discipulis diceret ei: *Domine doce nos orare, sicut docuit et Joannes discipulos suos.* Quod cum fecisset Christus, addit similitudinem de amico quodam importune alterum pro panibus (cum non haberet, quod poneret ante amicum venientem ad se) interpellante, atque tandem obtinente non eo, quod amicus eius sit, *propter importunitatem tamen eius*, ut discipulos ad perseverandum in oratione hortaretur a): *Quoniam oportet semper orare, et nunquam deficere*, ut apud eundem Evangelistam alibi dicit Christus admirabili comparatione a minore ad maius in iudice, *qui nec Deum timebat, nec hominem reverebatur*; fatigatum tamen eum molestia viduæ, sic Christus intra se loquentem inducit: „Etsi Deum non timeo, nec hominem revereor; tamen quia molesta est mihi hæc vidua, vindicabo illam, ne in novissimo veniens fugillet me. Ait autem Dominus: Audite, quid iudex iniquitatis dicit: Deus autem non faciet vindictam electorum suorum clamantium ad se die ac nocte, et patientiam habebit in illis? Dico vobis, quia cito faciet vindictam illorum. Verumtamen Filius hominis veniens, putas, inveniet fidem in terra?“

Quid vero hoc tibi postremum, velut abrupto sermone, de Filio hominis venturo iudice in consummatione sæculi? Ut nimirum declararet, nunquam ad ultimum usque tempus defuturos hostes, et persecutores electorum suorum, et tunc maxime,

a) *Luc. XVIII. 1.*

quando paucissimi erunt fideles, et gravissima persecutio, ac tribulatio, qualis nunquam fuit; Deum tamen nunquam defuturum, quin faciat vindictam electorum suorum, clamantium ad se die ac nocte in pressuris ab hoc mundo, etsi tardus in ulciscendis eorum iniuriis esse videatur. Est hoc argumentum *Apocalypsis Jesu Christi*, quam dedit illi Deus palam facere servis suis etc. ut incipit liber ille a S. Joanne in complementum veluti Evangelii regni scriptus: qui si recte accipiatur, utilissimus est lectu ad consolationem fidelium in suis et Ecclesiae, quæ nunquam deerunt, tribulationibus, ac terrorem persequentium inimicorum: dum identidem tubæ insonant ad denuntianda Ecclesiae electorum mala a malis perferenda usque ad finem mundi per septem tempora, quin necesse sit ea curiosius indagare aut per certas epochas determinare, qui septenarius in Apocalypsi generalis est numerus in totidem plagis, quæ per septem tubas denuntiantur, Ecclesiae electorum, quibus totidem etiam respondent phialæ iræ Dei in electorum suorum hostes effundendæ. Quæ, ne scandalizentur malis his fideles electi, perinde ac malorum vindicta, prædicta sunt a): *Impossibile est, ut non veniant scandala: Væ autem illi, per quem veniunt. Utilius est illi, si lapis molaris imponatur circa collum eius, et proiciatur in mare, quam ut scandalizet unum de pusillis istis*; additur apud Matthæum mox *Væ mundo a scandalis*, quod væ toties in Apocalypsi repetitur contra civi-

b) Luc. XVII. 1.

tatem illam huius mundi adversariam civitati electorum suorum ad eorum vindictam faciendam, *clamantium ad se die ac nocte*. Dum vicissim fideles sibi de malis a persecutoribus illatis coronas necunt perinde ac de bonis a se factis. Qua de re mirifica est inductio de villico iniquitatis, cuius exemplo monet nos Christus a): *Facite vobis amicos de mammona iniquitatis, ut cum defeceritis, recipiant vos in aeterna tabernacula*. Dicit hoc postquam induxisset villicum iniquitatis, qui cum amovendus esset a villicatione, convocatis debitoribus Domini sui singulis, accepta priore cautione maiorem partem debiti remisit, ut amotum se reciperent in domos suas. *Laudavit, subdit, dominus villicum iniquitatis, quia prudenter fecisset: Quia filii huius sæculi prudentiores filiis lucis in generatione sua sunt*. Dum nempe illis, quibuscum bona sua propria communia fecit cælestis Pater, ut possint sibi facere de illis amicos pro vita æterna, non sunt eius rei tam studiosi, quam filii huius sæculi ad sua commoda ex bonis alienis Dominorum suorum.

Simul hic incomparabilis differentia ob oculos ponitur Domini rerum omnium in cælis, et eorum qui bona possident sibi propria in terris. Talis erat homo ille, quem tam nativis coloribus describit Christus, dum nobis ab omni avaritia cavet: *Quia, ait b), non in abundantia cuiusquam vitæ eius est, ex his quæ possidet*. Cuius rei experientiam docet similitudine illa de homine divite illo,

a) *Luc. XVI. 9.*

b) *Ib. XII. 15.*

cuius „uberis fructus ager attulit : et cogitabat intra se dicens : Quid faciam, quia non habeo, quo congregem fructus meos? Et dixit, hoc faciam : destruam horrea mea, et maiora faciam : et illuc congregabo omnia, quæ nata sunt mihi, et bona mea. Et dicam animæ meæ : Anima, habes multa bona posita in annos plurimos : requiesce, comede, bibe, epulare. Dixit autem illi Deus : Stulte, hac nocte animam tuam repetent a te : quæ autem parasti cuius erunt? Sic est, qui tibi thesaurizat, et non est in Deum dives.“

Jam supra ex Matthæi VI. attigimus, quæ hic mox subdit Lucas a) Christi dicta ad discipulos suos, ne solliciti sint, quid manducarent, aut induerent, corvos hic inducens, „quia non seminant, neque metunt, quibus non est cellarium, neque horreum, et Deus pascit illos. Quanto magis vos pluris estis illis? Quis autem vestrum cogitando potest adiicere ad staturam suam cubitum unum? Si ergo, neque quod minimum est, potestis, quid de cæteris solliciti estis? Considerate lilia, quomodo crescunt: non laborant neque nent: dico autem vobis, nec Salomon in omni gloria sua vestiebatur, sicut unum ex istis. Si autem fœnum, quod hodie in agro est, et cras in clibanum mittitur, Deus sic vestit: quanto magis vos pusillæ fidei? . . . Et vos nolite in sublime tolli: Hæc enim omnia gentes mundi quærunt; Pater autem vester scit, quoniam his indi-

a) *Luc. XII. 22.*

getis. Verumtamen quærite primum regnum Dei et iustitiam eius, et hæc omnia adiicientur vobis. Nolite timere pusillus grex, quia complacuit Patri vestro, dare vobis regnum. Vendite, quæ possidetis et date eleemosynam. Facite vobis facculos, qui non veterascunt, thesaurum non deficientem in cœlis, quo fur non appropriat, neque tinea corrumpit. Ubi enim thesaurus vester est, ibi et cor vestrum erit,“ ut iam supra ex Mathæo retulimus, essetque Evangelium exscribendum, si omnia ad rem afferre gestiremus, quæ nobis non ad admirationem animo solum ingerendam sic sunt vivis coloribus ac imaginibus, rerumque vel maxime appositarum similitudinibus proposita, sed ad persuasionem dictorum et ad opus resque propositas nos inducendos: prout mulieri illi, quæ Christi dicta admirans et extollens vocem de turba in hæc verba prorupit a): *Beatus venter, qui te portavit, et ubera, quæ suxisti. At ille dixit: Quin imo beati, qui audiunt verbum Dei, et custodiunt illud.* Non erat non beata prædicanda mater Christi, quæ de se ipsa humilis virgo in cantico dixerat: *Ecce enim ex hoc beatam me dicent omnes generationes; sed fuerat hæc divina Evangelii Christi Verbi incarnationis œconomia, ut divinus potius ortus ex Patre quam humanus ex matre panderetur, quem illum divinum ipsa vox Patris cœlestis de cœlo delapsa, dum baptizatus a Joanne Christus, Evangelii sui prædicationem auspicaturus erat, denunciavit nobis b):* *Baptizatus autem Jesus confestim ascendit de*

a) *Luc. XI. 27.* .. b) *Matth. III. 16.*



aqua; et ecce aperti sunt cæli: et vidit spiritum Dei descendentem sicut columbam, et venientem super se. Et ecce vox de cælis dicens: Hic est Filius meus dilectus, in quo mihi complacui. Quæ eadem iterum vox post transfigurationem Christi in monte audita est, his adiectis verbis: *Ipsam audite*, prout apud tres Evangelistas Matthæum, Marcum et Lucam leguntur. Dum vero S. Joannes Evangelista, totam illam transfigurationis, cui ipse cum Petro et Jacobo aderat, narrationem silentio præterit: eius facturum mentionem in sua Epistola secunda D. Petrus nobis promittit (quod in suis successoribus perenne erit, ut in eorum communione *beati sint, qui audiunt verbum Dei et custodiunt illud*) daturum se operam, ut post obitum suum horum memoriam faciamus: „Non enim, addit a), doctas fabulas secuti notam fecimus vobis Domini nostri Jesu Christi virtutem et præsentiam: sed speculatores facti illius magnitudinis. Accipiens enim a Deo Patre honorem et gloriâ voce delapsa ad eum huiusmodi a magnifica gloria: Hic est Filius meus dilectus, in quo mihi complacui, ipsum audite. Et hanc vocem nos audivimus de cælo allatam, cum essemus cum ipso in monte sancto.“ S. Joannes cum Petro præsens singulariter nobis sermonem illum conservavit, qui rem ipsam luculenter edisserit sub parabola pastoris Filii Dei dilecti, cuius vocem oves eius audiunt: „Huic, ait b), ostiarius aperit, et oves vocem eius audiunt, et proprias oves vocat nominatim, et

a) II. Petr. I. 15.

b) Jo. X. 3.

educit eas. Et cum proprias oves emiserit ante eas vadit: et oves illum sequuntur, quia sciunt vocem eius. Alienum autem non sequuntur, sed fugiunt ab eo: quia non noverunt vocem alienorum.“ Et postea a): „Ego sum Pastor bonus: et cognosco oves meas, et cognoscunt me meæ. Sicut novit me Pater, et ego agnosco Patrem: Et animam meam pono pro ovibus meis. Et alias oves habeo, quæ non sunt ex hoc ovili: et illas oportet me adducere, et vocem meam audient, et fiet unum ovile et unus pastor.“ De vocatione gentium hic loquitur, qua nos forte ex illorum numero sumus *beati, qui audiunt verbum Dei* Christi oves, reiectis interim ex ovili suo incredulis Judæis, de quibus infra b): *sed vos non creditis, quia non estis ex ovibus meis. Oves meæ vocem meam audiunt: et ego cognosco eas, et sequuntur me.* An forte a cœlesti Patre, dum in baptismo Filium suum dilectum denunciavit, verba illa: *ipsum audite* prætermisita sunt, eoquod necdum discipulos, quos in dispersionem gentium ad prædicandum Evangelium, reiecta gente Judaica, missurus esset, sibi Christus aggregasset? Rememoranda hic est paulo ante notata conclusio sermonis Domini in monte ex Matthæo c), quæ vero apud Lucam d) sic habet: *Omnis, qui venit ad me, et audit sermones meos, et facit eos: Ostendam vobis cui similis sit: similis est homini edificanti domum, qui fodit in altum etc. Qui autem audit, et non facit, similis est homini edificanti domum suam super terram sine fundamento etc.*

a) Jo. X. 14. b) Ib. 26. c) Matth. VII. 24. d) Luc. VI. 47. etc

## EVANGELII ŒCONOMIA PARABOLIS EXPLICATA.

**XXI.** **F**acit huc parabola de feminante, quæ apud Matthæum XIII., Marcum IV., et Lucam VIII. prima occurrit, postquam Christus iam sermone in monte discipulis suis, quod notanter apud Matthæum et Lucam memoratur, legem Evangelii explicasset, præsentibus, et doctrinam admirantibus Judæis, qui tamen Evangelium non receperunt: id quod in ipsa hac parabola de feminante declaratur: aliud cecidisse secus viam, aliud in petrosa, aliud in spinas. Jam notavimus Christum sermonem illum in monte fecisse *elevatis oculis in discipulos suos*. Eodem pertinet, quod apud Lucam VI. 27. postquam et beatos prædicasset, et vix denuntiasset præcipua evangelicæ legis præcepta explicare his verbis auspicetur. *Sed vobis dico, qui auditis; diligite inimicos vestros etc.* Equidem aliquando etiam advocans turbam dicebat illis a): *Audite me omnes, et intelligite. Nihil est extra hominem introiens in eum; quod possit eum inquinare, sed quæ de homine procedunt, illa sunt, quæ communicant hominem.* At mox addit: *Qui habet aures audiendi audiat.* Memorat vero Matthæus XV. 11. postquam eandem sententiam Christi attulisset, Phariseos scandalizatos esse verbo hoc: quia nimirum aures audiendi non habebant. Sic etiam iisdem verbis Christus memoratam parabolam concludit b): „Qui habet aures audiendi audiat. Et

a) *Marc. VII. 14. etc.*

b) *Matth. XIII. 9.*

accedentes discipuli dixerunt ei: Quare in parabolis loqueris eis? Qui respondens ait illis: quia vobis datum est nosse mysteria regni cœlorum: illis autem non est datum. Qui enim habet, dabitur ei, et abundabit: qui autem non habet, et quod habet, auferetur ab eo. Ideo in parabolis loquor eis: quia videntes non vident, et audientes non audiunt, neque intelligunt. Et adimpletur in eis prophetia Isaïæ dicentis: Auditum audietis, et non intelligetis: et videntes videbitis, et non videbitis. Incrassatum est enim cor populi huius, et auribus graviter audierunt, et oculos suos clausurunt: ne quando videant oculis, et auribus audiant, et corde intelligant, et convertantur, et sanem eos. Vestri autem beati oculi, quia vident, et aures vestræ, quia audiunt. Amen quippe dico vobis, quia multi prophetæ et iusti cupierunt videre, quæ videtis, et non viderunt; et audire, quæ auditis, et non audierunt. Vos ergo audite parabolam feminantis. Omnis, qui audit verbum regni, et non intelligit, venit malus, et rapit, quod feminatum est in corde eius: hic est, qui fecus viam feminatus est. Qui autem super petrosa feminatus est, hic est, qui verbum audit, et continuo cum gaudio accipit illud; non habet autem in se radicem, sed est temporalis: facta autem tribulatione, et persecutione propter verbum, continuo scandalizatur. Qui autem feminatus est in spinis, hic est, qui verbum audit, et sollicitudo sæculi istius, et fallacia divitiarum suffocat verbum, et sine fructu efficitur. Qui

vero in terram bonam feminatus est, hic est, qui audit verbum, et intelligit, et fructum affert, et facit aliud quidem centesimum, aliud autem sexagesimum, aliud vero trigesimum." In alia parabola, quæ apud Matthæum nonnihil immutata mox subditur, Marcus IV. 23. præmittit hæc ipsa, quæ difficultatem in divina Evangelii Christi œconomia movent, verba: „Si quis habet aures audiendi audiat. Et dicebat illis: Videte, quid audiat. In qua mensura mensi fueritis, remetietur vobis, et adicietur vobis. Qui enim habet, dabitur illi: et qui non habet, et quod habet, auferetur ab eo. Et dicebat: Sic est regnum Dei, quemadmodum si homo iaciat fementem in terram, et dormiat, et exurgat nocte ac die et semen germinet, et increscat, dum nescit ille etc." Qua in re discutienda utinam semper theologi parabolas de feminante, et femente prout a Christo explicantur, cum epistola S. Pauli ad Romanos præ oculis habuissent, et eius se doctrina continuissent. Nihil hic Evangelista de zizaniis superseminatis, de quibus Matthæus in parabola immediate parabolæ memoratæ de feminante subiuncta: *Aliam, inquit, parabolam proposuit illis dicens: Simile factum est regnum cælorum homini, qui seminavit bonum semen in agro suo, cum autem dormirent homines, venit inimicus eius, et superseminavit zizania in medio tritici.* Apud Marcum non nisi de tritico est fermo, quod ultro fructificet in terra, homine iacente fementem dormiente, et *exsurgente nocte et die*, quæ verba in prophetis de

Deo ipso dicta leguntur, qui dum permittit in agro huius mundi mala, veluti dormit; at vero cum dormirent homines, quorum vigilantiae commissus est ager, venit inimicus, et superseminavit zizania in medio tritici, quod est bonum semen: *hi sunt*, ut apostolis parabolam explicat Christus *a)*, *fili regni; zizania autem, filii sunt nequam: inimicus autem, qui seminavit ea; est diabolus: messis vero, consummatio sæculi est.* Quibus paucis tam perspicuis verbis totam generis humani post lapsum ab interitu vindicati historiam per sacram scripturam veteris et novi testamenti diffusam complexus est Christus, decurrentem usque ad consummationem sæculi, quando *b)* *mittet Filius hominis angelos suos, et colligent de regno eius omnia scandala, et eos, qui faciunt iniquitatem: et mittent eos in caminum ignis. Ibi erit fletus et stridor dentium. Tunc iusti fulgebunt sicut sol in regno Patris eorum. Qui habet aures audiendi, audiat*, explicatam nimirum tam conspicue ac veluti uno obtutu oculis obversantem totam Evangelii Verbi incarnati œconomiam regni Christi. hic et in æternum cum forte filiorum regni, et filiorum nequam, in parabola de fagina missa in mare perspicue reddita *c)*, ad quam vero fortem beatam illustrandam faciunt proximæ apud Matthæum et Marcum parabolæ, quibus regnum cælorum simile esse dicitur thesauro abscondito in agro, et inventæ uni margaritæ. Quas modo memoratas attinentes ad regnum Christi in terris parabolas suo loco singulariter explicabimus.

*a)* *Matth. XIII. 38.*

*b)* *Ib. 41.*

*c)* *Ib. 47.*

Quam quæso sublimiter initia, et incrementa regni cœlorum in terris a minimo progressi in regnum immensum, et æternum in cœlis, quæ est divina Evangelii Christi œconomia, a Christo explicantur in parabolis de grano fynapis a), et de fermento, quod acceptum mulier abscondit in farinæ fatis tribus, donec fermentatum est totum, ad declarandam reconditam illam Evangelii *virtutem Dei* b), iuxta apostolum, *in salutem omni credenti*, de qua initio diximus, in grano finapis quoque conspicuam: *quod minimum est omnibus feminibus, cum autem creverit, maius est omnibus olivibus, et fit arbor; ita ut volucres cœli veniant, et habitent in ramis eius*. Adhibeturque perinde a Christo in comparationem apud Matthæum c), quando apostolorum incredulitatem arguens, eorum fidei stimulum addit: et apud Lucam, dum ipsi eum discipuli rogarent d): *Adauge nobis fidem. Dixit autem Dominus: Si habueritis fidem sicut granum finapis, dicetis huic arbori moro: Eradicare, et transplantare in mare: et obediet vobis*.

Moxque additur parabola, quæ nos vel maxime humiliter de nobis sentire docet, qui toti Deo obstricti omnia ei debemus per similitudinem servi iussa domini sui exequentis: *Nunquid gratiam, subdit e), habet servo illi, quia fecit, quæ ei imperaverat? Non puto. Sic et vos, cum feceritis omnia, quæ præcepta sunt vobis, dicite: Servi inutiles sumus*,

a) *Matth. XIII. 33.*      b) *Rom. I. 16.*      c) *Matth. XVIII. 19.*      d) *Luc. XVII.*      e) *Ib. 9.*

*quod debuimus facere, fecimus. Non abludit parabola Matth. XX. de patrefamilias (ab ipso Christo explicata in mysterio, postquam apostolis, omnibus relictis eum sequentibus vitam æternam promississet) qui exiit primo mane conducere operarios in vineam suam. Conventionem autem facta cum operariis ex denario diurno, misit eos in vineam suam. Cum autem, qui primo mane venerunt, murmurarent, quod novissimos pares illis fecerit, qui, ut aiunt, portavimus pondus diei et æstus, ille respondens uni eorum, dixit: Amice non facio tibi iniuriam: nonne ex denario convenisti mecum. Tolle, quod tuum est, et vade: volo autem et huic novissimo dare sicut et tibi. Aut non licet mihi quod volo facere? An oculus tuus nequam est, quia ego bonus sum? Sic erunt novissimi primi, et primi novissimi: multi enim sunt vocati, pauci vero electi. Dixerat Christus hanc parabolam, dum ascendens Hierosolymam secreto apostolis aperuerat, quæ eum ibi fata manerent a Judæis, quos maxime attingit parabola, quam proposuit invitatus ad prandium a principe quodam sacerdotum, cum aliquis ex discumbentibus diceret illi a): Beatus, qui manducat panem in regno Dei. At ipse dixit ei: Homo quidam fecit cenam magnam, et vocavit multos. Et misit servum suum hora cænæ dicere invitatis, ut venirent, quia iam parata sunt omnia. Et ceperunt simul omnes excusare. Quales non solum tunc erant Judæi ad nuptias agni frustra a Christo et eius apostolis invitati b), sed etiam invidus ille fratri*

a) *Luc. XIV. 15.*

b) *Ib. XV. 11. etc.*



fuo prodigo quidem (gentilibus scilicet) qui profectus est veluti in regionem longinquam, ibique dissipavit substantiam suam vivendo luxuriose; cui revertenti cum pius Pater prandium pararet, indignatus frater suus veniens ex agro noluit introire: etiam a Patre, ad eum egresso, rogatus: quod fecit cœlestis Pater mittendo filium suum ad Judæos. Cuius vero viscera non commoveantur legendo in parabola illa pium patris affectum non solum in recipiendo filio, qui perierat, sed etiam in persuadendo filio indignante patrique exprobane, quod paterpo affectu fecerat erga fratrem. At ipse dixit illi a): *Fili, tu semper mecum es, et omnia mea tua sunt: Epulari autem et gaudere oportebat, quia frater tuus hic, mortuus erat, et revixit; perierat, et inventus est.* Quis ad hunc tenerrimum patris affectum, intimis cordis medullis non moveatur? Quis non in parabola de divite et Lazaro, apud Lucam capite sequenti, dum sortem spectat tam disparem epulonis divitis in hac vita, conferens eam animo cum Lazari miseria, qui ad divitis ianuam iacebat ulceribus plenus, cupiens saturari de micis, quæ cadebant de mensa divitis, et nemo illi dabat, quis inquam non intime afficiatur animo, indignatus epuloni? quam benigne vero et æquanimiter eum pater Abraham alloquitur, cum eum rogaret, mittere Lazarum ad refrigerandam linguam, cum cruciaretur in flamma? Et dixit illi Abraham: *Fili recordare, quia recepisti bona in vita tua, et Lazarus similiter mala: nunc autem hic consolatur, tu vero cruciaris.*

a) Luc. XV. 21.

Quibus vero verbis adversam quisquam suffenzæ Pharisaicæ iustitiæ paupertatem spiritus spiritum-que pœnitentiæ præcisius definire potuisset, ut parabola illa, quam Christus a) „dixit ad quosdam, qui in se confidebant tanquam iusti, et aspernabantur cæteros? Duo homines ascenderunt in templum ut orarent: unus Pharisæus et alter publicanus. Pharisæus stans, hæc apud se orabat: Deus gratias ago tibi, quia non sum sicut cæteri hominum: raptores, iniusti, adulteri: velut etiam hic publicanus. Jeiuno bis in sabbatò: decimas do omnium, quæ possideo. Et publicanus a longe stans, nolebat nec oculos ad cælum levare; sed percutiebat pectus suum dicens: Deus propitius esto mihi peccatori. “

Uti hic Publicanum exosum Judæis ac detestabilis conditionis hominum genus, ita Samaritanum, gentem eisdem execrabilem e regione ponit; opponitque Sacerdoti et Levitæ in parabola composita, ut infra magis elucidabimus, ad ostendendum legisperito, tentanti illum, quis vere esset dicendus proximus. „Suscipiens autem Jesus, dixit b): Homo quidam descendebat ab Jerusalem in Jericho, et incidit in latrones, qui etiam despoliaverunt eum, et plagis impositis abierunt semivivo relicto. Accidit autem, ut sacerdos quidam descenderet eadem via: et viso illo præterivit. Similiter et Levita, cum esset secus locum,

a) Luc. XVIII. 9.

b) Ib. X. 30.

et videret eum, pertransiit. Samaritanus autem quidam iter faciens, venit secus: et videns eum, misericordia motus est; et appropians alligavit vulnera eius etc." Animadverte, quam articulatim hic recenseat, quæ Samaritanus faucio præstiterit charitatis officia, uti antea desperatum deplorabilemque eius statum, quo magis misericordia dignum eum ostenderet. Tum quærit ex legis perito: *Quis horum trium videtur tibi proximus fuisse illi, qui incidit in latrones? At ille dixit: qui fecit misericordiam in illum.. Et ait illi Jesus: Vade, et tu fac similiter.*

Sic cum Simone Phariseo egit, quando sibi apud eum prandenti a) „mulier, quæ erat in civitate peccatrix stans retro secus pedes eius, lacrymis cœpit rigare pedes eius, et capillis capitis sui tergebat, et osculabatur pedes eius, et unguento ungebat. Videns autem Phariseus, qui vocaverat eum, ait intra se dicens: Hic si esset propheta, sciret utique, quæ et qualis est mulier, quæ tangit eum: quia peccatrix est. Et respondens Jesus dixit ad illum: Simon, habeo tibi aliquid dicere. At ille ait: Magister, dic. Duo debitores erant cuidam fœneratori: unus debebat denarios quingentos, et alius quinquaginta. Non habentibus illis unde redderent, donavit utrisque. Quis ergo eum plus diligit? Respondens Simon dixit: Æstimo quia is, cui plus donavit. At ille dixit ei: Recte iudicasti." Quodsi in memoriam revocemus modo memoratam parabolam de Phariseo et Pu-

a) *Luc. VII. 38.*

blicano, conicere licet, fuisse, quæ Christus *καρδιογνώστης*, quem nullum latuit secretum, Simoni in animum revocare voluerit latentia peccata ac crimina locutus ad cor, iis, quibus eum mira suavitate post relatum modo sermonem, allocutus est verbis; „Conversus, quod probe notandum, ad mulierem: Vides, ait, hanc mulierem? Intravi in domum tuam, aquam pedibus meis non dedisti: hæc autem mulier lacrymis rigavit pedes meos, et capillis suis tersit. Osculum mihi non dedisti: hæc autem ex quo intravit, non cessavit osculari pedes meos. Oleo caput meum non unxisti: hæc autem unguento unxit pedes meos. Propter quod dico tibi: Remittuntur ei peccata multa, quoniam dilexit multum. Cui autem minus dimittitur, minus diligit.“ An non tacite Simoni insinuare videatur hic Christus eum esse ipsum, cui minus dimittitur, quia minus diligit? Hoc est quod nos Germani dicimus: *das Gewissen rühren*. Quem vero peccator minus aut magis diligere debet, ut minus aut magis ei remittatur, nisi Deum? quem se Christus esse haud obscure hic edixit, charitatis officia sibi præstita aut præstanda ei facta esse profitendo, qui peccata remittit, qui est Deus. *Dixit autem ad mulierem: Remittuntur tibi peccata. Et cæperunt, qui simul accumbebant dicere intra se: Quis est hic, qui etiam peccata dimittit?* modestius hæc dicunt hi, quam Scribæ illi, perinde ignari divinæ Evangelii Christi Verbi incarnati œconomix, cum Christus paralytico, ut supra memini-

mus, diceret a): *fili, remittuntur tibi peccata tua*, dicentes intra se, hic blasphematur, quod remittendi potestas soli Deo competat, qualem illi Christum esse non agnoscebant.

Erant, ut Lucas memorat evangelista b), *appropinquantes ei publicani, et peccatores, ut audirent illum. Et murmurabant Pharisei et Scribae dicentes: quia hic recipit peccatores, et manducat cum illis. Dicebat tunc illis parabolam illam, qua nihil convenientius esse potest, ad demonstrandum tenerrimum suum erga perditum humanum genus affectum, de homine nimirum, qualis ille ad nos redimendos esse voluit, „qui habet centum oves: et si perdiderit unam ex illis, nonne dimittit nonaginta novem in deserto, et vadit ad illam, quæ perierat, donec inveniat eam? Et cum invenerit eam, imponit in humeros suos gaudens: et veniens domum convocat amicos et vicinos dicens illis: Congratulamini mihi, quia inveni ovem meam, quæ perierat. Dico vobis, quod ita gaudium erit in cælo super uno peccatore pœnitentiam agente, quam super nonaginta novem iustis, qui non indigent pœnitentia.“*

Sed tales se, qui pœnitentia non egerent, fateri hominibus ostentare volebant Pharisei. Unde ipsis Christus xæ ingeminat c): *Quia estis ut monumenta quæ non apparent, et homines ambulantes supra nesciunt. Hæc Christus cum apud Phariseum*

a) *Matth. IX. 2.*

b) *Luc. XV. 1.*

c) *Ib. XI. 44.*

quemdam pranderet. *Pharisæus autem, (cum iam recubuissent) cæpit intra se reputans dicere, quare non baptizatus esset ante prandium. Et ait Dominus ad illum: Nunc vos Pharisæi, quod deforis est calicis et catini, mundatis: quod autem intus est vestrum, plenum est rapina, et iniquitate: prout etiam apud Matthæum a) inter alia complura Væ illud multo expressius habetur, quod ex Luca rētulimus de monumentis seu sepulchris cadaverum conditoriis, a quibus, ne immundi fierent, tantopere abhorrebant, nec quidem propius ad sepulchra accedentes, ut ex eorum scriptoribus palam fit, quare ea calce quoque dealbabant. Ut adeoque nihil gravius ad eos constringendos, confundendosque excogitari poterat, quam si ossibus mortuorum, et omni spurcitæ cadaverum compararentur, prout apud Matthæum legitur: Væ vobis Scribæ et Pharisæi hypocritæ: quia similes estis sepulchris dealbatis, quæ aforis parent hominibus speciosa, intus vero plena sunt ossibus mortuorum, et omni spurcitia. Sic et vos aforis quidem paretis hominibus iusti: intus autem pleni estis hypocrisi et iniquitate. Tum vero inter tot Væ illa non abs re primum apud Matthæum ponitur b): Væ autem vobis Scribæ et Pharisæi hypocritæ: quia clauditis regnum cælorum ante homines: vos enim non intratis, nec introeuntes finitis intrare.*

Quod nempe tunc faciebant illi, populum quoque avertentes a Christo, homine pro nobis facto, ut ovem perditam reduceret iuxta parabo-

a) *Matth. XXIII. 25.*

b) *Ib. 13.*

lam, cui præmittit apud Matthæum Christus una brevi sententia finem adventus sui in terram a): *Venit enim filius hominis salvare quod perierat*; eandemque reperit, cum murmurarent, *quod ad hominem peccatorem divertisset* Zachæum nimirum publicanum, quem ovem perditam quærens ad pœnitentiam adduxerat b): „Stans autem Zachæus, dixit ad Dominum: Ecce dimidium bonorum meorum, Domine, do pauperibus: et si quid aliquem defraudavi, reddo quadruplum. At Iesus ait ad eum: Quia hodie salus domui huic facta est: eoquod et ipse filius sit Abrahæ. „Venit enim filius hominis quærere, et salvum facere, quod perierat.“ Quæ est divina Evangelii Christi œconomia.

Factus est tunc Zachæus verè filius Abrahæ, in cuius femine benedicendæ erant omnes gentes per Christum redimendæ a servitute peccati non terreno per Messiam constituto regno, quale expectabant Judæi, de quibus Evangelista, „Hæc illis, pergit c), audientibus adiiciens dixit parabolam, eoquod esset prope Jerusalem: et quia existimarent, quod confestim regnum Dei manifestaretur. Dixit ergo: Homo quidam nobilis abiit in regionem longinquam accipere sibi regnum, et reverti. Vocatis autem decem servis suis, dedit eis decem mnas, et ait ad illos: Negotiamini, dum venio. Cives autem eius oderant eum: et miserunt legationem post illum, dicentes: nolu-

a) *Matth. XVIII. 11.*    b) *Luc. XIX. 7.*    c) *Ib. 11.*

is hunc regnare super nos.“ Quid expressius significantiusque dici in Judæos potuit, hominem nobilem unigenitum filium Dei recipere directantes, atque mnas suam *repositam in sudario* habentes? Unde illis ablata est, et data illi, qui decem mnas habet in Ecclesia per omnes gentes dispersa. „Et dixerunt ei a): Domine habet decem mnas. Dico autem vobis, quia omni habenti dabitur, et abundabit: ab eo autem, qui non habet, et quod habet auferetur ab eo. Verumtamen, inimicos meos illos, qui noluerunt me regnare super se, adducite huc, et interficite ante me:“ omnia hæc experti sunt, experiunturque miseri Judæi. *Et his dictis, præcedebat ascendens Jerosolymam.*

---

**CHRISTUS SE NON JAM IN PARABOLIS  
SED PALAM FILIUM DEI PROFITETUR MIRAÇULIS  
COMPROBATUM.**

**XXII.** Quis fit ille *Homo quidam nobilis*, ut uberius suo loco edisseremus, qui *abiit in regionem longinquam, accipere, sibi regnum et reverti*, nobis præ cæteris Evangelistis S. Joannes sublimissime, quod est caput in divina Evangelii Christi Verbi incarnati œconomia, manifestavit, ut ex initio Evangelii eiusdem in exordio statim declaravimus: ubi divini verbi generationem ante tempora ex Patre æternam, eiusque Incarnationem in tempore ex matre exposuimus. Subinde porro quædam

a) *Luc. XIX. 25.*



notavimus S. Joannis Baptistæ præcursoris Domini verba, quæ Christum æterni Patris Filium indicant ex eodem Evangelista Joanne: qui etiam primum habet Christi de se ipso testimonium in sermone cum Nicodemo, quo idem dicitur, quod in parabola de homine nobili abeunte in regionem longinquam accipere sibi regnum et reverti. *Nemo, sunt Christi verba a), ascendit in cælum, nisi qui descendit de cælo, qui est in cælis: nempe, qui est in sinu Patris b),* ut S. Joannes præcursor in primo suo de Christo testimonio rem explicat, deinde vero aperte Nicodemo Christus unigenitum Dei Filium declarat semetipsum c): *Sic Deus dilexit mundum, ut filium suum unigenitum daret: ut omnis, qui credit in eum, non pereat, sed habeat vitam æternam.* Quod S. Joannes Evangelista in epistola sic exprimit d): *In hoc apparuit charitas Dei in nobis, quoniam Filium suum unigenitum misit Deus in mundum, ut vivamus per eum.* Est hæc divina Evangelii Christi, Verbi incarnati, œconomia, a qua toto cælo aberrarunt Judæi. Vidimus supra, quam frivolis rationibus (ne quid de blasphemia dicam irremissibili in Spiritum sanctum, qua eum in Beelzebub principe dæmoniorum dicebant eiicere dæmonia) signa et opera eius eludebant, quibus se missum a Patre cœlesti coæqualem et naturalem eius Filium esse demonstrabat; quo Christus utebatur ad eos convincendos argumento: *Propterea, ut Joannes Evangelista testatur e), persequerentur Judæi Jesum, quia hæc*

a) Jo. III. 13.

b) Ib. I. 18.

c) Ib. III. 16. etc.

d) I. Jo. IV. 2.

e) Jo. V. 16.

(signa) faciebat in sabbato. *Jesus autem respondit eis: Pater meus usque modo operatur, et ego operor.* Palam se Christus hic prodit verbum illud Domini, quo cœli firmati sunt, ostendens se, nulla sabbati habita ratione, perinde operari ac Patrem, qui nunquam cessat ab opere suo, quo cœlum et terram fecit, perpetuo concursu in conservatione et gubernatione rerum, quas condidit. Intelligebant ex his verbis, Judæi, dum Patrem suum cœlestem compellat, verum se Deum æterni Patris Filium dicere Christum. *Propterea ergo magis quærebant eum Judæi interficere: quia non solum solvebat sabbatum, sed et Patrem suum dicebat Deum* (πατέρα ἰδὼν, proprium filium quem eundem vocat D. Paulus Rom. VIII. 32. non qualem homines vocant Deum Patrem suum, Christusque nos docuit orare *Pater noster*) *æqualem se faciens Deo.* Ex ipsa vero miraculi veritate facti in sabbato, quod utique non inficiabantur, cum ex illo cavillandi ansam arriperent, ostendit suam consensionem coniunctionemque cum Patre creatore rerum, et auctore sabbati, a quo nisi potestatem haberet, non posset præter rerum naturalem ordinem, quod fit in miraculis, quidquam facere. *Amen, amen dico vobis a): non potest Filius a se facere quidquam, nisi quod viderit Patrem facientem: quæcunque enim ille fecerit, hæc et Filius similiter facit. Pater enim diligit Filium, et omnia demonstrat ei, quæ ipse facit; et maiora his demonstrabit ei opera, ut vos miremini etc.* Dum hic dicit: *Quæcunque enim ille*

a) Jo. V. 19.

*fecerit, hæc et Filius similiter facit, iterum se æqualem Patri Deum declarat, unum in substantia a se subsistentem cœternum mox sequentibus verbis a): Sicut enim Pater habet vitam in semetipso; sic dedit et Filio habere vitam in semetipso.*

Provocat postea ad S. Joannem præcurso-  
 rum suum, qui testimonium perhibuit veritati b), at signis  
 nullis testimonium suum firmavit, unde erat veluti  
 testimonium ab homine; Christus autem dicit se  
 habere testimonium maius Joanne c): *Opera enim  
 quæ dedit mihi Pater, ut perficiam ea; ipsa opera, quæ  
 ego facio, testimonium perhibent de me, quia Pater  
 misit me. Et qui misit me, ipse testimonium perhibuit  
 de me. Nempe dum Jesu baptizato vox de cœlo  
 audita est: Hic est Filius meus dilectus, in quo mihi  
 complacui. Jam meminimus, Judæos a Christo  
 signum voluisse de cœlo videre; hucque iterum  
 respiciunt, dum post satiata quinque virorum millia  
 non contenti d), dixerunt ergo ei: Quod ergo tu facis  
 signum, ut videamus, et credamus tibi? quid operaris? Patres  
 nostri manducaverunt manna in deserto, sicut scriptum est:  
 Panem de cœlo dedit eis manducare. Manna datum patri-  
 bus pro pane de cœlo habent. Dixit ergo eis Jesus: Amen,  
 amen dico vobis: Non Moyses dedit vobis panem de cœlo, sed  
 Pater meus dat vobis panem de cœlo verum. Panis enim Dei  
 est, qui de cœlo descendit, et dat vitam mundo. Cum  
 autem eis declarasset, se esse hunc panem, qui  
 de cœlo descendit murmurabant Judæi, quia dixit*

a) Jo. V. 26.  
 VI. 30.

b) Ib. 33.

c) Ib. 36.

d) Ib.

set: *Ego sum panis vivus, qui de cælo descendi, et dicebant: Nonne hic est Jesus filius Joseph, cuius nos novimus patrem et matrem? Quomodo ergo dicit hic: quia de cælo descendi?* Sic cum Jesus a), „mediate festo ascenderet in templum, et doceret, mirabantur, Judæi dicentes: Quomodo hic litteras scit, cum non didicerit? Respondit eis Jesus, et dixit: *Mea doctrina non est mea, sed eius qui misit me etc.* Dicebant ergo quidam ex Jerosolymis: *Nonne hic est, quem quærunť interficere? Nunquid vere cognoverunt principes, quia hic est Christus? Sed hunc scimus unde sit: Christus autem cum venerit, nemo scit, unde sit.*“ Spectabant igitur Judæi in suo Messia aliam adhuc arcanam originem, præter eam ex semine David secundum carnem, quam cum in Christo non agnoscerent, vel hinc maxime eorum perplexitas: *alii dicebant b): Hic est Christus. Quidam autem dicebant: Nunquid a Galilæa venit Christus? Nonne scriptura dicit: Quia ex semine David, et de Bethlehem castello, ubi erat David, venit Christus? Dissensio itaque facta est in turba propter eum.*

Cum tunc Jesus perexisset in montem Oliveti c), et diluculo iterum venisset in templum, hac captata occasione concurrente omni populo d), *iterum locutus est eis Jesus dicens: Ego sum lux mundi: qui sequitur me, non ambulat in tenebris, sed habebit lumen vitæ.* Et iterum cum fustollentibus lapides Judæis e),

a) Jo. VII. 14. etc.      b) Ib. 41.      c) Ib. VIII. 1.

d) Ib. 12.      e) Ib. 59.

ut iacerent in eum, Jesus autem abscondens se et exiens de templo offenderet cæcum natum: *Me oportet, inquit, operari opera eius, qui misit me, donec dies est: venit nox, quando nemo potest operari. Quamdiu sum in mundo, lux sum mundi. Hæc cum dixisset exspuit in terram, et fecit lutum ex spuito, et linivit lutum super oculos eius, et dixit ei: Vade, lava in natatoria Siloe (quod interpretatur Missus.) Abiit ergo, et lavit, et venit videns. Iterum posteaquam tot miraculis toties illis contestatus fuisset Christus, unde esset, cum maledixissent homini, qui fuerat cæcus, seque nescire, unde esset, dicerent a), Respondit ille homo, et dixit eis: in hoc enim mirabile est, quia vos nescitis, unde fit, et aperuit meos oculos etc. At illi eiecerunt eum foras. Quod cum audisset Jesus, invenissetque eum, dixit ei b): Tu credis in Filium Dei? Respondit ille, et dixit: Quis est, Domine, ut credam in eum? Et dixit ei Jesus: Et vidisti eum, et qui loquitur tecum, ipse est. At ille ait: Credo Domine. Et procidens adoravit eum. Et dixit Jesus: In iudicium ego in hunc mundum veni: ut qui non vident, videant, et qui vident, cæci fiant: Ad tanta nimirum signa excæcati, ut non vererentur multi ex ipsis dicere: *Demonium habet, et insanit: quid eum auditis? Alii dicebant. . . . Nunquid demonium potest cæcorum oculos aperire c)?* Cum porro encænia essent, ambularetque Jesus in templo in porticu Salomonis, circumdederunt eum Judæi et dicebant ei: Quousque animam nostram tollis? Si tu es Christus, dic nobis palam. Respondit eis Jesus: Loquor vobis, et non creditis: opera,*

a) Jo. IX. 30.    b) Ib. 35.    c) Ib. X. 20.

*quæ ego facio in nomine Patris mei, hæc testimonium perhibent de me: sed vos non creditis, quia non estis ex ovibus meis.* Proxime ante hæc ad Judæos de ovili suo sermonem fecit, cuius ipse et ostium sit, et pastor a): „Ego sum ostium. Per me si quis introierit, salvabitur: et ingredietur, et egredietur, et pascua inveniet. Fur non venit, nisi ut furetur, et mactet, et perdat. Ego veni, ut vitam habeant, et abundantius habeant. Ego sum pastor bonus. Bonus pastor animam suam dat pro ovibus suis.“ Hæc benignissimus salvator ad Judæos, qui ipsum non multo post morte turpissima erant condemnaturi, quos hactenus indefesso labore, sermone et opere tot nimirum miraculis contenderat ad ovile suum vocare. Sed non erant illi ex ovibus suis, de quibus, „oves, ait b), meæ vocem meam audiunt: et ego cognosco eas, et sequuntur me: et ego vitam æternam do eis: et non peribunt in æternum, et non rapiet eas quisquam de manu mea. Pater meus, quod dedit mihi, maius omnibus est: et nemo potest rapere de manu Patris mei. Ego, et Pater unum sumus. Sustulerunt ergo lapides Judæi, ut lapidarent eum. Respondit eis Jesus: Multa bona opera ostendi vobis ex Patre meo, propter quod eorum opus me lapidatis? Responderunt ei Judæi: De bono opere non lapidamus te: sed de blasphemia, et quia tu homo cum sis, facis teipsum Deum.“ Vah impudentissimam perversitatem! dum a paucis, quibus Christus Evangelium bonum illum

a) *Jn. X. 9.*      b) *Ib. 27.*

nuncium salutis prædicavit, annis, atque regionem omnem Judææ benefaciendo percurrit, non possunt non coram testari, vidisse, et audisse mortuos, quos ad vitam revocavit; vivos, ægros a quacunque infirmitate ac languore fanos, cæcos videntes, surdos audientes, claudos ambulantes, a dæmone obsessos liberatos; hæc omnia inquam præ oculis habentes audent adhuc dicere, *de bono opere non lapidamus te, sed de blasphemia: et quia tu homo cum sis, facis teipsum Deum*: qualem tamen, quem se profitebatur, operibus demonstrabat. *Si non facio opera Patris mei a)*, concludit Christus sermonem, et abit, *nolite credere mihi. Si autem facio: et si mihi non vultis credere, operibus credite, ut cognoscatis, et credatis quia Pater in me est, et ego in Patre. Querebant ergo eum apprehendere: et exivit de manibus eorum.*

---

ULTIMUS CHRISTI, RESUSCITATO  
LAZARO, POST INGRESSUM IN JERUSALEM  
AD JUDÆOS SERMO.

XXIII. **V**ide vero, et adora clementiam, et benignitatem Salvatoris nostri post hæc omnia mortis pericula, ut lapidaretur, præcipitaretur, comprehenderetur, quibus sese abscondens subduxit, post tot iniurias, contumelias, calumnias, blasphemias, irrisiones, contemptus; cum nihil proficeret apud Judæos docendo, hortando,

a) Jo. X. 37.

arguendo; cum cæci et furdi essent ad omnia miracula, unum adhuc, dum iam in eo erat, ut expleret opus redemptionis nostræ, urbem Hierosolymitanam ingressurus, reservaverat idque omnium maximum in Bethania patrandum miraculum prope urbem Hierosolymam resuscitando Lazarum ad vitam, atque e tumultu, in quo iam quatuor diebus latuerat mortuus, multis præsentibus Judæis, qui venerant ad consolandas forores; dum alii postea quoque, ut conspicerent ad vitam revocatum, certatim ex urbe accurrunt, quidam vero quod suis oculis viderant, renunciant Pharisæis, et sacerdotibus, ob hanc rem colligentibus concilium.

Quis non sibi in animum induceret, Judæorum tandem commotas esse mentes, atque convictas, dum solemnem iam suum ingressum parante Christo iuxta prophetiam ab evangelistis hac occasione relatam a): „Ecce rex tuus venit tibi mansuetus, sedens super asinam (triumpho equidem iis, quæ futura erant, respondente atque omnem affectati regni terrestris suspicionem amoliente). Plurima autem turba straverunt vestimenta sua in via; alii autem cædebant ramos de arboribus, et sternerant in via: turbæ autem, quæ præcedebant, et sequebantur clamabant dicentes: Hosanna filio David: benedictus, qui venit in nomine Domini: hosanna in altissimis. Et cum intrasset Ierosolymam, com-

a) *Matth. XXI. 5. Jo. XII. 15.*



mota est universa civitas.“ Christus (quod  
 limus eum quoque fecisse, cum incipiens pr  
 tionis fuz munus Jerosolymam primo ing  
 est) mox a) „intravit in templum Dei, et  
 bat omnes vendentes et ementes in templ  
 mensas numulariorum, et cathedras vende  
 columbas evertit, et dicit eis: Scriptum es  
 mus mea domus orationis vocabitur; vos  
 fecistis eam speluncam latronum:“ prout  
 in eo, quod propediem facturi erant, im  
 prophetia: „Et accesserunt ad eum ca  
 claudi in templo, et sanavit eos. Videntes  
 principes sacerdotum et scribæ mirabilia  
 fecit, et pueros clamantes in templo, et di  
 Hosanna filio David! indignati sunt. C  
 autem relictis illis abiit foras extra civita  
 Bethaniam b), ibique mansit. Mane autem  
 tens in civitatem esuriit,“ salutem nimirum  
 orum, quos figurabat arbor fici infrugifera  
 viam, mox arefacta. c) „Et cum venisset  
 plum, accesserunt ad eum docentem pr  
 sacerdotum et seniores populi dicentes:  
 potestate hæc facis? Et quis tibi dedit ha  
 testatem? (quam utique hactenus tot sibi  
 lis asseruit.) Respondens Jesus dixit eis: I  
 gabo vos et ego unum sermonem, quem  
 xeritis mihi, et ego vobis dicam, in qua  
 state hæc facio.“ Interrogatio autem erat d  
 tismo Joannis, an ex Deo esset, an ex h  
 bus, quod cum nescire se dicerent; eos in

a) *Matth. XXI. 12.*b) *Ib. 17.*c) *Ib. 23.*

bolis allocutus, prout iam contestatus erat a), ideo in parabolis loquor eis, quia videntes non vident, et audientes non audiunt, neque intelligunt, tamen adegit, ut ipsi contra se sententiam ferrent; nimirum de duobus filiis, quorum primo dixit pater b): „Fili, vade hodie, operare in vinea mea. Ille autem respondens, ait: Nolo. Postea autem, pœnitentia motus, abiit. Accedens autem ad alterum dixit similiter. At ille respondens, ait: Eo Domine; et non ivit. Quis ex duobus fecit voluntatem patris? Dicunt ei: Primus. Dicit illis Jesus: Amen dico vobis, quia publicani, et meretrices præcedent vos in regnum Dei.“ Sic mox in parabola de vinitore, cuius agricolæ servos ad se missos male tractarunt c), novissime etiam filium hæredem, qualis Christus nos etiam cohæredes tunc constituturus erat d), „quem videntes dixerunt intra se: Hic est Hæres: venite, occidamus eum, et habebimus hæreditatem eius. Et apprehensum eum eiecerunt extra vineam, et occiderunt. Cum ergo venerit Dominus vineæ, quid faciet agricolis illis? aiunt illi: Malos male perdet, et vineam suam locabit aliis agricolis, qui reddant ei fructum temporibus suis?“ Quibus profecto nihil accommodatius dici potuisse nos maxime experimur, quibus in nostram salutem in eorum locum ex gentibus electis vinea Domini locata est: iam tunc vero ipsi etiam e) cum audissent principes sacerdotum et Pharisei parabolam eius;

a) Matth. XIII. b) Ib. XXI. 28. c) Ib. 33. d) Ib. 38.

e) Ib. 45.

*cognoverunt, quod de ipsis diceret; et querentes eum tenere, timuerunt turbas: quoniam eum sicut prophetam habebant.*

Postquam Matthæus a) addidisset parabolam de homine rege, qui fecit nuptias filio suo (quas nobis S. Joannes in Apocalypsi indicat, Lucas b). verò haud absimilem parabolam a Christo propositam in prandio apud principem Pharisæorum memorat de cœna magna) subdit, tunc abeuntes Pharisæos consilium iniisse, ut caperent eum in sermone c), missis discipulis suis, ut interrogarent eum, an censum liceret dare cæsari, ad invidiam illi conflandam affectati regni. Unde illis se sociabant Herodiani, qui nimirum stabant a partibus Herodis, qui ipse summum affectabat imperium, si illud Romanis eripi potuisset. Accesserunt etiam eo die Sadducæi, qui dicunt, non esse resurrectionem, cum Christus de se dixerit: *Ego sum resurrectio et vita*, quibus benigne quidem habitis, tametsi nihil inconvenientius adversantiusque divinæ Evangelii œconomix afferre potuissent, ita respondit, ut ipsi audientes Pharisæi, cum intelligerent, eum silentium illis impoisse, nihilominus iterum convenerint in unum d): *et interrogavit eum unus ex eis legis doctor tentans eum: Magister quod est mandatum magnum in lege?* Christus non dedignatus iuxta ac iam alias in alio legisperito comprobaverat plenitudinem legis et prophetarum con-

a) Matth. XXII. 1. b) Luc. XIV. c) Matth. XXII. 15.  
d) Ib. 39.

stitui in charitate Dei et proximi, respondit a): „Diliges Dominum Deum tuum ex totq corde tuo, et in tota anima tua, et in tota mente tua. Hoc est maximum et primum mandatum. Secundum autem simile est huic: Diliges proximum tuum, sicut te ipsum. In his duobus mandatis univēsa lex pendet et prophetæ,“

Hoc vero ordine charitatis ostenditur, quo nos loco habeat benignissimum numen, sic ipse diligens mundum, *ut unigenitum Filium suum daret* divina Evangelii Christi Verbi incarnati æconomia, quam postremum incredulis illis et pervicacibus demonstraturus b), „Congregatis Pharisæis interrogavit eos Jesus dicens: Quid vobis videtur de Christo? Cuius filius est? Dicunt ei: David, Ait illis: Quomodo ergo David in spiritu vocat eum Dominum, dicens: Dixit Dominus Domino meo: sede a dextris meis, donec ponam inimicos tuos scabellum pedum tuorum?“ Quibus simul verbis indicatur, quæ eos inimicos Domini fui, Christi sedentis a dextris Dei, etiamnum hodie facta maneant. Id quod Christus suis mox verbis intimavit, postremum iam turbas allocutus simul ad discipulos suos converso sermone dum ait c): *super cathedram Moysi sederunt Scribæ et Pharisei divinam nimirum interpretantes legem; omnia ergo quacunque dixerint vobis, servate, et facite: secundum opera vero eorum nolite facere: dicunt enim, et non faciunt etc.* Tunc illis multiplicia illa *Væ*, ut passim etiam

a) *Matth. XXII. 37.*    b) *Ib. 41.*    c) *Ib. XXIII. 1.*

alias, prout meminimus, contra Scribas et Pharisæos ingeminat, accumulaturque: ac primum quidem ob maximum illud omnium, quo se tunc reos, gentem a Christo avertentes, faciebant a):

*Væ autem vobis Scribæ et Pharisei hypocritæ: quia clauditis regnum cælorum ante homines: vos enim non intratis, nec introeuntes finitis intrare.* Ultimo Væ demum, Patres eis obiciens, qui prophetas Messisæ nuncios occiderunt, addit: *Et dicitis, si fuissetis in die patrum nostrorum, non essemus socii eorum in sanguine prophetarum. Itaque testimonio estis vobismetipsis, quia filii estis eorum, qui prophetas occiderunt. Et vos implete mensuram patrum vestrorum. Quod nempe antea illis in parabola de vinitore dixerat, qui vineam suam locavit agricolis, cum autem tempus fructuum appropinquasset, misit servos suos ad agricolas, ut acciperent fructus eius. Et agricolæ, apprehensis servis eius alium ceciderunt, alium occiderunt, alium vero lapidaverunt. Iterum misit alios servos plures prioribus, et fecerunt illis similiter. Novissime autem misit ad eos Filium suum, ut mox retulimus: hic vero Christus plane omnia exprobrat et patrum et suorum ipsorum, quæ erant completura crimina; et quam sint luituri pœnam indicit: „Serpentes genimina viperarum, quomodo fugietis a iudicio gehennæ? Ideo ecce ego mitto ad vos prophetas, et sapientes, et scribas, et ex illis occidetis, et crucifigetis, et ex eis flagellabitis in synagogis vestris, et persequemini de civitate in civitatem: ut veniat super vos omnis sanguis iustus, qui effusus est super*

a) *Matth. XXIII. 13.*

terram, a sanguine Abel iusti usque ad sanguinem Zachariæ, filii Barachiæ, quem occidistis inter templum et altare. Amen dico vobis, venient hæc omnia super generationem istam. Jerusalem, Jerusalem, quæ occidis prophetas, et lapidas eos, qui ad te missi sunt, quoties volui congregare filios tuos, quemadmodum gallina congregat pullos suos sub alas, et noluisti? Ecce relinquetur vobis domus vestra deserta. Dico enim vobis, non me videbitis amodo, donec dicatis: Benedictus, qui venit in nomine Domini.“ Fuerunt hæc postrema ad Judæos verba, quibus dictis egressus est de templo, iam non illuc reversurus.

---

## CHRISTI CUM DISCIPULIS SERMO DE EXCIDIO URBIS, ET ORBIS.

XXIV. **M**ox memorat Matthæus, accessisse discipulos eius, ut ostenderent ei ædificationes templi. *Ipse autem respondens dixit illis: Videtis hæc omnia? Amen dico vobis, non relinquetur hic lapis super lapidem, qui non destruatur a).* Plus modo paucis dixerat: *Ecce relinquetur vobis domus vestra deserta.* Et paulo ante in epiphonemate parabolæ de vinitore modo memoratæ, cuius agricolæ filium hæredem occiderunt, allusione veluti de lapidibus templi facta: „Nunquam, ait *b)*), legistis in scripturis: Lapidem quem reprobaverunt ædificantes, hic factus est in caput anguli. A Domino factum est

*a) Matth. XXIV. 1.      b) Ib. XXII. 42.*

istud, et est mirabile in oculis nostris? Ideo dico vobis, quia auferetur a vobis regnum Dei, et dabitur genti facienti fructus eius.“ Non est ulla tam conspicua oculis nostris prophetia five veteris five novi testamenti in Evangelio (ubi Christus ita de futuris rebus loqui solet, sicuti nos de præteritis) quam hæc de templo destruendo, synagogaque repellenda, ac cultu Judaico; ecclesia vero Christi eius loco constituenda in universo mundo: quod ille mulieri Samaritanæ tam perspicue, Judæis item toties præsertim in parabolis prædixit, primoque post triumphalem in urbem ingressum in ficu arefacta designavit die, idem quod iam antea parabola quoque de arbore fici, quam *habebat quidam plantatam in vinea sua, et venit querens fructum in illa, et non invenit a)*, excidenda.

At vero spem nobis facit Christus eo ipso loco, quo, eos postremum allocutus, dixit *b)*: *Ecce relinquetur vobis domus vestra deserta, dum mox subdit: Dico enim vobis, non me videbitis amodo, donec dicatis: Benedictus, qui venit in nomine Domini.* Spes inquam ad complementum divinæ Evangelii Christi œconomix superest, ut qui verba hæc acclamarunt Judæi in triumphali ingressu in Hierusalem ante suam passionem *c)*, idem facturi sint ad Christum reversi ante secundum adventum suum ad iudicium: ut totum impleatur, quod iam impletum coram ex parte cernimus, quod Jesus

a) *Luc. XIII. 6.*

b) *Matth. XXIII. 38.*

c) *Ib. XXI. 9.*

pastor bonus dixerat a): *Et alias oves habeo, quæ non sunt ex hoc ovili: et illas oportet me adducere, et vocem meam audient, et fiet unum ovile et unus pastor.* Sic implebitur, quod Christus respondit discipulis suis, quando post ultimum illum ad Judæos sermonem, sedente eo in monte Oliveti accesserunt ad ipsum dicentes b): *Dic nobis, quando hæc erunt? et quod signum adventus tui, et consummationis sæculi?* Ubi postquam multa eis prædixit, quæ debeant præcedere, subdit: *Et prædicabitur hoc Evangelium regni in universo orbe, in testimonium omnibus gentibus: et tunc veniet consummatio.* Prosequutus autem Christus fata novissimorum temporum enarrare, ipsumque extremum iudicium, *Ab arbore autem fici,* subdit c), *discite parabolam: cum iam ramus eius tener fuerit, et folia nata, scitis, quia prope est ætas: ita et vos, cum videritis hæc omnia, scitote, quia prope est in ianuis.* An non forte arbor hæc ficus illa arefacta repullulans est populus Judaicus? De quo Apostolus d): „Sed et illi, si non permanserint in incredulitate, inserentur: potens est enim Deus iterum inserere illos. Nam si tu (alloquitur Apostolus Ecclesiam, reiecta synagoga, ex gentilibus electam) ex naturali excisus es oleastro, et contra naturam insertus es in bonam olivam quanto magis ii, qui secundum naturam inserentur suæ olivæ? Nolo enim vos ignorare fratres mysterium hoc (ut non fitis vobisipsis sapientes) quia cæcitas ex parte contigit in Israel, donec

a) Jo. X. 16.

b) Matth. XXIV. 3.

c) Ib. 32.

d) Rom. XI. 23.



plenitudo gentium intraret, et sic omnis Israel salvus fieret, sicut scriptum est: Veniet ex Sion, qui eripiat, et avertat impietatem a Jacob.“ An non forte ad beatam hanc Judæorum sortem pertinet, quod in psalmo dicitur a): *Qui redimit de interitu vitam tuam, qui coronat te in misericordia, et miserationibus. Qui replet in bonis desiderium tuum, renovabitur ut aquila iuventus tua.* Spectata rerum conversione, quam alio opere inscripto *Ecclesia militans regnum Christi in terris* b) notavimus in utraque republica novissimis temporibus futuram coniuncta ultimata R. J. defectione cum conversione Judæorum ad fidem, ut speratur, lucem hæc accipiunt obscurius adhuc emicantem, involutam nempe futurorum temporum illorum caligine. Apud Lucam memoratur, interrogatum a Phariseis Jesum: *Quando venit regnum Dei*, respondisse eis: *Non venit regnum Dei cum observatione: neque dicent: ecce hic, aut ecce illic: Ecce regnum Dei intra vos est!* Exposuit autem deinde discipulis sua ipsorum et novissimorum temporum discrimina: post quæ respondentes dicunt illi: *ubi domine? Qui dixit illis ubicunque fuerit corpus, illuc congregantur et aquila.* Quem locum infra suo loco pluribus edisseremus. Fuit in Judæa corpus Christi a Judæis occisum τὸ πτώμα cadaver. Congregari igitur poterunt ibi Judæi quando renovabitur ut aquilæ iuventus eorum ad Christum conversorum; quemadmodum

a) Psalm. CII. 4.

b) T. II. p. 227. etc. add. T. I. cap. XII. Rom. Imp. factis cum Ecclesiæ novissimis coniuncta p. 57. seqq.

aquila Romanorum signum militare adfuit Hierosolymis ad eius excisionem. Apud Matthæum verba illa ponuntur inter signa secundi adventus Christi a): „Sicut enim fulgur exit ab Oriente, et paret usque in Occidentem: ita erit et adventus Filii hominis. Ubicunque fuerit corpus, illic congregantur et aquilæ. Statim autem post tribulationem dierum illorum, sol obscurabitur, et luna non dabit lumen suum, et stellæ cadent de cælo, et virtutes cælorum commovebuntur: et tunc parebit signum Filii hominis in cælo: et tunc plangent omnes tribus terræ: et videbunt Filium hominis venientem in nubibus cæli cum virtute multa et maiestate etc.“

Equidem promiscue ponuntur signa illa excisionis urbis Hierosolymæ et orbis, seu consummationis sæculi b): *de die autem illa et hora nemo scit, neque angeli cælorum, nisi solus Pater.* Quandoquidem nos semper vigilare vult, quia, ait, *nescitis, qua hora Dominus vester venturus sit.* Apertius utraque desolatio urbis et orbis distinguitur apud Lucam c): *Cum autem videritis circumdari ab exercitu Jerusalem, tunc scitote, quia appropinquavit desolatio eius, quam post annos quadraginta tunc sunt experti, experiunturque, prout mox sequitur d): Et cadent in ore gladii, et captivi ducentur in omnes gentes, et Jerusalem calcabitur a gentibus, donec impleantur tempora nationum.* Ad discipulos gente

a) Matth. XXIV. 27.

b) Ib. 26.°

c) Luc. XXI. 20.

d) Ib. 24.

Judæos loquitur, persequiturque, quæ adventum filii hominis præcessura sint „signa in sole, et luna, et stellis, et pressura gentium præ confusione sonitus maris, et fluctuum: arescentibus hominibus præ timore, et exspectatione, quæ supervenient universo orbī, nam virtutes cœlorum movebuntur. Et tunc videbunt Filium hominis venientem in nube cum potestate magna, et maiestate. His autem fieri incipientibus, respicite, et levate capita vestra: quoniam appropinquat redemptio vestra,“ Affert tunc similitudinem modo explicatam de *grbore fici a)* seu ficulnea, *et omnibus arboribus*. Demum ut læti possint respicere, et levare capita sua, *quoniam appropinquat redemptio vestra*; ne illa excidant cum impiis, cavet suis: *Attendite autem vobis, ne forte graventur corda vestra in crapula et ebrietate, et curis huius vitæ: et superveniat in vos repentina dies illa: tanquam laqueus enim superveniet in omnes, qui sedent super faciem omnis terræ. Hoc igitur bonorum et malorum est discrimen, quod hi cum, iuxta Apostolum b), dixerint pax et securitas: tunc repentinus eis superveniet interitus, sicut dolor in utero habenti, et non effugient. Vos autem fratres non estis in tenebris, ut vos dies illa tanquam fur comprehendat. Prout nimjrum Christus apud Matthæum loquitur c): Illud autem scitote, quoniam si sciret paterfamilias, qua hora fur venturus esset, vigilet utique, et non sineret perfodi domum suam. Ideo et vos estote parati: quia qua nescitis hora,*

a) Luc. XXI. 29.      b) I, Thessal. V. 3.

c) Matth. XXIV. 43.

*Filius hominis venturus est. Faciunt huc, quæ sequuntur de decem virginibus a), quinque prudentibus oleum in lampadibus habentibus, ac vigilantibus, et fatuis quinque, quorum lampades oleo deficiente, dum moram facit sponsus, extinguuntur: Homine item, qui peregre proficiscens vocavit servos suos, et tradidit illis bona sua . . . Post multum vero temporis venit dominus servorum illorum, et posuit rationem cum eis. Quis vero edicere queat, quam vividis perinde nativisque coloribus, ac inductionibus omnia hæc sint oculis exposita, quamque gravi ac Θεοπερίη cum simplicitate procul omnibus rhetoricis pigmentis humanæque sapientiæ verbis proposita, perinde ac ipse ille actus iudicii b): „Cum autem venerit Filius hominis in maiestate sua, et omnes angeli cum eo, tunc sedebit super sedem maiestatis suæ: et congregabuntur ante eum omnes gentes, et separabit eos ab invicem, sicut pastor segregat oves ab hædis. Et statuet oves quidem a dextris suis, hædos autem a sinistris etc.“*

---

## CHRISTUS PROCEEDIT IN JERUSALEM MORITURUS PRO NOBIS.

**XXV. S.** Joannes, qui Evangelium suum post excidium Hierosolymitanum scripsit, fata autem Ecclesiæ consummationem sæculi in Apocalypsi sua adumbravit, silentio hæc, quæ modo diximus,

a) *Matth. XXV.*

b) *ib. 31.*

omnia præterit, etsi in Judæa atque Hierosolymis a Christo dicta, quæ alias fingillatim persequitur, in supplementum reliquorum Evangelistarum, qui potissimum enarrant, quæ a Christo in Galilæa sunt gesta, ubi, præter festa fere Hierosolymis concelebranda, commoratus docuit, ac quam plurima patravit miracula ad finem propemodum vitæ ac ultimam vitæ hebdomadam, de qua Joannes narrat *a)*, Jesum ante sex dies paschæ venisse Bethaniam, ubi Lazarum fuscitaverat a mortuis. *Fecerunt autem ei cœnam ibi: et Martha ministrabat, Lazarus vero unus erat ex discumbentibus cum eo. Maria ergo accepit libram unguenti nardi pistici pretiosi, et unxit pedes Jesu, et extersit pedes eius capillis suis.* Occasionem hanc arripit Christus prædicendi proximam sepulturam suam, sicut non semel aperte prædixerat passionem, mortem, et post tres dies resurrectionem suam. Cum autem eum ibi esse cognovisset turba multa Judæorum, subdit Evangelista, eos venisse illuc. Non propter Jesum tantum, sed ut Lazarum viderent, quem fuscitavit a mortuis; quem vero et ipsum cogitaverunt principes sacerdotum imperceptibili perversitate interficere. Turbam vero in crastinum propterea obviam ei venisse narrat Evangelista *b)*, *Quia audierunt, eum fecisse hoc signum.* Omnia hæc ad præstitutum finem redemptionis nostræ per passionem et mortem suam serviebant Christo, sive amico sive inimico animo fierent: deducebaturque in urbem velut in triumpho, qui paucis post diebus

*a) Jo. XII. 1. etc.      b) Ib. 18.*

erat exaltandus in cruce. *Turba etiam multa a), quæ venerat ad diem festum, cum audissent, quia venit Jesus Jerosolymam, acceperunt ramos palmarum, et processerunt obviam ei, et clamabant: Hosanna, benedictus, qui venit in nomine Domini, Rex Israel.* Cum vellent porro quidam gentiles ex his, qui ascenderant, ut adorarent in die festo, Jesum videre, testatus is, venisse horam, *ut clarificetur Filius hominis b)* incomparabili illa allegoria mortem ac proventuram inde salutem apostolis, desiderium gentium denunciantibus, significavit: *Amen, amen dico vobis, nisi granum frumenti cadens in terram mortuum fuerit, ipsum solum manet: si autem mortuum fuerit, multum fructum affert. Qui amat animam suam, perdet eam: et qui odit animam suam in hoc mundo, in vitam æternam custodit eam.* Hæc apud alios omnes tres Evangelistas aliis occasionibus dicta iam notavimus. Horrore vero iam imminenti immanis, quam perpesurus erat, mortis turbatus animo, *Et quid dicam?* inquit c), *Pater, salvifica me ex hac hora? Sed propterea veni in horam hanc. Pater, clarifica nomen tuum. Venit ergo vox de cælo: Et clarificavi, et iterum clarificabo.* Rogavit Christus, ut clarificetur nomen Patris, *Nomen tuum*; gloriæ autem, quam habet Deus in seipso nihil addi potest. Unde Christus rem omnem, divinam nimirum Evangelii sui œconomiam in cruce consummandam, pandens, *Non propter me, inquit d), hæc vox venit, sed propter vos. Nunc iudicium est mundi: nunc princeps huius mundi*

a) Jo. XII. 12.

b) Ib. 23.

c) Ib. 27.

d) Ib. 30.

*eiicietur foras. Et ego si exaltatus fuerò à terra, omnia traham ad meipsum. Hoc autem dicebat, significans, qua morte esset moriturus: immensa nimirum erga nos charitate, qua maiorem nemo habet, quam ut animam suam ponat quis pro amicis suis, dum is insuper pro nobis mortuus esset, cum adhuc inimici essemus. Atque hinc clarus fit nexus, ac contextus verborum Evangelistæ a): Ante diem festum paschæ, sciens Jesus, quia venit hora eius, ut transeat ex hoc mundo ad Patrem; cum dilexisset suos, qui erant in mundo, in finem dilexit eos: quando nimirum pro dilectis suis seipsum tradidit in mortem.*

## EUCHARISTIÆ INSTITUTIO.

XXVI. Sic nimirum Pascha nostrum immolatus est Christus. Neque enim ob legale, quod instabat, Pascha dixit b): *Desiderio desideravi hoc Pascha manducare vobiscum, antequam patiar.* Erat hoc Pascha, quod, antequam pateretur, ac se ipsum agnum immaculatum in cruce offerret sacrificium cruentum, incruentum iam tunc in cœna discipulis suis exhibuit, de quo loquuntur cæteri tres Evangelistæ c), S. Joannes vero hoc prætermisso, reliquis Evangelistis, ut observat S. Augustinus d), „cum quibus ab initio libri sui raro eadem dixit in Christi altiora subvectus, ad passionis

a) Jo. XIII. 1.      b) Luc. XXII. 15.      c) Matth. XXVI. 26.      Marc. XIV. 22.      Luc. XXII. 19.  
d) Lib. IV. de consensu Evangel. c. 10. et ult.

tempus concurrens, ipsam dominicam cœnam, de qua nullus eorum tacuit, multo opulentius, tanquam de cellario dominici pectoris, ubi discumbere solebat, exhibuit.“

Tres reliqui Evangelistæ, veluti etiam S. Paulus uno ore nobis narrant a), quod Christus gratias agens acceperit panem, et fregerit, similiter et calicem, discipulisque dederit ad edendum et bibendum, clarissimis verbis, esse corpus et sanguinem suum contestatus. Igitur dum in veritate Christus realiter sistitur in Altari, et offertur, quis hic verum sacrificium esse neget a Christo in ultima cœna institutum, et in memoriam cruenti sacrificii in cruce fieri præceptum? dicente: „Hoc est corpus meum, quod pro vobis tradetur: Hoc facite in meam commemorationem. Similiter et calicem postquam cœnavit dicens: Hic calix novum testamentum est in meo sanguine: hoc facite quotiescunque bibetis in meam commemorationem. Quotiescunque enim manducabitis panem hunc, vel calicem bibetis mortem Domini annuntiabitis, donec veniat.“ Quæ verba iuge ac perenne sacrificium significant usque ad adventum Domini. Ingratos vero illos (contra ipsum Eucharistiæ nomen, quod sacrificio huic a prima institutione inditum est) pro tanto beneficio iam S. Ignatius notavit b), „eoquod non confiteantur, Eucharistiam carnem esse Salvatoris nostri Jesu Christi; quæ pro peccatis nostris passa est, quam Pater

a) I. Cor. XI. 24.

b) Epist. ad Smyrnicos, n. 7.



sua benignitate fuscitavit. Qui ergo contradicunt huic dono Dei, altercantes moriuntur. " Alludit hic S. Joannis discipulus ad invicem litigantes Judæos „dicentes a): Quomodo potest hic nobis dare carnem suam ad manducandum? Dixit ergo eis Jesus: Amen, amen dico vobis: Nisi manducaveritis carnem filii hominis, et biberitis eius sanguinem, non habebitis vitam in vobis. Qui manducat meam carnem, et bibit meum sanguinem, habet vitam æternam: et ego resuscitabo eum in novissimo die. Caro enim mea vere est cibus et sanguis meus vere potus etc." Quam multi quæso sunt hodie, qui cum discipulis illis, quos S. Joannes notat, dicunt b): *Durus est hic sermo, et quis potest eum audire?* moxque subdit; ex hoc multos discipulorum eius abiisse retro, et iam non cum illo ambulasse. Quodsi vero allegorice tantum locutus fuisset Christus, quomodo durus esse sermo potuisset discipulis illis, quem nemo posset audire? Quis dubitet benignissimum salvatorem, quod uno verbo facere potuisset, eos fuisse instructurum, ne retro abirent. At non solum hoc non fecit, verum etiam sententiam suam ac verba firmavit ad duodecim dicendo: *Nunquid et vos vultis abire?* Respondit ergo ei Simon Petrus: *Domine ad quem ibimus? Verba vitæ æternæ habes. Et nos credidimus, et cognovimus, quia tu es Christus Filius Dei.* Sic nos cum tota retro Ecclesia Christi eum, ut cum S. Justino loquar in sua Apologia pro fide christiana, qui per orationem verbi, quod ab

a) Jo. VI. 53.      b) Ib. 61.

*eo est, eucharistia facta est; cibum ex quo carnes nostræ et sanguis per mutationem nutriuntur, ipsius incarnati Jesu et carnem et sanguinem esse, edocti sumus: Grati- que εὐχαριστῶντες, quod dignum et iustum est, gratias pro gratia agentes pro præcipuo hoc divinæ Evangelii Christi Verbi incarnati œconomix monumento hactenus id agimus, quod ibi memorat idem S. Martyr: „dum ei qui præest, ex fratribus offertur panis et poculum aquæ et vini: quibus ille acceptis laudem et gloriam universorum Patri per nomen Filii et Spiritus sancti emittit, et gratiarum actionem pro eo, quod nos hisce dignatus fit, prolixè prosequitur: atque ubi perfecit preces, et gratiarum actionem, populus, qui adest, omnis acclamat, dicens, Amen.“*

## LOTIO PEDUM.

**XXVII.** Lotionem pedum, quæ ceti præparatio communioni eucharisticæ præmissa fuerat, solus commemorat S. Joannes; qui etiam, quæ proditorum Judam attingent, pluribus prosequitur, et in lotionem intentum item a Christo spectans finem, quem post eandem lotionem recumbens indicavit discipulis, cum illi paulo ante, quis eorum videretur esse maior, inter se contendissent: „Scitis, ait, quid fecerim vobis? Vos vocatis me Magister, et Domine: et bene dicitis: sum etenim. An hæc magister humilitatis ex dictatu Evangelii sui dicere

potuisset Christus homo, nisi etiam simul Deus fuisset? Si ergo ego lavi pedes vestros Dominus et Magister: et vos debetis alter alterius lavare pedes. Exemplum enim dedi vobis, ut quemadmodum ego feci vobis, ita et vos faciatis. Amen, amen dico vobis: Non est servus maior domino suo: neque apostolus maior est eo, qui misit illum. Si hæc scitis, beati eritis, si feceritis ea. Non de omnibus vobis dico: ego scio, quos elegerim: sed ut adimpleatur scriptura: Qui manducat mecum panem, levabit contra me calcaneum suum. Amodo dico vobis, priusquam fiat: ut cum factum fuerit, credatis, quia ego sum." Nempe *ego sum, qui sum*, Jehova, Deus; quem se demonstrat ex præscientia futurorum sibi propria tanquam Deo, non ut prophetæ dicebant: *Hæc dicit Dominus*. Christus autem tanquam Deus per totum Evangelium loquitur de futuris perinde ac nos de præteritis. Atque hic quoque se Dominum, uti semper et ubique in Evangelio divina humanis, et vicissim humana divinis miscens, vocat, ubi apostolos, suo etiam exemplo in lotionem pedum, ad humilitatem, procul omni fastu in hierarchia sua, hortatur. Mox tamen iuxta divinam Evangelii Christi, quod apostoli missi in universum mundum erant prædicaturi, æconomiam, divinam eorum firmat, solito quoque suo iuramento, auctoritatem, dum mox subdit a): *Amen, amen dico vobis: Qui accipit, si quem misero, me accipit: qui autem me accipit,*

a) Jo. XIII. 20.

*accipit eum, qui me misit.* Quæ verba etiam leguntur Matth. X. 49. et Luc. X. 16. tam apostolorum quam LXXII. discipulorum gratia prolata.

## ULTIMUS CHRISTI AD DISCIPULOS SERMO.

**XXVIII.** In admirabili illo Christi sermone, quem postquam Judas proditor iam exisset accepta buccella intincti panis habuit, quemque solus nobis uti sublimiora quæque S. Joannes reliquit *a)*, ante omnia discipulis *Mandatum novum* illud denunciâns, *ut diligatis*, inquit, *invicem, sicut dilexi vos, ut et vos diligatis invicem.* In hoc cognoscent omnes, quia *discipuli mei estis, si dilectionem habueritis ad invicem.* Indicaverat illis modo non solum discessum suum, verum etiam eos non posse venire, quo ipse vaderet. Ne verò conciderent animo, aut fiduciam in eum amitterent, antequam ad præceptum diligendi Deum, quod est primum et maximum, progrediretur, eos primum in fide instruere voluit, ac docere, credere in Deum, esse etiam credere in ipsum, hoc est in Patrem et Filium unum Deum. *Creditis*, ait *b)*, *in Deum, et in me credite.* Tum eos de suo discessu solaturus, *Quia*, ait, *vado parare vobis locum, . . . Et quo ego vado scitis, et viam scitis.* Dicit ei Thomas: Domine nescimus, quo vadis: et quomodo possumus viam scire?

*a)* Jo. XIII. 34.

*b)* Ib. XIV. 1.

*Dicit ei Jesus: Ego sum via, et veritas, et vita. Nemo venit ad Patrem, nisi per me. Est hæc divina Evangelii Christi Verbi incarnati œconomia, ut suis locum per mortem suam pararet in regno Patris sui. Cui ut se æqualem ostenderet, Non creditis, ait a), quia ego in Patre, et Pater in me est? Verba quæ ego loquor vobis, a me ipso non loquor. Pater autem in me manens, ipse facit opera. Signa nimirum seu miracula, per quæ Christus se a Patre missum demonstravit; unde subdit: alioquin propter opera ipsa credite. Ut vero opera hæc perinde sua ac Patris esse ostenderet: Amen, amen, pergit, dico vobis, qui credit in me, opera, quæ ego facio, et ipse faciet, et maiora horum faciet: quia ego ad Patrem vado, et quodcunque petieritis Patrem in nomine meo, hoc faciam. Se facturum dicit, quod petierint Patrem in nomine suo, ut glorificetur Pater in Filio, Patri nimirum consubstantiali. Post hæc etiam eis Spiritum sanctum manifestat (quibus postea præceptum dederat eundi in universum mundum, prædicandi Evangelium, et baptizandi b) „in nomine Patris, et Filii, et Spiritus sancti) si diligitis me, mandata mea servate. Et ego rogabo Patrem, et alium Paraclitum dabit vobis, ut maneat vobiscum in æternum, spiritum veritatis, quem mundus non potest accipere . . . Paraclitus autem Spiritus sanctus c), quem mittet Pater in nomine meo, ille vos docebit omnia, et suggeret vobis omnia, quæcunque dixero vobis. Pacem relinquo vobis, pacem meam, do vobis,“*

a) Jo. XIV. 10.

b) Ib. 15.

c) Ib. 26.

abiturus ad Patrem, missurusque consolatorem optimum in malis huius vitæ in hoc mundo; *non quomodo mundus dat, ego do vobis*, ait. *Non turbetur cor vestrum neque formidet etc.*

Sic intrepidè procedens iam Christus, *surgite*, ait, *eamus*, ut mox iterum repetit procedens postea in occursum paratorum cum Juda lictorum. Experturus, quomodo in amaritudinem conversa sit vitis, a Patre suo plantata, iam aliena: *Ego*, inquit a), *sum vitis vera, et Pater meus agricola est. Et: Ego sum vitis, vos palmites, qui manet in me et ego in eo, hic fert fructum multum . . . in hoc clarificatus est Pater meus b), ut fructum plurimum afferatis, et efficiamini mei discipuli. Sicut*, ait, *dilexit me Pater, et ego dilexi vos. Est hic admirabilis ille ac plane divinus ordo amoris. Sicut Pater Filium sibi per naturam divinam consubstantiali, ita nos Filius nobis per humanam naturam consubstantialis diligit, et a nobis diligi vult, idem Deus et homo; ut sicut per unionem hypostaticam utraque coniuncta est, ita etiam in dilectione maneat, divina Evangelii Christi Verbi incarnati œconomia. Manete in dilectione mea. Si præcepta mea servaveritis, manebitis in dilectione mea, sicut et ego Patris mei præcepta servavi, et maneo in eius dilectione. Christus autem præcepta Patris sui servavit factus obediens usque ad mortem, mortem autem crucis, manens in dilectione eius, ita et nos servando præcepta Christi manere in eius dilectione debe-*

a) Jo. XV. 1.

b) Ih. 5.

mus. Atque hinc mandatum novum illud, de quo primum mentionem fecerat recapitulans declarat, quomodo velit, ut invicem diligant sese discipuli sui, sicut ipse eos dilexit a): *Hoc est praeceptum meum, ut diligatis invicem, sicut dilexi vos. Maiorem hac dilectionem nemo habet, ut animam suam ponat quis pro amicis suis. Vos amici mei estis, si feceritis, quae ego praecipio vobis etc.* Tum vero animos eorum praeparans ad ea, quae eos manebant mala a mundo, ut Christo a Iudæis, *Hæc, ait b), mando vobis, ut diligatis invicem. Si mundus vos odit, scitote, quia me priorem vobis odio habuit etc.* Postquam dixisset, quis esset mundus, et quae ab illo eos mala exspectarent, de suo discessu ad Patrem ex adventu Paracliti eos solaturus, *Quia, inquit c), hæc locutus sum vobis, tristitia implevit cor vestrum. Sed ego veritatem dico vobis: expedit vobis, ut ego vadam: Si enim non abiero, Paraclitus non veniet ad vos; si autem abiero, mittam eum ad vos.* Alibi promisit discipulis suis, se cum illis futurum usque ad consummationem sæculi, hic autem toties repetit, se abiturum. Oportebat Christum nempe humana natura indutum post mortem et resurrectionem suam corporaliter intrare in gloriam suam; qui vero unus cum Spiritu sancto perinde ac Patre Deus semper nobis adfuturus esset, iam singulariter per redemptionis suae gratiam, de his certos et securos esse volens „adhuc multa, ait d), habeo vobis dicere, sed non potestis portare

a) Jo. XV. 12.

b) Ib. 17.

c) Ib. XVI. 6.

d) Ib. 12.

modo. Cum autem venerit Spiritus ille veritatis, docebit vos omnem veritatem: non enim loquetur a semetipso; sed quæcunque audiet, loquetur, et quæ ventura sunt, annuntiabit vobis. Ille me clarificabit: quia de meo accipiet, et annuntiabit vobis. Omnia quæcunque habet Pater, mea sunt. Propterea dixi: quia de meo accipiet, et annuntiabit vobis.“ Deinceps iterum mala eis in mundo perferenda prædicens, solatur eos, quod tristitia eorum sit convertenda in gaudium: certa fiducia item obtinendi, quidquid petierint Patrem in nomine suo: *Usquemodo non petistis quidquam Patrem in nomine meo: Petite, et accipietis, ut gaudium vestrum sit plenum.* Tum demum divinam Evangelii Verbi incarnati œconomiam omnem complexus: „Ipse Pater, inquit a), amat vos, quia vos me amastis, et credidistis, quia a Deo exivi. Exivi a Patre, et veni in mundum: iterum relinquo mundum, et vado ad Patrem. Dicunt ei discipuli eius: Ecce nunc palam loqueris, et proverbium nullum dicis: nunc scimus, quia scis omnia, et non opus est tibi, ut quis te interroget: in hoc credimus, quia a Deo existi.“

a) Jo. XVI. 27.



---

 ORATIO CHRISTI AD PATREM.

XXIX. **P**ostremum ipsam hanc divinam Evangelii œconomiam Christus Patri suo cœlesti *suble-*  
*vatis oculis in cœlum* ardenti oratione comendans,  
*dixit: Pater venit hora, clarifica Filium tuum, ut*  
*Filius tuus clarificet te a).* Nisi Christus Deus  
 fuisset, cui soli debetur honor et gloria, dicere  
 non potuisset: Pater clarifica Filium; nec clarifi-  
 care potuisset Patrem, si Filius hominis Christus  
 Jesus simul non etiam Filius Dei fuisset. Instabat  
 iam tempus, de quo Christus ad Nicodemum *b):*  
*Sicut Moyses exaltavit serpentem in deserto; ita exal-*  
*tari oportet Filium hominis: ut omnis, qui credit in*  
*ipsum, non pereat, sed habeat vitam æternam. Sic*  
*enim Deus dilexit mundum, ut Filium suum unigenitum*  
*daret. Hoc est, quod sequitur in Oratione Christi.*  
*Sicut dedisti ei potestatem omnis carnis, ut omne,*  
*quod dedisti ei, det eis vitam æternam. Sed quia ut*  
*pergit in colloquio cum Nicodemo c), lux venit*  
*in mundum, et dilexerunt homines magis tenebras,*  
*quam lucem: erant enim eorum mala opera; seu ut*  
*Evangelista prius dixerat d): Erat lux vera, quæ*  
*illuminat omnem hominem venientem in hunc mundum.*  
*In mundo erat, et mundus per ipsum factus est, et*  
*mundus eum non cognovit. Hinc Christus orans Pa-*  
*trem: Non pro mundo rogo, ait, sed pro his, quos*  
*dedisti mihi, quia tui sunt, apostoli nimirum, de*  
*quibus, Ego, inquit e), dedi eis sermonem meum, et*

a) Jo. XVII. 1.

b) Ib. III. 14.

c) Ib. 19.

d) Ib. I. 9.

e) Ib. XVII. 14.

*mundus eos odio habuit, quia non sunt de mundo, sicut et ego non sum de mundo. Non rogo, ut tollas eos de mundo, quos nimirum misit in universum mundum ad prædicandum Evangelium. Unde postquam rogasset Patrem, ut fervet eos a malo, mundo scilicet in maligno posito, singulariter pro eis rogat a): Sanctifica eos in veritate. Sermo tuus veritas est: quoniam nempe eis per Evangelium commissus fuit, ut annuntiarent omni creaturæ. Quare id, quod ante omnia pro eis orat b): Pater sancte, serva eos in nomine tuo, quos dedisti mihi: ut sint unum, sicut et nos, idem rogat deinde etiam pro eis, qui credituri sunt per verbum eorum in me: ut omnes unum sint, sicut tu Pater in me, et ego in te: ut et ipsi in nobis unum sint: ut credat mundus, quia tu me misisti. Et ego claritatem, quam dedisti mihi, dedi eis: ut sint unum, sicut et nos unum sumus. Ego in eis, et tu in me: ut sint consummati in unum per baptismum, quo in Christo regeneramur in adoptionem filiorum Dei, humanitati autem Christi hypostatice divinitati unitæ peculiariter per participationem corporis et sanguinis Christi unimur ad beatam immortalitatem in vitam æternam.*

Suo loco infra uberius explicatum dabimus mysterium hoc corporis et sanguinis Domini, cuius primum participes facti sunt in ultima cœna apostoli sacrificio incruento ante cruentum Christi in cruce, qui de seipso dixerat c): *Ego sum panis vitæ*. Quia autem murmurabant Judæi, quod dixisset:

a) Jo. XVII. 17.

b) Ib. 11.

c) Ib. VI. 35.

*Ego sum panis vivus, qui de celo descendi, hoc eis iterum atque significantius ad id, quod dixerat, panem hunc dare vitam mundo, declarans: Ego sum, inquit a), panis vita. Patres vestri manducaverunt manna in deserto, et mortui sunt. Hic est panis de celo descendens: ut si quis ex ipso manducaverit, non moriatur morte scilicet animæ æterna. Tum iterum de vita æterna corporis in resurrectione carnis ad beatam immortalitatem b): „Qui manducat meam carnem, et bibit meum sanguinem, habet vitam æternam: et ego resuscitabo illum in novissimo die. Caro enim mea vere est cibus; et sanguis meus vere est potus. Qui manducat meam carnem, et bibit meum sanguinem, in me manet, et ego in illo. Sicut misit me vivens Pater, et ego vivo propter Patrem: et qui manducat me, et ipse vivet propter me.“ Hoc est, quod demum rogat in ultima illa ante passionem suam oratione, paulo postquam apostolos suos corporis et sanguinis sui participes reddidisset c): „Pater, quos dedisti mihi, volo, ut ubi ego sum, et illi sint mecum: ut videant claritatem meam, quam dedisti mihi: qui dilexisti me ante constitutionem mundi. Pater iuste, mundus te non cognovit, ego autem cognovi te: et hi cognoverunt, quia tu me misisti. Et notum feci eis nomen tuum, et notum faciam: ut dilectio, qua dilexisti me, in ipsis sit, et ego in ipsis.“ Hoc demum fiet, quando Deo summo bono fructi benedicti filii Patris nostri in cœlis videbimus eum*

a) Jo. VI. 48.

b) Ib. 55.

c) Ib. XVII.

sicuti est, et revelata facie amabimus eum. My-  
 sterium hoc in loco parallelo nobis alibi pandit  
 idem dilectus Christi discipulus hisce verbis a):  
 „Videte, qualem charitatem dedit nobis Pater, ut  
 filii Dei nominemur et simus. Propter hoc mun-  
 dus non novit nos: quia non novit eum. Cha-  
 rissimi, nunc filii Dei sumus: et nondum appa-  
 ruit, quid erimus. Scimus, quoniam cum appa-  
 ruerit, similes ei erimus, quoniam videbimus eum  
 sicuti est. Et omnis, qui habet hanc spem in eo,  
 sanctificat se, sicut et ille sanctus est.“ Quæ est  
 autem nostra in hac spe sanctificatio, nisi pro-  
 fectus charitatis nostræ in hac vita? qua in via  
 sumus tanquam filii Dei ad patriam nostram in  
 cœlis, ubi evacuabitur, quod imperfectum est in  
 charitate, quæ iuxta apostolum b) „nunquam ex-  
 cidit, five prophetiæ evacuabuntur, five linguæ  
 cessabunt, five scientia destruetur. Ex parte enim  
 cognoscimus, et ex parte prophetamus. Cum  
 autem venerit, quod perfectum est, evacuabitur,  
 quod ex parte est. Cum essem parvulus, loque-  
 bar ut parvulus, sapiebam ut parvulus, cogita-  
 bam ut parvulus. Quando autem factus sum vir,  
 evacuavi, quæ erant parvuli. Videmus nunc per  
 speculum in ænigmate: tunc autem facie ad fa-  
 ciem. Nunc cognosco ex parte, tunc autem  
 cognoscam, sicut et cognitus sum.“ Est hoc  
 mysterium, de quo idem apostolus iam prius in  
 eadem epistola locutus fuerat in parallelo quoque  
 loco, ultimis illis Christi in Oratione ad Patrem

a) I. Jo. III. 1.    b) I. Cor. XIII. 8.

suum verbis a): „Sapientiam autem loquimur inter perfectos; sapientiam vero non huius sæculi, neque principum huius sæculi, qui destruuntur: sed loquimur Dei sapientiam in mysterio, quæ abscondita est, quam prædestinavit Deus ante sæcula in gloriam nostram, quam nemo principum huius sæculi cognovit: si enim cognovissent, nunquam Dominum gloriæ crucifixissent. Sed sicut scriptum est: Quod oculus non vidit, nec auris audivit, nec in cor hominis ascendit, quæ præparavit Deus iis, qui diligunt illum.“

## CHRISTI PASSIO ET MORS.

XXX. Christus Jesus Deus et homo, qui se oratione ultima ante passionem et mortem suam declaravit mediatorem Deum inter et homines, talem se exhibiturus per passionem suam, dum humiliavit semetipsum usque ad mortem, mortem autem crucis, semper tamen in hoc stupendæ humiliationis statu Deum se simul et hominem monstravit: undique resplendente divina Evangelii Christi Verbi incarnati œconomia. Ubi vero ante omnia id est animadvertendum, omnes quatuor Evangelistas prolixos quam maxime esse in historia passionis ac mortis Christi in cruce, uti etiam deinceps apostoli in annunciando Evangelio. Ex quibus D. Paulus I. Cor. I. 23.: *Nos autem, scribit, prædicamus Christum crucifixum: Judæis qui-*

a) I. Cor. II. 6.

*dem scandalum, gentibus autem fultitiam; ipsis autem vocatis Judæis, atque Græcis, Christum Dei virtutem, et Dei sapientiam. Quibus nimirum datum est, ut possint magnitudinem bonitatis Dei, ac sublimitatem Christi in maxima humilitate (dum humiliavit semetipsum factus obediens usque ad mortem, mortem autem crucis) comprehendere iuxta eundem apostolum Eph. III. 18. cum omnibus sanctis, quæ sit latitudo, et longitudo, et sublimitas et profundum. Scire etiam supereminentem scientiæ charitatem Christi, qua maiorem nemo habet, quam ut animam suam ponat pro amicis suis.*

Absoluta igitur oratione narrat S. Joannes a), egressum Jesum trans torrentem Cedron cum discipulis suis, ubi erat hortus, præteritis iis, quæ reliqui Evangelistæ de agonia Christi perhibent, quippe cui propositum erat, uti initio statim notavimus, contra hæreticos Judaizantes divinitatem Christi, œconomiam nempe divinam Verbi incarnati repræsentare b), *Jesus itaque, inquit, sciens omnia, quæ ventura erant super eum, processit, eum nobis omniscium, rerumque futurarum omnium præscium sistens, prout ipsum proxime ante hanc orationem discipulis prædixisse idem memorat, quod mox in horto factum fuit. Diserte etiam præ cæteris S. Joannes in cœna prodicionem Judæ enarrat, a Christo sibi super pectus eius recumbenti singulariter manifestatam. Ipse porro Joannes cum Petro missus fuerat in civitatem ad pa-*

a) Jo. XVIII. 1.

b) Ib. 4.

randum pascha præclaro haud minus divinitatis suæ argumento, quam cum duos itidem discipulos misit in castellum ad solvendum adducendumque sibi pullum asinæ a).

Idem S. Joannes b), qui introduxerat Petrum in atrium pontificis, testis erat vaticinii de negatione Petri, et proditiōis Judæ in horto. Ubi idem S. Joannes c) Christum Deum Jehova nobis sistit, prout iam non femel notavimus. Dum nempe missam ad eum capiendum cohortem, et a pontificibus et Pharisæis ministros interrogat, quem quærerent? *Ut dixit eis d): EGO SUM, Dei Jehova nomine prostrati, abierunt retrorsum, et ceciderunt in terram.* In eo etiam, quod sequitur, divini a Patre mandati se potentia ostendit, dum iterum interrogavit eos: *Quem quæritis? Illi autem dixerunt: Jesum Nazarenum. Respondit Jesus: Dixi vobis, quia ego sum: si ergo me quæritis, finite hoc abire. Ut impleretur sermo, quem dixit: Quia quos dedisti mihi, non perdidisti ex eis quemquam.* Sunt vero hæc verba ex Christi oratione ad Patrem apud eundem e), ex qua mox quædam attulimus. Ipse vero Christus tradidit se, *quia ipse voluit*, qui Petrum iubens gladium mittere in vaginam dixit f): *Calicem, quem dedit mihi Pater, non bibam illum?* Addit Matthæus huic Christi ad Petrum sermoni g): *An putas, quia non possum rogare Patrem meum, et*

a) Matth. XXI. 1. Marc. XI. 1. Luc. XIX. 30.

b) Jo. XVIII. 16. c) Ib. 3. d) Ib. 6. e) Ib. XVII. 12.

f) Ib. XVIII. 11. g) Matth. XXVI. 53.

*xhibebit mihi modo plusquam duodecim legiones angelorum? Quomodo ergo implebuntur scriptura, quia sic oportet fieri? a) Idem debitum sibi unigenito Filio Dei angelorum ministerium spectant, quæ Christus respondit Pilato interroganti, an esset rex Judæorum b)? „Respondit Jesus: Regnum meum non est de hoc mundo. Si ex hoc mundo esset regnum meum, ministri mei utique decertarent, ut non traderer Judæis: nunc autem regnum meum non est hinc. Dixit itaque illi Pilatus: Ergo rex es tu? Respondit Jesus: Tu dicis, quia rex sum ego. Ego in hoc natus sum, et ad hoc veni in mundum, ut testimonium perhibeam veritati: Omnis, qui est ex veritate, audit vocem meam.“*

Etsi vero Pilatus *ex veritate* non esset, nec quid est veritas, audire abiens vellet, constanter tamen huic inhæsit de Christo rege veritati. Et dum Judæi alterum caput accusationis arriperent dicentes c): *Nos legem habemus, et secundum legem debet mori, quia Filium Dei se fecit. Cum ergo audisset Pilatus hunc sermonem, magis timuit: neque vero hic a veritate alienus erat Pilatus sicut princeps sacerdotum, Christum asseverans blasphemare, ipse blasphemus, adiurans illum per Deum vivum, ut, ait d), dicas nobis, si tu es Christus Filius Dei. Dicit illi Jesus: Tu dixisti, quæ est affirmantis vox; unde et addit: Verumtamen dico vobis, amodo videbitis Filium hominis sedentem a dextris virtutis Dei, et*

a) *Isa. LIII. 10.* b) *Jo. XVII. 36.* c) *ib. XIX. 17.*

d) *Matth. XXVI. 63.*



venientem in nubibus cæli. Sic etiam Judæi blasphemantes insultabant Christo iam in cruce pendenti a), moventes capita sua et dicentes: *Vah qui destruis templum Dei, et in triduo illud reedificas: salva temetipsum: si Filius Dei es, descende de cruce, dum e contra b) Centurio, et qui cum eo erant custodientes Jesum, viso terra motu, et his quæ fiebant, timuerunt valde dicentes: Vere Filius Dei erat iste. Ex Gentilium nimirum numero erant hi milites prætorix cohortis, ad quos transferendum iam erat regnum Dei, ablatum filiis regni Judæis, destructo, et in perpetua ruina mansuro templo illo, de quo et Christum in cruce iterum blasphemabant, cum iam fugillasset exordientem munus prædicationis suæ, dum vendentes et ementes ex templo expellit c); Judæi autem signum ab eo peterent, quia hæc faceret; ad quod respondebat ille: *solvite templum hoc, et in tribus diebus excitabo illud. Dixerunt ergo Judæi: Quadraginta et sex annis edificatum est templum hoc, et tu in tribus diebus excitabis illud? Fecit utrumque Christus, et templum corporis sui post tres dies resurgendo excitavit; et Judæorum templum post quadraginta annos destruxit. Decurrunt quadraginta hi anni a primo prædicationis Christi anno, ut adeo et hic illud psalmistæ locum habeat: Quadraginta annis proximus fui generationi huic, et dixi: semper hi errant corde, ipsi vero non cognoverunt vias meas, quibus iuravi in ira mea, si introibunt in requiem meam.**

a) Matth. XXVII. 39. b) Ib. 54. c) Jo. II. 14.

## CHRISTI POST PASSIONEM ET MORTEM SUAM RESURRECTIO; ET ASCENSIO IN COELUM.

**XXXI.** **M**arci XV. 39. de centurione, de quo modo locuti sumus, dicitur: *Videns autem centurio, qui ex adverso stabat, quia sic clamans exspirasset, ait: Vere hic homo Filius Dei erat; rem quippe supra naturam esse intellexit, sic clamantem hominem animam reddere. Ipse nimirum, qui oblatuſ est, quia ipse voluit, sic etiam exposuit animam, tradens Patri cœlesti spiritum a), clamans voce magna: Pater; in manus tuas comendo spiritum meum. Et hæc dicens, exspiravit. Ut homo volens, dum vivit, spirat, sic Christus, dum mori vult, exspirat. Matthæus perinde ac Lucas dicunt, voce magna clamantem reddidisse spiritum. Mox subdit ille b): „Et ecce velum templi scissum est in duas partes a summo usque deorsum: et terra mota est, et petrae scissæ sunt: et monumenta aperta sunt: et multa corpora sanctorum, qui dormierant, surrexerunt. Et exeuntes de monumentis post resurrectionem eius, venerunt in sanctam civitatem, et apparuerunt multis;“ post resurrectionem Christi nimirum, ad quam iuxta eundem c) „Et ecce terræ motus factus est magnus. Angelus enim Domini descendit de cœlo: et accedens revolvit lapidem, et sedebat super eum. Erat autem aspectus eius sicut fulgur: et vestimentum eius sicut nix. Præ timore autem eius exterriti sunt custodes, et facti sunt velut mortui.“ Admirabilis sane et stupendus cum terræ motu mag-*

a) *Luc. XXIII. 46.* b) *Matth. XXVII. 51.* c) *Ib. XXVIII. 2.*

no humanis oculis ac imaginatione sese repræsentat aspectus ac sessio angeli fulgidi super lapidem sepulchri. Quem aspectum ferre non potuerunt custodes exterriti præ timore; hunc vero mulieribus affatus tollit angelorum, quos illis apparuisse omnes Evangelistæ testantur; apud Lucam vero memorantur *a) mulieres quædam*, quæ, ut loquuntur duo discipuli euntes in Emaus, *ex nostris terruerunt nos, quæ ante lucem fuerunt ad monumentum, et non invento corpore eius venerunt dicentes, se etiam visionem angelorum vidisse, qui dicunt eum vivere*. Ex his mulieribus erat prior Maria Magdalene, cui Christus ipse primus apparuit, eamque cum læto illo, omnem spem humanam superante, semper præ oculis mentis habendo, unice salutari nuncio, quod est divinæ Evangelii Christi Verbi incarnati œconomix complementum, mittit ad fratres suos, quos in apostolis divino hoc nomine omnes suæ redemptionis participes compellat. *Qui enim sanctificat, et sanctificantur, ex uno omnes. Propter quam causam non confunditur fratres eos vocare b)*; ut cum unigenito Filio filii Dei nominemur et simus, fratres Christi: qui naturam nostram in unionem hypostaticam divinitatis suæ assumens, quam D. Paulus l. c. prosequitur divinam Evangelii Christi Verbi incarnati œconomiam consummavit in cruce mortuus, atque a mortuis resurgens nomen Patris sui cœlestis fratribus suis se denuntiaturum iam per Psalmistam prænuntiavit, dicens, ut ab apostolo notatur *c)*, *Nunciabo nomen tuum fratribus meis:*

*a) Luc. XXIV. 22.*

*b) Hebr. II. 11.*

*c) Ps. XVII. 13*

*in medio Ecclesie laudabo te.* Et iterum a): „Ecce ego et pueri mei, quos dedit mihi Deus. Quia ergo pueri communicaverunt carni, et sanguini, et ipse similiter participavit eisdem: ut per mortem destrueret eum, qui habebat mortis imperium, id est, diabolus: et liberaret eos, qui timore mortis per totam vitam obnoxii erant servituti.“ Quanta vero quam immensa ac inenarrabili quæso dignatione hoc factum est solo Deo digna, ut in libertatem vindicati, facti consortes divinæ in Verbo incarnato naturæ b) adoptionem filiorum reciperemus. Quoniam autem estis filii, misit Deus spiritum filii sui in corda vestra, clamantem: Abba, Pater. Hoc igitur primum est, quod Christus ex mortuis resurgens per Mariam Magdalenam, cui primæ ad sepulchrum currenti primo apparuit, denunciare nobis voluit in apostolis, non solum fratres salutans, verum etiam communem Patrem, et Deum suum et nostrum declarans, per adoptionem scilicet filiorum Dei, qua hæredes scribimur regni Christi in cœlis: quorsum se Christus ascendere annuntiat ad Patrem suum, et Patrem nostrum, Deum suum, et Deum nostrum, manifesto simul testimonio c), Quod sumus filii Dei. Si autem filii, et hæredes: hæredes quidem Dei, cohæredes autem Christi, iuxta apostolum: quod idem alibi de Ecclesia Christi ex gentibus testatus: Gentes esse, inquit d), cohæredes et concorporales, et comparticipes promissionis eius in Christo Jesu per Evangelium, cuius divinam

a) Isa. VIII. 18.

b) Gal. IV. 5.

c) Rom. VIII. 16.

d) Eph. III. 6.

hanc œconomiam nobis, omnem sensum omneque desiderium exsuperantibus (ut iam supra etiam attigimus, et suo loco uberius dilucidabimus) in apostolis per M. Magdalenam Christus denuntiavit verbis: *Vade, ait a), ad fratres meos, et dic eis: Ascendo ad Patrem meum, et Patrem vestrum: Deum meum, et Deum vestrum.* Quod vero diffident apostoli muliebri forte phantasie, id ipsum ad rei firmamentum facit, ne ex condito res acta ad fallendum videri posset; cum palam hinc sit, apostolis memoria haud hæsisse, quod illis sæpius cum passione et morte sua etiam resurrectionem prædixit; quando necdum redemptionis ac resurrectionis claram rectamque ideam habebant, quæve passione ac morte Christi funesta magis confundebatur b); unde et Christus discipulos illos duos, qui ei in via occurrenti spem, quam habebant, sed eo sic iam mortuo remiserant animo, quia ipse esset redempturus Israel c), aperuerunt, redarguit: *O stulti, inquit, et tardi corde ad credendum in omnibus, quæ locuti sunt propheta! Nonne hæc oportuit pati Christum, et ita intrare in gloriam suam? Et incipiens a Moyse, et omnibus prophetis, interpretabatur illis in omnibus scripturis, quæ de ipso erant.* Incipiens a Moyse dicit Evangelista, prout etiam Nicodemus dixerat Christus, *sicut Moyses exaltavit serpentem in deserto, ita exaltari oportet Filium hominis;* in cruce nimirum, cuius scandalum cessabat, quando hæc Christum pati debere prædictum esse

a) Jo. XX. 17.      b) Matth. XVII. 21. XX. 18.  
 Marc. IX. 30.      Luc. IX. 44.      c) Ib. XXI. 21.

constabat a prophetis, quorum instar omnium esse potest Psalmista, atque apud hunc ipsum psalmus XXI. *Deus, Deus meus, respice in me, quare me dereliquisti?* Quæ fuerunt ipsa propemodum verba extremum iam spiritum ducentis in cruce. Deinceps vero in hoc psalmo Christus iam ab utero matris suæ *tanquam vermis et non homo, opprobrium hominum et abiectio plebis* sistitur: *omnes videntes me, sequitur, deriserunt me, locuti sunt labiis et moverunt caput;* præsertim autem in eius passione, quam primum *tribulatio proxima* esse cœpit: quando in *horto circumdederunt eum vituli multi, et tauri pingues obsederunt eum in synedrio, in prætorio, et foras adductum a Pilato ad populi conspectum, aperueruntque super eum os suum sicut leo rapiens et rugiens: dum iam sicut aqua effusus est, et dispersa sunt omnia ossa eius, vulnerato toto corpore, sanguineque perfuso quando inde ab agonia in horto factum est cor eius tanquam cera liquescens in medio ventris sui: aruit, tanquam testa virtus eius, et lingua eius adhesit faucibus suis, et in pulverem mortis deductus est, in montem Calvariæ, una omnium voce damnatus ad mortem: quoniam circumdederunt eum canes multi: concilium malignantium obsedit eum. Foderunt manus eius, et pedes eius extendentes et suspendentes in cruce, ut potuerint numerari omnia ossa eius. Ipsi vero consideraverunt, et inspexerunt eum illudentes et impropetantes: et dividerunt sibi milites vestimenta sua, super vestem eius mittentes sortem. Jam vero, Tu autem Domine, clamans,*

• a) *Hebr. V. 7.*      b) *Marc. XVI. 14.*      c) *Jo. XXI. 25.*  
d) *Luc. XXIV. 37.*

b) *Marc. XVI. 14.*

c) Jo. XXI. 25.

d) *Luc. XXIV. 37.*

---

pedes; adhuc autem illis non credentibus et mirantibus præ gaudio, manducasse coram eis, reliquiasque eis dedisse, ultimo demum aperuisse illis sensum, ut intelligerent scripturas, et dixisse eis: „Quoniam sic scriptum est, et sic oportebat Christum pati, et resurgere a mortuis tertia die, et prædicari in nomine eius pœnitentiam, et remissionem peccatorum in omnes gentes, incipientibus a Jerosolyma. Vos autem testes estis horum.“ Illi nimirum, quibus incredulitatem et duritiam cordis exprobraverat, quia iis, qui viderant Christum resurrexisse, non crediderunt: qui primum etiam, dum eis apparet, tam difficulter ad credendum induci potuerunt. Quos demum postquam federe iussit a), quoadusque induerentur virtute ex alto promisso Patris sui spiritu, „Eduxit eos foras in Bethaniam, et elevatis manibus suis benedixit eis. Et factum est, dum benediceret illis, recessit ab eis: et ferebatur in cœlum. Et ipsi adorantes regressi sunt in Jerusalem cum gaudio magno: et erant semper in templo, laudantes, et benedicentes Deum. Amen.“ Quot et quanta quæso ad firmandam resurrectionis fidem documenta! Tot porro divinæ Evangelii Christi Verbi incarnati œconomix argumenta.

a) *Luc. XXIV. 49.*

---



ex utero matris suæ claudus, testis omni exceptione maior miraculi, quod in conspectu totius populi die præterita factum fuerat ad portam templi, *quæ dicitur Speciosa, ad quam quotidie portabatur, ut peteret elemosynam ab introeuntibus templum a*). Ut vero ibi agnoscebatur ab omnibus esse idem, qui fuerat claudus; sic etiam ipsum synedrium, hominem eundem videntes stantem cum eis, qui curatus fuerat, *nihil poterant contradicere b*). Quo vero uno non solum Christi resurrectio, sed etiam totius evangelicæ historiæ veritas invicte demonstratur, quæ ita a primo Incarnationis momento usque ad ascensionem in cælos sibi cohæret, ut aut toti sua fides constet, aut tota neganda atque inter commenta referenda, aut impostura vel fabula habenda; quæ vero in tanta rerum tam mirarum ac publicarum ferie, multitudine ac multiplicitate quomodo agi potuisset, aut publicari a tot personis sibi in conspiratione consentientibus, ac concordibus? tum vero palam etiam litteris mandari eo ipso, quo res contigerunt tempore, quibus ubique contradicebatur, ibique maxime vulgabantur, agebanturque ab hominibus plebeis, simplicibus, rudibus et illiteratis, quales esse apostolos ipsi recognoscunt *Annas princeps sacerdotum, et Caiphas, et Joannes, et Alexander et quotquot erant de genere sacerdotali c*), quos memorat Lucas in iudicium vocasse atque ad suum tribunal Petrum et Joannem, qui miraculi auctores fuerunt: *Videntes autem Petri constantiam, et Joannis, comperto quod homines essent sine literis, et idiotæ, admirabantur,*

a) Act. III.    b) Ib. IV. 14.    c) Ib. 6.

et cognoscebant eos, quia cum Jesu fuerant. Quinimo nec quidem non confiteri potuerunt rei veritatem, dum remotis apostolis conferrent inter se dicentes a) : *Quid faciemus hominibus istis? quoniam quidem notum signum factum est per eos omnibus habitantibus Jerusalem: manifestum est, non possumus negare, frustra comminati, ne ultra loquantur in nomine hoc ulli hominum dum, ut antea virtute magna reddebant apostoli testimonium resurrectionis D. N. J. Deinceps cæsi etiam ibant gaudentes a conspectu concilii, quoniam digni habiti sunt pro nomine Jesu contumeliam pati, non solum Hierosolymis aut in Judæa, sed per universum mundum intrepidi per tormenta, per mortes: qui profecto nec ipsi ita desipere potuissent, nec alios decipere, si Christus non vere resurrexisset. „Tria sunt incredibilia (ut cum S. Augustino b) concludam) quæ tamen facta sunt. Incredibile est Christum resurrexisse in carne, et in cælum ascendisse cum carne: incredibile est mundum rem tam incredibilem credidisse: incredibile est homines ignobiles, infimos, paucissimos, imperitos rem tam incredibilem, tam efficaciter mundo, et in illo etiam doctis persuadere potuisse. Horum trium incredibilium primum nolunt isti, cum quibus agimus, credere, secundum coguntur et cernere; quod non inveniunt, unde fit factum, si non credunt tertium. Resurrectio certe Christi, et in cælum cum carne, in qua resurrexit, ascensio, toto iam mundo prædicatur et creditur: si credibilis non est, unde toto terrarum orbe iam credita est? Si multi nobi-*

a) *Act. IV. 16.*b) *Lib. II. de civit. Dei. c. 5.*

---


les, sublimes, docti eam se vidisse dixerunt, et quod viderunt, diffamare curarunt; eis mundum credidisse non mirum est; sed istos adhuc credere nolle perdurum est: si autem, ut verum est, paucis, obscuris; minimis, indoctis eam se vidisse dicentibus et scribentibus credidit mundus; cur pauci obstinatissimi, qui remanserunt, ipsi mundo iam credenti adhuc usque non credunt? qui propterea numero æquo ignobilium, infimorum, imperitorum hominum credidit, quia in tam contemptibilibus testibus multo mirabilius divinitas se ipsa persuasit. Eloquia namque persuadentium, quæ dicebant, mira fuerunt facta, non verba. Qui enim Christum in carne resurrexisse, et cum illa in cælum ascendisse non viderant, id se vidisse narrantibus, non loquentibus tantum, sed etiam mirifica facientibus signa credebant. Si vero per Apostolos Christi, ut eis crederetur, resurrectionem, et ascensionem prædicantibus Christi, etiam ista miracula facta esse non credunt, hoc nobis unum grande miraculum sufficit, quod eam terrarum orbis sine ullis miraculis credidit.

---

DE  
S U B L I M I  
IN  
EVANGELIO  
C H R I S T I  
CAPITA SELECTA.

Quando quidem divinorum eloquiorum natura in paucis verbis multas sententiarum affert divitias, et ineffabilem diligenter scrutari volentibus thesaurum largitur; proinde obsecro ne quid in facris literis perfunctorie aut obiter prætereatur, sed etiamsi nomina recenseantur vel historiæ narrentur reconditum investigemus thesaurum. Nam ideo Christus dicebat: *scrutamini scripturas*. Quia non ubique in superficie mens scripturæ invenitur, sed opus est scrutinio multo ut nihil in profundo latens, nobis remaneat absconditum etc.

*S. Jo. Chrysost. Hom. XXIV. in Genes.  
T. IV. p. 216. D.*



## CAPUT I.

### VERBI DIVINITAS.

In principio erat *Verbum*, et *Verbum* erat  
apud *Deum*, et *Deus* erat *Verbum*. Hoc  
erat in principio apud *Deum*, omnia  
per ipsum facta sunt. Joan. I. 1.

Suapte se manifestat sublime illud, atque  
distantia infinita et diversitas, quæ est inter  
Moysis verba Gen. I. 1: *In principio crea-*  
*vit Deus cælum, et terram*, et hæc S. Joan-

---

is: *In principio erat Verbum*, quibus æterni-  
tatem, atque adeo divinitatem Verbi uno  
verbo declarat. „Hoc est, ut rem nobis  
ob oculos ponit S. Ambrosius <sup>a)</sup>: Cælum  
 nondum erat, quando in principio erat  
Verbum. Nam etsi cælum habet princi-

CAPUT  
I.

Compa-  
rantur  
verba  
Moysis  
Gen. I.

<sup>a)</sup> L. De Incarnat. Dom. Sacramento C. III. n. 16,  
T. II. p. 707.

## CAPUT

## I.

pium, Deus non habet. Denique *in principio creavit Deus cælum, et terram.* Aliud est, *fecit*: Aliud est, *erat*. Quod fit, incipit: Quod erat, principium non accipit, sed prævenit. Remaneant etiam tempora, quia post cælum tempora. Remaneant etiam Angeli, et Archangeli; etsi principium eorum non invenio, erat tamen, quando non erant.“ Et alibi *a)*, quæ mox sequuntur apud Joannem, idem S. Pater complexus, hæreticos Christi Divinitatem negantes incessens, „Erat, erat, erat, erat, ait, Ecce quater erat! ubi impius invenit, quod non erat.“ S. Hilarius *b)*, „Trans-euntur tempora, inquit, transscenduntur sæcula, tolluntur ætates: pone aliquid, quod voles tuæ opinionis principium, verbum iam erat, unde tractatur. Respice ad mundum, intellige, quid de eo scriptum est: *In principio creavit Deus cælum et terram.* Fit ergo in principio, quod creatur, et ætate continet, quod in principio continetur, ut fieret. Meus autem piscator illiteratus, indoctus, liber a tempore, solutus a sæculis, vicit omne principium, erat enim, quod est.“

ὁ λόγος

verbum  
divinum

us est S. Evangelista, notio, λόγος, qua Filius Dei etiam antiquissimi sopheri in divinis sunt usi:

per quem

omnia fac-

ta sunt.

*a) L. I. de file c. 5.**b) L. II. de Trinit. n. 13. p. 795.*

„Melius, inquit Lactantius a), Græci λόγον CAPUT I.  
dicunt, quam nos verbum, sive sermonem: I.  
λόγος enim et sermonem significat, et ratio-  
nem, quia ille est et vox, et sapientia Dei.  
Hunc sermonem divinum nec Philosophi  
ignorarunt etc.“ Platonicos indigitat, quos  
hodieque sunt, qui infuscasse theologiam  
christianam antiquissimis Ecclesiæ tempori-  
bus demonstrandum sibi sumpserunt. Hos  
inter Laur. Moshemium, *de turbata per Pla-  
tonicos Ecclesia* disserentem perstringit mona-  
chus ex Congr. S. Mauri P. II. præfat. in  
Opera S. Justini M. cui ostendit perperam  
affingi Platonice notionem τῆς λόγου. Quod  
etiam de Athenagora valet, qui Justinum  
sequitur in hac re in sua apologia ex S.  
Joanne: uir etiam Clemens Alex. et Ori-  
genes, et ex latinis apologistis primus Ter-  
tullianus sunt usi hac voce, quam aliis visus  
est S. Joannes Gnosticis ex disciplina Si-  
monis magi (qui se magnam Dei virtutem  
ἐνεργειαν dicebat, λόγον ἀνυπόστατον) extrica-  
visse, ut ex S. Irenæo b) iam notavimus;  
innuitque S. Hilarius c): „Res, inquit,  
existit in verbo, verbi res enuntiatur in  
nomine. Verbi enim appellatio in Dei

a) *Instit. div. lib. IV. cap. 9.*

b) *Lib. III. contra hæreses cap. 11. p. 188. ut supra*  
in divina Evangelii Christi Verbi incarnati Oeco-  
nomia n. II. retulimus.

c) *L. c. L. VII. n. 11. p. 921.*



CAPUT I. Filio de Sacramento nativitatis est, sicut sapientiæ, et virtutis est nomen. “ S. Irenæus vero, postquam ex tribus Evangelistis Patrem et Filium verum Deum demonstrasset, eundem ex S. Joanne ostensurus, „quoniam, inquit a), unus Deus, qui omnia fecit per verbum suum, et non quemadmodum illi dicunt, alterum quidem fabricatorem, alium autem Patrem Domini etc. secundum autem quosdam Gnosticorum ab angelis factus est mundus, et non per verbum Dei:“ Verbum nimirum hypostaticum substantiale, quale nobis sistit S. Irenæus b) *In principio verbum existens apud Deum: ubique* habet textus græcus λόγος.

Quandoque, ob vim nominis, græco vocabulo ὁ λόγος primi SS. Patres etiam latini usi fuere; putat tamen S. Thomas c) in hunc locum, quo per ipsum facta esse omnia dicuntur, melius dici verbum, „quod importat, ut ait, respectum ad exteriora, quam ratio, quæ tantum conceptum mentis insinuat;“ sed utrumque significat ὁ λόγος. Nec videtur Jo. Lightfoto in horis Thalmudicis in h. l. curiosius inquirendum, unde Evangelista petierit hunc titulum, quo unigenitus Dei Filius Verbum appellatur, cum toties repetatur in historia creationis אֱלֹהִים אָמַר et dixit Deus. Rem ad

a) l. c.    b) p. 269.    c) T. III. opp. p. 397.

captum, conceptumque humanum paucis explicat S. Theophilus Antioch. Episc. Sæc. II. ad Autolicum a) quoad generationem Verbi æternam, et rerum per Verbum creationem. *In principio erat Verbum.* „Quibus verbis, inquit, ostendit initio solum fuisse Deum, et in eo Verbum, tum addit: *Et Deus erat Verbum, omnia per ipsum facta sunt, et sine ipso factum est nihil.* Verbum igitur cum Deus sit, et ex Deo genitum, illud Pater universorum, cum ita visum fuerit, mittit in aliquem locum, quo cum venerit, auditur, et videtur missum ab eo, et in loco invenitur.“ Et S. Irenæus b): „Si autem credat quis unum Deum, et qui verbo omnia fecit, quemadmodum et Moyses ait: *Dixit Deus, fiat lux, et facta est lux,* in Evangelio legimus: *omnia per ipsum facta sunt*: et apostolus Paulus similiter: *Unus Dominus, una fides etc.* „Post deinde et omnis sermo ei constabit, si et scripturas diligenter légerit apud eos, qui in Ecclesia sunt presbyteri, apud quos est apostolica doctrina, quemadmodum demonstravimus.“ Hanc apostolicæ doctrinæ firmitatem in Ecclesia („cui, ut L. I. c. 4. n. 1. loquitur, apostoli, quasi in depositarium dives, plenissime in eam contulerint omnia, quæ sunt veritatis: ut omnis, quicumque velit, sumat ex ea potum vitæ“) constanter con-

a) L. II. n. 22. p. 365.

b) L. IV. contra hæres. c. 32.

**CAPUT** I. tra hæreticos urget S. Martyr, quam vero novatores migrarunt. Ex quibus Centuriones Magdeburgenses perstringit P. Masuet in Dissertat. præviis in S. Iren. Dissert. III. art. 5. vindicatque art. 6. eius doctrinam orthodoxam de verbo divino Filio Dei, *per quem omnia facta sunt* iuxta initium Evangelii S. Joannis, congruenter iis, quæ Moyses initio Genesis de creatione rerum *in principio* dicit, quando *iam erat Verbum*, atque adeo coæternum Patri et consubstantiali, utpote ante quamvis rerum creaturam substantiam existens. Theodoretus Interrog. IX. in Genesin, „cuinam dixit Deus *fiat lux, et fiat firmamentum*? Sic respondet ad rem: Non præcepit Deus alteri cuidam creare: sed quæ non sunt, vocat, ita ut hic præceptum sit ipsa voluntas.“ Omnia enim, ait, quæcunque voluit Deus, fecit. „Quodsi creando voce quadam usus est, certum est, hoc non elementorum inanimatorum causa, sed invisibilium virtutum gratia factum esse, ut sciant, quod ipso iubente, ea, quæ non sunt, subsistunt.“

A Longino  
notatus  
locus.

Est hoc τὸ ὕψος, τὸ θεῖον sublime, ac divinum illud, quod in verbis Moysis scriptor ethnicus Dionysius Longinus animadvertit in libro περὶ ὕψους de Sublimi cap. 9. aliis 7. ubi postquam ridicule sane Deos nobis gigantes stitisset, ad Moysen vero

delapsus, „sic, ait, et Judæorum legis-  
tor, vir non vulgaris, quandoquidem nu-  
minis potentiam pro dignitate notam fecit,  
declaravitque statim initio proæmii legum  
suarum scribens: *Dixit Deus, inquit, quid?*  
*Fiat lux, et facta est: fiat terra, et facta est.*“  
Qui sublimitatem in hoc loco desiderarunt,  
eoquod nihil sublime in verbis sibi animad-  
vertere visi sunt, saltem ad thema, seu  
argumentum, in quo versatur ibi Longinus  
attendere debuissent, quod est *περὶ νοήσεως*,  
seu quod est *τὸ περὶ τὰς νοήσεις ἀδρεπή-  
βολόν*, vel *μεγαλόφρον* magnum, seu subli-  
me in ipsa mente, seu cogitatione. Id quod  
et lectores nostri in præsentī tractatione  
præ oculis habeant. Sed *τὸ ὕψος* quod est  
in mente divina, ex qua prodiit verbum  
divinum, quod erat in principio ex Deo  
natus ab æterno ante omnia tempora uni-  
genitus Filius Dei, quis edicet? *Generatio-  
nem eius quis enarrabit a)?* Generationem,  
inquam, qua ab æterno genitus Dei Filius  
unus est cum Patre Deus,

Extra se rapitur humana mens, dum  
cogitatione sua, quantavis animi conten-  
tione persequi gestit ens initio carens, ab  
æterno, a se existens, et in se ipso, in  
ipsa sua substantia rationem suæ existentiae  
habens: ens necessarium, a quo entia con-

a) Is. LIII. 8.

**CAPUT** II. **II.** *tingentia, quibus constat rerum creatarum universitas. Utrumque vero admirabili simplicitate ob oculos ponitur alterum a S. Joanne, Ens nimirum, quod semper fuit, In principio erat etc. alterum a Moyse: In principio creavit etc. Nec potest insipiens, quocumque se vertat, qui dicit in corde suo non est Deus, ens aliquod a se, a quo alia omnia, non agnoscere: ut facilius homo se a parentibus suis editum in hunc mundum inficiari possit, quam mundum per semet ab æterno extitisse manifesta contradictione, et confusione entis necessarii et contingentis, finiti et infiniti, absurdissimo processu in infinitum: in quo quis dicat? an v. g. gallina prior, quæ parit ovum, an ovum, ex quo gallina excluditur.*

## CAPUT II.

### ADOPTIO FILIORUM DEI

*Quotquot autem receperunt eum, dedit eis potestatem filios Dei fieri. Jo. I.*

**S**ed quid nunc nobis cum Longino de luce, quæ facta est, quando divinus Joannes lucem illam pandit, Verbum divinum nempe *λογον*, per quem facta sunt omnia? S. Irenæus, et post eum SS. Patres cæteri,

S. Joannes aquila.

quando nobis in quatuor animalibus Apoc. **CAPUT IV. 7.** quatuor Evangelistas describunt, **II.**  
 aquilam, perspicacem in primis visu, cæterisque alitibus sublimius volantem, ad unum omnes Joannem interpretantur. „Quartum vero, sunt verba S. Irenæi *a)*: simile aquilæ volantis, spiritus in Ecclesiam advolantis gratiam manifestans. Et Evangelia igitur his consonantia, in quibus insidet Christus Jesus. Aliud enim illam, quæ est a Patre, principalem, et efficacilem, et gloriosam generationem eius enarrat sic dicens: *In principio erat Verbum, et Verbum erat apud Deum, et Deus erat Verbum. Tum: Et omnia per ipsum facta sunt, et sine ipso factum est nihil.* Propter hoc et omni fiducia plenum est Evangelium istud, talis est enim persona eius, “

Tum postquam, ut diximus, *quadriforme Evangelium* quatuor Evangelistarum explicasset S. Irenæus, finiens de S. Joannis Evangelio, „quartum vero, subdit *b)*, quod renovat hominem, et recapitulat in se omnia, quod est per Evangelium, elevans, et pennigerans homines in œæleste regnum.“ Nempe ut postea rem edisserit explicatius de Incarnatione Verbi: „Ostendimus enim, inquit *c)*, quia non tunc cœ-

Pandit  
nobis  
adoptio-  
nem filio-  
rum Dei.

*a)* L. III. contra hæres. cap. XI. n. 8. p. 190.

*b)* Pag. 191.

*c)* C. XVIII. n. 1. p. 209.

## CAPUT

## II.

pit Filius Dei, existens semper apud Patrem; sed quando incarnatus est, et homo factus, longam hominum expositionem in seipso recapitulavit, in compendio nobis salutem præstans, ut quod perdideramus in Adam, id est secundum imaginem, et similitudinem esse Dei, hoc in Christo Jesu reciperemus.“ Et id quidem cum fœnore misericordissima in nos Dei pietate, ac superabundante gratia in Christo, et iustitia iuxta Apostolum a): *Ubi autem abundavit delictum, superabundavit gratia, ut sicut regnavit peccatum in mortem, ita et gratia regnet per iustitiam in vitam æternam per Jesum Christum Dominum nostrum.* Per adoptionem nimirum in filios Dei, de qua nobis hic S. Joannes testatur, et Apostolus postea b), *quod sumus filii Dei, si autem filii et hæredes etc.* Sic iuxta eundem Apostolum c) *prædestinavit nos in adoptionem filiorum per Jesum Christum in ipsum, secundum propositum voluntatis suæ, in laudem gloriæ gratiæ suæ, in qua gratificavit nos in dilecto Filio suo, de quo mox affatus Ephesios; Non cesso, ait, gratias agens pro vobis, memoriam vestri faciens in orationibus meis: ut Deus, Domini nostri Jesu Christi Pater gloriæ, det vobis spiritum sapientiæ, et revelationis in agnitione eius: illuminatos oculos cordis vestri, ut sciatis, quæ sit spes vocationis eius,*

a) Rom. V. 20.

b) Ib. VIII. 10.

c) Eph. I. 5.

et quæ divitiæ gloriæ hæreditatis eius in sanctis, CAPUT  
II.  
hæredibus quidem Dei, cohæredibus autem  
Christi in fortem filiorum Dei adoptatis.

Quis vero unquam pater filium suum unicum ita hæredem instituit, sicut nos Pater noster cœlestis, qui se ipsum nobis in æterna beatitudine dat summum bonum pro hæreditate nostra: qui *videmus* quidem a), *per speculum in enigmate*, tunc autem facie ad faciem iuxta Apostolum. Quod nobis edisserens S. Joannes, *charissimi*, inquit b), *nunc filii Dei sumus*, et necdum apparuit, quid erimus. *Scimus, quoniam cum apparuerit, similes ei erimus: quoniam videbimus eum sicuti est.* Rem nobis idem Apostolus in principio sui Evangelii explicat, quomodo in ipso, Verbo divino, *vita erat*, et *vita erat lux hominum*, ut nimirum nos in ipso, qui vita est, viveremus, et naturæ lucis huius divinæ participatione ipsi in filios Dei sublimemur. Explicat quidem deinceps, quomodo lux in tenebris lucet, et tenebræ eam non comprehenderunt, excæcati nempe ad lucem Evangelii: quomodo item *in propria venit*, et *sui eum non receperunt* Judæi nimirum, a quibus ideo lux hæc divina ad gentes pervenit: *Quotquot autem receperunt eum, dedit eis potestatem filios Dei fieri.* Ἐξουσίαν habet Evangelista, quæ et humanam in

a) 1. Cor. XIII. 11.      b) 1. Joan. III. 2.



CAPUT  
II.

Christo potestatem, et in nobis dignitatem denotat, qua ex Deo nati Filii Dei nominemur et simus. Tanto hoc sublimius est in Evangelio Christi, quantum inter Deum et hominem discrimen est; inter hominem et Deum læsum, qui hominem induit, ut homines liberet: misit unigenitum filium suum in mundum, ut homines in filios suos adoptaret: „Neque enim iam, ait S. Augustinus *a)*, desperandum, participatione Verbi fieri posse homines filios Dei, quando Filius Dei participatione carnis factus est filius hominis.“ Explicat huc S. Cyrillus Alexand. *b)* in hunc Joan. locum illud I. Petri II. „Vos autem genus electum, regale sacerdotium, gens sancta, populus acquisitionis, ut virtutes eius annuntietis, qui vos e tenebris vocavit in lucem admirabilem. Cum enim, inquit S. Pater, Filium exceperint per fidem, potestatem accipiunt, ut inter filios Dei collocentur. Enimvero dat filius, ut sint potestate id, quod sibi uni proprie, et secundum naturam inest, in commune quodammodo proponens in signum benignitatis suæ in homines, et erga mundum charitatis. Non enim aliter possemus corruptionem fugere, qui terreni portamus imaginem, nisi pulchritudo imaginis illius cœlestis impressa nobis esset ex eo, quod vocati su-

*a)* Ep. CXL. n. 11. T. II. p. 426.      *b)* T. IV. p. 20.

mus ad filiorum Dei adoptionem." S. CAPUT  
III.  
 Gregorius Regulæ pastoralis P. II. cap. 3. in rectore explicans rem, „quatenus, inquit, nobilitatem semper intimæ regenerationis aspiciat, et cœlestis regni sibi habitum moribus defendat. De hac quippe nobilitate spiritus per Petrum dicitur: *Vos autem genus electum, regale sacerdotium.* De hac enim potestate, quia vitia subigimus, Joannis voce roboramur, qui ait: *Quotquot autem receperunt eum, dedit eis potestatem filios Dei fieri.* Hanc dignitatem fortitudinis Psalmista considerat dicens: *Mihi autem nimis honorati sunt amici tui Deus, nimis conformatus est principatus eorum.*"

## CAPUT III.

### VERBI INCARNATIO.

*Et Verbum caro factum est, et habitavit in nobis. Joan. I. 14.*

„Noli mirari, alloquitur nos S. Augustinus a), noli mirari, o homo, quia efficeris filius per gratiam, quia nasceris ex Deo secundum verbum eius. Prius ipsum Verbum voluit nasci ex homine, ut tu securus

Verbum  
fit caro,  
ut filii  
Dei efficeremur.

a) *Tract. II. in Joan. n. 15. T. III. P. II. p. 303.*

## CAPUT

## III.



nascereris ex Deo, et diceres tibi: non sine causa Deus nasci ex homine voluit, nisi quia alicuius momenti me existimavit, ut immortalem me faceret, et pro me mortaliter nasceretur. Ideo, cum dixisset, *ex Deo nati sunt*: quasi ne miraremur, et exhorresceremus tantam gratiam, ut nobis incredibile videretur, quia homines ex Deo nati sunt, quasi securum te faciens ait: *et Verbum caro factum est, et habitavit in nobis*. Quid ergo miraris, quia homines ex Deo nascuntur? Attende ipsum Dominum Deum natum ex hominibus, “ Et Verbum caro factum est, et habitavit in nobis. S. J. Chrysostomus monet *b)*), ut hæc audientes animum erigamus, illud maxime mirati, quod genuinus Filius Dei sine principio existentis, se filium hominis audire passus sit, ut nos faceret filios Dei. „Neque enim, inquit, frustra et incassum seipsum ita humiliasset, nisi nos exaltaturus esset. Natus est enim secundum carnem, ut tu nascereris secundum spiritum.“

Quare  
caro  
factum  
Verbum  
dicitur.

Non dixit Evangelista verbum hominem esse factum, sed carnem, quæ est vilior, infirma, et humilis nostri pars, atque in nobis peccatrix. Verbum divinum infirmitates sine peccato in se suscepit, et nobiscum in carne abiectus, et humilis,

*a) Ilom. II. in Math. n. 2. T. VII. p. 21.*

esuriens, sitiens, passus, et ignominiosa morte sublatuſ est: „Ut ſcilicet, planum fieret, ſunt verba S. Athanaſii *a)*, omneſque crederemus, eum ipſum, qui ſemper Deus fuit, et eoſ, ad quos accellit, ſanctos effecit, omniaque iuxta Patris voluntatem adminiſtrat, propter noſ hominem poſtea factum fuiſſe, atque, ut loquitur Apoſtoluſ, divinitatem corporaliter in carne habitaſſe: quod idem eſt, ac ſi diceret, cum Deus eſſet, proprium habuit corpus, quo ut inſtrumento utenſ, homo propter noſ factuſ eſt.“ Hinc, quæ carniſ ſunt propria, illi attribuuntur, quia in ea nempe ſubiſtebat. Hæc ergo in ſe omnia ſuſcepit in carne Salvator noſter, atque etiam Evangelista dum Verbum hominem ſuſcepiſſe memorat, carnem factum dicere voluit *a parte affecta poſſimum animali ſignificato*, cum S. Cyrillo Alex. in h. l. loquor *b)*: „Ut una cerneretur vulnuſ, et remedium: æger, et medicuſ: quod in mortem prolapſuſ eſt, et qui excitavit ad vitam: quod corruptioni ceſſit, et qui corruptionem amovet: quod morte ſuperatuſ eſt, et qui morte ſuperior eſt: quod orbatuſ eſt vita, et qui vitam largitur. Non autem ait, ad carnem Verbum veniſſe, ſed carnem factum eſſe, ne habitudine ſicut in

*a)* Orat. III. Cont. Arian. n. 31. T. I. p. 581.

*b)* T. IV. p. 95.

CAPUT  
III.

prophetas, aut sanctos alios ipsum venisse suspiceris, sed revera carnem factum esse, id est, hominem.“ Breviter S. Augustinus hic Hebraismum notat a): „More suo, inquit, scriptura, ut Christi humilitatem magis ostenderet, ne carnis nomen quasi indignum aliquid refugisse videretur, carnem pro homine posuit.“ S. Thomas h. l. his rationibus addit aliam, cur Evangelista de anima rationali mentionem non fecerit, sed de carne solum, ad demonstrandam nimirum Dei erga nos magnitudinem benignitatis. „Constat, inquit, quod anima rationalis magis conformis est Deo, quam caro; et quidem magnum pietatis sacramentum fuisset, si Verbum assumisisset animam humanam, utpote sibi conformem, sed assumere etiam carnem elongatam a simplicitate suæ naturæ fuit multo amplioris, imo inæstimabilis pietatis indicium, secundum quod Apostolus dicit I. Timoth. III. 16. *Et manifeste magnum est pietatis sacramentum, quod manifestatum est in carne.*“

Quidquid  
superba  
obganniat  
ratio,

At vero quo magis commendat charitatem suam Deus in nobis per incarnationem Verbi divini, eo protervius exsurgit hic, seseque opponit superba ratio, quam arguit in Platoniciis philosophis S. Augustinus b)

b) *Epist. 140. n. 12. T. II. p. 420.*

b) *Lib. X. de civ. Dei, c. 29. T. VII. p. 245.*

christianismum detrectantibus, „quia Christus humiliter venit, et vos superbi estis. CAPUT III.

Narrat ibi quidem quod initium sancti Evangelii, cui nomen est secundum Joannem, quidam Platonius, sicut a sancto fene Simpliciano, qui postea Mediolanensi Ecclesiæ præsedet episcopus, solebamus audire, aureis literis conscribendum, et per omnes ecclesias in locis eminentissimis proponendum esse dicebat. “ Non erat hic ex eorum numero, quos ibi perstringit S. Doctor in scripto capite illo *de incarnatione D. N. J. C. quam confiteri Platoniorum erubescit impietas*. Haud inepta equidem erant Platonica placita de corrupto humani generis statu, agnitaque quam per metempsychosin sibi fingeant, purificationis necessitate; „Sed ideo viluit superbis Deus ille magister, quia verbum caro factum est, et habitavit in nobis: ut parum sit miseris, quod ægrotant, nisi se in ipsa etiam ægritudine extollant, et de medicina, qua fanari poterant, erubescant. “ Ferax imprimis est nostrum hoc sæculum incredulis eiusmodi in ipso christiano orbe, quibus religio christiana vel omnino vilescit, vel retento simulacro, divinitatem Christi atque adeo incarnationem Verbi divini negant hæreticorum hodie maximus grex, Socinianorum: Fuitque a primordiis Ecclesiæ hæ-

## CAPUT

## III.

petra scandali, in quam tam diversis modis impeerunt hæretici, ut haud temere dicat S. Fulgentius a), omnes hæreses ad id ætatis a coniunctione duarum naturarum in Christo esse exortas. Ex antiquissimis vero illis hæreticis fuerunt, qui aut divinam in Christo negabant naturam, aut humanam, indignum cumprimis rati, quod ita *femetipsum exinaniverit formam servi accipiens, in similitudinem hominum factus et habitu inventus ut homo b).*

Dum econtra nihil in scripturis sublimius atque in religione christiana admirabilius, nihil porro divinius est, quam hæc Dei dignatio, ut assumendo humanam naturam omnino nobis assimilaretur iuxta Apostolum c): *Tentatus per omnia pro similitudine absque peccato.* Rem vero insigniter illustrat S. Augustinus d) in celebri ad Volusianum epistola CXXXVII. Quid vero ingratius, quid inhumanius dici potest de homine, quam maxima hac Dei erga genus humanum dignatione non tam se indignum, quam eam ipsam Deo indignam esse asserere, *qua sic dilexit Deus mundum, ut Filium suum unigenitum daret e),* iuxta dilectum Christi discipulum Joannem. Et alibi:

a) Lib. ad Trasimundum regem c. 4.

b) Philip. II. 7.

c) Hebr. IV.

d) T. II. p. 405.

e) Jo. III. 16.

*In hoc, ait a), apparuit charitas Dei in nobis, quoniam filium suum unigenitum misit Deus in mundum, ut vivamus per eum. Hoc immensæ divinæ bonitatis beneficium miseri homines perinde quidem supra captum nostrum positum, atque non solum immerentibus, verum etiam in damnatione mortis positus, a benignissimo numine collatum humiliter revereri debemus in Christo semetipsum exinante ac formam servi accipiente, ut homo divine agere doceretur, ut Tertullianus loquitur b), cum eodem Tertulliano divinitus asserta incarnatione haud arroganter persuasi, quod nihil tam Deo dignum quam salus hominis: nihilque veriti cum eodem dicere possumus: Quodcumque Deo indignum est, mihi expedit, ut in libro de carne Christi loquitur, ubi ex professo mox in exordio libri demonstrat incarnationem Verbi divini nec impossibilem, nec inconvenientem aut Deo indignam esse contra Marcionem, „quod aliter non diceretur homo Christus sine carne, nec hominis filius sine aliquo parente homine, sicut nec Deus sine Spiritu Dei, nec Dei Filius sine Deo Patre. Ita utriusque substantia census, hominem et Deum exhibuit: hinc natum, inde non natum: hinc carneum, inde spiritalem: hinc infirmum, inde præ-*

a) I. Jo. IV. 9.

b) Adv. Marcionem lib. II.



CAPUT IV. fortem: hinc morientem, inde viventem, quæ proprietas personæ æqua utique naturæ utriusque veritate, eadem fide et spiritus, et carnis, virtutes Spiritum Dei, passionibus carnem hominis probaverunt."

## CAPUT IV.

### VERBI INCARNATI GLORIA

*Et vidimus gloriam eius, gloriam quasi unigeniti a Patre, plenum gratiæ, et veritatis. Joan. I. 14.*

Gloria  
Verbi  
divini  
in infir-  
mitate.

Fuit Joannes ex illis tribus Apostolis, quibus Christus gloriam suam ostendit transfiguratus in monte; sed hic generatim loquitur de gloriâ Christi *quasi unigeniti* inter medias infirmitates, statuque humilitatis eo sublimius atque gloriosius enitente, veluti eximia in tenebris lux. Gloria hæc Verbo Dei incarnato, atque in nobis habitante iam etiam oculis conspicua est reddita.

Dum equidem in propria venit, sui tamen eum non receperunt. Venit cum Maria matre in Bethlehem natale Davidis regis solum, unde oriturus erat Messias, eoque venit ceu ex stirpe David oriundus;

t nec locum in diversorio habere, nec CAPUT  
IV.  
pinionem de se facere, quis esset, potuit.

udæi præstolabantur Messiam regem re-  
um et dominum dominantium in terris,  
um interim ille nascitur in stabulo, de-  
octurus non solum gentem suam vanam  
mundi gloriam, sed et omnes gentes, quæ  
um aliquando reverituræ essent, quem  
ens sua dedignabatur, verum Messiam :  
uibus se iam nascens, quis esset, stella  
emonstrabat : veniuntque Hierosolymam  
um adoraturi magi, „ hoc est professi  
rtem contemplativam teste Philone Judæo  
criptore a) suppari, per quam naturales  
es cernuntur clariores, quam non modo  
lebs, sed etiam reges maximi imprimis  
Persici sectantur, qui hanc artem ita ad-  
mirantur, ut regnare non liceat, nisi ma-  
gorum antea usi fuerint contubernio.“ Sed  
ultra efferenda est in magis nostris cogita-  
io, ut iam notavimus, notabimusque ite-  
rum suo loco; dum humi hic serpit Philo-  
ludæus, perinde ac contribules sui dedig-  
nati in humili conditione sua regem suum  
Christum, quam nihil morati, magi adorant  
a præsepio, edocti per stellam ex Jacob :  
De Jacob erit, qui dominetur b): exigua hæc  
quidem tunc erat scintilla mysterii Colos. I.  
6. quod absconditum fuit a sæculis et genera-  
tionibus : nunc autem manifestum est sanctis eius,

a) Pag. 792.

b) Num. XXIV. 19.

**CAPUT** *quibus voluit Deus notas facere divitias gloria*  
**IV.** *sacramenti huius in gentibus, quod est Christus,*  
*in vobis spes gloria.* Magis advenientibus  
 turbatur Herodes a) rex, et omnis Hieroso-  
 lyma cum illo, frustra timente throno suo  
 regio in Judæa, dum a principibus Sacer-  
 dotum et Scribis docetur Christum nasci-  
 turum in Bethlehem Judæ: quod et factum  
 iam fuerat præconiato rege non humanis  
 sed angelicis vocibus, facta subito *multitudine*  
*militiæ cælestis* cum angelo, qui evangeliza-  
 verat pastoribus in regione eadem vigilan-  
 tibus, et custodientibus vigiliis noctis super  
 gregem suum, Deique claritate circumful-  
 gente illos, *gaudium magnum quod erit omni*  
*populo: quia natus est vobis hodie Salvator,*  
*qui est Christus Dominus in civitate David.*

Quæ unquam gloria humana mundana  
 accedere potuit huic, cælesti gloria trans-  
 lata in terras, dum cælorum Dominus nas-  
 citur in stabulo? Prægustum gloriæ cælestis  
 accipiunt homines, ut eis fordescat omnis  
 mundana gloria cum caducis gaudiis huius  
 vitæ, ubi nil nisi vanitas vanitatum et  
 omnia vanitas, testimonium reddente sa-  
 pientissimo perinde ac felicissimo regum  
 terræ Salomone: cuius etiam nomine sapiens:  
*Et ego, inquit b), natus accepi communem aerem*  
*et in similiter factam decidi terram, et primam*


a) *Matth. II. 3.*      b) *Sap. VII. 3.*

*vocem similem omnibus emisi plorans. In involumentis nutritus sum, et curis magnis: nemo enim ex regibus aliud habuit nativitatis initium. Sic homo natus de muliere brevi vivens tempore repletur multis miseriis a),* quas etiam nostri causa suscepit Christus Verbum incarnatum, ut tamen in ipsa nativitate cœlestium gaudiorum eos, qui cum ipso vana huius vitæ gaudia pompam et gloriam despecturi essent, redderet certiores *qui inter animalia editus, ab angelis nunciabatur b),* ut inter alia Hormisdas P. M. Sæc. VI. quo Rom. Imperium novum splendorem accepisse visum est, Justino Augusto Imperatori differentiam ob oculos ponit inter gloriam regum terræ, et Christi regis cœlorum, quam ab ipsa mox nativitate sua exhibuerat. „Nam, sunt Hormisdæ P. verba, iacens in præsepio, videbatur in cœlo, involutus pannis, adorabatur a magis, inter animalia editus, ab angelis nuntiabatur, vix egressus infantiam, et annuntians mysticam sine institute doctrinam, inter rudimenta annorum puerilium edens cœlestia signa virtutum. Idem enim Deus et homo, non (ut ab infidelibus dicitur) sub quartæ introductione personæ: sed ipse Dei Filius Deus et homo, id est, virtus et infirmitas, humilitas et maiestas, redimens et venditus, in cruce positus, et cœli regna largitus; ita nostræ

a) *Job. XIV. 1.*    b) *Apud Laltb. T. IV. Conc. p. 1553.*

CARUT infirmitatis particeps, ut posset interimi,  
 IV. ita ingenitæ potentia Dominus, ne posset  
 morte consumi: sepultus est, iuxta id,  
 quod homo voluit nasci, et iuxta id, quod  
 Patri erat similis, resurrexit: patiens vul-  
 nerum, et salvator ægrorum, unus defunc-  
 torum, et vivificator obeuntium: ad infer-  
 na descendens, et a Patris gremio non  
 recedens: unde et animam, quam pro  
 communi conditione posuit, pro singulari  
 virtute, et admirabili patientia (potentia)  
 mox resumpsit. " Sic quam admirandum  
 in modum, quando *Verbum caro factum est,*  
*et habitavit in nobis, vidimus gloriam eius,*  
*gloriam quasi unigeniti a Patre, plenum gratie*  
*et veritatis!* Quem in locum commentatus  
 Ven. Beda, „Gloriam Christi, inquit a),  
 quam ante incarnationem videre non pote-  
 rant homines, per incarnationem viderunt,  
 aspicientes humanitatem miraculis refulgen-  
 tem et intelligentes divinitatem intus latitan-  
 tem, illi maxime, qui eius claritatem ante  
 passionem transfigurati in monte sancto  
 contemplari meruerunt voce delapsa a Deo  
 huiuscemodi a magnifica gloria: *hic est Filius*  
*meus dilectus, in quo mihi complacui,* et post  
 passionem, resurrectionis, ascensionisque  
 ipsius gloria conspecta, Spiritus eius dono  
 mirifice sunt refecti, quibus omnibus mani-  
 feste cognoverunt, quod huiusmodi gloria

a) T. V. p. 456.

non cuilibet sanctorum, sed illi soli homini, **CAPUT**  
 qui esset in divinitate unigenitus a Patre, **IV.**  
 conveniret.“ 

Manens Verbum incarnatum semper, quod erat ab æterno, non potuit occulere radios divinitatis suæ, conspicuamque nobis reddidit *gloriam quasi unigeniti a Patre, plenum gratiæ, et veritatis in Evangelio gratiæ nos sanctificantis, quia de plenitudine eius nos omnes accepimus a)*, dum ipsi Dei Patris Filio nihil gloriæ, quam ab æterno habuit, accedere, nihil deperire potuit. Solummodo autem in ipso statu exinanitionis, ceu contrariis iuxta se positis, nobis eluxit gloria hæc unigeniti filii Dei in eo etiam, quod exemplum humilitatis tanto maius et excellentius dederit, quo infinitior est distantia inter Filium Dei, et filium hominis, qualem se nobis in terris ostentavit. „Itane, cum S. Augustino *b)* exclamare licet, magnum est, esse parvum, ut nisi a te, qui tam magnus es, fieret, disci omnino non posset? Ita plane.“ Quid sublimius, quid divinius gloria hac quasi unigeniti Filii Dei, elucente in ipsa eius humilitate, ac infirmitatibus, quas nostri causa in se suscepit Verbum incarnatum, quam status humilitatis nequaquam diminuit, aut obscuravit, imo conspicuam nobis reddidit, et

a) *Joun. I. 16.* b) *De S. Virg. C. 15. T. VI. p. 348.*

**CAPUT** augustiorem, tantum abest, ut unigenitus

**IV.** Dei Filius factus homo quidquam de ea, quam ab æterno habuit, apud Patrem, gloria amiserit. „Cum Verbum carnem factum esse dixerit (sunt verba S. Cyrilli Alex. *a*) in h. L.) hoc est hominem, et fratrem fervorum, atque creaturarum, integram tamen ei servat quoque hoc pacto dignitatem, et plenum esse Patris proprietate rursus ostendit. Natura quippe divina in se ipsa firma, et stabilis est, nec mutationem capit in aliud, sed eodem se modo semper habet, et in suis dotibus constanter manet. Itaque licet Evangelista Verbum carnem factum esse dicat, non tamen ipsum carnis infirmitatibus succubuisse asserit, nec pristina illa sua virtute, et gloria excidisse, eo quod infirmum nostrum, et inglorium corpus induit. Vidimus enim gloriam eius, inquit, omni gloria superiorem, et qualem decere Filium ex Deo Patre unigenitum nemo non fateatur. Plenus enim erat gratia et veritate. Siquis enim sanctorum chorum contempletur, et uniuscuiusque res gestas perpendat, mirabitur utique, et illorum virtutibus oblectabitur, eosque gloria repletos a Deo fuisse fatebitur. Unigeniti vero gloriam, et gratiam nullo modo cum cæterorum gloria comparandam esse theologi docent, ac

*a) Pag. 97.*

---

facri testes, sed longe eminentiorem, et **CAPUT**  
præstantiorem, ut qui non definitam ha- **IV.**  
beat gratiæ mensuram quasi ab altero ac-  
ceptam, sed tanquam in perfecto perfec-  
tam, ac veram; id est, non adscititiam,  
nec aliunde' quasi accessionis loco suppe-  
ditatam, sed substantialiter inexistentem,  
et fructum paternæ proprietatis naturaliter  
transmissum in Filium. Quodsi cui placet  
accuratius id, quod dictum est, exami-  
nare, consideret apud se, quid sancti ipsi,  
et quid Salvator noster Christus mirabili-  
ter patrarunt, tantumque distare comperiet,  
quantum antea diximus."

---



VERBI INCARNANDI  
ANNUNTIATIO.

In mense autem sexto, missus est angelus Gabriel a Deo in civitatem Gallilææ, cui nomen Nazareth, *ad virginem desponsatam viro, cui nomen erat Joseph, de domo David, et nomen virginis, Maria.* Luc. I. 26.

Messias  
Zachariæ  
sacerdoti  
denunciatus.

Ad denunciandum Messię, eiusque præcursoris adventum, ac incarnationis mysterium Gabriel angelus missus, primum Zachariæ Joannis præcursoris patri a), qui secundum consuetudinem sacerdotii sorte exiit, ut incensum poneret ingressus in templum Domini, qualem, quantumque ei in senectute sua Elisabeth uxor sterilis, ac senex genitura esset filium, simulque quod esset obiturus officium, denunciat: *Erit enim magnus coram Domino: et vinum, et ficeram non bibet, et Spiritu sancto replebitur adhuc ex utero matris sue: et multos filiorum Israel convertet ad Dominum Deum ipsorum.*

Haud obscure Messię divinitas designatur verbis his angeli: *Et multos filiorum*

a) Luc. I. 2.

*Israel convertet ad Dominum Deum ipsorum; CAPUT  
illis vero, quæ mox sequuntur: Et ipse præcedet ante illum, Dominum nempe Deum  
ipsorum in spiritu, et virtute Eliæ, innuitur V.  
tota œconomia regni Christi a primo eius  
adventu in carne usque ad secundum in  
consummatione sæculi, quem Elias præces-  
surus est, primum autem in spiritu et vir-  
tute Eliæ Joannes (quem ipse Christus  
Eliam vocat). Ut convertat corda patrum in  
filios, et incredulos ad prudentiam iustorum, pa-  
rare Domino plebem perfectam: ei nimirum  
Domino, de quo mense abhinc sexto (post-  
quam Gabriel angelus Zachariæ Joannem  
ex Elisabeth uxore nasciturum denunciave-  
rat) idem archangelus missus ad Mariam  
virginem, Ecce, inquit, concipies in utero et  
paries filium, et vocabis nomen eius Jesum.  
Hic erit magnus, et Filius Altissimi vocabitur.*

Animadvertite autem, in verbis Gabrielis Regnum  
Messiæ.  
omnia comparata esse ad Messiæ regnum  
in terris quoque, fed nequaquam eiusmodi  
quale tunc vulgo exspectabant Judæi, per-  
verse interpretati prophetiam Isaïæ de Mes-  
siæ pacifico imperio super solium David,  
omnibus cæteris posthabitis, quæ ibidem  
de Christo historica narratione veluti iam  
facta deprædicat propheta a): *Parvulus enim  
natus est nobis, et filius datus est nobis, et*

a) *Isaïa* LX. 6. 7. 8.

## CAPUT

## V.



*factus est principatus super humerum eius: et vocabitur nomen eius Admirabilis, consiliarius, Deus fortis, pater futuri sæculi, princeps pacis. Multiplicabitur eius imperium, et pacis non erit finis: super solium David et super regnum eius sedebit: ut confirmet illud, et corroboret in iudicio et iustitia, amodo et usque in sempiternum; zelus Domini exercituum faciet hoc. Verbum misit Dominus in Jacob, et cecidit in Israel. Quis sibi persuadeat, humilem virginem Mariam Deo gratam, et dilectam inprimis, cui tam gratiosam angelus a Deo salutationem attulit, ita accepisse angeli verba sicut Iudæi de filio, quem esset paritura: cui daturus esset Dominus Deus sedem David Patris eius. Erat quidem de domo David Joseph Mariæ sponsus, quæ vero familia post captivitatem Babylonicam in obscuro latebat, et quidquid principatus apud Iudæos fuerat sub secundo templo penes Asmonæos erat seu Machabæos ex genere sacerdotali, ut Iudæis de regno terreno Messiae opinio eximeretur animo: quod regnum futurum esset æviternum per propagationem carnalem, a qua abhorrens Maria virgo maritalis thori nescia, quærir. Quomodo fiet istud, quoniam virum non cognosco? Revelat autem angelus, hæc futura sine coniunctione, atque adeo successionem carnali: itaque solum illum ac unicum, quem, virtute Altissimi obumbrante a*

Spiritu sancto conceptum enixura esset Fili- CAPUT  
 lium Altissimi, fore, qui regnaturus esset V.  
 in æternum *εις τὰς αἰῶνας*. Quod vero quale  
 fit futurum æviternum tempus, ne am-  
 biguum esse posset additur, regni eius  
*βασιλείας αὐτοῦ*, quem esset paritura, non  
 fore finem. Hæc vero supra captum, et  
 ultra expectationem erant carnaliter sapien-  
 tium Judæorum, sibi quæ persuadentium  
 regnum terrenum *εις τὰς αἰῶνας* per sæcula  
 perennaturum in domo Jacob, ac folio  
 David.

Missus quidem, et destinatus fuerat  
 Christus ad quærendas salvandas oves  
 Israelis, ex quo etiam quicumque eum re-  
 ceperunt, in regnum suum adscripsit, at-  
 que ex illo populo apostolos selegit, qui  
 Evangelium deferrent ad gentes, quas om-  
 nes in semine Abraham benedicendas pro-  
 miserat Deus *a)*, *universas cognationes terra*,  
 prout singulariter iterum ea promissio facta  
 est patriarchæ Jacob, postquam in somnis  
 vidit scalam stantem super terram, et ca-  
 cumen illius tangens cælum, angelos quo-  
 que Dei ascendentes et descendentes per  
 eam, et Dominum innixum scalæ dicentem  
 sibi *b)*: *Ego sum Dominus Deus Abraham patris*  
*tui, et Deus Isaac: Terram, in qua dormis,*  
*tibi dabo, et semini tuo. Eritque semen tuum*

*a)* Gen. XII. 3. XXII. 18. *b)* Ib. XXVIII. 12.

**CAPUT VI.** *quasi pulvis terræ: dilataberis ad Occidentem, et Orientem, et Septentrionem, et Meridiem: et benedicentur in te, et in semine tuo cunctæ tribus terræ.* Ubi iam iterato terra Chanaan populo regnoque Israelitico promittitur, quæ erat figura regni Christi, uti etiam solium David terrenum, qui in Psalmis longe sublimius, augustiusque regnum Christi deprædicat æternum.

## CAPUT VI.

*Dixit autem Maria ad angelum: Quomodo fiet istud, quoniam virum non cognosco?* Luc. I. 34.

**E**xemplo hic suo beatissima Virgo demonstrat, quousque in divinis mysteriis ratio, quæ fidei nequaquam adversatur, quæri, ac locum habere possit, theologiæ sanæ sobriorumque theologorum magistra. Ab angelo edocta, quomodo integra virgo, virtute Altissimi mater esset futura per Spiritum sanctum, iam non ultra quærit: *Unde hoc sciam?* Sicut Zacharias incredulus, postquam iam ab angelo didicerat a), filium sibi Elisabeth uxorem parituram, eumque magnum futurum coram Domino, qui

B. Mariæ  
et Zachariæ  
dispar  
fidei ratio,

a) Luc. I. 13.

Spiritu sancto repletus ex utero matris suæ, multos filiorum Israel converteret ad Dominum Deum ipsorum, Messiam nimirum, ut contextus verborum prodit nexusque sermonis cum mox sequentibus verbis a): *Et ipse præcedet ante illum* (quem modo nominaverat: *Dominum Deum ipsorum*, nempe *filiorum Israel*) *in spiritu et virtute Eliæ, ut convertat corda patrum in filios etc.* Zacharias sacerdos in lege et prophetis eruditus ignorare non poterat, hanc esse prophetiam postremam ultimi prophetarum Malachiæ, qui suum et totius veteris testamenti vaticinium his claudit verbis cap. ultimo versibus duobus postremis: *Ecce ego mittam vobis Eliam prophetam, antequam veniat dies Domini magnus et horribilis. Et convertet cor patrum ad filios, et cor filiorum ad patres eorum: ne forte veniam, et percutiam terram anathemate.* Quæ ex hac prophetia ad filium Zachariæ nasciturum pertinebant, edixerat ei angelus. Insuper diligens et iam longævus scripturarum lector prophetarumque scrutator septuaginta hebdomadas iuxta Danielis prophetiam tunc temporis complendas esse, nosse debuerat. Id quod Zachariæ in memoriam revocans angelus, dixit ei b): *Ego sum Gabriel, qui adsto ante Deum: et missus sum loqui ad te, et hæc tibi evangelizare.*

a) *Luc. I. 17.*b) *Ib. 19.*

CAPUT Is ipse angelus, qui Danieli tempus Messiae

VI. post septuaginta hebdomadas prædixerat,

nunc quoque Mariæ virgini denuntiat:

*Ecce concipies, et paries filium etc. quæ etiam Dei genitrix ab Elisabeth uxore Zachariæ, qui in pœnam incredulitatis mutus factus fuit, beata, prædicatur a), quæ credidisti, quoniam perficientur ea, quæ dicta sunt tibi a Domino, per angelum nimirum, a quo mysterium requisierat. Ignara Elisabeth, quæ marito acciderant in templo, quippe qui domum mutus redierat ob incredulitatem, dum prophetico instinctu beatam de-prædicat Mariam, quæ credidit; ignara inquam marito veluti exprobrat cum Gabriele angelo pro eo, quod non credidisset verbis angeli, qui tam aperte instantem iam iam Messiae adventum (tam præcise indicato, quod tunc aderat, tempore eius adventus) Danieli prophetæ denunciaverat. Mox vero Zacharias reddita lingua reminiscens prophetiarum de redemptione plebis suæ per Messiam iam conceptum a virgine, et ipse prophetans b): *Benedictus, canit, Dominus Deus Israel, quia visitavit, et fecit redemptionem plebis suæ: Et erexit cornu salutis nobis, in domo David pueri sui. Sicut locutus est per os sanctorum, qui a sæculo sunt, prophetarum eius.* Maria vero mox ut percipit ab angelo, quomodo iuxta prophetiam*

a) Luc. I. 45.

b) Ib. 68.

Isaïæ VII. 14. virgo conceptura esset et CAPUT VI.  
paritura, mox *Ecce*, inquit, *ancilla Domini*,

*fiat mihi secundum verbum tuum*, dum prius de pudore ac integritate sua sollicita quæsiisset: *Quomodo fiet istud, quoniam virum non cognosco?* Quæ in verba, „Videtur hic, commentatur S. Ambrosius *a)*, non credidisse Maria, nisi diligenter advertas; neque enim fas est, ut electa ad generandum unigenitum Dei Filium fuisse videatur incredula. Quo autem modo fieri posset (licet salva prærogativa sit matris, cui profecto amplius fuit deferendum: sed ut prærogativa maior, maior etiam fides ei debuit reservari) quo ergo modo fieri posset, ut Zacharias, qui non crediderat, silentio condemnaretur: Maria autem si non credidisset, Spiritus sancti infusione exaltaretur? Sed neque non credere Maria, neque tam temere debuit usurpare: non credere angelo, usurpare divina. Neque enim facile erat scire mysterium absconditum a sæculis in Deo, quod nec superiores potestates scire potuerunt. “Mysterium hoc absconditum est Mariæ virginitas, quæ et partus ipsius, similiter et mors ipsius S. Ignatio M. dicuntur *b)* „tria mysteria clamoris, quæ in silentio Dei patrata sunt. “ Hinc, ut Theophy-

*a)* L. II. in *Lucam*. n. 14. T. I. p. 1286.

*b)* *Ep. ad Eph.* n. 19.



CAPUT VI. lactus a) in hunc locum notat post S. Chrysostomum, Zacharias merito condemnatur; habuit enim exempla multa, quandoquidem et multæ steriles pepererunt; virginis autem matris nullum exemplum erat.

S. Maria  
virgo Deo  
devota.

Argumentum hinc repetit S. Augustinus b), B. Mariam virginem, antequam Christum conciperet, iam Deo dicatam fuisse sublimiori, quam fuerit veteris testamenti conditio, statu. „Hæc, ait, indicant verba, quæ sibi fætum annuntianti angelo Maria reddidit: *Quomodo fiet istud*, inquit, *quoniam virum non cognosco?* Quod profecto non diceret, nisi Deo virginem se ante vovisset. Sed quia hoc Israelitarum mores adhuc recusabant, desponsata est viro iusto, non violenter ablaturus, sed potius contra violentos custodituro, quod illa voverat.“ Eundem in modum S. Gregorius Nissænus c) ad fidem historiæ incerti auctoris argumentatur. „Si enim, inquit, liberorum causa ducta fuisset a Joseph, quomodo parituram angelo prænuntianti, se rem novam et alienam audire præsetulisset, cum ipsa quoque sese obstrinxisset naturæ lege, ut aliquando mater esset? Verum quia carnem Deo consecratam, tanquam sanctum aliquod oblatum munus

a) T. I. p. 276.

b) De sancta Virginit. c. 4

c) In diem natalem Christi T. III. p. 347.

oportebat intactam, integramque præstare: idcirco, licet, inquit, angelus sis, licet e cœlo venias, licet id, quod ostenditur, naturam superet humanam, tamen me virum cognoscere nefas est. Quomodo sine viro mater ero? Joseph enim sponsum novi, sed virum non cognosco.“ Juvat hunc ipsum S. Doctorem ab ovo salutationem angeli in eandem sententiam explicantem audire. „His autem, inquit, faustissimis verbis usus est, *Ave gratia plena, Dominus tecum*. Contraria est hæc oratio illis vocibus, quas prima mulier audivit. Tunc enim illa doloribus propter peccatum donata est. Nunc autem in hac per gaudium dolor expellitur. In illa molestiæ partum præcesserunt. Huic partum lætitiæ prænuntiat. *Ne timeas*, inquit, quoniam omnibus mulieribus timorem affert partus expectatio, dulcis partus promissione timor eximitur. *In utero, inquit, concipies, et paries filium, et vocabis nomen eius Jesum. Ipse enim salvum faciet populum suum a peccatis eorum*. Quid autem Maria? audi pudicam virginis vocem! Angelus partum nuntiat. At illa virginitati inhæret, et integritatem angelicæ demonstrationi anteponendam iudicat: nec angelo fidem habet, nec a proposito recedit suo. Interdixi, inquit, mihi consuetudine viri. Quomodo istud erit mihi, quoniam virum non cognosco?“

*Dixit autem Maria: Ecce ancilla Domini,  
fiat mihi secundum verbum tuum.  
Luc. I. 38.*

Antithesis  
Mariam  
inter et  
Evam.

Quam S. Gregorius Nissænus paucis attigit Mariam inter et Evam antithesin, perinde ac S. Ambrosius <sup>a)</sup> [ dum utraque virgo, Eva genus humanum perdidit, Maria, Verbum divinum pariens, restituit, sublimitate adoptionis in filios Dei inde secuta ] eam dudum antea egregie S. Irenæus amplificaverat in ~~hac~~ <sup>hæc</sup> verba <sup>b)</sup>: „Consequenter autem et Maria virgo obediens invenitur, dicens: *Ecce ancilla tua, Domine, fiat mihi secundum verbum tuum.* Eva vero inobediens: non obedivit enim, adhuc cum esset virgo. Quemadmodum illa virum quidem habens Adam, virgo tamen adhuc existens (erant enim utrique nudi in Paradiso, et non confundebantur, quoniam paulo ante facti, non intellectum habebant filiorum generationis; oportebat enim illos primo adolescere, dein sic multiplicari) inobediens facta, et sibi, et universo generi humano causa facta est mortis: sic et Maria habens prædestinatum virum, et

<sup>a)</sup> L. II. in Lucam. n. 17. T. I. p. 1287. c.

<sup>b)</sup> L. III. contra hæreses, c. 22. n. 4. p. 219.

tamen virgo, obediens, et sibi, et universo generi humano causa facta est salutis. Et propter hoc lex eam, quæ desponsata erat viro, licet virgo sit adhuc, uxorem eius, qui desponsaverat, vocat; eam, quæ est a Maria in Evam recirculationem significans: quia non aliter, quod colligatum est, solveretur, nisi ipsæ compagine alligationis reflectantur retrorsus; ut primæ coniunctiones solvantur per secundas, secundæ rursus liberent primas. Et evenit primam quidem compaginem a secunda colligatione solvere, secundam vero colligationem primæ solutionis habere locum. Et propter hoc Dominus dicebat, primos quidem novissimos futuros, et novissimos primos. "Adhuc luculentius rem agit postea: iuvat et eum hic ad considerandum exscribere locum: „Manifeste itaque, inquit a), in sua propria venientem Dominum, et sua propria eum baiulante conditione, quæ baiulatur ab ipso, et recapitulationem eius, quæ in ligno fuit inobedientiæ, per eam, quæ in ligno est obedientiam, facientem, et seductionem illam solutam, qua seducta est male illa, quæ iam viro destinata erat virgo Eva, per veritatem evangêlizata est bene ab angelo iam sub viro virgo Maria. Quemadmodum enim illa per angeli sermonem seducta est, ut effugeret Deum, præ-

a) L. V. c. 19. p. 316.

**CAPUT VII.** varicata verbum eius; ita et hæc per angelicum fermonem evangelizata est, ut portaret Deum, obediens eius verbo. Et si ea inobedierat Deo; sed hæc fuasa est obedire Deo, uti virginis Evæ virgo Maria fieret advocata. Et quemadmodum adstrictum est morti genus humanum per virginem, solveretur per virginem: æqua lance disposita, virginalis inobedientia, per virginalem obedientiam. Adhuc enim protoplasti peccatum per correptionem primogeniti emendationem accipiens, et serpentis prudentia devicta in columbæ simplicitate, vinculis autem illis resolutis, per quæ alligati eramus morti.“ Tertullianus fidem Mariæ virginis opponit credulitati Evæ a).

**B. Mariæ humilitas.** Alii alias virtutes Mariæ (quam potiori iure dicunt vocari matrem viventium) Evæ, nominatim S. Epiphanius b) opponunt; celebrant autem præsertim humilitatem B. V. in iis potissimum verbis, quibus se ancillam Domini obsequentem ostendit: „Vide humilitatem, exclamat S. Ambrosius c) in h. l. vide devotionem! Ancillam se dicit Domini, quæ mater eligitur, nec repentino exaltata promisso est. Simul ancillam dicendo, nullam sibi prærogativam

a) *De Carne Christi. n. 17. p. 321.*

b) *L. III. hæres. LXXVIII. T. I. p. 1050. ed. Petav.*

c) *L. II. in Luc. n. 16. T. I. p. 1287.*

tantæ gratiæ vindicavit, quæ faceret, quod CAPUT  
VII.  
iuberetur. Mitem enim, humilemque paritura, humilitatem debuit et ipsa præferre.

*Ecce ancilla Domini, contingat mihi secundum verbum tuum.* Habes obsequium, habes votum. *Ecce enim ancilla Domini, apparatus officii est: contingat mihi secundum verbum tuum, conceptus voti est.* Dum vero humillima esset virgo, virtuti huic delicatissimæ deperiisse aliquid ne videatur, si ipsa eam in semet extulisse dicatur in cantico suo *Magnificat a) etc.* Quia respexit humilitatem ancillæ suæ *ὅτι ἐπέβλεψεν ἐπὶ τὴν ταπείνωσιν τῆς δούλης αὐτῆς.* Utrinque vox *humilitas* et *ταπείνωσις* suo significatu nativo accipitur pro abiecta conditione, misera, afflicta; Origenes vero altius assurgit, humilitatemque principem virtutem christianam ante Christum in Christi matre deprædicat: cuius locum aliis quoque titulis memorabilem operæ pretium est exscribere. („De eo *b)* quod scriptum est: *Magnificat anima mea Dominum*, usque ad illum locum, ubi ait: *timentibus efficit virtutem.*.) In quam, inquit, humilitatem Mariæ respexit Dominus? Quid habebat mater Salvatoris humile, atque deiectum, quæ Dei Filium gestabat in utero? Quod ergo dicit: *Respexit humilitatem ancillæ suæ*, tale est, quasi dixerit: Respexit in iustitiam ancillæ suæ,

*a) Luc. I. 48.    b) Hom. VII. in Luc. T. III. p. 941.*

**CAPUT VII.** respexit in temperantiam, respexit in fortitudinem, atque sapientiam. Dignum

quippè est, ut virtutes respiciat. Respondeat aliquis, et dicat: Intellego, quomodo Deus iustitiam ancillæ suæ, sapientiamque respiciat: quomodo autem intendat humilitatem, non satis liquet. Consideret, qui quærit talia, quoniam proprie in scripturis una de virtutibus humilitas prædicetur. Ait quippe salvator: *Discite a me, quia mansuetus sum, et humilis corde, et invenietis requiem animabus vestris.* Quodsi vis nomen huius audire virtutis, quomodo etiam a philosophis appellatur, ausculta, eandem esse humilitatem, quam respiciat Deus, quæ ab illis ἀνυψία, sive μετρίότης appellatur. Sed et nos quodam eam possumus dicere circuitu, cum aliquis non est inflatus, sed ipse se deiicit. Qui enim inflatur, cadit secundum apostolum in iudicium diaboli: siquidem et ille ab inflatione cœpit, atque superbia. *Ut non, inquit, inflatus in iudicium incidat diaboli. Respexit super humilitatem ancillæ suæ.* Humilem me, inquit, et mansuetudinis sectantem, deiectionisque virtutem respexit Deus. *Ecce enim amodo beatam me dicent omnes generationes.* Si simpliciter intelligam omnes generationes, super credentibus illud interpretor. Si autem altius aliquid fuero scrutatus, animadvertam, quanti sit profectus dicere: *Quia fecit mihi magna, qui*

*potens est : quoniam omnis , qui se humiliat ,* CAPUT VIII.  
*exaltabitur. Respexit Deus in humilitatem*  
*beatæ Mariæ , propterea fecit illi magna ,*  
*qui potens est , et sanctum nomen eius. Et mise-*  
*ricordia eius in generationes generationum.*“

## CAPUT VIII.

### CHRISTUS PROMISSUS PATRIBUS.

*Hic erit magnus , et Filius Altissimi vo-*  
*cabitur. Et dabit illi Dominus Deus*  
*sedem David patris eius : et regnabit*  
*in domo Jacob in æternum , et regni*  
*eius non erit finis. Luc. I. 32.*

**A**d tantam familia ac domus David ob-  
 scuritatem humilitatemque redacta fuerat  
 post reditum ex captivitate Babylonica , ut  
 post Zorobabelem , de quo certum non est ,  
 eum ex ea stirpe fuisse , nulla illius in re-  
 gimine tribus Judæ ratio habita fuisse lega-  
 tur. Quidquid residui fuit potestatis in  
 tribu Juda , penes sacerdotes erat : dum  
 etiam postea sub Simone Machabæo , ab-  
 latum est iugum gentium ab Israel , ut habe-  
 tur Machab. XIII. 41. firmatumque est  
 huic familiæ regimen ; nec memoria quidem  
 stirpis David superstès videtur posse colligi

Ex semine  
 Abrahæ  
 oritur  
 et stirpe  
 David.



CAPUT ex eo quod legere est Machab. XIV. 41.

VIII.



*Judai et sacerdotes eorum consenserunt, eum (Simonem) esse Ducem suum et summum Sacerdotem in aeternum εἰς τοὺς αἰῶνας, donec surgat propheta fidelis. Defecerant tunc iam diu prophetæ, ac etiam deinceps usque ad Joannem Baptistam. Dum ecce eo adhuc in utero latente Filius ex Maria nasciturus is futurus denunciatur, quem ostentat præmissus textus Lucæ. Hoc est, quod B. V. Maria in suo cantico deprædicat a): Quia respexit humilitatem ancillæ suæ: ecce enim ex hoc beatam me dicent omnes generationes. Totum in eo est canticum illud, ut hanc divinam misericordiam extollat et potentiam in brachio suo, qua, depositis potentibus de fede, exaltati sunt humiles ex domo et familia David, ut ex ea fusciperet Israel puerum suum, sicut locutus est ad patres nostros Abraham et semini eius in sæcula. Factas has patribus promissiones D. Paulus Gal. III. 16. respiciens, Non dicit: Et seminibus, ait, quasi in multis: sed quasi in uno: Et semini tuo, qui est Christus, iuxta œconomiam Evangelii Christi Verbi incarnati. Sic etiam Zacharias canticum suum informat b): Benedictus Dominus Deus Israel, quia visitavit, et fecit redemptionem plebis suæ. Et erexit cornu salutis nobis in domo David pueri sui. Sicut locutus est per os sanctorum, qui a sæculo sunt,*

a) Luc. I. 48.

b) Ib. 68. etc.

*prophetarum eius. Salutem ex inimicis nostris, et de manu omnium, qui oderunt nos. Ad faciendam misericordiam cum patribus nostris: et memorari testamenti sui sancti. Quodsi promissio hæc esset etiam secundum carnem in semine Abrahæ, misericordia hæc fieri non potuisset cum Patribus ante Christum iam defunctis, sed per Christum non qui filii carnis, iuxta Apostolum a), hi filii Dei, sed qui filii promissionis, æstimantur in semine, nimirum testamenti sui sancti, quo hæredes quidem Dei cohæredes autem Christi sumus regni cœlestis per Christum. Deinde etiam ad promissionem Abrahæ factam Zacharias provocat iuramento firmatam a Deo per semetipsum: quoniam, ut ait Apostolus b), neminem habuit, per quem iuraret maiorem. In quo, subdit c), abundantius volens, Deus ostendere pollicitationis hæredibus immobilitatem consilii sui, interposuit iusiurandum: ut per duas res immobiles, quibus impossibile est mentiri Deum, fortissimum solatium habeamus, qui confugimus ad tenendam propositam spem, qua nimirum spe repromissionis factæ Abrahæ per Christum fimus participes: id quod est argumentum totius illius epistolæ, ut novi præ veteri testamento præstantiam declararet Apostolus d): qua nimirum amplioris gloriæ iste præ Moyse dignus est habitus, quanto*

a) Rom. IX. 8.      b) Hebr. VI. 13.      c) Ib. 17.  
d) Ib. III. 3.

CAPUT  
VIII.

*ampliores honores habet domus, qui fabricavit illam, Verbum nimirum divinum æterni Patris Filius a), per quem fecit et sæcula, incarnatus; et quidem cum esset Filius Dei, didicit ex iis, quæ passus est, obedientiam: et consummatus, factus est omnibus obtemperantibus sibi, causa salutis æternæ.*

Est hoc in canticis Zachariæ b) iusiurandum illud, quod iuravit ad Abraham patrem nostrum, daturum se nobis: ut sine timore, de manu inimicorum nostrorum liberati, serviamus illi, in sanctitate et iustitia coram ipso, omnibus diebus nostris: tanquam spiritale semen Abrahæ secundum Evangelium Christi vitam instituendo in sanctitate et iustitia, de quibus Apostolus c): Si autem vos Christi: ergo semen Abrahæ estis, secundum promissionem heredes. Et supra d): Cognoscite ergo, quia qui ex fide sunt, ii sunt filii Abrahæ. Providens autem scriptura, quia ex fide iustificat gentes Deus, prænuntiavit Abrahæ: Quia benedicentur in te omnes gentes. Igitur qui ex fide sunt, benedicentur cum fidei Abraham. Et paulo post e): Ut in gentibus benedictio Abrahæ fieret in Christo Jesu, ut pollicitationem Spiritus accipiamus per fidem. Benedictionem hanc Abrahæ factam postquam extulisset Jesus filius Sirach, subdit f): Et in Isaac eodem

a) Hebr. V. 7.    b) Luc. I. 73.    c) Gal. III. 29.  
d) Ib. 7.    e) Ib. 14.    f) Eccli. XLIV. 24. etc.

*modo fecit propter Abraham patrem eius. Benedictionem omnium gentium dedit illi Dominus, et testamentum confirmavit super caput Jacob.*

Patriarcham Isaac commemorat secundum tertio iam factam Abrahæ illam promissionem, qua demum *per semetipsum* iuravit Deus, postquam iussus immolare voluit filium Isaac a): *Benedicentur in semine tuo omnes gentes terræ, quia obedisti voci meæ.* Juramenti Abrahæ ipse Dominus meminit, dum Gen. XXVI. Isaac apparens eandem ei impertitur benedictionem, facitque promissionem. Eadem etiam benedictio facta vivente adhuc Isaac patre fuit Gen. XXVIII.

14. Jacob, quem nominat angelus ad Mariam de Christo filio locutus: *Et regnabit in domo Jacob in æternum.* Benedictionem accepit Jacob prima nocte adhuc recumbens in terra Chanaan promissa Abrahæ, cum fratris Esau iram fugiens ad avunculum suum Laban in Mesopotamiam contenderet b), *videretque in somnis scalam stantem super terram, et cacumen illius tangens cælum: Angelos quoque Dei ascendentes et descendentes per eam, et Dominum innixum scalæ dicentem sibi: Ego sum Dominus Deus Abraham patris tui, et Deus Isaac: terram, in qua dormis, tibi dabo et semini tuo. Eritque semen tuum, quasi pulvis terræ: dilataberis ad Occidentem, et Orientem, et Septentrionem, et Meridiem: et*

a) Gen. XXII. 18.

b) Ib. XXVIII.

**CAPUT** *benedicentur in te, et in semine tuo cuncta tribus*  
**VIII.** *terra.* Omnia hæc regnum Christi porten-  
 debant Ecclesiam militantem hic in terris,  
 et regnantem in æternum in cœlis, cuius  
 regni non erit finis. Unde *cum evigilasset*  
*Jacob de somno, ait: Verè Dominus est in loco*  
*isto, et ego nesciebam. Pavensque, quam terri-*  
*bilis est, inquit, locus iste! non est hic aliud*  
*nisi domus Dei, et porta cæli . . . Appellavit-*  
*que nomen urbis Bethel Domus Dei, quæ*  
*est Ecclesia inter gentes iuxta promissio-*  
*nem factam Jacob.*

Quod attinet mox antecedentem pro-  
 missionem: *Et dabit illi Dominus Deus sedem*  
*David patris eius, facta legitur promissio hæc*  
*Davidi in filio Salomone, dum ei reservata*  
*est templi ædificatio a): Cumque completi fue-*  
*rint dies tui, et dormieris cum patribus tuis,*  
*fuscitabo semen tuum post te, quod egredietur de*  
*utero tuo, et firmabo regnum eius. Ipse adifi-*  
*cabit domum nomini meo, et stabiliam thronum*  
*regni eius usque in sempiternum . . . Et fidelis*  
*erit domus tua, et regnum tuum usque in æter-*  
*num ante faciem tuam, et thronus tuus erit*  
*firmus iugiter.* Promissio hæc Davidi facta  
 in apertissima de Christo prophetia Isa.  
 IX. 6. etc. a nobis paulo ante recitata ex-  
 plicatur. Quando vero, et quomodo  
 hæc implenda sint, idem propheta postea

a) *II. Reg. VII.*

declarat a): *Inclinate aurem vestram, et venite ad me: audite, et vivet anima vestra, et feriam vobiscum pactum sempiternum, misericordias David fideles. Ecce testem populis dedi eum, ducem ac præceptorem gentibus. Ezech. XXXIV. 23. fistitur Christus pastor ille ovium bonus b), præter quem, sicut Christus ipse dicit, quotquot venerunt, fures sunt et latrones. Et suscitabo super eas, verba sunt Ezechielis, pastorem unum, qui pascat eas, servum meum David: ipse pascet eas, et ipse erit eis in pastorem. Ego autem Dominus ero eis in Deum: et servus meus David princeps in medio eorum: ego Dominus locutus sum. Tum postea XXXVII. 24. Et servus meus David rex super eos, et pastor unus erit omnium eorum: in iudiciis meis ambulabunt, et mandata mea custodient, et facient ea. Et habitabunt super terram, quam dedi servo meo Jacob, in qua habitaverunt patres vestri: et habitabunt super eam ipsi, et filii eorum, et filii filiorum eorum usque in sempiternum: et David servus meus princeps eorum in perpetuum. Et percutiam illis fœdus pacis, pactum sempiternum erit eis etc.* Accipitur hic locus etiam de populi Judaici conversione, quæ adhuc speratur ante finem mundi futura, perinde ac alia eiusmodi vaticinia aliorum prophetarum, quæ longum esset hic referre, veluti Isa.

a) Isa. LV. 3.      b) Jo. XI. 14.

CAPUT X. 22. XI. 11. XXXVII. 32. Jer. XXX.  
VIII. 33. XXXIV. 21. 26. Osee III. 4. Mich.

IV. apud quem vero prophetam mox frequenti capite quinto insignis illa prophetia, quæ Matth. II. 6. ab ipsis principibus sacerdotum et scribis populi ab Herode consultis licet non integra allata legitur in testimonium nascituri in Bethlehem Messiae. Et adhuc explicatius Jo. VII. 42. *Nonne scriptura dicit: Quia ex semine David et de Bethlehem castello, ubi erat David, venit Christus? veluti accidit: quemadmodum nempe Evangelista testatur a), dum omnes ibant, ut profiterentur singuli iuxta edictum Augusti, ut describeretur universus orbis, in civitatem suam, ascendisse Joseph in civitatem David, quæ vocatur Bethlehem: eoquod esset de domo et familia David cum Maria desponsata sibi uxore prægnante. Factum est autem, cum essent ibi, impleti sunt dies, ut pareret. Adestque subito natum Salvatorem annuntians angelus pastoribus exterritis: Nolite, inquiens, timere: Ecce enim evangelizo vobis gaudium magnum, quod erit omni populo: quia natus est vobis hodie Salvator, qui est Christus Dominus, in civitate David.*

In salutem gentium,

Quod hic annuntiat *gaudium magnum omni populo b)*, Simeonem illum senem, cum Christum in templo præsentatum in ultas

a) Luc. II.    b) Ib. 28.

fusciperet, extra se rapuit, ut iam dimitti in pace, seu mori cuperet, *Quia*, ut ait, *viderunt oculi mei salutare tuum, quod parasti ante faciem omnium populorum; lumen ad revelationem gentium, et gloriam plebis tue Israël.* Plena sunt de hoc prophetarum oracula, quorum nonnulla tum alibi passim, plura vero simul colligit S. Paulus Rom. XV. ac primum quidem ipsius regis Davidis ex cantico eius, quod habetur II. Reg. XXII. estque psalmus XVII. Dicit autem apostolus, *Christum Jesum ministrum fuisse circumcisionis propter veritatem Dei ad confirmandas promissiones patrum: gentes autem super misericordia honorare Deum, sicut scriptum est: Propterea confitebor tibi in gentibus Domine, et nomini tuo cantabo.* Idem adhuc copiosius facit apostolus a) Christum Antiochiæ prædicans in synagoga Judæorum, illud imprimis agens, ut ex Christi resurrectione ipsorum animis sinistram de regno Messie in fide David et domo Jacob in æternum eximat opinionem, quod Judæi terrenum in progenie David fore existimabant perduraturum, annuntiando eam, quæ, ut inquit b), *ad patres nostros repromissio facta est; quoniam hanc Deus adimplevit filiis nostris, resuscitans Jesum.* Ex eo autem, quod Christus iam non moritur, quale eius sit reg-

a) Act. XIII.

b) Ib. 32.



CAPUT VIII. num, declaratur; *David enim*, subdit a)

*in sua generatione cum administrasset voluntatem Dei, dormivit, et appositus est ad patres suos, et vidit corruptionem; quem vero Deus suscitavit, non vidit corruptionem.* Idem argumentum adhuc magis illustrat D. Petrus in primo post acceptum Spiritum sanctum ad Judæos sermone b): „Viri fratres, liceat audenter dicere ad vos de patriarcha David, quoniam niam defunctus est, et sepultus: et sepulchrum eius est apud nos usque in hodiernum diem. Propheta igitur cum esset, et sciret, quia iureiurando iurasset illi Deus de fructu lumbi eius federe super sedem eius, providens locutus est de resurrectione Christi, quia neque derelictus est in inferno, neque caro eius vidit corruptionem. Hunc Jesum resuscitavit Deus, cuius nos testes sumus. Dextera igitur Dei exaltatus et promissione Spiritus sancti accepta a Patre effudit hunc, quem vos videtis, et auditis. Non enim David ascendit in cœlum etc. c)

Perspicuum hinc fit, quomodo hoc regnum fit secundum repromissionem factam patribus ante Christum, qui sunt filii resurrectionis nobiscum ad reformandam in nobis imaginem Dei per Adamum secundum, in primo depravatam c), ut sicut per

a) Act. XIII. 36.

b) Ib. II. 29. etc.

c) I. Cor. XV. 49.

*vimus imaginem terreni, portemus et imaginem  
lestis: Nempe a) cum essemus mortui pecca-  
, conuivificavit nos in Christo, cuius gratia  
is salvati, et conresuscitavit, et consedere fecit  
cælestibus in Christo Jesu. Mirarer, esse  
dieque ex Christianis etiam doctoribus,  
i resuscitantes ex parte saltem veterum  
iliastarum Judaizantium opinionem, res-  
irant regnum quoddam Davidicum in  
ris cum Christo ævum quoddam perdu-  
urum, nisi ex illis essent, qui ecclesiam  
litantem regnum Christi. in terris a prima  
ristiani nominis ætate in orbe catholico  
nspicuum nolunt agnoscere, haud secus  
Judæi Christum humilem ac abiectum,  
m coram cernerent Romanos domitores  
bis falsorum deorum cultores, divinare-  
e experti, toties accisas res suas ac reg-  
m, quoties patres sui a cultu veri Dei  
in idololatriam fuissent prolapsi: certe-  
rro tenentes simulacra gentium argentum  
aurum opera manuum hominum esse;  
nentes in sacris suis cum regio psalte suo  
vide (in cuius femine erat, quod ex-  
ectabant tunc vel maxime ablatq a Juda  
ptro, instaurandum Messix regnum)  
simulacris illis gentium b) *Os habent, et  
loquentur etc.* orantesque ardentem: *Simi-  
illis fiant, qui faciunt ea, et omnes qui  
fidunt in eis.* Velamen vero cum positum  
) *Eph. II. 5.*      b) *Psalm. CXIII. 5.**

CAPUT  
VIII.

super cor haberent, eundem regium psalmistam non intelligebant toties conversionem gentium prædicentem, præsertim in psalmo XXI. quo tota Evangelii Christi ac redemptionis nostræ per crucem œconomia, ut iam vidimus, tam aperte declaratur, ac simul etiam Ecclesia illa magna, in qua constanter resonat in suis psalmis David canens in memorato psalmo illo a): *Apud te laus mea in ecclesia magna: vota mea redam in conspectu timentium eum.* Et mox: *Remiscentur, et convertentur ad Dominum universi fines terræ: et adorabunt in conspectu eius universa familia gentium.* Tum vero præsertim in psalmo LXXI. *Deus iudicium tuum regida, et iustitiam tuam filio regis Salomoni quidem, ut tamen ad ecclesiam militantem regnum Christi in terris excurrat spiritu prophetico psalmista b): Et adorabunt eum omnes reges terræ: omnes gentes servient ei: quia liberabit pauperem a potente; et pauperem cui non erat adiutor etc.* Idemque in Ps. LXXXV. in rebelle filio Absolom refragariam Christo gentem Judæicam adumbrans, simul triumphum de gentibus idololatriis attingit: *Non est similis tui in diis Domine: et non est secundum opera tua. Omnes gentes quascunque fecisti, venient, et adorabunt coram te Domine: et glorificabunt nomen tuum. Quoniam magnus es tu, et faciens mirabilia: tu es Deus solus.*

a) Psalm. XXI. 26.

b) Ib. LXXI. 11.

## CAPUT IX.

CAPUT  
IX.CHRISTI GENEALOGIA, ET  
GENERATIO EX VIRGINE.

Christi autem generatio sic erat: Cum  
esset desponsata mater eius Maria Jo-  
seph, antequam convenirent, inventa  
est in utero *habens de Spiritu sancto*  
*etc.* Matth. I. 18.

**D**uplex legitur in Evangelio Christi ge- Duplex  
Christi  
genealogia  
in Evan-  
gelio.  
nealogia; altera Luc. III. 23. etc. ab Heli  
(quod est abbreviatum nomen ex Heliacim,  
idem ac Joachim apud Hebræos) patre  
Mariæ matris Jesu; deduciturque hæc ge-  
nealogia usque ad Adam: altera Matth. I.  
usque ad Abraham, cuius femini facta est  
promissio nascituri Messiae ex stirpe David  
regis, cuius regnum figura fuerat regni  
Christi: quod non erat de hoc mundo, ut  
Judæi sperabant, putabantque ad suam  
solum ex patriarcha Abraham descenden-  
tem pertinere gentem; sed commune erat  
futurum omnibus gentibus posteris Adami  
protoparentis, ad quem usque ascendit ge-  
nealogia Lucæ. Genealogia Matthæi tamen  
Judaicam propius gentem spectabat, ex  
qua natus est Christus tunc, cum iam de  
tribu Juda ablatum esset sceptrum; familia

**CAPUT** David vero dudum throno deiecta inops

**IX.** erat et abiecta: ita ut natus ex illa Chris-

tus non haberet, ubi caput reclinaret, natus in stabulo, positusque in præsepio.

Tantum vero abest, ut aliquando facultates, pompam et splendorem huius sæculi ambiret Messias mundi, ut pótius contemptum mundanarum rerum docuerit verbo atque exemplo, pauperis filius fabri, ut putabatur, Joseph, qui artificio suo sibi, Mariæ ac Jesu victum parabat.

Huc pertinet genealogia apud Matthæum *a)* ad Joseph patrem Christi nutrimentum deducta, qui ibidem mox etiam ab angelo filius David compellatur; cui fuit secundum legem Maria, ipsa etiam ex eadem descendens tribu Juda et familia secundum Lucam, desponsata: placuitque divinæ sapientiæ hunc generationis Christi ordinem admirabilem inire: quo simul prophetiæ de matre virgine constaret veritas, alterique de danda ei sede David patris sui, quod ius virile erat: unde etiam apud eundem Evangelistam dicitur: *Qui fuit Heli*, scilicet patris Mariæ adeoque avi Christi. Porro hodiernis evangelicæ veritatis irrisoribus, qui genealogiam apud Matthæum et Lucam sibi contrariari dicere haud verentur, id, quod olim S. Hieronymus Juliano apostatæ

*a) Matth. I. 20.*

idem oggerenti respondit, sufficit reponere, inscitia eos veteris legis laborare; qua cautum erat, ut mulieres non solum coniungerentur eiusdem tribus maritis; verum etiam mulier seu virgo unica relicta ex stirpe agnato proximo ad resuscitandum semen copularetur. Cuius rei admirabili Deus consilio ac providentia voluit in ipsa familia David, ex qua nasciturus erat Christus, esse exemplum in Booz Davidis proavo, dum, ut legitur Ruth a) nurum defuncti mariti Elimelech accepit uxorem, perinde ac Joseph filius Jacob, qui per Salomonem originem ex stirpe David deducebat, Mariam virginem per Nathan filium David ex eadem stirpe oriundam accepit uxorem, ex qua natus est Christus secundum naturam, secundum legem vero ex Joseph: quam genealogiam S. Lucas prosequitur, alteram S. Matthæus: quare ille patrem Josephi vocat Jacob naturalem, hic Heli seu Eliacim parentem Mariæ: dum vero ad Joseph devenit, non iam, ut antea constanter utitur verbo *genuit*, utpote designans legalem generum Heli parentis Mariæ. S. Lucas vocem *fuit* adhibet, quæ naturali, et legali patri congruit; Heli autem Eliacim seu Joachim naturalis pater fuit Mariæ et Joseph per adoptionem, seu gener per legem b), ut putabatur filius Joseph, qui

a) Ruth IV.      b) Luc. III. 23.

**CAPUT** fuit *Heli*, Jesus nimirum ex *Maria* filia

**IX.** *Heli* natus.

Myste-  
rium par-  
tus virgi-  
nei.

Antequam igitur convenirent, inventa est in utero habens de Spiritu sancto. „Sic principem huius sæculi latuit *Mariæ* virginitas, ut *S. Ignatius M.* loquitur *a)*, et partus ipsius.“ *S. Leo M.* veluti commentatus in hunc *S. Martyris* locum, „*Christus* nasci, ait *b)*, elegit ex virgine, ut natam humani generis salutem diabolus ignoraret, spiritali latente conceptu, quem non alium videret, quam alios, non aliter crederet natum esse, quam cæteros.“ Eandem *S. Ambrosius c)* in *Lucæ* cap. *I.* 27. rationem reddit, cur desponsatæ demum virgini angelus conceptum virgineum denunciavit: „ut, inquit, virginitas *Mariæ* falleret principem mundi: qui cum desponsatam viro cerneret, partum non potuit habere suspectum.“ Quod sic commode accipitur, ne diaboli instigatione partus redderetur apud homines suspectus: iuxta ac iam prius animadverterat *S. Pater d)* bene utrumque posuisse scripturam, „ut et desponsata esset et virgo: virgo, ut expers virilis consortii videretur: desponsata, ne temeratæ virginitatis adureretur infamia,

*a)* *Epist. ad Eph. n. 19.* *b)* *Serm. XXI. de Nat. D. n. 4.*

*c)* *Lib. II. in Luc. n. 3. T. I. p. 1282.*

*d)* *Ibidem n. 1,*

cui gravis alveus corruptelæ videretur insignie præferre. Maluit autem Dominus aliquos de suo ortu, quam de matris pudore dubitare.“ Factum hoc in pœnam iam reprobandorum Judæorum, obque malitiam et perversitatem eorundem, ne calumniandi matrem et blasphemandi filium materiam haberent, ansamque arriperent. Addit S. Ambrosius Herodem æmulum: „Quid autem, inquit a), Judæis, quid Herodi posset adscribi, si natum viderentur ex adulterio persecuti?“ Omnis hinc causandi, tergiversandique illis ratio evanescit, qui cum Judæis hodieque vaticinium Isaïæ b) nihil pensi habent, etiamsi ab ipso evangelista Mathæo in testimonium vocetur c): *Ecce virgo in utero concipiet, et pariet filium, et vocabitur nomen eius Emanuel: quod est interpretatum Nobiscum Deus.* Non sine causa additur apud Matthæum nominis interpretatio ad innuendum, de re ipsa rem esse, non de in dendo nomine, dum Judæi, eorumque patroni desiderant in Christo nomen Emanuel secundum textum quo dicitur: *Et vocabitur nomen eius Emanuel.* At vero Emanuel hic debebat esse Deus absconditus, et Salvator, id est Jesus, quod vocatum est nomen eius, antequam in utero conciperetur.

a) *Lib. II. in Luc. n. 2. T. I. p. 1282.*

b) *Isai. VII. 14.* c) *Matth. I. 23.*



**CAPUT** En medium inter tria mysteria clamoris  
**IX.** a nobis iam supra ex S. Ignatio M. memorata a), quæ in silentio Dei patrata sunt. Jacet pannis involutus in præsepio clinguis infans. Eat iam Dionysius Longinus dum in libro de sublimi c. 7. „Aiacis in Necya silentium magnum et quavis oratione sublimius extollit.“ Quid hoc ad mysterium nostrum clamoris in silentio Dei patratum, dum nobis fistitur Verbum incarnatum fasciis involutum lacrymis, non voce, qua adhuc divinus pusio caret, non suas imbecillis corpusculi, sed nostras plorans animæ miseras, dum mater virgo Deum et Hominem peperit Emanuel: *Nobiscum Deus,*

Quidni cum S. Proclo b) in laudem parientis virginis erumpamus: „Omnium vice, quæ tui præconio dici queunt, unus tibi propheta abunde sit ad laudis cumulum, qua clamat: *Ecce virgo habebit in utero.* Miraculum dixit, sed modum reticuit. *Et pariet filium:* prædicavit partum, nec relationem adulteravit. *Et vocabunt nomen eius Emanuel:* Mysterium protulit, altaque velut tonutruvi voce appellationem edixit: *Quod interpreteris Nobiscum Deus.* Natam prolem

a) *Epist. ad Ephes. n. 19.*

b) *Orat. V. T. IX. Bibl. P. P. ed. nov. Venedæ, p. 631.*

---

claro præconio Deum dixit, ac Judæorum **CAPUT**  
ora obstruxit. *Nobiscum Deus*, ac error **IX.**  
extinctus est: *Nobiscum Deus*, fugantur dæ-  
mones: *Nobiscum DEUS*, cassaue ac in-  
utilis cessit diaboli opera: *Nobiscum Deus*,  
Regesque pietatem colunt: *Nobiscum Deus*,  
et Ecclesiæ mire frequentantur: *Nobiscum*  
*Deus*, mortuique vindicatam libertatem exul-  
tabundi celebrant, ac clamore dicunt: Non  
angelus, non legatus, sed ipsemet Deus  
venit et salvavit nos, ipsi gloria in sæcula  
sæculorum. “ Amen.

---

CHRISTUS NASCITURUS IN BETHLEHEM CIVITATE DAVID.

Exiit edictum a cæsare Augusto, ut describeretur universus orbis. Hæc descriptio prima facta est a præside Syriæ Cyrino: et ibant omnes, ut profiterentur, singuli in suam civitatem. *Ascendit autem et Joseph a Galilæa de civitate Nazareth in Judæam in civitatem David, quæ vocatur Bethlehem: eoquod esset de domo, et familia David, ut profiteretur cum Maria desponsata sibi uxore prægnante.* Luc. II. 1.

Ablato  
iam sce-  
ptro de  
Juda.

Est hæc divina redemptionis nostræ in Incarnatione Verbi divini œconomia, qua naturam humanam ex femine David assumsit, natus in Bethlehem civitate David, acciditque admirabili divina ordinatione, ut Maria prægnante exiret edictum a cæsare Augusto a) ut describeretur universus orbis, Romanus nempe, cui tunc accensebatur Judæa, ablato iam sceptro: quod nequaquam futurum patriarcha Jacob celebri vaticinio moriens edixerat, *donec veniat, qui mittendus est, et ipse erit expectatio gentium* b).

a) Luc. II. 1.      b) Gen. 49.

S. Justinus M. Antonino Pio in Apol. 1. CAPUT X.  
 curate describit Bethlehem locum nativita-  
 tis Christi: „Est autem, inquit a), vicus  
 quidam in terra Judæorum, stadiis triginta  
 quinque Hierosolymis distans, ubi natus  
 est Jesus Christus, quemadmodum et ex  
 descriptionibus census discere potestis, quæ  
 sub Cyrenio, primo vestro in Judæa præ-  
 side, confecta sunt.“ Et Tertullianus  
 contra Marcionem: „de censu, inquit b),  
 Augusti, quem testem fidelissimum Domi-  
 nicæ Nativitatis Romana Archiva custo-  
 diunt.“ Adhuc semel eodem libro c) lo-  
 quitur *de iisdem Augustianis censibus*. Vide  
 et adora miram Dei providentiam, dum  
 describitur orbis gentium, ille adhuc in  
 utero matris suæ in censum venit, qui  
 erat exspectatio gentium, oriturus ex tribu  
 Juda, sed tunc, quando iam sceptrum ab  
 ea ablatum fuerat, et dux de femore eius,  
 Christo, conceptor de Spiritu sancto, nas-  
 cituro ex virgine in Bethlehem Juda civi-  
 tate David, ex cuius stirpe nempe oritu-  
 rus erat Messias. Constat Judæorum mo-  
 rem fuisse, ut census per tribus fieret et  
 familias, quod statu illo Judæorum confuso  
 fieri non poterat, nisi parentes eo se confer-  
 rent, unde familia fuerat Davidica nempe  
 ex Bethlehem Juda, manifesto stirpis Joseph

a) N. 34. p. 65. A.

b) Lib. 10. c. 7. p. 417.

c) Ibid. c. 36. p. 453.

**CAPUT** ac Mariæ matris Jesu argumento; sed non  
**X.** minus manifesto iudicio, quod ablatum  
 ~~~~~ esset sceptrum de Iuda delatum ad Roma-  
 nos, quod tam singulari providentia Chris-  
 tus ipse testari debebat in ipsa sua nativi-  
 tate in Bethlehem, parentibus ex edicto  
 cæsaris eo se conferre iussis, ut profiteren-  
 tur se esse de ditione cæsaris. *Factum est*  
*autem, cum esset ibi Maria, impleti sunt dies,*  
*ut pareret: et peperit filium suum primogenitum, et*  
*pannis eum involvit, et reclinavit eum in præ-*  
*prio: quia non erat eis locus in diversorio a).*

Maria ex  
 Nazareth  
 in Bethle-  
 hem con-  
 oedit.

Sic impletum est S. Joannis in principio  
 Evangelii fui dictum: *In propria venit, et*  
*fui eum non receperunt;* iterumque dum pa-  
 rentes Jesu iussi sunt cum infante fugam in  
 Ægyptum arripere, quod eum rex alienigna  
 Herodes quæreret ad perdendum eum: ac  
 redux etiam, quod Archelaus filius He-  
 rodis regnaret in Judæa, timuit eo ire Jo-  
 seph, et admonitus in somnis, secessit in partes  
 Galilææ. *Et veniens habitavit in civitate, que*  
*vocatur Nazareth b),* ubi iam prius degebant,  
 dum ecce Maria in Nazareth iam gravida:  
*Exiit edictum a casare Augusto, ut describeretur*  
*universus orbis c).* Sicque Joseph cum Ma-  
 ria iam partui proxima nihil cogitans d)  
*ascendit a Galilæa de civitate Nazareth in*

a) Luc. II. 6.      b) Matth. II. 22.

c) Luc. II. 1.      d) Ib. 4. 5.

*Judaam in civitatem Bethlehẽm, eoquod esset de domo et familia David, ut profiteretur cum Maria desponsata sibi uxore pręgnante, relin- quens divinę sapientię consilio orbi Ro- mano in tabulis publicis ortus fui documen- tum; ad quod confidenter provocarent chris- tiani. O adorandam divinam providentiam! dum superbit Cęsar ostentans imperii poten- tiam et imperandi potestatem per orbem, creator orbis et dominus adhuc in utero ma- tris humilis obsecundat simul principi terres- tri, et Patri cęlesti iuxta prophetiam Mich. V. 2. etc. Et tu Bethlehẽm, Ephrata parvulus es in millibus Judę: ex te mihi egredietur, qui sit dominator in Israel, et egressus eius ab initio, a diebus eternitatis. Propter hoc dabit eos usque ad tempus, in quo parturiens pariẽt: et reliquię fra- trum eius convertentur ad filios Israel. Et stabit, et pascet in fortitudine nominis Domini Dei sui: et convertentur, quia nunc magnificabitur usque ad terminos terrę: lapis nimirum ille Dan. II. 45. qui de monte abscissus est sine manibus, et commi- nuit testam et ferrum etc. Mandatum Augusti matrem Jesu deducit in Bethlehẽm, ut ibi, cum non esset locus in diversorio, nasceretur in stabulo, qui sibi omnia regna subiiceret, ac colla regum subderet fuscitato sibi regno, quod in æternum non dissipabitur, et regnum eius alteri populo non tradetur: comminuet autem, et consumet omnia regna hæc: Nabuchodonosori nempe in statua repręsentata per somnum,*

CHRISTUS NATUS IN BETHLEHEM  
PASTORIBUS DENUNTIATUR AB ANGELIS.

*Pastores erant in regione eadem vigilantes,  
et custodientes vigilias noctis super gre-  
gem suum. Et ecce angelus Domini  
stetit iuxta illos. Luc. II. 8. etc.*

Cur solis  
pastori-  
bus de-  
nuntiatus  
sit Chris-  
tus natus.

**I**dem Dominus rex cœli et terræ, qui postea ad ministerium suum viles piscatores vocavit, et apostolos ad prædicandum Evangelium in orbem misit, nascens voluit rudibus et humilibus pastoribus denunciari non regi Herodi, tetrarchis vel optimatibus Judææ principibus sacerdotum, synedrio, scribis, vel Pharisæis. Ita Pater, quoniam sic placitum fuit ante te, ut absconderentur hæc a sapientibus, et prudentibus incredulis, et revelarentur parvulis. Quid enim illi suffeni, si eis pro nato Salvatore, qui est Christus Dominus, signum datum esset, sicut pastoribus? Et hoc vobis signum a): Invenietis infantem pannis involutum et positum in præsepio? Ecce prævenitur voce angeli pastorum simplicitas, ne dubitarent eum agnoscere natum Salvatorem Christum Dominum, quem angelus denunciasset inve-

a) Luc. II. 12.

niendum infantem pannis involutum positum in præsepio: „Angustum, ut cum S. Gaudentio Brixienti loquar *a)*; præsepis cunabulum, et obvolutio consueta pannorum, humanam signat infantiam; sed angelorum voces Deum pastoribus annunciant esse, qui natus est. Nam cum diceret angelus: *Nolite timere, evangelizo vobis gaudium magnum; quod erit omni plebi: quia natus est vobis hodie Salvator, qui est Christus Dominus in civitate David. Et hoc vobis signum; addidit: invenietis infantem pannis involutum.* “ Quid est vero, quod angelus dicit: *in civitate David*, cuius regia erat urbs Hierosolymitana tam splendida ac dives, ut sub Salomone Davidis filio argentum veluti lapides in plateis computari videretur?

Sed neminem latet, quomodo David ex Bethlehem ortus ad solium evectus sit. Factus rex ex pastore cum scepro baculum pastoritium commutavit. Quis igitur non admirabundus suspiciat, et adoret simplices perinde ac imbecilli obtutui nostro stupendas divinæ sapientiæ vias. Filius Dei, Dominus dominantium nascitur in stabulo, et reponitur in præsepe pecorum; omnis humanæ opis expers, exclusus omni contubernio, concubia nocte: dumque dormientibus cæteris, foli vigilant pastores;

*a) Serm. XIX. edit. August. an. 1757. p. 190.*



CAPUT ad hos quoque solum Evangelium nati

XI. Salvatoris factum est. Reges sedent in so-

lio, Augustus tunc imperator in summo fastigio Imperii Romani, quartæ apud Danielelem designatæ monarchiæ: milites in campo, castris aut præsidio orbem sub uno principatu continentes, dum rex regum et Dominus dominantium nascitur lapis ille colossum monarchiarum abscissus de monte sine manibus humanaque opera subruiturus: sacerdotes stant ad altare Judæi Romano quidem Imperio subiecti, in templo tamen splendidissimo orbis miraculo, omni ordinis levitici perfunguntur ceremoniarum pompa, dum nascitur summus sacerdotum sacerdos et victima offerens et oblatio figuris testamenti veteris, per novum in sanguine suo, finem impositurus: Quivis incola sive in urbibus mœniis clausis, sive in vicis apertis de nocte dormiunt in domibus suis; illi etiam, qui de die in sudore vultus sui vescentes panem præprimis maledictum Adami sentiunt, in adventu Adami secundi quiescunt concubia nocte; foli tunc erant pastores in regione eadem vigilantes, et custodientes vigilias noctis super gregem suum; ad hos igitur vox angelica fit, quorum unus patriarcha Jacob, in cuius domo regnaturus virgini matri denunciatur nasciturus infans, de se die noctuque, ait a), astu urebar et gelu;

a) Gen. XXXI. 40.

*fugiebatque somnus ab oculis meis.* Clamat Isaias *Custos quid de nocte? custos quid de nocte? Dixit custos: Venit mane et nox. Si queritis, querite: convertimini, venite a).* Ecce fecerunt hoc nascente salvatore, pastores custodes in nocte. Ex eodem Isaiâ propheta Matth. XII. 18. etc. nobis Christus puer describitur: *Ecce puer meus, quem elegi, dilectus meus, in quo bene complacuit animæ meæ. Ponam spiritum meum super eum, et iudicium gentibus nuntiabit. Non contendet, neque clamabit, neque audiet aliquis in plateis vocem eius. Arundinem quassatam non confringet, et lînum fumigans non extinguet, donec eiiciat ad victoriam iudicium: et in nomine eius gentes sperabunt.* Hæc ad Ecclesiam ex gentibus pertinent congregandam sponsam illam, de qua filias Jerusalem adiurat sponsus, ne evigilare faciant sponsam, *donec ipsa velit.* Solis pastoribus vigilantibus denunciatur Salvator mundi, quorum conditioni infans in stabulo natus, et in præsepi reclinatus congruit. Hæc si denunciata essent magnatibus huius sæculi, et sapientibus, fuissent tunc ludibrio excepta; dum christiani nos, qui exemplum hoc humilis Filii Dei præ oculis habemus et admiramur, tam tardi ad imitandum sumus. Tandem erubescat homo esse superbus propter quem factus est humilis Deus. Disce ab incarnato Verbo in humilitate veram sublimitatem et gloriam.

a) Isai. XXI. 11.

GLORIA IN EXCELSIS, ET IN  
TERRA PAX.

Et subito facta est cum angelo multitudo militiæ coelestis laudantium Deum, et dicentium: *Gloria in altissimis Deo, et in terra pax hominibus bonæ voluntatis.* Luc. II. 13. 14.

Gloria  
Verbi di-  
vini in-  
carnati pa-  
storibus  
denuntia-  
ta,

**I**nfinitiæ gloriæ divinæ, quam in se ab æterno cum unigenito filio habuit, uti nihil detrahi in se, ita nihil accedere in rebus creatis potuit: Christus homo factus, Verbum incarnatum statu exinanitionis novo stupendo et incomprehensibili modo id meruit, ut a multitudine militiæ coelestis laudantium Deum gloria in Altissimis Deo Θεοπρόσωπος, audientibus pastoribus resonaret, et in terra pax hominibus: *quoniam quidem Deus erat in Christo mundum reconcilians sibi*, ut ait Apostolus II. Cor. V. 19. Idem Coloss. I. 26. *mysterium hoc extollens, quod absconditum fuit*, ait, *a sæculis et generationibus, nunc autem manifestatum est sanctis eius, quibus voluit Deus notas facere divitias gloriæ sacramenti huius in gentibus, quod est Christus, in vobis spes gloriæ.* Sic mox vult eos venire in agnitionem mysterii Dei Patris et Christi Jesu,

*in quo sunt omnes thesauri sapientiæ absconditi.* CAPUT

XII.

Ad Christum natum usque, cœli quidem annuntiaverunt gloriam Dei, quæ unus ac solus est ac esse debet creaturarum rerum omnium finis, a quo tamen desciscens ad creaturas homo iam in paradyso se convertit, indeque pulsus, eousque a fine hoc ultimo aberravit, ut abiecto etiam vero Deo falsos sibi effingeret, quibus gloriam foli Deo debitam redderet: aut si verum Deum agnosceret, gloriam ei debitam perverteret, nec, quæ eo digna erat, redhibere posset, donec is in mundum venisset, qui Deus et homo gloriam Deo condignam præstaret, et *Θεοπρέπως* nos præstare faceret, sibi, a quo eramus alienati, reconciliatos, redditâ in terra pace hominibus. Pacem, quam etiam suis discipulis post resurrectionem reliquit, *non quomodo mundus dat*, eratque tunc quidem pax in orbe, a Romanis devicto, pax armis ac scelere parta, atque invitis, renitentibusque imposita, ipsi electo populo Dei in ditionem atque in servitutem redacto. Dum ecce adest, qui mittendus erat expectatio gentium: *rex pacificus: princeps pacis*: ut iam non esset distinctio Judæi et Græci, Scythæ ac Barbari: pax hominibus bonæ voluntatis pastoribus denunciatur ab angelis.

## CAPUT

## XII.

*Et factum est, ut discesserunt ab eis angeli in cælum: pastores loquebantur ad invicem: Transeamus usque Bethlehem, et videamus hoc verbum, quod factum est, quod Dominus ostendit nobis. Et venerunt festinantes: et invenerunt Mariam, et Joseph, et infantem positum in præsepio. Crediderunt pastores voci angelicæ, susceperuntque ceu sibi divinitus factum verbum, quod Dominus ostendit illis, invenientesque infantem in præsepio cognoverunt de verbo, quod dictum erat illis de puero hoc. Nihil eos offendit, nihil eorum fidei detraxit stabulum, in quo viles parentes infantemque positum in præsepio inveniunt, et quod vident, propalant, atque divulgant. Et omnes qui audierunt mirati sunt: et de his, quæ dicta erant a pastoribus ad illos.*

*Et in terra pax electis.* Testimonium ergo reddiderunt primi evangelistæ pastores, quod nato Salvatore, qui est Christus Dominus, Deo, denunciata a multitudine exercitus cælestis gloria in Altissimis sit redhibita, atque restituta in terra pax hominibus bonæ voluntatis. Pax cælum inter et terram, consociantibus se celi civibus bonis angelis hominibus bonæ voluntatis ac electis, reprobis cum reprobis angelis manentibus. Habet nempe textus græcus ἐν ἀνθρώποις εὐδοκία in hominibus bona voluntas, beneplacitum, quam lectionem passim græci Patres sequuntur; latini vulgarem. Antiquissimus græcus evange-

liorum codex Alexandrinus dictus Cantabrigiensis utriusque lectionis sensum coniungit *εἰρήνη ἐν ἀνθρώποις εὐδοκίας*, quando-  
 CAPUT XII.

quidem nobis Christus natus datus est reconciliationis divinique beneplaciti pignus. *Pacificavit enim*, iuxta apostolum a), *Jesus per sanguinem crucis eius, sive quæ in terris, sive quæ in cælis sunt. Omne bellum destruens et tumultum*, ut loquitur Didymus Alexandr. b) *Mox etenim in descensu eius et nativitate facta de virgine dictum est: Gloria in excelsis Deo, et in terra pax. Quam sententiam illustrans S. Gregorius M. „Prius quippe, inquit c), quam Redemptor noster nasceretur per carnem, discordiam cum angelis habuimus, a quorum claritate atque munditia per primæ culpæ meritum, per quotidiana delicta longe distabamus. Quia enim peccando extranei eramus a Deo, extraneos nos a suo consortio deputabant angeli cives Dei. Sed quia nos cognovimus regem nostrum, recognoverunt nos angeli cives suos. Quia enim cæli rex terram nostræ carnis assumpsit, infirmitatem nostram illa iam angelica celsitudo non despicit. Ad pacem nostram angeli redeunt, intentionem prioris discordiæ postponunt, et quos prius infirmos abiectosque despexerant, iam socios venerantur.“*

a) Coloss. I. 20. b) In Epist. S. Petri I. enarrat. T. FL. Bibl. PP. p. 293.

c) In Evang. lib. I. hom. I. n. 2. T. I. p. 1462.

Vocatum est nomen eius *Jesus*, quod vocatum est ab angelo, priusquam in utero conciperetur. Luc. II. 21.

Cur non Emanuel, sed Jesus vocetur. Sunt, quod iam notavimus, qui locum illum Isaïæ: *Ecce virgo in utero habebit, et pariet filium, et vocabunt nomen eius Emanuel*, etsi a S. Matthæo allatum, Christo tamen proprie convenire non putent, quod Jesus non Emanuel vocetur. Ac si vero, cum hoc sit generalius nomen, et appellativum, Messizæ proprium et singulare Emanuelli salutari nostro congruentius aliquod nomen esse potuerit, quam nomen Jesu, ad causam, cur nobiscum sit Deus, indicandam. „Vocatum est plane, sunt verba S. Bernardi a), non impositum, nempe hoc ei nomen est ab æterno. A natura propria habet, ut sit Salvator: innatum est ei nomen hoc, non inditum ab humana vel angelica creatura. Sed quid dicimus, quod egregius ille propheta hunc ipsum puerum multis nominibus appellandum fore prædicens, hoc unum tacuisse videtur, quod solum (ut præmonuit angelus, et testatur Evan-

a) *Serm. II. in circumcis. n. 3. T. III. p. 791.*

gelista) *vōcatum est nomen eius?* Exsul- **CAPUT**  
 tavit Isaias, ut videret diem hunc: et **XIII.**  
 vidit, et gavisus est. Denique et loque-  
 batur gratulabundus, et laudans Deum. "  
*Puer natus est nobis, filius datus est nobis,*  
*et factus est principatus super humerum eius;*  
*et vocabitur nomen eius Admirabilis, Consilia-*  
*rius, Deus, Fortis, Pater futuri sæculi,*  
*Princeps pacis.* „Magna quidem nomina:  
 sed ubi est nomen, quod est super omne  
 nomen, nomen Jesu, in quo omne genu  
 flectatur? "

Nomen hoc (quod hebraice scribitur **ישוע** in hagiogra- **Vis ac et**  
 phis contracte **ישו** interpretanturque græci **etymon**  
 interpretes, Siracides, Josephus et Philo **nominis**  
**Ιησὺς**) in veteri testamento habuerunt in **Jesu.**  
 figura duo insignes liberatores populi Israël-  
 itici: quorum alter populum post mortem  
 Moysis in terram Chanaan deduxit, alter  
 eum eodem e captivitate Babylonica redu-  
 xit. Talem tunc Judæi imperio iam Ro-  
 mano subiecti Josue, Jesum præstolaban-  
 tur, Messiam sceptro de Juda ablato, liber-  
 tatis vindicem, qui vero non tantum resti-  
 tueret regnum Israel in promissa patribus  
 terra Chanaan, ut Josue ille victoriosus dux  
 exercitus Israelitici, sed qui etiam armis  
 invictus sceptro suo folioque David virtute  
 bellica nationes cæteras triumphator subiice-



**CAPUT** ret, dominareturque; cum contra Jesus

**XIII.**

populum suum *a peccatis eorum*, salus populorum. „Habuit, ut cum S. Bernardo loquar *a)*, et Judæa quosdam Jesus, quorum vacuis gloriatur vocabulis. Illa enim nec lucent, nec pascunt, nec medentur. Idcirco synagoga in tenebris est usque adhuc, fame et infirmitate laborans; et non sanabitur nec fatiabitur, quousque sciat meum Jesum dominari Jacob, et finium terræ, et convertatur ad vesperam, et famem patiatur ut canes, et circumeat civitatem.“ Sic S. Bernardus, mirifice hoc nomine delectatus, varimode passim id in suis sermonibus est interpretatus prout græci Patres ex sua lingua ethymologiam effinxerunt, addideruntque hebraicæ. „Jesus itaque, ut loquitur S. Cyrillus Hierosolimitanus *b)*, iuxta Hebræos salvatorem sonat, in lingua vero græca eum, qui sanat, quandoquidem animarum est et corporum medicus, et spirituum curator.“ Et brevius supra *c)*, „Jesus nominatur congruo sibi nomine, ab salutari medicina appellationem habens.“ Veluti coniungens genuinum sensum, quem angelus Josepho in somnis declaravit *d)*: *vocabis nomen eius Jesum: ipse*

*a)* Serm. XV, in Cant. n. 8. T. IV. p. 1312.

*b)* Cathech. X, n. 13. p. 143.

*c)* Ib. n. 4. p. 138.

*d)* Matth. I. 21. Luc. II. 11.

*enim saluum faciet populum suum a peccatis eorum.* Σώου habetur in græco textu, unde Σώτης. Indignatus invehitur Cicero in Verrem, quod hoc nomen usurparit inscriptione quadam Syracusis sibi posita: *Hoc*, ait a), *quantum est! ita magnum, ut uno latino vocabulo exprimi non possit. Is est nimirum Soter, qui salutem dedit.* Hoc est, quod nos omnino in Christo Jesu agnoscimus, unique omnem salutem nostram in acceptis ferimus, atque cum Maria matre eius in Deo salutari nostro exultamus; ut quisque cum propheta dicat: *Ego autem in Domino gaudebo, et exultabo in Deo Jesu meo.* Nisi enim Jesus simul esset Deus, non posset esse Jesus seu Salvator noster, ut se condignam cœlesti Patri suo pro salute nostra offerret hostiam placationis ac reconciliationis, mediator inter Deum et homines: quod quomodo esse posset, si ipse merus homo simul mediatore indigeret, aut solum Deus, medium inter se Deum et homines non haberet? *Unus enim Deus, unus et mediator Dei et hominum, homo Christus Jesus, qui dedit redemptionem semetipsum pro omnibus b).* Non sic Josue dux populi Israelitici bellator fortis salvavit populum suum, ut per semetipsum Jesus esset ac dici posset, sicut Jesus Salvator ac Deus noster c): *Qui cum in forma Dei esset, non rapinam arbitratus est, esse se*

a) Or. II. n. 63.    b) I. Tim. II. 5.    c) Phil. II. 6.

**CAPUT XIII.** *æqualem Deo: sed semetipsum exinanivit formam servi accipiens, in similitudinem hominum factus, et habitu inventus ut homo. Humiliavit semetipsum factus obediens usque ad mortem, mortem autem crucis. Propter quod et Deus exaltavit illum, et donavit illi nomen, quod est super omne nomen: ut in nomine Jesu omne genu flectatur cælestium, terrestrium et infernorum: ut nimirum per incarnati Verbi mysterium natura humana divinæ in una hypostasi idem homo sit, et adoretur Deus, de quo propheta a): Deus ipse venit, et salvabit nos. Tunc aperientur oculi cæcorum, et aures surdorum patebunt. Tunc saliet sicut cervus claudus, et aperta erit lingua mutorum. Quæ testantur de Christo Jesu Evangelia, simulque de eius discipulis, in eius nomine eadem facientibus. Quod et testatus est post eius resurrectionem Petrus Judæis, dum claudum fecisset sicut cervum salientem b): Notum sit omnibus vobis, et omni plebi Israel: Quia in nomine Domini nostri Jesu Christi Nazareni, quem vos crucifixistis, quem Deus suscitavit a mortuis, in hoc iste astat coram vobis sanus. Hic est lapis, qui reprobatus est a vobis ædificantibus, qui factus est in caput anguli: et non est in alio aliquo salus. Nec enim aliud nomen est sub cælo datum hominibus, in quo oporteat nos salvos fieri.*

a) Isai. XXXV. 5.      b) Act. IV. 10.

## CAPUT XIV.

CAPUT  
XIV.MAGI CHRISTUM ADORATURI EX  
ORIENTE ADVENIUNT.

Cum ergo natus esset Jesus in Bethlehem  
Juda in diebus Herodis regis, ecce  
Magi ab Oriente venerunt Jerosolymam  
dicentes: *Ubi est, qui natus est rex  
Judaorum? Vidimus enim stellam eius  
in Oriente, et venimus adorare eum.*  
Matth. II. 1. 2.

„**U**nus et idem Deus, sunt verba S. Ire- Videntes  
stellam  
eius in  
Oriente.  
næi L. III. de hæres. c. 9. qui a prophetis  
prædicatus est, et ab Evangelio denuntia-  
tus, et huius Filius, qui ex fructu ventris  
David, id est, ex Maria virgine, et Em-  
manuel: cuius et stellam Balaam quidem  
prophetavit: Orietur stella ex Jacob, et  
surget dux in Israel.“ Numer. XXIV. 17.  
(ubi hæc habetur prædictio quam alii quo-  
que SS. Patres de Christo Messia interpre-  
tantur) pro *Dux* legitur *virga de Israel*,  
virga nimirum virtutis suæ, quam iuxta  
psalmistam emissurus erat Dominus ex  
Sion, ut dominetur in medio inimicorum  
suorum, ut mox sequitur l. c. Num. XXIV.  
19. *De Jacob erit, qui dominetur, et perdat  
reliquias civitatis, Hierusalem nimirum exci-*

CAPUT  
XIV.

dendæ postquam ablato sceptro de Juda reiectisque perfidis Judæis implenda iam in gentibus erat promissio a Deo patriarchæ Jacob facta de qua egimus c. VIII. ad-  
erantque mox nato Domino magi veluti incunabula regni in domo Jacob in dispersione gentium *dilataberis ad Occidentem, et Orientem, et Septentrionem, et Meridiem, et benedicentur in te, et in semine tuo cunctæ tribus terræ a*). Quam promissionem acceperat, cum ex promissa simul terra Chanaan exiturus erat per plures annos commoraturus in Mesopotamia (unde Magi hi advenisse creduntur) ductis etiam ibi uxoribus *b*), non sine numine cavente patre Isaac, ne Chanaanitidem sibi coniungeret, terra illa promissa quidem, diris aliquando tamen devovenda: quam etiam senex postea Jacob cum tota familia sua iterum relicturus erat in Ægyptum migrans: apud exteras gentes constituta domo Jacob, in qua aliquando Messias regnaturus erat inter gentes orta stella ex Jacob de qua Magi: *Vidimus stellam eius in Oriente, et venimus adorare eum.*

Sublimis  
Magorum  
de Christo  
theologia.

Magos in rege Judæorum Christo Jesu nato excelsius aliquid homine, atque divinum agnovisse, vetustissima est SS. Patrum doctrina, qua confundebant Judæos, de Messia suo non nisi terrena sapientes:

a) Gen. XXVIII. 14.

b) Ib. 1.

„Deductos, dicit S. Irenæus *a*), a stella CAPUT XIV.  
 in domum Jacob ad Emanuel, per ea, quæ  
 obtulerunt, munera ostendisse, quis erat,  
 qui adorabatur: myrrham quidem, quod  
 ipse erat, qui pro mortali humano genere  
 moreretur, et sepeliretur: aurum vero,  
 quoniam Rex, *cuius regni finis non est*;  
 thus vero, quoniam Deus, qui et *notus in*  
*Judæa factus est*, et manifestus eis, qui  
 non quærebant eum. “ Alias huiusmodi  
 mysticas interpretationes passim legere est  
 apud SS. Patres. Nec solum munera, sed  
 et tota suscepti a Magis itineris ratio, ad-  
 orandi natum regem, aliquid augustius  
 ostentat, quam solum homini regi præstan-  
 di homagium; thus imprimis in cultu di-  
 vino constanter ubique gentium adhiberi  
 solitum: firmata excelsa magorum existima-  
 tione, per acceptam divinitus in somnis  
 admonitionem, ne se deceptos opinione  
 sua suspicari possent, dum coram infante  
 cum parentibus imbellem, pauperem et  
 ignobilem in cunis cernerent.

S. Chrysostomus „Quid illos, quærit  
 de Magis *b*), ad puerum adorandum induxit?  
 neque enim virgo insigne quidpiam præ-  
 sefererat, neque domus magnifica erat;

*a*) Lib. III. contra hæres. c. 9.

*b*) Hom. VIII. in Matth. n. i. T. VII. p. 118.

**CAPUT** neque isthic aliquid aliud erat, quod posset  
**XIV.** illos vel percellere, vel allicere. Illi vero non

modo adorant, sed apertis thesauris suis munera offerunt; munera inquam, non quasi homini, sed quasi Deo. Thus enim et myrrha Dei maxime symbolum erat. Quid igitur hoc illis suasit? Id ipsum quod excitavit illos, ut relictâ domo tantum iter fusciperent, nimirum stella, et illustratio mentis a Deo ipsis indita, quæ paulatim illos ad perfectiorem notitiam deduxit. Nisi enim res se ita haberet, cum omnia, quæ isthic videbantur, vilia essent, non ei tantum exhibuissent honorem. Ideo autem nihil eorum, quæ sub sensum cadunt, ibi magnum erat, sed præsepe, tugurium, mater inops, ut nudam magorum philosophiam perspicias, atque discas, eos non ut hominem purum, sed ut Deum et beneficum ipsum adiisse. Quapropter nullo eorum, quæ extrinsecus videbantur, offensi sunt, sed adoraverunt, et dona obtulerunt, quæ dona multum a Judaica crassitie differebant. Neque enim oves et vitulos immolarunt, sed quæ ecclesiasticæ philosophiæ vicina erant. Siquidem scientiam, obedientiam, et dilectionem ipsi offerebant. Vides hic sanctum Doctorem non ad species munerum attendere, sed altius nos a rebus sensibilibus sublimiusque ad id evehere, quod hic in Magis gentilibus auspiciu habuit, a Chri

sto mulieri Samaritanæ prædictum a): **Mu-** **CAPUT**  
*lier crede mihi, quia venit hora, quando neque* **XIV.**  
*in monte hoc, neque in Jerosolymis adorabitis*  
*Patrem...* Sed venit hora, et nunc est, quando  
*veri adoratores adorabunt Patrem in spiritu et*  
*veritate.* Tempus hoc est, quando reiecta  
 Synagoga, ac templo Jerosolymitano Eccle-  
 sia per orbem terrarum fuit constituta,  
 cuius veluti primitiæ fuerunt Magi: Pasto-  
 res autem, qui Christum in præsepio ad-  
 oraverunt, natumque Salvatorem mundi  
 primi divulgaverunt, præbant apostolos  
 aliosque Christi discipulos ab eo ex Judæis  
 assumptos, qui lucem evangelicam orbi in-  
 ferentes gentilismi tenebras effugarunt, quam  
 lucem stella magis apparens et ad Christum  
 in præsepio deducens, designabat. „Quo-  
 modo ergo, cum S. Ignatio M. quærere  
 licet b), manifestatus est sæculis? Stella in  
 cælo fulsit, splendore exsuperans omnes  
 stellas, et lux illius ineffabilis erat, et stu-  
 pore incussit ipsius novitas. Omnia at-  
 tem reliqua astra, unacum sole et luna  
 chorus fuere stellæ: ipsa vero lumen suum  
 extendebat super omnia: et perturbatio  
 erat, unde prodiret illis novitas dissimilis:  
 quare soluta est omnis magia, et omne vit-  
 culum malitiæ est abolitum, ignorantia  
 destructa est, vetus regnum est labefacta:

a) *Jæ IV. 21.*

b) *Epist. ad Ephes. n. 19.*



**CAPUT** XIV. tum; Deo humanitus manifestato, in novitatem vitæ æternæ. Principatum vero accepit id, quod a Deo omnibus suis partibus absolutum erat. Inde omnia commovebatur, quod meditaretur mortis abolitionem.“ Notandum imprimis est in hoc loco, quod S. Martyr, illi ætati proximus, de præcellentia et claritate stellæ illius perhibet. Cætera cum Evangelio concordant, prout Matth. II. 3. narratur, Herodem regem, et omnem Hierosolimam cum illo, sciscitatum, ubi Christus, quem ille regni sui æmulum timebat, nasceretur. Atque hinc edoctus in Bethlehem Judæ occidit pueros in omnibus finibus eius, cum familia David lateret; Christi vero esset ea conditio, inde etiam, quod in Nazareth habitaret, ut potius Elias aut Jeremias, aut alius ex prophetis quam Messias promissus rex Israel crederetur postea ab Herode tetrarcha Galilææ.

## CAPUT XV.

CAPUT

XV.

PROPHETIA SIMEONIS DE CHRISTO;  
ANNA PROPHETISSA.

Benedixit illis Simeon, et dixit ad Mariam matrem eius; *Ecce positus est hic in ruinam, et in resurrectionem multarum in Israel: et in signum, cui contradicetur. Et tuam ipsius animam pertransibit gladius, ut revelentur ex multis cordibus cogitationes. Et erat Anna prophetissa etc.* Luc. II. 34. 35.

**D**um Magi responso accepto in somnis Evangelii ne redirent ad Herodem, per aliam viam ad gentes reversi sunt in regionem suam, subdit deferendi Matthæus fugam Christi a), iusso in somnio contin- denuntiatio contia- nua inde a Christo tum- nato, rum est enim, aiebat angelus, ut Herodes querat puerum ad perdendum eum. Cum fugam hanc factam esse necesse sit post purificationem Mariæ in templo, hic Maria mater Jesu experimentum aliquod habebat eorum, quæ futura a Simeone audierat. In magis iam primordia eorum viderat, quæ idem senex, benedicens Deum, fausta præ-

a) Matth. II. 13.

**CAPUT** dicit, in ulnas suas accipiens Jesum, ac  
**XV.** iam dimitti, morique in pace desiderans;

*Quia, inquit, viderunt oculi mei salutare tuum. Quod parasti ante faciem omnium populorum; lumen ad revelationem gentium, et gloriam plebis tue Israel. Hæc nos impleta gaudemus ante faciem omnium populorum, ad gloriam plebis DEI Israel. Nempe qui, iuxta apostolum c), sunt Israelitæ, quorum adoptio est filiorum, et gloria, et testamentum, et legislatio, et obsequium, et promissa: quorum patres, et ex quibus est Christus secundum carnem... Sed sicut non omnes, qui ex Israel sunt, ii sunt Israelitæ, ut apostolus pergit, id est, non qui filii carnis, hi filii Dei, sed qui filii sunt promissionis, æstimantur in semine, ita etiam iis, qui reiectis perfidis Judæis sunt adoptati, contingit. „ Vides (commentatur S. Ambrosius in h. l. b) Nunc dimittis fervum tuum) uberem in omnes gratiam Domini generatione diffusam, et prophetiam incredulis negatam esse, non iustis. Ecce et Simeon prophetat in ruinam et resurrectionem plurimorum venisse Dominum Jesum Christum; ut iustorum iniquorumque merita discernat, et pro nostrorum qualitate factorum iudex verus et iustus aut supplicia decernat, aut præmia. “*

c) Rom IX. 4.

b) Exposit. in Lucam Lib. II. n. 60. T. I. p. 1301.

Ad B. Mariam verba faciens Simeon, dirigensque prophetiam: *Ecce positus est hic, inquit, in ruinam, et in resurrectionem multorum in Israel: et in signum, cui contradicetur: et tuam ipsius animam pertransibit gladius.* Uti vero B. Maria potissimum sub cruce experta est gladium, qui pertransivit animam, ita deinceps etiam impleri vidit prophetiam de salutari, quod paratum fuerat ante faciem omnium populorum. Hæc læta sunt, quibus tristia miscet propheta in eo, quod positum dicit suum filium *in ruinam et resurrectionem multorum, et in signum cui contradicetur*, quod præsertim ad ea, quæ designanda erant a gente Judaica, pertinet, dum tamen salutare Dei ad gloriam etiam plebis Israel paratum esse dicit, prophetia, ut speratur, demum in fine temporum ultimum complementum in conversione gentis Judaicæ habitura, quando vicissim fides apud alias gentes deficiet. Sic semper lætis tristia miscentur, succeduntque. Id quod perpendens Theodotus Ep. Ancyranus, multa ad rem edisserit in sermone in Deiparam et Simeonem a), „At enim, exclamat, quid lætis tristia misces o Senex? Hactenus *lumen et gloriam* loqueris, nuncque *ruinam* annuntias, ac parenti *gladium* palam edicis? Maxime, inquit: erunt omnia suo tempore: ruina quidem infidelibus,

a) T. IX. Bibl. PP. p. 467.

**CAPUT** fidelibus autem resurrectio. *Et in signum*  
**XV.** cui contradicetur late per orbem; quod  
 ~~~~~ nimirum apertis probationibus ac virtutibus  
 non levitate ab hominibus recipiendum sit;  
 sed et virginalis animi tui erit quandoque  
 tormentum ex variis cogitationibus subeun-  
 tibus, ac exeuntibus. Neque enim de  
 minimis res erit; sed de Deo, de morum  
 legumque translatione, de mutatione homi-  
 num, de unione populorum, de concordia  
 gentium, de adunatione linguarum, de in-  
 divisa religione, de destructione tyranni.  
 Quei vero fieri queant isthæc sine strepitu?  
 Idcirco cadent alii, alii resurgent; alii vita  
 donabuntur, alii mortem incurrent. Atque  
 alii quidem signo contradicent, pro eius  
 novitate, alii efficaciz eius virtuti succum-  
 bent. Sunt igitur a iusto relata summe  
 conspicua, eventu ipso comprobata.“

Quod porro paulo supra Cap. XI, no-  
 tavimus, cur solis pastoribus Christus natus  
 fuerit annuntiatus, hic iterum est animad-  
 vertendum. Etsi hic ageretur cærimonia  
 legalis in templo a), postquam impleti sunt  
 dies purgationis eius secundum legem Moysi,  
 tulerunt illum in Jerusalem, ut sisterent eum  
 Domino, nemo tamen sacerdotalis vel levi-  
 tici ordinis, ceu propediem antiquandi  
 agnovit Christum tunc exspectatum Mes-

e) Luc. II. 22.

siam; sed homo in Jerusalem, cui nomen Si-  
meon, et homo iste iustus, et timoratus, expec-  
tans consolationem Israel, et Spiritus sanctus  
erat in eo a). Ab hoc nempe illustratus  
spem suam supra figuram et opera legis  
efferrens Messiam prætolatus in iustitia et  
sanctitate Deo serviebat. Sic etiam Anna  
prophetissa, memoratur, postquam vixe-  
rat cum viro suo annis septem a virginitate  
sua b), servasse instar Judith heroissæ con-  
tinentiam, asceticamque ac ceu monasticam  
egisse vitam ad annos octoginta quatuor: quæ  
non discedebat de templo, ieiuniis et obsecratio-  
nibus serviens nocte ac die. Et hæc, ipsa hora  
superveniens, confitebatur Domino: et loqueba-  
tur de illo omnibus, qui expectabant redemptio-  
nem Israel, apostolico, ut Cap. XI. de  
pastoribus vidimus, munere perfuncta. No-  
tanter Anna hæc prophetissa de tribu Aser  
dicitur, una ex decem illis tribubus, ex  
quibus regnum Israeliticum constabat: quod  
dudum, antequam Juda et Jerusalem in  
captivitatem abducerentur, penitus cessavit  
capta a Salmanasar rege Ninivitarum Me-  
tropoli Samaria, tribubusque, quas Teglat-  
phalassar necdum in captivitatem deduxerat  
ultra Euphratem translatis. Dum ecco  
Judæis quidem ex captivitate Babylonica  
restitutis, at iamiam sceptro a Juda ablato,  
Christoque nato, atque in templo præsen-

a) Luc. II. 25.

b) Ib. 36. etc.

**CAPUT** tato adest Anna prophetissa de tribu Aser

**XV.** filii Jacob, confessa Domino, Christum

**~** Messiam professa, et locuta de illo omnibus qui exspectabant redemptionem Israel. De domo Jacob scilicet prout virgini Mariæ denunciatus fuerat nasciturus ex ea filius regnaturus in domo Jacob in æternum, et regni eius non erit finis. Ut supra cap. VIII. vidimus amplissimam benedictionem patriarchæ Jacob datam, de qua etiam Eccli. XLIV. 25. *Benedictionem omnium gentium dedit illi (Jacob) Dominus, ne videretur opinione Judæorum sedes regni David in monte Sion figenda in terris, cum esset Christus regnaturus in domo Jacob in æternum, in cuius semine benedicendæ erant omnes gentes per Christum, quem infantem in ulnas suas accipiens Simeon exclamat: Nunc dimittis servum tuum, Domine, secundum verbum tuum in pace; quia viderunt oculi mei salutare tuum. Quod parasti ante faciem omnium populorum; lumen ad revelationem gentium, et gloriam plebis tue Israel.*

## CAPUT XVI.

CAPUT  
XVI.JESUS IN MEDIO DOCTORUM  
IN TEMPLO.

**I**nvenērunt illum in templo sedentem in medio doctorum, audientem illos, et interrogantem eos. *Stupebant autem omnes, qui eum audiebant, super prudentia et responsis eius; et videntes admirati sunt.* Luc. II. 46. 47.

**A**nimadvertēte, nihil hic egisse Jesum duodennem, quod supra ætatem admodum esset in eo, quod sedens in medio doctorum auscultaverit eos, et interrogaverit; sic autem respondit ad quæstiones sibi propositas (quod extraordinarium quidem, sed alienum omnino non est ab ætate) ut stupeant omnes super prudentia et responsis eius. *Et videntes admirati sunt.* Sic iam supra retulimus, omnes qui audierant miratos esse, de his quæ dicta erant a pastoribus ad ipsos. *Maria autem, subdit mox Evangelista, conservabat omnia verba hæc conferens in corde suo.* Viden<sup>r</sup>, differentiam Mariam inter et stuporem doctorum, eorumque omnium, qui et Jesum audierant in templo, nec tamen conservabant verba conferentes in corde suo, et ideo evanescunt mente,

Myste-  
rium in-  
fantie  
Christi



**CAPUT XVI.** ac quæcunque alia adhuc multo magis stupenda sunt, dicta miracula de Christo infante, excidunt memoria eorum, natusque Salvator in obscuro manet et oblivione. „Non solum, sunt verba S. Ambrosii *a)*, ab angelis et prophetis, a pastoribus et parentibus, sed etiam a senioribus et iustis generatio Domini accipit testimonium. Omnis ætas, et uterque sexus, eventorumque miracula fidem adstruunt. Virgo generat, sterilis parit, mutus loquitur, Elisabeth prophetat, Magus adorat, utero clausus exultat, vidua confitetur, iustus exspectat.“

Maria conservat omnia conferens in corde suo: Pater et Mater in admiratione sunt, super his, quæ dicebantur de illo, et fiebant. Audiunt angelos, vident pastores, Magosque adorantes, percipiunt prophetas Simeonem et Annam: inveniunt in templo puerum, dum omnes stupent prudentiam, et responsa eius; ipsi religioso apud se silentio omnia tenent, et admirantur, causas non discutiunt, nihil curiose disquirunt, rerum altitudinem non temere indagandam fuscipiunt, sed mysterium reverenter considerant, contenti magnitudine eorum, quæ operatur Dominus, quæ vident et audiunt, in admiratione manent, humilique ignorantia et silentio de rebus

*a)* *Expos. in Luc. Lib. II. n. 58. T. I. p. 1501.*

mysteriisque incomprehensibilibus non plus scire, aut sapere affectant quam oportet. Est hoc sublime in Evangelio Christi, quod non curiosius perscrutandum, aut temerarie diiudicandum fuscipias, sed pie credendum, reverenter suspiciendum, adorandumque, religiose custodiendum, conservandumque in corde fit.

Liceat tamen ictum oculi conicere in Jesu infantiam, profectumque ætatis, de quo Evāgelista a): *Puer autem, ait, crescebat, et confortabatur, plenus sapientia: et gratia Dei erat in illo*, id quod etiam de amabilitate ac formæ venustate interpretantur phrasi Hebraica: uti illud Act. VII. 26. ubi Moyses *gratus Deo* iuxta vulgatam dicitur in textu græco ἀγαπῶν τὸν Θεόν, quem vero Josephus appellat in antiquitatibus Judaicis b) *μόρφῃ Θεῶν*; de Jesu autem legitur apud Lucam *χάρις Θεῶν ἦν ἐπ' αὐτόν*. Gratia Dei erat in eo, plenus vero sapientia utique institutione humana dici non potuit, quem ætate profectum annorum triginta, cum iam munus prædicationis obiret docens in templo c): *Mirabantur Judæi dicentes: quomodo hic literas scit, cum non didicerit? Christum fabrili artificio operam dedisse Joseph nutritio, Justinus M. apostolicis temporibus auctor propinquus testatur: Hæc*

a) *Lac. II. 40.*b) *Lib. II. c. 9.*c) *Jo. VII. 15.*

**CAPUT** enim, inquit, *fabrilia opera faciebat, cum inter*  
**XVI.** *homines versaretur, aratra et iugā, his rebus*  
 ~~~~~ *etiam iustitiæ insignia et vitam actuosam docens.*  
 Iustitiæ insignia sunt, quibus nobis per  
 omnia similis factus est absque peccato,  
*vitam actuosam docens* secundus hic Adam  
 illam, ad quam primus, paradyso volupta-  
 tis expulsus, est condemnatus, ut in sudore  
 vultus sui comederet panem suum, victitans  
 labore manuum suarum: quam Christus ad  
 trigesimum usque vitæ suæ annum traduxit  
 paupere in domo, non habens, ut postea  
 contestatus est, ubi caput suum reclinaret.

Quis vero non intimo animi sensu, ac  
 tenerrimo cordis affectu sibi ob oculos  
 mentis ponat absconditam hanc Christi  
 vitam, ac familiam beatissimam, Jesum  
 cum Maria matre, et patre, ut putabatür,  
 Joseph? A prima infantia puerum cres-  
 centem et confortatum, ut posset fabriles  
 operas fabricator orbis præstare atque sup-  
 petias nutritio ad victum egenæ familiæ.  
 Quis non faltem quadantenus assequi cogi-  
 tatione gestiat sanctissimæ huius familiæ  
 convictum, colloquia, ac mutuam vitæ  
 conversationem: pia filii in parentes, et  
 parentum in filium studia, curam et solli-  
 citudinem: officia charitatis in concives ac  
 religionis in Deum *in omnibus mandatis et*  
*iustificationibus Domini, quomodo de Zacharia*

et Elisabeth memoratur a), quod essent **Caput**  
*iusti ambo ante Deum*; de parentibus autem **XVI.**  
 Jesu b), qui ut *perfecerunt omnia secundum*  
*legem Domini*, reversi sunt in Galileam in  
 civitatem suam Nazareth, hoc unum Evan-  
 gelista commemorat, ivisse parentes eius  
 per omnes annos in Jerusalem in die so-  
 lemni Paschæ; moxque de Jesu subdit:  
*Cum factus esset annorum duodecim, ascenden-*  
*tibus illis Jerosolymam secundum consuetudinem*  
*diei festi, consummatisque diebus, cum redirent,*  
*remansit puer Jesus in Jerusalem, ubi ali-*  
*quando completurus erat opus redemptionis*  
*nostræ, finem imponens veteri Testamen-*  
*to, novumque instituens in sanguine suo.*

a) *Luc. I. 6.*      b) *Ib. II. 39.*

QUOMODO CHRISTUS PARENTI-  
BUS SUBDITUS PROFICIEBAT  
SAPIENTIA, ET ÆTATE.

*Et dixit mater eius ad illum: Fili, quid fecisti nobis sic? Ecce pater tuus et ego dolentes quærebamus te. Et ait ad illos: Quid est, quod me querebatis? Nesciebatis, quia in his, quæ Patris mei sunt, oportet me esse? et ipsi non intellexerunt verbum, quod locutus est ad eos. Et descendit cum eis, et venit Nazareth: et erat subditus illis. Et mater eius conservabat omnia verba hæc in corde suo. Et Jesus proficiebat sapientia, et ætate, et gratia apud Deum, et homines. Luc. II. 48. etc.*

**M**ulta apud Lucam de B. Maria virgine habentur, quæ apud alios Evangelistas non leguntur, nec apud ipsum Joannem, cui tamen Christus matrem in cruce moriens commendavit, ipseque accepit eam in sua. Nec dubium est, quin S. Lucas ex ore B. Mariæ acceperit, quæ illa prius conservaverat in corde suo, ut de ea hic, iam secundo testatur.

Pandam hic S. Augustini verbis mysterium in responsione Christi ad illa Mariæ verba, *Ecce pater tuus et ego dolentes quærebat* *mus te*: „At ille, inquit S. Doctor a), ut ostenderet habere se præter illos Patrem, qui eum genuit, præter matrem, respondit eis: *Quid est, quod me quærebatis? Nesciebatis, quia in his, quæ Patris mei sunt, oportet me esse?* Et rursum, ne hoc dicto parentes illos negasse putaretur, Evangelista adiunxit: *Et ipsi non intellexerunt verbum, quod locutus est ad illos.*“ Necdum aderat tempus, ut sese Christus æterni Patris Filium manifestaret. Nec vero ante tempus indagandum sese existimasse eius munus a cœlesti Patre acceptum, etsi illis divinus ortus clam haud esset, palam facit confessio, se non intellexisse verbum: neque etiam, ut modo de sublimi illo in Evangelio Christi notavimus, curiose, aut temere ante tempus scire aut indagare contendebant, quæ filio in iis, quæ Patris sui erant, essent agenda.

Descendit vero cum parentibus, *et venit Nazareth, et erat subditus illis.* Quod perpendens S. Bernardus b), „utrinque stupor, exclamat, utrinque miraculum. Et quod fœminæ

Christi  
hominis  
profectus  
cum  
ætate:

a) *Lib. I. de nupt. et concup. c. II.*

b) *Homil. I. super Missus est: n. 7. et 8. T. III. p. 735.*

CAPUT Deus obtemperet, humilitas absque exemplo:

XVII. et quod Deo fœmina principetur sublimitas

~ sine socio... Erubescere ergo cinis! Deus se humiliat, et tamen tu te exaltas? " Et alibi a): „O humilitas, virtus Christi! O humilitatis sublimitas! quantum confundis superbiam nostræ vanitatis? Parum aliquid scio, vel magis scire mihi videor, et iam filere non possum, impudenter me et imprudenter ingerens et ostentans, promptus ad loquendum, velox ad docendum, tardus ad audiendum. "

Repetit mox: *JESUS proficiebat sapientia, et ætate, et gratia*, quod paulo ante dixerat Evangelista, puerum autem crevisse, et confortatum fuisse plenum sapientia, et gratiam Dei fuisse in illo. Quomodo autem Christus profecerit, non eadem est, fuitque doctorum christianorum sententia. Quod per se palam est, quæstionem solummodo esse posse de humana natura divinæ hypostaticè unita in Christo, in quo sunt omnes thesauri sapientiæ et scientiæ absconditi b), quomodo sese per incrementa ætatis exeruerit, facitque ad sublime illud in Evangelio Christi, ut non plus sapere, quam oportet sapere, sed sapere ad sobrietatem c) discamus, quandoquidem Christum profecisse sapientia et

a) In Epiph. Serm. II. p. 799.

b) Coloss. II.

c) Rom. XII. 3.

etate intelligimus. Habetur hæc XXXIV. inter quæstiones a viris gravissimis Cæsario fratri Gregorii Theologi Nazianzeni proposita a): „Si perfectus Deus erat Christus, quomodo *sapientia et ætate ipsum proficere* dicit Evangelium?“ sequitur simplicissima responsio hæc: „Non debemus illa applicare divinitati. Secundum illam enim neque crescit, neque deficit; non minuitur, non fit gloriosior, non maior; non insistit, non contrahitur. Proficit vero roboratus, et crescens secundum naturam nostram in servili forma.“ S. Amphilochius in excerptis variis eodem Tom. Bibl. PP. novissime Venetiis editæ sic rem explicat b): „Proficiebat secundum ætatem: corpore ad firmam ætatem iuxta naturam producto. Sapientia: propter eos, quos ad sapientiam componebat: Gratia; qua recreante proficimus: fide certi, fore ut consummentur dicta ab ipso de spe nostra. Apud Deum: consummavit enim opus Patris, assumpta carne, et redemptis nobis. Apud etiam homines, quos ab idololatria ad divinam Trinitatis notitiam transtulit. Juxta hos ergo modos proficiebat, habetque verum. Non enim iuxta quod insipientes existimant, ab eo quod est deterius, in melius promovebat.“

a) T. VI. Bibl. PP. p. 22. Edit. Veneta.

b) Ibid. p. 500.



CAPUT S. Gaudentius Brixienſis in reſponſione ad  
XVII. Paulum Diaconum *de eo, quod Dominus*

*Jesus dixit apostolis, quia Pater maior me est:*  
„Idem, ait a), cœpit etiam eſſe filius hominis, qui in principio erat apud Patrem Filius Dei, utique Deus Verbum. Exinde per incrementa ætatis, creator temporum proficit in virum perfectum testante Evangelista: *Puer autem crescebat.*“ Marius Mercator varias in eandem rem refert aliorum SS. Patrum ſententias in operibus eius Bibl. Patrum T. VIII. insertas contra Nestorium p. 676. Imprimis vero p. 715. ex Cyrilli Alexandr. ſcholiis de Incarnat. c 13. ſequentia habet: „Et ſi dicatur *proficere Jesus ætate, et ſapientia, et gratia*, diſpenſationis id ratio eſt. Deus etenim Verbum humanitatem more ſuo proficere permittebat, et quaſi paulatim divinitatis ſuæ volebat gloriam declarare, et cum corporis ætate etiam ſuam extendere. Neque novum videatur, idque nonnullos nimia novitate perterreat, cum præſertim ſic quoque dicerent: *Quomodo hic litteras ſcit, cum non didicerit?* Ergo corporale quidem eſt augmentum, et profectus gratiæ et ſapientiæ humanitatis magis menſuræ conveniat; ipſum vero Deum Verbum per ſuam naturam perfectiſſimam confitemur.“ Theodoretus in Epist. ad monachos: „Proficit porro, inquit b), ætate et ſapientia

a) *Serm. XIX. p. 189.*

b) *T. IX. Bibl. PP. p. 409.*

tia non divinitas, quæ semper perfecta est, sed humana natura, quæ tempore et extat, et augetur, et perficitur. Quocirca humana omnia Christi Domini, famem, inquam, sitim, laborem, somnum, timorem, sudorem, orationem, ignorationem et cætera id genus alia, nostræ conspersiois esse dicimus, quam assumens Deus Verbum uniit sibi, nostram operaturus salutem.“ Et postea in fragmento de Incarnatione. „Cum ergo, inquit a), audis, *proficiebat sapientia et gratia*, ne factam illi sapientiæ accessionem aliquam existimes (Dei enim verbum nullius eget:) sed quia videntibus sapientius semper atque gratius erat, inde proficere dictum est; ut inde iam admirantium habitus, quam ipsius magis proficeret. Quod in aliquo proficit, aliud est ab eo, in quod proficit. Cum ergo Jesus dictus sit sapientia proficere; non sapientia proficiebat, sed in illa animus hominis. Cum se enim quotidie Deitas in eo detegeret ac manifestaret, maiori semper videntibus admirationi habebatur. Hocque sibi vult, quod dictum est, *proficiebat sapientia*. Ad hunc modum sapientia proficiebat humanitas; natura humana sapientiam induens: hoc est, Dei Verbum paulatim per opera ac mirabiles effectus assumptum templum apud videntes Deificans, ea

a) Pag. 421.

**CAPUT XVIII.** sibi ratione profectum adsciscebatur. In hunc modum natura humana sapientia proficiebat, per eam Deificata. " Add. B. Bossuet Evêque de Meaux *Elévations sur les Mystères* XX. Semaine. *La vie cachée de Jesus*. I. Elév. T. II. edit. Paris. an. 1772. p. 276. Dum vere Christus infirmitates nostras tulit, quidni etiam infantiae ab utero matris fuæ? Tanto insignius elucescit sublimitas mysterii Verbi divini, percellitque mentem, quo amplius se prodit humilitas in statu exinanitionis, nobisque se admirandam ad exemplum præbet.

## C A P U T XVIII.

### S. JOANNES PRÆCURSOR DOMINI

Venit Joannes Baptista prædicans in deserto Judææ, et dicens: Poenitentiam agite: appropinquavit enim regnum coelorum. Hic est enim, qui dictus est per Isaiam prophetam dicentem: *Vox clamantis in deserto: parate viam Domini: rectas facite semitas eius.* Matth. III. 1. 2. 3.

**O**bservandum hic est ante omnia, S. Lucam nobis, quod caput est, de tempore venturi Messiae iuxta prophetiam patriarchæ Jacob (scilicet non auferendum sceptrum de Juda, donec veniat, qui mittendus est) iam, ut supra vidimus, prænotasse, dum

Auspicium missionis Christi Jesu veri Messiae per S. Joannem præcursorem.

edictum cæsaris Augusti memorat a), ut CAPUT XVIII.  
describeretur universus orbis, quando singulari Dei providentia factum est, ut Christus in Bethlehem nasceretur: quod est luculentissimum argumentum, pro Christo Jesu vero Messia, quippe qui adhuc in utero matris in ipsa urbe regie stirpis David Bethlehem iussis Augusti parens sceptrum de Juda ablatum demonstravit ipse Christus Messias cum parentibus; idem tamen argumentum idem S. Lucas non minus luculenter, et adhuc dissertius depromit b), dum nobis auspiciū missionis Jesu Christi Messie narrat in eius præcursore Joanne, de quo prius, enarrata eius plena miraculis nativitate, demum addit c): *Puer autem crescebat, et confortabatur spiritu: et erat in desertis usque in diem ostensionis sue ad Israel*, ut nimirum esse Christum Messiam coram monstraret, demonstraretque: cuius demonstrationis caput erat, ablatum esse sceptrum de Juda et ducem de femore eius, dum Christus, non de femore Juda, sed de Maria virgine natus, tunc ostenditur, quando ad alienigenas delatum est sceptrum, et ducatus, qui perstitit post captivitatem Babylonicam apud tribum Judam in Asmonæis, resumpto etiam ab Hircano diademate seu sceptro, quem non ita multo post Herodi alienigenæ Idumæo Augustus

a) *Luc. II. 1.*    b) *Ib. III. 1.*    c) *Ib. I. 80.*

cæsar dedit, cum iam esset Judæa in provinciam Romani Imperii reducta. Quæ omnia S. Lucas articulatim edisserens missionem Messię Christi ab eius præcursore auspicatus sic infit a) : *Anno autem quinto decimo imperii Tiberii cæsaris, procurante Pontio Pilato Judeam, tetrarcha autem Galilææ Herode, Philippo autem fratre eius tetrarcha Ituræ, et Trachonitidis regionis, et Lysania Abilinæ tetrarcha: non paucos nempe post annos, dum Augustus post mortem Herodis M. regnum tribus illius filiis distribuit Archelao, Herodi antipæ, et Philippo; prior autem iam Viennam in exilium missus fuerat. Quare Herodis tantum hic et Philippi fit mentio, cum Lysania tetrarcha Abilinæ parvæ provinciæ ad Libanum, unde Jordanis fluvius oritur, quem Joannes baptizando obibat, postquam factum est verbum Domini super eum in deserto. Et venit in omnem regionem Jordanis prædicans baptismum penitentia in remissionem peccatorum, sicut scriptum est in libro sermonum Isaïæ propheta: Vox clamantis in deserto præpare viam Domini; rectas facite semitas eius: Omnis vallis implebitur; et omnis mons et collis humiliabitur: et erunt prava in directa, et aspera in vias planas. Et videbit omnis caro salutare Dei b).*

a) Luc. III. 1.      b) Ib. 3. etc.

Paradoxa esse debebat Judæo vox hæc CAPUT XVIII.  
clamantis in deserto, provocantis ad agen-  
dam pœnitentiam, exemplo quoque suo  
vitæ tam austeræ, et ab omni hominum  
consortio remotæ. Coram cernebant Ju- S. Joan-  
nes Bap-  
tista vox  
Verbi di-  
vini in-  
carnati.  
dæi Romanam tunc adultam iam quartam  
apud Daniele adumbratam monarchiam,  
quæ erat conterenda per Messiam, cuius  
regnum per universum orbem tam splen-  
dide describitur Daniel. VII. *Dedit ei pote-  
statem, et honorem, et regnum: et omnes populi,  
tribus, et linguæ ipsi servient: potestas eius po-  
testas æterna, quæ non auferetur: et regnum  
eius, quod non corrumpetur.* Hæc vero nobis  
de regno Christi perspicua sunt, quæ co-  
ram cernimus in Ecclesia diffusa per or-  
bem, Judæis solis non persuasis, qui spe-  
rant, ac tunc maxime sperabant Messiam  
venturum, alias omnes potius excisurum  
gentes, quotquot legi suæ non obseque-  
rentur, instituturum inter suos amplissimum  
regnum, restitutum aurea tempora, libe-  
raturumque Israel a iugo ethnico, quo iam  
ipsi sub Romano Imperio premebantur, in  
quo etiam tunc, ut ex Suetonio in Vespas-  
iano discimus, percrebuit Oriente toto  
vetus et constans opinio, *esse in fatis, ut eo  
tempore Judæa profecti rerum potirentur.*

Miserunt equidem Judæi Jerosolymis  
sacerdotes et levitas ad Joannem interro-

CAPUT XVIII. gantes, an esset Christus, an Elias, qui præturus erat Messiam, an alius propheta?

Eo autem hæc omnia abnuente a), dixerunt ergo ei: quis es, ut responsum demus his, qui miserunt nos? quid dicis de te ipso? Ait: Ego vox clamantis in deserto: dirigite viam Domini, sicut dixit Isaias propheta. Locum hunc Isaiæ XL. 3. ad unum Evangelistæ omnes de S. Joanne præcursore Domini accipiunt, nec concinnius aliquid sublimiusque excogitari potuit ad designandum eius officium. Rem SS. Patrum verbis explicabimus, qua ratione S. Joannes ceu vox, quæ ad exprimendum verbum seu conceptum mentis comparata est, ceu vox inquam pertransiens Verbum æternum in mundum veniens prænuntiaverit. S. Augustinus altius rem repetit ab ipso muto Zacharia Joannis patre: „Hoc, inquit Serm. VII. de S. Joanne b), „quod factum est, refer ad significationem rerum, et vide magnum mysterium. Zacharias tacet, et amittit vocem, donec Joannes nasceretur præcursor Domini, et aperiret vocem. Quid est silentium Zachariæ, nisi prophetia latens, et ante prædicationem Christi quodammodo occulta et clausa? Aperitur illius adventu, clara fit venturo eo, qui prophetabatur... Solvitur lingua, quia nascitur vox:... vox Joan-

a) Jo. I. 22. etc.

b) Serm. CCXCIII. n. 2. T. V. p. 1176.

nes, Dominus autem *in principio erat Verbum*: Joannes vox ad tempus; Christus Verbum in principio æternum. " Rem conspicue imprimis, ac luculenter S. Augustinus Serm. de Jo. Bapt. explicat: De voce et verbo *a*). „Scripturæ sanctæ Verbum, alibi ait, esse definiunt, quod intra animi silentium concipimus: verbum esse definiunt ipsam cogitationem, quæ adhuc intra conscientiæ secreta reticetur; vocem verò per quam verbum profertur in medium. Vox sonus est index cogitationis, verbum vero ipsa cogitatio. Sicut enim, quando verbum corde concipimus, necessaria vox est, quasi quoddam vehiculum verbi, et qua verbum ipsum per oris sonum ad alium transferamus; tamen illud integrum etiam intra nos, id est clausum a loquente transfertur, ut in sua sede teneatur; ita et omnipotens Pater innotescere nobis volens sapientiam, et Verbum illud, quod in principio erat apud Deum, sicut ipse testatur, *eructavit cor meum verbum bonum*, beatum Joannem quasi vocem, per quam ad nos Verbum suum proferret, assumpsit. Quod quidem Verbum de illa sede ita ad nos descendit, ut e sinu, id est in profundo paterni pectoris permaneret, terrena visitans et cœlestia non relinquens." Additur in catena Patrum in Lu-

*a*) Serm. CCLXXXVIII. n. 2. T. V. p. 1153. etc.



**CAPUT XVIII.** cam a Corderio locus auctoris operis imperfecti Hom. III. in Matth. sequens a), qui rem ipsam seu mysterium egregie dilucidat, ac illustrat: „Vox est sonus, nullum secretum cordis ostendens, sed hoc tantummodo significans, quia vult aliquid dicere ille, qui clamat. Verbum autem est sermo rationalis, mysterium cordis aperiens. Adhuc vox inter animalia et homines communis est, verbum autem hominum tantum. Ideo ergo Joannes dictus est vox, non verbum: quia per Joannem neque misericordias suas Deus, neque iustitias, neque ante constitutionem mundi præparata consilia demonstravit, sed hoc tantummodo, quia aliquid magni facere Deus in hominibus meditabatur. Postea autem per filium suum plenissimum mysterium suæ voluntatis aperuit, ideo et dictus Verbum.“ Vener. Beda in cap. I. Joannis in eandem sententiam commentatur b); „Scitis, quia unigenitus Filius Verbum Patris vocatur, Joanne attestante, qui ait: *In principio erat Verbum, et Verbum erat apud Deum, et Deus erat Verbum.* Ex ipsa vestra locutione cognoscitis, quia prius vox sonat, ut verbum postmodum possit audiri. Joannes ergo vocem se esse asserit, quia Verbum præcedit. Adventum itaque Dominicum præcurrens vox dicitur, quia per eius ministe-

a) Pag. 78. b) T. V. p. 459.

rium Patris Verbum ab omnibus auditur. **CAPUT XVIII.**  
 Qui etiam in deserto clamat, quia derelictæ ac destitutæ Judææ solatium Redemptoris annunciat.“ Semper novi aliquid ad sublimitatem mysterii panditur, dignitatemque præcursoris Domini extollendam, quo, ipso Domino prædicante, nullus maior internatos mulierum, uti nullus suo officio verbo incarnato fuit coniunctior, veluti vox verbum mentis „tanto propinquior Deo, ut verbis S. Bernardi utar a), quanto vox Verbo vicina, cui nulla voce alia media, quod foris fonet, oportet intimari.“ S. Thomas illud ea sententia imprimis illustrat, quæ ipse Joannes de Christo testatur b): *Post me venit vir, qui ante me factus est: quia prior me erat.* „Dixit autem, sunt verba Thomæ c), se vocem esse, quia vox origine posterior est verbo, sed notitia prior. Nam verbum in corde conceptum per vocem prolatam cognoscimus, cum sit signum eius. Deus autem Pater prækursorem misit Joannem in tempore factum, ut Verbum suum ab æterno conceptum annuntiaretur; et ideo congrue dicit: *Ego vox.* Quod autem addit *clamantis*, potest intelligi dupliciter, ut scilicet sit vel Joannis in deserto clamantis, et prædicantis, vel Christi clamantis in ipso.“

a) T. III. p. 984.

b) Jo. I. 30.

c) Lect. XII. in Joann. T. III. p. 438.

## CAPUT

## XVIII.

Aurora  
solis iu-  
stitiæ.

Sic etiam aurora dici potest S. Joannes præcursor Christi solis iustitiæ, qui oriturus prædicatur Malach. IV. 2. et mox V. 5. Elias venturus, *antequam veniat dies Domini*. Eliam autem esse Joannem, ipse nobis Christus denunciavit, qui nimirum *ante illum præivit in spiritu et virtute Eliæ, parare Domino plebem perfectam* Luc. I. 17. Itaque auroræ instar Christum solem præcessit: *Non erat ille lux, sed ut testimonium perhiberet de lumine a*). Jo. V. 39. autem a Christo dicitur *lucerna ardens et lucens* non proprio utique suo, sed solis iustitiæ lumine, prædicans pœnitentiam in remissionem peccatorum, ad satisfaciendum divinæ per Christum nemesis.

a) Jo. I. 9.

## CAPUT XIX.

CAPUT  
XIX.

## FILII ABRAHAM.

Ne velitis dicere intra vos: Patrem habemus Abraham: dico enim vobis, *quoniam potens est Deus de lapidibus istis suscitare filios Abrahamæ*. Jam enim securis ad radicem arborum posita est. Omnis igitur arbor, quæ non facit fructum bonum, excidetur, et in ignem mittetur. Matth. III. 9.

**P**alam hic ad reiectionem Judæorum respicitur: atque etiam antiquissimi Patres S. Ignatius M. in epistola ad Magnes. et S. Irenæus libro IV. contra hæreses. c. 7. p. 235. Clemens Alexandrinus in protrept. ad Græcos. p. 3. de gentilibus acceperunt, quod dicitur *quoniam potens est Deus de lapidibus istis suscitare filios Abrahamæ*, quorum lapidea sunt corda, et qui faxa stipitesque cultu prosequuntur, de quibus Psalmista: *similes illis fiant, qui faciunt ea, et omnes, qui confidunt in eis*, ex quibus vero potens est Deus filios Abraham suscitare. Ad fidem certe Abrahamæ hic respicitur, quam gentiles sunt sectati, dum Judæi prosapiam ex Abraham iactitantes, ea exciderunt. Sic iuxta S. Irenæum hoc fecit Jesus, „a

Gentiles  
electi.

**CAPUT XIX.** lapidum religione extrahens nos, et a duris et infructuosis cogitationibus transferens

nos, et similem Abrahæ fidem in nobis constituens. Quemadmodum et Paulus testificatur, dicens nos esse filios Abrahæ secundum similitudinem fidei, et repromissionem hæreditatis. „Non enim successio carnis quæritur, ut loquitur S. Hilarius in h. l. fed fidei hæreditas. “ S. Hieronymus „lapides, inquit in h. l. ethnicos, intelligit iuxta illud Ezechielis XXXVI. 26. *Auferam cor lapideum, et dabo vobis cor carneum*; subdit: In lapide duritia, in carne mollitudo monstratur. Sive simpliciter indicat Dei potentiam, quod, qui de nihilo cuncta fecerit, possit et de saxis durissimis populum procreare. “ Ad illud Isaïæ LI. 1. hic respicitur, *attendite ad petram, unde excisi estis, et ad cavernam laci, de qua præcisi estis*. „Nominat enim petram Abraham propter impotentiam generandi et Saram propter sterilitatem, “ ut etiam S. Thomas in hunc locum animadvertit, quasi dicat a): „Deus qui potentem fecit Abraham, et fœcundam Saram, potens est de lapidibus istis fuscitare filios Abrahæ. “ „Et ideo admonentur, sunt verba S. Ambrosii b), claritatem sibi magis operis, quam nobilitatem generis vindicare; quod nulla in successione

a) T. III. p. 43.

b) *Expos. in Lucam lib. II. n. 75. T. I. p. 1305.*

prærogativa sit, nisi fidei adstipuletur hæreditas, quam Dei nutu ad populos gentilium transferendam, sermone prophetico revelavit, dicens: *Potens est Deus de lapidibus istis suscitare filios Abrahæ.* Nam licet Deus possit diversas convertere et commutare naturas; tamen quia mihi plus mysterium, quam miraculum prodest, in prænuntio Christi nihil magis, quam ædificationem Ecclesiæ debeo surgentis agnoscere: quæ non rupeis faxis, sed vivis lapidibus extructa, in habitaculum Dei, et fastigium templi conversione nostrorum surrexit animorum. Etenim parabat Deus mentium nostrarum dura mollire, et de lapidibus offensionis excitare cultores religionis. Quid enim aliud quam lapides habebantur, qui lapidibus serviebant, similes utique iis, qui facerent eos? Prophetatur igitur faxosis gentilium fides infundenda pectoribus, et futuros per fidem Abrahæ filios oracula pollicentur, quibus per duritiam mentis faxeus quidam insensibilis, irrationabilisque naturæ usus inoleverat. Nam si lapidibus vivis firmatos viros fidei robore sententia apostolica comparavit, iuxta quod scriptum est: *Et vos tanquam lapides vivi ædificamini domus spiritalis, in sacerdotium sanctum, offerentes hostias spirituales*: multo magis hîc videntur voce prophetica lapidibus homines comparati, qui ita humanæ sensum mentis

CAPUT  
XIX.

amiserant; ut dum lapidibus putant divinitatis alicuius inesse rationem, ipsi in naturam lapidum non usu corporis, sed mentis habitu verterentur.“ Sed, ut iam notavimus, sanctus Jo. Chrysostomus inhærendo litteræ non minus apte, et concinne subtilitatem huius sententiæ exponit in h. l. his verbis a): Quidam dicunt, id de gentibus dici, quas lapides metaphorice vocat. Ego vero aliam dicti sententiam esse puto. Qualem illam? Ne putetis, inquit, si vos pereatis, patriarcham sine filiis fore. Non ita, non ita utique se res habet. Deus enim potest ex lapidibus filios ipsi dare, et ad eius genus cognationemque illos deducere, siquidem hoc ipsum a principio factum est. Nam ex lapidibus homines fieri tale est, quale ex vulva sterili puellum prodire. Quod et propheta subindicans dicebat: *Respiciite in solidam petram, ex qua excisi estis, et ad foveam lacus, ex qua effossi estis. Respiciite in Abraham patrem vestrum, et in Saram, qua vos parturivit.* Hanc ergo prophetiam illis revocat in memoriam, ostenditque sicut a principio illum sic mirabiliter patrem effecit, quasi ex lapidibus, sic et nunc quoque id posse fieri. Sed vide quomodo et terreat, et excindat. Non enim dixit, iam excitavit, ne ipsi animum desponderent; sed suscitare potest. Neque

a) T. VII. p. 151.

dixit, homines facere potest ex lapidibus; CAPUT XIX.  
 sed quod multo maius erat, et cognatos, et filios Abrahæ. Viden' quomodo illos abduxit a carnali illa imaginatione, et a præsidio proavorum, ut in propria pœnitentia temperantiaque spem salutis haberent? Viden' quomodo cognationem carnis excludens, fidei cognationem inducit? "

Perinde ac S. Joannes Baptista ita etiam Christus et eius apostoli Judæis superbiam illam ex eorum animis eximere passim al-laborabant, quam ex Abrahamida prosapia conceperant, radice quidem sancta, ex qua ortum habere debebat Christus secundum promissionem Abrahæ et semini eius factam, tunc cum de terra sua et cognatione sua egredi iuberetur a): *Factamque te in gentem magnam, et benedicam tibi, et magnificabo nomen tuum, erisque benedictus. Benedicam benedicientibus tibi, et maledicam maledicentibus tibi, atque in te benedicentur universæ cognationes terræ.* Hoc, ad se solos reflectentes animum, non attendebant carnaliter sapientes Judæi, id est, ut rem nobis explicat D. Paulus b), non qui filii carnis, hi filii Dei, sed qui filii sunt promissionis, estimantur in semine. Et alibi Christi nos semen allocutus, Nos autem, inquit c), fratres, secundum Isaac promissionis filii sumus; sed quomodo

a) Gen. XII. 2.    b) Rom. IX. 8.    c) Gal. IV. 28.



**CAPUT XX.** *tunc is, qui secundum carnem natus fuerat, persequabatur eum, qui secundum spiritum: ita et nunc. Sed quid dicit scriptura? Eiiice ancillam et filium eius. Hoc tunc Judæos manebat fatum, dum iam esset infructuosa arbor, quod eis exprobrat Joannes Baptista et excidium prædicit: Jam enim securis ad radicem posita est. Omnis ergo arbor non faciens fructum bonum, excidetur, et in ignem mittetur.*

## CAPUT XX.

### TENTATUR CHRISTUS A DIABOLO.

*Erat in deserto quadraginta diebus, et quadraginta noctibus: et tentabatur a satana, eratque cum bestiis, et angeli ministrabant illi. Marc. I. 13.*

**M**oyses et Elias, qui cum Christo transfigurati sunt in monte, etiam leguntur ieiunasse quadraginta diebus, et quadraginta noctibus, alter legislator Judæorum, alter corypheus prophetarum: fecit et hoc ille, qui venit, ut legem et prophetas adimpleret. Dicitur Christus ductus a spiritu in desertum, ut tentaretur a diabolo a), nobis

Adam fecundus.

a) Matth. IV. 1.

ad exemplum, ut discamus nullum locum, CAPUT  
XX.  
opus aut institutum tam pium et sanctum, quo se malignus satan non insinuet,

Nuspian in Evangelio sublimitas in humilitate Christi se prodit apertius, quam hic, dum non solum extra commercium humanum cum bestiis esse dicitur, verum etiam diabolo inimico irreconciliabili tentandum sæpius, enormiter tractandum, tamque viliter abutendum se comittit. Quod enim hic compendio dicit S. Marcus de tentatione Christi in deserto, articulatim explicant Evangelistæ Matth. IV. et Luc. IV. quam vero S. Joannes silentio penitus præterit. Qua de re Origenes a), „scripturæ sensum, inquit, diligenter eventilans, reor invenire me causam, quare Joannes tentationem Domini non descripserit: sed tantum Matthæus, Lucas, et Marcus. Joannes enim, qui a Deo exordium fecerat dicens: *In principio erat Verbum etc.* nec poterat divinæ generationis ordinem texere, sed tantummodo quod ex Deo et cum Deo esset, expresserat, adiecit: *Et Verbum caro factum est.* Porro quia Deus tentari non potest, de quo ei erat sermo, ideo tentari illum a diabolo non introducit.“

Antiquissimi quique SS. PP. rationem et schema tentationis Christi ceu Adami secundi in tentatione Adami primi in paradiso quærent. S. Justinus M. postquam

a) *Homil. XXIX. in Luc. T. III. p. 967.*

CAPUT sequentia ad rem retulisset a), „statim enim

XX. atque Jesus ascendit e fluvio Jordane, ubi

vox in eum edita est: *Filius meus est tu; Ego hodie genui te*; scriptum est in commentariis Apostolorum, diabolus ad illum accessisse, et tentasse, usque adeo, ut ei diceret: *Adora me*, eique respondisse Christum: *vade retro me satana: Dominum Deum tuum adorabis, et illi soli servies*. Quemadmodum enim Adamum decipit, sperabat se in hunc quoque aliquid moliri posse.“ S.Irenæus vero: „Quoniam enim, ait in conclusione cap. 21. lib. V. ubi hanc rem tractat, in initio homini fuasit transgredi præceptum factoris, ideo habuit eum in sua potestate, potestas autem eius est transgressio, et apostasia, et his colligavit hominem; per hominem ipsum iterum oportebat victum eum contrario colligari iisdem vinculis, quibus alligavit hominem, ut homo solutus revertatur ad suum Dominum, illi vincula relinquens, per quem ipse fuerat alligatus, id est, transgressionem. Illius enim colligatio, solutio facta est hominis, quoniam *non potest aliquis introire in domum fortis, et vasa eius diripere, nisi primum ipsum fortem alligaverit b)*.“ Quibus in verbis imprimis ratio et causa attendenda est, quam ob rem genus humanum insidiis dæmonis expositum ac vinctum, in eius servitutem

a) *Dialog. cum Tryph.* n. 103. p. 198. 4.

b) *Matth. XII.* 29.

est redactum, a Christo iterum creptum. CAPUT XX.  
 S. Ambrosius „convenit, inquit a), recor-  
 dari, quemadmodum de paradiso in deser-  
 tum Adam primus eiectus sit; ut advertas  
 quemadmodum de deserto ad paradisum  
 Adamus secundus reverteretur.“

Intelligis utique hinc admirabilem œconomiam redemptionis nostræ, qua Christus statim post baptismum a Joanne Baptista acceptum, dum voce cœlesti Filius Dei esse est declaratus, ductus a Spiritu divino est in desertum, ut tentaretur a diabolo, atque opus redemptionis liberationisque a servitute diaboli conveniret tentationi, lapsuique in paradiso. Itaque, qui aliquando post creationem hominis mox adfuit tentator in forma serpentis, hic in forma humana, quam Christus nostri causa assumpsit naturam, accedit, redemptoremque nostrum in ipso exordio sui muneris prædicandi Evangelium regni, ad destruendum regnum diaboli, aggreditur. „Agebatur, ut idem S. Ambrosius postea scribit, consilio in desertum, ut diabolum provocaret: nam nisi ille certasset, non mihi iste vicisset: mysterio, ut illum Adam de exilio liberaret, qui de paradiso in desertum eiectus est: exemplo, ut ostenderet, nobis diabolum ad meliora tendentibus invidere;

a) *Exposit. in Luc.* n. 7. T. I. p. 1236.

CAPUT et tunc magis esse cavendum, ne mysterii  
XX. gratiam deserat mentis infirmitas.“ Voluit

igitur Christus per omnia nobis assimilari  
tentatus *per omnia pro similitudine absque peccato* a), velut dux et signifer noster nos  
ad pugnam contra diabolum præire, et nos  
quibus armis, fuga nempe seu secessu a  
mundo, ieiunio, oratione, et Verbo Dei  
contra diabolum certamen ineundum fit,  
edocere: securos nos reddere et certos de  
victoria, si strenue cum ipso in pugnam  
processerimus: nec pugnam detrectandam  
esse, aut alienam existimandam post bap-  
tismum, quia etiam „tunc Jesus ductus est  
in desertum a spiritu, ut tentaretur a dia-  
bolo, docens nos, sunt verba Theophi-  
lacti in cap. IV. Matthæi b), quod post  
baptismum magis oportet expectare tenta-  
tiones.“ Eadem in verba „Tunc quan-  
donam? quærit S. Chrysostomus c), post  
descensum illum Spiritus sancti, post vocem  
illam superne delatam, et dicentem: *Hic  
est filius meus dilectus, in quo mihi complacui.*  
Quodque mirum est, a Spiritu sancto: hic  
enim illuc adduxit illum. Quia enim omnia  
ad docendum nos fecit, et passus est, illuc  
adduci, et cum diabolo pugnam commit-  
tere voluit: ut unusquisque baptizatorum,  
si post baptismum maiores sustineat tenta-

a) *Hebr. IV. 15.*      b) *T. I. p. 19.*

c) *Hom. XII. in Matth. n. 1. T. VII. p. 167.*

tiones, ne turbetur, quasi insperatam rem expertus; sed maneat fortiter omnia ferens, utpote re secundum rectam seriem accidente. Etenim ideo arma accepisti, non ut otieris, sed ut pugnes. Ideo ingruentes tentationes non impedit Deus; primo quidem, ut discas te multo fortiolem factum; deinde ut moderate sapias, neque donorum magnitudine extollaris, cum te tentationes reprimant: ad hæc vero, ut malignus ille dæmon, an abs se discesseris dubitans, tentationum experimento certior fiat, te ipso prorsus relicto, abscessisse; quarto, ut fortior, et ipso ferro solidior sic evadas; quinto, ut thesauri tibi crediti certum habeas argumentum,“

CAPUT  
XX.

Animadvertenda vero imprimis est convenientia tentationum Christi victoris et primorum parentum victorum iuxta species illas concupiscentiæ carnis nempe, concupiscentiæ oculorum, et superbiæ vitæ a). A seductore quippe decepti sunt primi parentes nostri, inductique fraudulenter, nequaquam morituros se, si comederent, sed aperiendos potius eorum oculos, et futuros sicut deos, scientes bonum et malum; videns mulier, quod bonum esset lignum ad vescendum b), voluit tentator, ut poma gulam ceu concupiscentiam carnis fatiarent:

Victoria  
Christi de  
diabolo.

a) I. Jo. II. 16.

b) Genes. III. 6.

**CAPUT** *et pulchrum oculis, aspectuque delectabile: Ea*

**XX.** concupiscentiam oculorum; superbiam vero vitæ, dum persuasit: *Eritis sicut dii.* „Tria præcipue, ut rem exponit S. Ambrosius a), edocemur esse tela diaboli, quibus ad convulnerandam mentem hominis consuevit armari: gulæ unum, aliud iactantiæ, ambitionis tertium. Inde autem cœpit, unde iam vicit. Et ideo inde incipio in Christo vincere, unde in Adam victus sum; si tamen mihi Christus imago Patris, virtutis exemplum sit.“ Copiosius hæc explicata leges apud Cassianum in collat. Patrum collatione quinta, quæ est Abbatis Serapionis de octo principalibus vitiis cap. 6. b). Et apud S. Gregorium lib. I. hom. XVI. in Evang. c). Notandum vero, quod S. Ambrosius (postquam pulchre imprimis rerum huius mundi caducitatem ex eo demonstrasset, quod diabolus uno momento omnes ob oculos posuisset) in illa verba Lucæ IV. 13. *Et consummata omni tentatione, diabolus recessit ab illo, usque ad tempus commentatur:* „Prope omnium, scribit d), criminum fontes hæc tria genera demonstrantur esse vitiorum. Neque enim consummatam omnem tentationem scriptura dixisset: nisi in his tribus esset omnium materia de-

a) *Expos. in Luc. lib. IV. n. 17. T. I. p. 1339.*

b) *Adversus Pelag. lib. VII. c) T. I. p. 1492.*

d) *L. IV. n. 35. p. 1343.*

lictorum, quorum femina in ipsa origine sunt cavenda. Finis ergo tentationum, finis est cupiditatum; quia causa tentationum causæ cupiditatum sunt. Causæ autem cupiditatum sunt carnis oblectatio, species gloriæ, aviditas potentiæ. "Conspirat S. Jo. Chrysostomus in Matthæum a): „Et quomodo, inquires, Lucas ait, ipsum omnem tentationem consummasse? Videtur mihi, ut capita tentationum diceret, omnes dixisse, quasi aliis hoc numero comprehensis. Nam hæc mala, innumera alia complectuntur, ventri fervire, ad vanam gloriam quid agere, furioso pecuniarum amore teneri. "Lectu omnino digna sunt, quæ S. Pater in ea homilia edisserit de ordine tentationum, arteque, qua vaferrimus hostis usus fuerat, id in omnibus intendens, ut, an vere esset Filius Dei, expiscaretur, cum audisset in baptismo Patris oraculum ac Joannis Baptistæ testimonium, cerneretque nihilominus cæteroquin hominem infirmum. „Sed his dictis Christus, subdit S. Pater b), non solum tamen revelat; sed quasi homo ei interim loquitur. Nam quod dixit, *non in solo pane vivit homo*, neque illud: *Non tentabis Dominum Deum tuum*, non sese admodum manifestantis erat, sed sese ex cæterorum hominum numero declarantis. "Et S. Hieronymus in

a) *Hom. XIII. n. 4. T. VII. p. 172.*

b) *Ib. p. 171.*



**CAPUT XX.** Matthæum a): „In omnibus tentationibus, inquit, hoc agit diabolus, ut intelligat, si Filius Dei sit: sed Dominus sic responsionem temperat, ut eum relinquat ambiguum.“ Spectata nimirum litera tantum, ut exemplo satanæ facere solent filii tenebrarum. Si enim spiritum verborum Christi assecutus fuisset fatan, agnovisset ex responsione prima in Christo verbum illud divinum, quod procedit de ore Dei: et adhuc manifestius in secunda responsione redargutum se intellexisset, quod Dominum Deum suum tentare in Christo non esset reveritus: uti etiam in tertia tentatione, responsione hac Dominum Deum tuum, quem tu tentas, ut te adoret, adorabis, et ipsi soli servies.

Jam supra ex S. Ignatio M. notavimus, quocum S. Hilarius aliique Patres sentiunt, diabolum latuisse incarnationis mysterium; experimentum autem capere voluit miraculo, quod ad creationem proxime accedit, si lapidem in panem mutaret. Respondet autem Christus ex Moyse b), per quem olim Deus Israelitas in deserto manna de cælo misso nutrit, a quo hæc verba, dum in Deuteronomio istud inter varia beneficia divina populo ob oculos poneret, sunt prolata: *Non in solo pane vivit homo, sed in omni verbo quod procedit de ore Dei.* Disci-

a) T. IV. p. 12.    b) Deuter. VIII. 3.

pulis suis in prima statim instructione, ser- CAPUT  
 mone in monte Matth. VI. omnem sollici- XX.  
 tudinem demit de necessariis huius vitæ :  
 eos etiam redarguens Matth. XVI. 7. dum  
 de non acceptis panibus *cogitabant intra se*,  
 miracula multiplicatorum in deserto panum  
 in memoriam revocat : iisdem porro ali-  
 quando afferentibus sibi panem Jo. IV. 34.  
*Meus cibus est, ait, ut faciam voluntatem eius,*  
*qui misit me, ut perficiam opus eius.* Hæc  
 declarant nobis responsionem diabolo a  
 Christo factam in statu suo omnium rerum  
 experte in hoc mundo, ut plena in cœle-  
 stem Patrem suum fiducia posset dicere  
 in statu exinanitionis : *Non in solo pane vivit*  
*homo etc.* Quæ in verba, „ideo sic respon-  
 dit Dominus, commentatur Ven. Beda a),  
 quia propositum ei erat humilitate diabo-  
 lum vincere, non potentia.“ Ipsa hæc  
 Filii Dei humilitas audacem adeo reddidit  
 tentatorem, ut eum in pinnaculum templi  
 elevaret, cum iam incertior esset, iterum  
 aggressus, miraculum iterum expostulat,  
 eandem instituens quæstionem : *Sic Filius*  
*Dei es, mitte te deorsum, scriptum est enim :*  
*Quia angelis suis mandavit de te etc.* cum sci-  
 ret miracula esse divinum opus, quo etiam  
 argumento deinceps Christus divinam suam  
 assertum ivit missionem ; Christus autem  
 iterum verbis legis Deuteron. VI. 16. ten-

a) T. V. p. 259.

**CAPUT** tationem eludit, dum *Rursum*, inquit, *scriptum est: Non tentabis Dominum Deum tuum.*

**XX.** Nec enim per alienam, ut S. Irenæus observat a), „sed per propriam Patris sui sententiam destruxit adversarium, et fortem vicit,“ simulque se eius Filium innuit, ut notat S. Petrus Chrysologus „se utique Dominum, se utique Deum intelligi voluit, hæc dicendo: qui non de pinna templi tantum se dedit ad terram, sed e cœlis se ad inferos usque iactavit, ut non cadentium forma, sed esset resurrectio mortuorum.“ Et mox idem S. Pater ad tertiam tentationem, qua ad tantam audaciam impudentiamque erupit, ut se adorari peteret diabolus, promittens Christo: *Hæc omnia dabo tibi, si cadens adoraveris me:* „Offert, pergit S. Chrysologus b), quæ Dei sunt, Deo: auctori, quæ auctoris sunt, reponit: suadet, ut adoret ab omnibus adorandus, et cæcatus ausibus suis ante iudicium iudici, quemadmodum simplices deciperet, confitetur: cui Dominus non tam testimonio legis, quam divinitatis suæ respondet imperio: *Dominum Deum tuum adorabis.* Tu Dominum Deum illum, cui genu flectunt omnia non solum cœlestia et terrestria, sed etiam inferna. Adorabis ergo tu in inferno stridens et eiulans eum, quem ad te adorandum modo temerarius

a) *Lib. V. contra hæreses c. 22.*

b) *Pag. 24.*

desertor invitas.“ Jam vero aperto Marte cum tentatore agit, quis esset ei exprobrans. *Vade satana, Dominum Deum tuum adorabis, et illi soli servies.* „ Denudans eum, sunt verba S. Irenæi a), per hoc nomen, et se ostendens qui erat. Satana enim verbum Hebraicum, apostatam significat. Et tertio itaque vincens eum, de reliquo repulit a semetipso, quasi legitime victum: et soluta est ea, quæ fuerat in Adam præcepti Dei prævaricatio, per præceptum legis, quod servavit filius hominis, non transgrediens præceptum Dei:“ Nobis nempe in exemplum ac robur, quod sua victoria Christus præstat ad superandas quascunque diabolicas tentationes et insidias; quod ipsum eum in oratione dominica rogamus, ne nos inducat in tentationem, sed liberet nos a malo, hoc est, a diabolo; quam ob rem, ut fortes resistere possemus atque a diaboli fervitute eriperemur, hanc nostri causa pugnam iniit et victoriam in hostem reportavit; atque ut intrepide cum ipso, et in ipso dicere ei tentanti possimus: *Vade satana.* „ Nos vero Dominus, monachos suos alloquitur S. Antonius b), non fuit a diabolo circumveniri, cum similibus phantasiis se aggredientem increpavit his verbis: *Vade retro me satana: Scriptum est enim: Dominum Deum tuum adorabis, et illi soli*

a) *Lib. V. c. 21. p. 319.* b) *T. IV. Bibl. PP. p. 647.*

**CAPUT** *servics.* Quapropter magis magisque versi-

**XX.** pellis iste despiciatur a nobis. Quod enim

illi hæc Dominus dixit, id nostri causa factum est: ut has voces a nobis item audientes dæmones evertantur, propter Dominum, qui eos ipsis (his verbis) increpavit.

Angelo-  
rum mini-  
sterium.

Quod vero Matthæus et Lucas de tentatione Christi explicatius edisserunt, hoc præmissus huic capiti S. Marci locus paucis verbis complectitur, estque sublime illud admirandum cumprimis, et adorandum in tota hac narratione, qua se Christus in initio statim, dum foras prodit perfuncturus munere suo, eum demonstravit, ut, iuxta Apostolum a), in nomine Jesu omne genu flectatur cælestium, terrestrium et infernorum, dum, postquam Spiritu S. ductus in desertum post ieiunium quadraginta dierum fatanam deiecit, accedentes angeli ministrabant ei, incarnato Verbo obsequium præstantes iuxta Apostolum Hebr. I. 6. *Et cum iterum introducit primogenitum in orbem terræ, dicit: Et adorent eum omnes angeli Dei, angelorum Dominum et creatorem, quem unigenitum Filium suum hominem factum misit in terram Deus, ut sciamus b), quæ sit supereminens magnitudo virtutis eius in nos, quæ credimus, secundum operationem potentiæ virtutis eius, quam operaturus erat in Christo suscitans*

a) Phil. II. 10.

b) Eph. I. 19. etc.

*illum a mortuis, et constituens ad dexteram suam in cælestibus, supra omnem principatum et potestatem, et virtutem, et dominationem, et omne nomen, quod nominatur non solum in hoc sæculo, sed etiam in futuro. Et omnia subiecit sub pedibus eius. Divinam virtutem suam quomodo experti fenserint dæmones paulo post hanc tentationem idem evangelista Marcus I. 24. enarrat in obsesso exclamantes inducens: Quid nobis et tibi Jesu Nazarenè: venisti perdere nos? Scio qui sis, sanctus Dei. Et comminatus est ei Jesus, dicens: obmutesce, et exi de homine. Et discerpens eum spiritus immundus et exclamans voce magna exiit ab eo. De bonis angelis mox plura, ex quibus unus, dum in carne degeret Luc. XXII. 43. apparuit illi de cælo confortans eum. Ad Petrum verò in horto, quod famulatum angelorum demonstrat, dicit a): An putas, quia non possum rogare Patrem meum, et exhibebit mihi modo plusquam duodecim legiones angelorum? Eadem sunt, quæ Christus respondit Pilato: Jo. XVIII. 36. Igitur postquam omnia, quæ oportebat fieri, essent facta, mox Christo iam resurrecturo b), Ecce terræ motus factus est magnus. Angelus enim Domini descendit de cælo: et accedens revolvit lapidem, et sedebat super eum. Mox etiam angelus mulieribus Christi resurrectionem denuntiat, et timo-*

a) *Matth. XXVI. 53.*b) *Ib. XXVIII. 2.*

CAPUT XX. rem aufert, dum contra *præ timore eius exterriti sunt custodes, et facti sunt velut mortui*: qui nimirum non erant in spe resurrectionis dominicæ, de eorum numero quos Christus e servitute dæmonis liberans, captivam ducturus erat captivitatem in cœlos, *deglutiens mortem, ut vitæ æternæ hæredes efficeremur: profectus in cælum, subiectis sibi angelis, et potestatibus, et virtutibus a)*. Nobis autem, quamdiu in hac vita sumus non solum exemplum, sed etiam virtutem, devicto satana, tribuit, ut possimus *per armaturam Dei stare adversus insidias diaboli. Quoniam non est nobis colluctatio adversus carnem et sanguinem: sed adversus principes, et potestates, adversus mundi rectores tenebrarum harum, contra spiritualia nequitie in cælestibus b)*: Satanam nimirum cœlo detrusum, quem supra Apostolus c. II. 2. vocat *principem potestatis aeris huius, spiritus, qui nunc operatur in filios diffidentie*: Ἐνεργῶνς ut habet textus originalis; qua voce communiter etiam aeris regiones denotantur.

a) 1. Petr. III. 22.      b) Eph. VI. 11.

## CAPUT XXI.

CAPUT  
XXI.CHRISTUS A JOANNE AGNUS DEI  
DEMONSTRATUR.

Vidit Joannes Jesum venientem ad se,  
et ait: *Ecce Agnus Dei, ecce qui tollit  
peccatum mundi.* Hic est, de quo  
dixi: Post me venit vir, qui ante me  
factus est: quia prior me erat. Jo.  
I. 29. 30.

**P**rimum testimonium Joannis præcursoris quod refertur a Joanne Evangelista, statim postquam Verbum caro factum habitasse in nobis dixerat, est: post se venturum qui ante se fuerit, *γέγονεν, quia prior me erat a)*, quod æternam Filii generationem designat; ea vero quæ mox sequuntur, ad incarnati Verbi divini mysterium pertinent, novumque testamentum in locum veteris substitutum, legem nempe gratiæ: *et de plenitudine eius nos omnes accepimus, et gratiam pro gratia: quia lex per Moysen data est, gratia et veritas per Jesum Christum facta est. Deum nemo vidit unquam: unigenitus Filius, qui est in sinu Patris, ipse enarravit b).* Hoc testimonium iterum in memoriam revocare voluit, quan-

Pro pec-  
catis no-  
stris im-  
molatus:

a) Jo. I. 15. b) Ib. 16. etc.



CAPUT XXI. do Christum altera die agnum demonstravit, *qui tollit peccatum mundi*. „Vides,

inquit Theophanes a), in uno Christo duarum naturarum compositionem, cum dixit agnum Dei, assumptam humanitatem ostendit, agnum revera innocentem pro nobis ductum ad mortem. Ne vero purum hominem hunc agnum existimares, protinus addidit, *qui tollit peccatum mundi*, hoc enim quod est divinitatis indicium, priori convenit. Per utrumque vero dictum ad Isaie prophetiam mentem eius traducit, qui audire possit, modo non clamans: “ ut ovis ad occisionem ductus est, et ut agnus coram tondente se, ipse iniquitates nostras portavit, et livore eius fanati sumus. Agnus hic præfigurabatur per agnum pascalem, nec non iuge sacrificium, quo singulis mane unus agnus, et vespere alter immolabatur: quæ vero omnia cessarunt, dum pascha nostrum immolatus est Christus: inde enim cessarunt victimæ et hostiæ umbræ futurorum, ut D. Paulus docet in epistola ad Hebr. X. 4. etc. *Impossibile enim est sanguine taurorum, et hircorum auferri peccata. Ideo ingrediens mundum dicit: Hostiam et oblationem noluisti: corpus autem aptasti mihi: Holocaustomata pro peccato non tibi placuerunt; tunc dixi: Ecce venio b).* Hic idem est, qui de se Jerem. XI. 19. dicit: *Et ego*

a) Homil. L. p. 345.

b) Psalm. XXXIX. etc.

*quasi agnus mansuetus, qui portatur ad victimam. Eundem iterum Joannes, cum videret Jesum altera die ambulantem, demonstravit, dicens: Ecce agnus Dei a), duobus ex discipulis, quorum unus Andreas frater Simonis Petri, qui, primus eum agnoscens Messiam, fratrem Petrum adduxit ad Jesum: qui in prima sua epistola capite primo nos hoc etiam iugi in memoria habere vult. Scientes, quod non corruptibilibus auro vel argento redempti estis, . . . sed pretioso sanguine quasi agni immaculati Christi, et incontaminati b). In Apocalypsi identidem nobis Christus ut agnus, ceu victima repræsentatur occisus ab origine mundi c) unde quippe a peccato originali usque primorum parentum nostrorum omnium peccata ipse tulit; quodque non semel Josephus de bello Judaico testatur d), agnus holocausti seu sacrificii quotidie non pro Judæis tantum, sed pro totius generis humani offerebatur peccatis comburendus, admirabili consensione cum verbis Joannis e): Ecce agnus Dei, qui tollit τὴν ἀμαρτίαν peccatum mundi: Ipse est propitiatio pro peccatis nostris; non pro nostris autem tantum, sed etiam pro totius mundi. Hoc est quod Joannes de Christo dicit: Ecce agnus Dei, ecce qui tollit peccatum mundi. Parallelus est*

a) Jo. I. 36. b) I. Petr. I. 18. c) Apoc. XIII. 8.

d) Lib. II. c. 10. n. 1. Ib. §. 4.

e) I. Jo. II. 2.

**CAPUT XXI.** hic locus illi I. Jo. III. 5. *Scitis, quia ille apparuit, ut peccata nostra tolleret: et peccatum in eo non est.* Hic est enim: *Agnus absque macula a)*, qui vetus Phase terminat: *Et enim pascha nostrum immolatus est Christus, dum agno pecori agnus Dei, figuræ succedit veritas.*

Lex et Prophetæ de terra terreni, terrena in veteri sonabant testamento, terram promissam, regnum terrestre, quale etiam Judæi a Messia sua præstolabantur: dum ecce adveniens unigenitus Dei Filius, qui est in sinu Patris, cœlestia nobis enarrat, et ius cœlestis patriæ restituit, deleto chyrographo peccati, vere *agnus Dei, qui tollit peccatum mundi*, ac pœnitentibus remissionem peccatorum regnumque cœlorum promittit. Id quod primus nobis Joannes nuntiat præcursor Domini, quod in ipsa eius nativitate Zacharias ipsius pater in cantico de eo vaticinatus fuerat: *Et tu puer propheta Altissimi vocaberis: præbis enim ante faciem Domini parare vias eius: ad dandam scientiam salutis plebi eius: in remissionem peccatorum eorum.* Neque enim ullus hoc facere potuit prophetarum veteris testamenti, usque ad adventum Christi b): *In diebus autem illis venit Joannes Baptista prædicans in deserto Judææ, et dicens: Pœnitentiam agite:*

a) Exod. XII. 5.    b) Matth. III. 1.

*appropinquavit enim regnum, cælorum. Nec aliter Christus, relicto post ieiunium quadraginta dierum deserto, et diaboli tentationem, munus suum auspicatus est a): Exinde capit Jesus prædicare, et dicere: Pœnitentiam agite: appropinquavit enim regnum Dei. Sic Marc. I. 4. de Joanne dicitur: Fuit Joannes in deserto baptizans, et prædicans baptismum pœnitentiæ in remissionem peccatorum: utrumque hic baptismum suum in aqua, et Christi in Spiritu sancto in remissionem peccatorum designat, de quo utroque paulo post v. 8. Ego baptizavi vos aqua, ille vero baptizabit vos Spiritu sancto, nempe agnus Dei, qui tollit peccatum mundi, ac per remissionem peccatorum e servitute diaboli in libertatem filiorum Dei nos restituit, regnoque Dei, de quo mox v. 14. et 15. Postquam autem traditus est Joannes, venit Jesus in Galileam prædicans Evangelium regni Dei, et dicens: Quoniam impletum est tempus, et appropinquavit regnum Dei, pœnitementi, et credite Evangelio. Sic etiam apostoli ab eo missi exeuntes prædicabant, ut pœnitentiam agerent b). Et post acceptum Spiritum sanctum dum prima concione Petri ad Judæos, compuncti sunt corde, et dixerunt ad Petrum, et ad reliquos apostolos: Quid faciemus viri fratres? Petrus vero ad illos: Pœnitentiam, inquit, agite, et baptizetur unusquisque vestrum in nomine Jesu Christi, in remissionem peccatorum vestrorum: et accipietis donum Spiritus sancti c).*

a) Matth. IV. 17. b) Marc. VI. 12. c) Act. II. 37. etc. -

## ANGELI IN MINISTERIO CHRISTI.

Quia dixi tibi: vidi te sub ficu, credis: maius his videbis. Et dicit ei: *Amen dico vobis, videbitis cælum apertum, et angelos Dei ascendentes, et descendentes supra filium hominis.* Jo. I. 50. 51.

Scala Jacob typus novi testamenti in Nathanaele.

Viderat Jesus Nathanaelem ad se venientem, et dicit de eo: *Ecce vere Israelita, in quo dolus non est.* Hinc repetenda est mystica expositio huius loci de ascendentibus et descendentibus angelis super filium hominis. Israelis nomen patriarchæ Jacob a Deo in Genesi inditum legitur, atque etiam ab integritate commendatur, ut hic Nathanael. Vidit autem aliquando Jacob in somnis scalam stantem super terram et cacumen illius tangens cælum; Angelos quoque Dei ascendentes et descendentes per eam. Et Dominum innixum scalæ dicentem sibi: *Ego sum Dominus etc.* a) Quibus omnibus anxio tunc patriarchæ, providentiam suam et opem de cælo ministeriumque angelorum declarare voluit. Observandum porro, Christi figuram gessisse tunc Jacob, cui promissa est terra Chanaan, typus cœlestis

a) Gen. XXVIII. 12. etc.

patriæ, semenque eius quasi pulverem terræ **CAPUT**  
 dilatandum ad Orientem, et Occidentem, **XXII.**  
 et Septentrionem, et Meridiem: *et benedi-*  
*centur in te, et in semine tuo cunctæ tribus terræ:*  
 quod in Christi Ecclesia fuit impletum.  
 Dilucidavimus hæc supra Cap. VIII. ubi  
 vidimus Christum Mariæ annunciatum ab  
 angelo, regnaturum in domo Jacob in æter-  
 num, aliquando cum angelis descensurum  
 ad iudicium, et ascensurum in cælum: Cap.  
 XIV. item de stella oritura ex Jacob, quam  
 viderunt nascente Domino Magi incuna-  
 bula Ecclesiæ inter gentes; et Cap. XV.  
 de prophetia Annæ et Simeonis, viden-  
 tium salutare Dei in Christo, lumen ad  
 revelationem gentium, et gloriam plebis  
 Israel, secundum promissionem factam pa-  
 triarchæ Jacob, quando in somnis vidit  
 angelos Dei ascendentes et descendentes,  
 et Dominum innixum scalæ, agnovitque  
 evigilans vere Dominum esse in loco isto,  
 nec esse hic aliud nisi Domum Dei et por-  
 tam cœli per Christum, regnumque Christi  
 in cœlis.

Quod vero ascendentes et descendentes  
 angelos super filium hominis attinet, no-  
 tandum, Nathanaelem professum fuisse  
 Christum filium Dei, ac regem Israel; eo-  
 quod procul absentem eum sub ficu se vi-  
 disse testetur in spiritu, hinc respondet

**CAPUT XXII.** *Christus : Quia dixi tibi, vidi te sub ficu, credis: maius his videbis, cœlum nempe apertum, ut olim in somno Jacob, et angelos Dei ascendentes et descendentes supra filium hominis. De Domino superne in cœlo innixum scalæ nihil dicitur: quia Dominus ille Deus per incarnationem iam filius hominis in terris erat, et ad suum ministerium angelos habuit ascendentes et descendentes sicut in Jacob fuit figuratum, paratumque in ipso peregrinationis suæ exordio. Tanta autem est distantia inter typum et veritatem in Christo, quanta inter cœlum et terram, hominem et Deum, qualis est filius hominis, ad manifestationem divinæ gloriæ Verbi incarnati per Evangelium coram hominibus ministerio angelorum Domino perinde, ac hominum, unigenito filio Dei præstito. Potuit Nathanael facile a cœtaneis suis comperiri, quæ fuerint circa Verbum incarnatum Filium Dei venientem in hunc mundum angelorum ministeria, comperturus ipse ac coram intuiturus eadem post resurrectionem in ascensione præsertim in cœlum et futuro adventu secundo. Hæc cum sententia facile conciliantur, combinanturque pleræque omnes, quæ tam diversæ occurrunt apud veteres perinde ac recentiores, simulque admirabilis illa simplicitas declaratur, qua Christus Nathanaelis Filium Dei et regem Israel agnoscentis sic*

confirmat fidem, ut simul ex typo in patriarcha Jacob Christi divina opera, potestas et imperium non solum, sed etiam orbis felicitas in eius adventu demonstretur, ut cum Jacob exclamare liceat: *Vere non est hic aliud nisi domus Dei: et porta cæli a).* „Viden' quomodo, de Nathanaele exclamat S. Jo. Chrysostomus in h. l. b) illum paulatim de terra erigat, et eo deducat, ne ipsum tanquam simplicem hominem effingat? Is enim cui angeli serviunt, super quem angeli ascendunt et descendunt, quo pacto homo fuerit? Ideo dixit *maiora his videbis*, quod explicans, angelorum ministerium attulit, ac si diceret: Magnum tibi hoc videtur ô Nathanael! ideoque me ut Israelis regem confessus es: quid ergo dices, si videris angelos super me ascendentes, et descendentes?“ Affert deinde varia angelorum ministeria circa Christum in passione, resurrectione, ascensione, ipsa nativitate, et iam prius in annuntiatione, eritque aliquando omnium illustrissimum angelorum super filium hominis ministerium! quando in maiestate sua ad iudicium venerit cum angelis suis.

Insignem, ut iam notavi, hæc interpretatio lucem accipit ex Epist. ad Hebr. cap. I, ubi apostolus ex ministerio angelorum di-

a) Gen. XXVIII. 17.      b) T. VIII. p. 120.



**CAPUT** vinitatem Christi demonstrat; *Qui cum sit,*  
**XXII.** ait, *splendor gloria, et figura substantiæ eius,*

*portansque omnia verbo virtutis suæ, purgationem peccatorum faciens, sedet ad dexteram maiestatis in excelsis: tanto melior angelis effectus, quanto differentius præ illis nomen hæreditavit. Cui enim dixit aliquando angelorum: Filius meus es tu, ego hodie genui te? Et rursum: Ego ero illi in patrem, et ipse erit mihi in filium. Et cum iterum introducit primogenitum in orbem terræ dicit; Et adorent eum omnes angeli Dei. Et ad angelos quidem dicit: Qui facit angelos suos spiritus, et ministros suos flammam ignis. Ad Filium autem: Thronus tuus Deus in sæculum sæculi; virga æquitatis, virga regni tui etc. S. Augustinus in hunc Evangelistæ locum luculenter typum cum veritate in Christo, qui figuratus fuit in posito in titulum a Jacobo lapide fundente super eum oleum, conciliat a): „Scalas vidit Jacob, et in ipsis scalis vidit angelos ascendentes et descendentes et lapidem, quem sibi posuerat ad caput, unxit. Audistis, quia Messias Christus est. . . Quid autem vidit tunc in scalis? ascendentes et descendentes angelos. Sic est de Ecclesia, fratres. Angeli Dei boni prædicatores, prædicantes Christum, hoc est super filium hominis ascendunt et descendunt.“ S. Augustinum, Ven. Beda, et alii sequuntur in explicatione*

a) *Tom. VII. in Jo. 22. Tom. VII. p. 352.*

typi in prædicatoribus. S. Zeno postquam singularem quorundam attulisset sententiam, qui ascendentes angelos tenebrarum intelligunt, ipse vero censet angelos homines iustos et iniustos generaliter dictos; præterquam quod ad literam intelligitur de ministris angelis, „quos Domino, cum esset in terris fecisse invenimus officium, sic etiam S. Thomas in h. l. a) Angeli autem, inquit, ascendunt et descendunt, in quantum ei adsunt obsequendo et ministrando. Dixit ergo: *Amen, amen dico vobis, videbitis cælum apertum etc.* quasi dicat: Quia vere Israelita es, attende ad id, quod Israel vidit, ut scilicet credas me illum esse, qui est significatus per unctum lapidem a Jacob: nam tu etiam videbis super ipsum angelos ascendentes vel descendentes.“

Quod si tamen stricte inhærendum sit verbis: *videbitis angelos Dei ascendentes et descendentes super filium hominis*, de omnium maxime conspicuo intelligendus est locus angelorum ministerio, quando venerit in maiestate ad iudicandum cum suis angelis in illa die, sicut in gloriosa ascensione sua in cælum, ubi iam denuntiaverunt etiam hunc secundum adventum angeli b): *Viri Galilæi, quid statis aspicientes in cælum? Hic Jesus qui assumptus est a vobis in cælum, sic*

a) T. III. p. 457.

b) Act. I. 11.

**CAPUT** *veniet, quemadmodum vidistis eum euntem in*  
**XXIII.** *cælum. Cæterum cum esset ex primariis*

*Christi discipulus Nathanael ex plerorumque sententia Bartholomæus, apostolus, adfuit absque dubio cum discipulis aliis huic apparitioni, qui Jo. XXI. 2. adfuisse legitur, quando Christus post resurrectionem suam ad mare Tiberiadis apparuit, adfuturus etiam cum venerit filius hominis in sede maiestatis suæ, et omnes angeli cum eo etc. a) Vidit igitur videbitque cælum apertum et angelos Dei ascendentes et descendentes super filium hominis.*

## C A P U T XXIII.

### CHRISTUS MORTI TRADENDUS SUA VIRTUTE RESURRECTURUS.

*Solvite templum hoc, et in tribus diebus excitabo illud. Jo. II. 19.*

**C**um primum Christus suscepto munere evangelizandi, ex Galilæa Hierosolimam ascendisset instante paschate, invenissetque in templo vendentes boves, et oves, et columbas, et numularios sedentes, etsi hæc ad sacrificia et oblationes fieri viderentur, indignatus tamen, *cum fecisset quasi flagellum*

Templum  
Dei in  
Christo  
destruc-  
tum a Ju-  
dæis, post  
triduum  
restitu-  
tum.

a) *Matth. XXV. 31.*

*funiculis, omnes eiecit de templo, oves quoque boves, et numulariorum æs effudit, et mensas vertit, et his, qui columbas vendebant dixit: auferte ista hinc, et nolite facere domum Patris ei, domum negotiationis. Judæi, qui nec-um, ut videtur, miraculum a Christo factum in Cana Galilææ intellexerant, signum ei ostendi petebant, cur hæc, quæ modo tulimus, faceret; retuleruntque respon-sonem præsam eorum, quæ essent ipsi Christum perpetraturi. Et sane coram dice caput hoc fuit accusationis contra sum dicto certe singulari ac mirabili: sic dixit: Possum destruere templum Dei, et est triduum readificare illud, accipientes rem e Hierosolymitano templo suo, utique on multo post tempore a Deo vindice m urbe destruendo; cum Christus loque- tur de templo corporis sui, quod multo eliore iure dicebatur templum Dei, ut- ote in quo omnis plenitudo divinitatis in- bitabat corporaliter, nec temporarium d æternum sibi elegerat habitaculum, de- ructum quidem a Judæis ad tres illos dies, : prædixerat Christus, sed propria virtute, rod nonnisi divinæ erat potentiæ, resus- tatum, ut promiserat, et in tribus diebus citabo illud; ut tunc recordati sunt cum surrexisset a mortuis, discipuli eius. Ju- ei vero Christum adhuc in cruce penden- m subsannabant dicentes: Vah, qui destruis*

*templum Dei, et in triduo illud reedificas: salva  
temetipsum: si Filius Dei es, descende de cruce a).*

Non descendit tunc de cruce, sed plus fecit  
sua virtute resurgens a mortuis, templum  
divinitatis suæ a Judæis destructum exci-  
tans, ut promiserat: qui tanquam Deus po-  
testatem habebat ponendi animam suam, et  
iterum sumendi eam. Quod sublime in Evan-  
gelio Christi crassi Judæi non percipiebant:  
„Quis est enim, ut cum Novatiano loquar b),  
qui dicit animam suam se posse ponere, aut  
animam suam posse sese rursus recuperare,  
quia hoc mandatum acceperit a Patre? aut  
quis dicit destructum corporis sui templum  
resuscitare rursus, et reedificare se posse?  
nisi quoniam fermo ille, qui ex Patre, qui  
apud Patrem, per quem facta sunt omnia,  
et sine quo factum est nihil, imitator pater-  
norum operum et virtutum, imago invisibi-  
lis Dei, qui descendit de cælo, qui, quæ  
vidit, et audivit, testificatus est, qui non  
venit, ut faceret suam voluntatem, sed po-  
tius ut faciat Patris voluntatem, a quo mis-  
sus ad hoc fuerat, ut magni consilarii ange-  
lus factus arcanorum cælestium nobis iura  
reseraret, quique Verbum caro factus habita-  
vit in nobis, ex nobis hic Christus non ho-  
mo tantum, quia hominis filius, sed etiam  
Deus, quia Dei Filius comprobatur.“

a) *Matth. XXVII. 40.*

b) *De Trinit., c. 21. Bibl. PP. T. III. p. 304.*

Subdit Evangelista: *Cum ergo resurrexisset a mortuis, recordati sunt discipuli eius, quia hoc dicebat, et crediderunt scripturæ, et sermoni, quem dixit Jesus a). Tardi quidem fuerant discipuli Domini post resurrectionem Domini ad credendum: unde et Christus iam ascensurus in cœlum exprobravit incredulitatem eorum et duritiam cordis; quia iis, qui viderant eum resurrexisse, non crediderunt b). Sed hoc ipsum ad firmandam fidem nostram facit: uti etiam Judæorum pervicacia et obcæcatio; quibus quidem citius mente occurrit, quæ Christus de resurrectione sua prædixerat, quam discipulis Domini: dum altera mox die, quæ est post parasceven, convenerunt principes sacerdotum et Pharisei ad Pilatum dicentes: Domine recordati sumus, quia seductor ille dixit adhuc vivens: Post tres dies resurgam c). Dumque post resurrectionem quidam de custodibus venerunt in civitatem, et nuntiaverunt principibus sacerdotum omnia quæ facta fuerant, congregati illi cum senioribus consilio accepto pecuniam copiosam dederunt militibus, dicentes: Dicite, quia discipuli eius nocte venerunt, et furati sunt eum; nobis dormientibus. Et si hoc auditum fuerit a præside, nos suadebimus ei, et securos vos faciemus. At illi, accepta pecunia fecerunt, sicut erant edocti d). Sicque*

a) Jo. II. 22.

b) Marc. XVI. 14.

c) Matth. XXVII. 62.

d) Ib. XXVIII. 11.

**CAPUT** omni ex parte mentita est iniquitas sibi:  
**XXIII.** dum et custodes vigiles se dormisse mentiuntur: et clausis oculis dormientes testimonium dant, vidisse se discipulos nocte venientes et cadaver furantes: et principes sacerdotum cum senioribus præsidi suadent, securosque faciunt custodes in collum suum mentientes.

Habemus hic quod in parabola de Lazaro a) Abraham diviti epuloni iam in inferno sepulto respondit, cum is rogaret, ut aliquem ex mortuis mitteret in domum patris sui, ut testetur quinque fratribus suis, ne et ipsi venirent in hunc locum tormentorum, pœnitentiam acturi, si quis ex mortuis ierit ad eos. *Ait autem illi: Si Moysen et prophetas non audiunt, neque si quis ex mortuis resurrexerit, credent.* S. Joannes b) vero cum memorasset testimonium perhibuisse turbam, quæ erat cum eo, quando Lazarum vocavit de monumento, et fuscitavit eum a mortuis, addit, propterea et obviam venisse in solemnibus ingressu in Jerusalem: *quia audierunt eum fecisse hoc signum, post innumera alia nihilominus increduli: quare subdit c): Cum autem tanta signa fecisset coram eis, non credebant in eum: ut sermo Isaia propheta impleretur, quem dixit: Domine, quis credidit auditui nostro?*

a) Luc. XVI. 27. etc. b) Jo. XII. 17. c) Ib. 37. etc.

et brachium Domini cui revelatum est? Prop- CAPUT  
 terea non poterant credere, quia iterum dixit XXIV.  
*Isaias: Excæcavit oculos eorum, et induravit*  
*cor eorum: ut non videant oculis, et non intelli-*  
*gant corde, et convertantur, et sanem eos. Hæc*  
*dixit Isaias, quando vidit gloriam eius, et locu-*  
*tus est de eo.* Isaiæ VI. nimirum, ubi ad  
 finem dispersio gentis prædicitur, post ever-  
 sionem scilicet urbis et templi, utpote, qui  
 in crucifixo Christo templum Dei solverint.

## C A P U T XXIV.

### BAPTISMUS NOVI TESTAMENTI.

Amen, amen dico tibi, *nisi quis renatus*  
 *fuerit ex aqua et Spiritu sancto, non*  
 *potest introire in regnum Dei.* Quod  
 natum est ex carne, caro est: et quod  
 natum est ex spiritu, spiritus est. Jo.  
 III. 5. 6.

Venit Nicodemus princeps Judæorum, Regnum  
 et magister in Israel ad Christum nocte, Messiæ.  
 cumque fatis officiose compellasse sibi visus  
 est: *Rabbi, inquit, scimus, quia a Deo ve-*  
 *nisti magister: nemo enim potest hæc signa facere,*  
 *quæ tu facis, nisi fuerit Deus cum eo.* Jam



CAPUT XXIV. Christus his ab eo dictis, interruptit sermonem, et velut ex abrupto, *Amen, amen*

~~~~~ dico tibi, ait, nisi quis renatus fuerit denuo, non potest videre regnum Dei. „Hoc, sunt verba S. Jo. Chrysostomi a), si Judæi audissent, deridentes discessuri erant. Hic autem discendi studium præsetulit. Ideo enim obscure sæpe loquitur Christus, ut auditores et ad interrogandum promptiores, et ad operandum expeditiores reddat. “ Quærit Nicodemus: *Quomodo potest homo nasci, cum sit senex?* Judæus erat Nicodemus ex semine Abrahæ, cui et femini eius tantæ promissiones factæ fuerunt, ipseque Messias inde certo oriturus sperabatur; nec Nicodemus alienus erat mente, ut Jesum hunc esse, tunc maxime desideratum speratumque, sibi persuaderet, cumque iam a tribu Juda regnum esset translatum, sibi in animum induceret, eum restitutum regnum Israel. At terrena adhuc et nimis humana de Christo cogitat Rabbi eum compellans. Equidem *scimus*, inquit, *quia a Deo venisti*; Deum vero Jesum non agnoscit, nec aliquid in conditione eius humili perspicit, quo eum idoneum credere posset, qui regnum Israel, quale sibi Judæi de suo Messia animo conceperant, posset instaurare.

a) *Hom. XXIV. in Joan. T. VIII. p. 145.*

**Dumque** Nicodemus a Christo audit, neminem posse videre regnum Dei, nisi quis renatus fuerit denuo, in carnali generatione hæret, nec quomodo homo, cum fuerit senex, possit nasci, capit. *Nunquid, ait, potest in ventrem matris suæ iterato redire, et renasci?* Propius vero iam ad rem respondit Jesus: *Amen, amen dico tibi, nisi quis renatus fuerit ex aqua et Spiritu sancto, non potest introire in regnum Dei.* Notus haud dubie Nicodemo erat Baptismus Joannis per aquam: erant porro et Judæis lotiones variæ et baptismata, quorum discrimen ut ostenderet Christus, dicit renascendum ei esse ex aqua et Spiritu sancto, qui vellet introire in regnum Dei. Theocratiam vero Judæi in mente habebant terrenam, quam felicissimam sibi pollicebantur a Messia restaurandam, ita ut subactis gentibus, ac regnis, rerum per orbem potiretur Judaica natio, semen Abrahæ, tribus Juda, regia Davidis stirps. Subdit vero Christus: *Quod natum est ex carne, caro est: et quod natum est ex spiritu, spiritus est*, ut, quid sibi vellet renasci ex spiritu, insinuaret. „Ipsam, sunt verba S. Jo. Chrysostomi <sup>a)</sup>, abducit rebus omnibus sub sensum cadentibus, neque finit corporeis oculis mysteria scrutari. Non de carne, inquit, disserimus, sed de Spiritu, ô Nicodeme.“ Pergit Christus: *Non mire-*

Regeneratio ex aqua et Spiritu sancto.

<sup>a)</sup> *Hom. XXVI. in Joan. T. VIII. p. 149.*

**CAPUT** ris, quia dixi tibi : Oportet vos nasci denuo.

**XXIV.** Spiritus ubi vult spirat : et vocem eius audis, sed nescis, unde veniat, aut quo vadat : sic est omnis, qui natus est ex spiritu. De vento libere flante, et omnia pervadente est comparatio, cuius sonum audimus atque etiam eius motum et flatum sentimus, sed unde veniat, et quo vadat, nescimus. Nihil sublimius esse potest comparatione hac incomparabili ad designandas invisibiles operationes Spiritus S. τὸ πνεύματος, quæ vox simul ventum et spiritum significat. Act. II. 2. habetur vox πον, ubi adveniente Spiritu S. factus esse legitur repente de cælo sonus, tanquam advenientis spiritus vehementis, et replevit totam domum, ubi erant sedentes : ut nimirum ventus omnia penetrat, et pervadit : vehementia autem spiritus efficaciam operantis Spiritus S. declarat ac virtutem.

Iterum hæret aqua Nicodemo, quæritque : quomodo possunt hæc fieri ? Respondit Jesus, et dixit ei : Tu es magister in Israel, et hæc ignoras ? Oportebat magistros in Israel præ cæteris esse dociles, atque ad recipiendum Christum, veritatemque evangelicam comparatos : sed spiritus ubi vult spirat, nec a sapientibus carnaliter percipitur ; spiritualibus promissis autem animum noluerunt intendere Scribæ imprimis et Pharisei, magistri in Israel, Evangelium Christi, et Apo-

stolorum eius reiicientes prædicationem : **CAPUT XXIV.**  
*Amen, amen dico tibi, quia quod scimus loquimur, et quod vidimus testamur, et testimonium nostrum non accipitis. Si terrena dixi vobis, et non creditis, quomodo, si vobis dixero cælestia, credetis? De baptismo fermo est Christo, quo nihil erat frequentius apud Judæos, Phariseos præsertim rituum et cæremoniarum externarum tenaciores. Pharisei enim et omnes Judæi, nisi crebro laverint manus, non manducant, tenentes traditionem seniorum. Et a foro nisi baptizentur, non comedunt; et alia multa sunt, quæ tradita sunt illis servare, baptismata calicum, et urceorum, et aramentorum, et lectorum a). A vana autem observantia, externæ solum lotionis et munditiæ Phariseorum revocat; qui etiam Christum secus facientem carpebant, uti Phariseus ille offensus Luc. XI, 38, quare non baptizatus esset ante prandium? Et ait Dominus ad illum: Nunc vos Pharisei, quod de foris est calicis, et catini mundatis; quod autem intus est vestrum, plenum est rapina, et iniquitate. Stulti, nonne qui fecit, quod de foris est, etiam id quod deintus est, fecit? Et Matth. XXIII. 26. Pharisee cæce, munda prius, quod intus est calicis et paropsidis, ut fiat id, quod de foris est, mundum.*

a) Marc. VII. 3.

## CHRISTI DIVINITAS.

Si terrena dixi vobis, et non creditis :  
 quomodo, si dixero vobis cœlestia  
 credetis? *Et nemo ascendit in cœlum,*  
*nisi qui descendit de cœlo, filius hominis,*  
*qui est in cœlo. Jo. III. 12. 13.*

Generatio  
 divini  
 Verbi.

Explicaverat Christus Nicodemo regenerationem nostram, quæ fit ex aqua et spiritu, veluti homo constat ex corpore et anima: Dum vero, ut vidimus, Nicodemus vel in hac percipienda tantam fuerit expertus difficultatem; esset autem Nicodemi mens adhuc altius efferenda in fide, erudienda nempe de divinitate Christi, merito dicit Christus: *Si terrena dixi vobis, et non creditis: quomodo, si vobis dixero cœlestia credetis?* Si generationem non capitis, quæ fit ex aqua et Spiritu S. in terra secundum gratiam, quid de ineffabili illa Verbi divini generatione? ut rem accipit S. Jo. Chrysostomus: „Si porro, pergit a), baptismum terrenum appellet, ne mireris: aut enim illud ita vocat, quod in terra conferatur; aut ita vocat ipsum comparando cum tremenda illa sua generatione. Nam etsi hæc

a) *Hom. XXVII. in Jo. n. 1. T. VIII. p. 154.*

generatio cœlestis sit, si tamen comparetur cum illa ex Patris substantia generatione, terrena dici potest.“ Tanta vero est inter utramque generationem distantia, ut terrena hæc nostra, ne quidem in comparationem divinæ illius veniat, licet nos filios Dei hæredesque regni cœlestis faciat, civesque cœli; sed per eum, qui descendit de cœlo, factus homo. „Ipsē ad nos descendit, ut ait S. Leo a), ad quem nos non poteramus ascendere.“ Quia *nemo ascendit in cælum, nisi qui descendit de cœlo*. Et S. Paulus, *qui descendit, ipse est et qui ascendit b)*. „Hoc enim, ut in h. l. commentatur S. Thomas c), et in rebus naturalibus invenitur, quod unumquodque corpus tendit in locum secundum suam originem, vel naturam. Unde hoc modo potest fieri, ut aliquis per spiritum vadat ad locum, quem carnales nesciunt, ascendendo in cælum; si hoc fiat per virtutem eius, qui descendit de cœlo: quia ad hoc descendit, ut ascendens nobis viam aperiret.“ Et *nemo ascendit in cælum, nisi qui descendit de cœlo, filius hominis, qui est in cœlo*. Obiectionem hic præoccupat Theophanes, quæ fieri possit, quod, quando hæc dixerat Christus, necdum tanquam filius hominis, cum natura scilicet humana, fuerit in cœlo,

a) Serm. de Nativ. Dom.

b) Eph. IV, 10.

c) T. III. p. 482.

CAPUT XXV. respondet autem, dogma hic insinuari communicationis Idiomatum in ineffabili unione

divini Verbi cum nostra natura. „Cum enim, inquit a), essent duæ naturæ in unam hypostasim inconfuse coniunctæ, altera quæ alterius sunt participavit, ut naturarum proprietates de uno eodemque communiter dici possint. Cum igitur audis, in cælum neminem ascendisse, nisi eum, qui de cælo descenderat, Verbi divinitatem intellige; ideo enim continue addidit, *qui est in cælo*: stultum quippe est, ita de carne cogitare, quia ea in cælo extiterit, simulque cum Nicodemo disseruerit, cum trinam dimensionem, et circumscriptionem in loco naturaliter habeat.“ Mysteriorum sublimitatem textus græcus originalis melius ob oculos ponit *ὁ θεὸς ἀναβέβηκεν* nemo ascendit in præterito: et *ὁ ὢν ἐν τῷ ἁρανῶ* qui est, quod Unigenitum, seu consubstantialem Deo Filium demonstrat, ut se Deus per Moysen manifestaverat; *qui est*, misit me ad vos b). Et: *Deum nemo vidit unquam: unigenitus Filius*, qui est *ὁ ὢν* in sinu Patris, ipse enarravit c). Congruit huc locus Isaïæ XLVIII. 16. in quo S. Hieronymus mysterium S. Trinitatis notavit: *Non a principio in abscondito locutus sum: ex tempore antequam fieret, ibi eram: et nunc Domi-*

a) Hom. III. p. 14.

b) Exod. III. 14.

c) Joan. I. 18.

*nus Deus misit me, et spiritus eius.* Sic in **CAPUT**  
 sensu obvio verba hæc: *unigenitus filius, qui* **XXVI.**  
*est in cælo,* unionem hypostaticam Verbi  
 divini cum humana natura, Christi divini-  
 tatem, et mysterium Incarnationis sublimis-  
 sime complectuntur, et ob oculos ponunt:  
 dum nempe filius hominis in cælo esse  
 dicitur, Christus adhuc in terris degens, per  
 suam divinitatem, qua de cælo descendens  
 finem Patris coæternus, et consubstantialis  
 Dei Filius non relinquit.

---

**C A P U T XXVI.**  
**REDEMPTIO NOSTRA PER**  
**CRUCEM.**

*Sicut Moyses exaltavit serpentem in deserto:*  
*ita exaltari oportet filium hominis: ut*  
 omnis, qui credit in ipsum, non pereat,  
 sed habeat vitam æternam. Sic enim  
 Deus dilexit mundum, ut filium suum  
 unigenitum daret: ut omnis, qui credit  
 in eum, non pereat, sed habeat vitam  
 æternam. Jo. III. 14. etc.

---

**P**ergit Christus, Nicodemo exponere opus **Christus**  
 redemptionis humanæ consummatum in cruce **pro nobis**  
 incomparabili inenarrabilique amoris exem- **maledic-**  
 plo, ut non solum Deus ipse veniret, et ligno. **tum in**



CAPUT XXVI. salvaret nos, sed etiam fieret pro nobis  
maledictum suspensus in cruce. *Christus*

*nos redemit de maledicto legis, factus pro nobis maledictum; quia scriptum est: Maledictus omnis, qui pendet in ligno a). Maledictum serpentem ob seductionem primorum parentum in paradyso novimus, dum ex ligno vetito comedunt. Rationem legis ab apostolo memoratæ habuerunt Judæi, dum iubent frangi crucifixorum crura, ne remanerent corpora eorum sabbato, erat enim magnus dies ille sabbati; sed Christus morte sua iam prævenerat, in quo impleri oportebat omnem scripturam, factusque est maledictum illud pro nobis in cruce pendens in ligno Deut. XXI. 22. etc. Non permanebit cadaver eius in ligno, sed in eadem die sepelietur, quia maledictus a Deo est (Hebr. maledictio Dei est) qui pendet in ligno: et nequaquam contaminabis terram tuam, quam Dominus Deus tuus dedit tibi in possessionem. Maledictionem hanc ad redemptionem nostram, liberationemque a maledicto suscepit Christus in ligno crucis exaltatus, sicut serpens æneus a Moyse in deserto. Qua de re Justinus M. dicit b): „Moysen Deo aspirante, et præcipiendo impellente, aes accepisse, et crucis effigiem effecisse:“ rem ipsam vero ipse Christus Nicodemo declarat, consummaturque in hoc τὸ ὑψος in*

a) Gal. III. 13.

b) In Apol. I. n. 60. p. 79.

Evangelio Christi, sublimitate mysterii ite- CAPUT  
 rum elucente in humilitate Christi, qui XXVL  
*nos redemit de maledicto legis, factus pro nobis*  
*maledictum: humiliavit semetipsum factus obe-*  
*diens usque ad mortem, mortem autem crucis.*  
 „ Jam autem, sunt verba Theophanis Ar-  
 chiepiscopi Tauromenitani a), æneum illum  
 serpentem figuram Christi gessisse aperte  
 Evangelium prædicat. Neminem vero aman-  
 tium Christi conturbet hoc, quod audit, in  
 tam invisum animal rationem tanti mysterii  
 convenire. Si enim serpens pater peccati  
 in sacris litteris appellatur, quod etiam est  
 ex hoc serpente progenitum, peccatum in-  
 quam, eodem ac genitor nomine serpens  
 vocabitur. Cæterum nostri causa Dominum  
 factum esse peccatum, cum naturam no-  
 stram obnoxiam peccatis assumerit, testa-  
 tur apostolus: *eum, qui non noverat peccatum,*  
*pro nobis peccatum fecit.* Aptatur igitur hoc  
 ænigma Domino congruenter. Postquam  
 enim nequissimi illi serpentes in universum  
 genus humanum insilientes, naturam no-  
 stram peccatorum morsibus dilacerando  
 confecerunt, ea de causa similitudinem ser-  
 pentis induit Deus, factus *in similitudinem*  
*carnis peccati*, ut Paulus ait b): atque ita  
 liberatur homo a peccato per eum, qui  
 peccati habitum suscepit, similisque factus  
 est nobis, quia ad serpentem sponte acces-

a) *Homil. III. p. 15.*      b) *Rom. VIII. 3.*

**CAPUT XXVI.** seramus : cuius opera mors a morsibus orta cohibetur, et ipsi serpentes crucis passione delentur. Et destructa quidem est mors a serpentibus importata, nimirum impietas; at morsus nondum omnino cessarunt. Etenim illa concupiscentia, quæ carni adversus spiritum inest, nondum perfecte compressa est. Nam et in illis, qui virtute maxime pollent, sæpe concupiscentiæ morsus insurgunt. Sed qui in eum, qui sublatuſ in crucem est, oculos coniicit, affectionem illam, motumque inordinatum depellit, et timorem Dei veluti quoddam pharmacum in venenum aspergit. Crucem porro aspicere nihil est aliud, quam ita instituere vitam, ut mundo mortua, et crucifixæ sit, et ad omne peccatum immobilis perseveret, propriamque carnem timore Dei configere, iuxta psalmistæ votum: clavus vero carnem cohibens, continentia fuerit. “ Pergit Theophanes declarare, virgam Moysis in serpentem conversam Christi symbolum fuisse; nec est, quo magnitudo divini erga genus humanum amoris magis ob oculos poni possit, quam per hanc tantam unigeniti Filii Dei demissionem in similitudine serpentis antiqui, morsumque illum lethalem, quem ab eo accepimus, a Christo exaltato in ligno in melam versum, ut per Osee prophetam prædictum fuit: *De manu mortis liberabo eos,*

de morte redimam eos : ero mors tua ô mors , CAPUT XXVI.  
 morsus tuus ero inferne a). A Christo autem in figura serpentis ænei ostensa veritas :  
*sic enim Deus dilexit mundum , ut filium suum unigenitum daret , ut omnis , qui credit in illum , non pereat , sed habeat vitam æternam.* Quæ in verba commentatus S. Jo. Chrysostomus sic Nicodemum alloquitur : „ Ne mireris , ait b) , quod ego exaltandus sim , ut vos salutem consequamini. Nam hoc ita Patri visum est ; et sic ille vos dilexit , ut pro servis filium daret , et pro ingratis servis. Atqui neque pro amico quispiam id agat : *vix enim pro iusto quis moriatur c).* Sed ille longiore usus est sermone , quia fidelibus verba faciebat ; hic autem brevius Christus , quia Nicodemum alloquebatur , sed cum maiori emphasi : quæ in singulis dictis observatur. His enim verbis : *sic dilexit Deus mundum* , ingens amor significatur. Multum quippe immo immensum erat discrimen. Nam immortalis , et sine principio , magnitudo infinita , ex terra et cinere formatos innumeris onustos peccatis , qui semper se offendebant , ingratos ; hos , inquam , dilexit. Et quæ postea sequuntur , perinde vehementia sunt. Addit enim , *ut filium suum unigenitum daret* , non servum , non angelum , non archangelum ait. Atqui nemo unquam

a) *Osse XIII. 14.*      b) *Hom. XXVII. in Jo.*  
 a. 1. *T. VIII. p. 156.*      c) *Rom. V. 7.*

**CAPUT** vel circa filium tantum studium adhibuit,  
**XXVI.** quantum Deus circa ingratos servos. Pas-  
 sionem itaque non omnino aperte, sed ob-  
 scure prædixit: emolumentum autem ex  
 passione futurum clare dicit: *ut omnis, qui*  
*credit in eum, non pereat, sed habeat vitam*  
*æternam.*“ Omnia hic S. Justinus M. ad  
 Diognetum n. 9. complexus est, „quo-  
 modo Deus præ immenso, quo homines  
 prosequitur amore, nos odio non habuerit,  
 neque reiecerit, neque improbitatis nostræ  
 memorem se ostenderit, sed patienter eam  
 tulerit, ac fustinuerit? ipse peccata nostra  
 suscepit: proprium ipse Filium pretium re-  
 demtionis pro nobis dedit, sanctum pro  
 iis, qui legem transgressi erant; nihil mi-  
 nus quam malum pro malis; iustum pro  
 iniustis, corruptionis nescium pro obnoxiiis  
 corruptioni, immortalem pro mortalibus.  
 Quid enim aliud peccata nostra potuit  
 tegere, quam eius iustitia? In quo alio  
 nos iniqui et impii iustificari possumus,  
 quam in solo Dei Filio? O dulcem permu-  
 tationem! O impervestigabile artificium!  
 O beneficia expectationem omnem supe-  
 rantia! Ut iniquitas quidem multorum in  
 iusto uno abscondatur, iustitia autem *unius*  
*faciat, ut multi iniusti iustificentur.*“

Suis fide-  
 libus.

Quemadmodum vero prius Christus  
 Nicodemum iam dedocuerat, in negotio

salutis non esse spectandum semen ac generationem carnalem, ut suffeni sibi persuaserant Judæi de sua gente et stirpe, sed regenerationem ex aqua et spiritu, ita etiam hic exclusis operibus legis hunc veluti aspectum in serpentem suspensum in ligno declarat; fidem nimirum in Christum; *ut omnis, qui credit in illum, non pereat, sed habeat vitam æternam.* Deinceps etiam illam arrogantiam Judaicam excludit, quæ illi Messiam non solum quasi sibi soli natum existimabant, verum etiam ad conterendas nationes mundi, subigendasque ad unum omnes imperio Judæorum, quorum iudicio, seu tribunali subdendus, imperioque esset pariturus mundus, errorem hunc dedocturus Nicodemum; *non enim, subdit, misit Deus filium suum in mundum, ut iudicet mundum, sed ut salvetur mundus per ipsum:* Messiam nempe perinde omnibus nationibus fore redemptorem, non Dominatorem, ac iudicem terrenum, qualem Judæi Messiam affectabant, tribunalque ac thronum eius sibi fingeant. At *qui credit in eum, additur, non iudicatur, qui autem non credit in nomine unigeniti Filii Dei, iam iudicatus est.* Jam illud etiam declarans, quod primum Joannes dixerat a), lucem in tenebris lucere, et tenebras eam non

a) *Jo. I. 5. ii.*

CAPUT XXVI. comprehendisse; in propria venisse, et suos eum non recepisse, *hoc est autem*, inquit, *iudicium, quia lux venit in mundum, et dilexerunt homines magis tenebras, quam lucem: erant enim eorum mala opera etc.* Ut sermonem suum prosequitur Christus, Judæorum cæcitatem notans, quam eis toties, Pharisæis præsertim exprobravit verbis, tum ipso opere tenebris nempe illis, quæ factæ sunt ab hora sexta usque ad horam nonam, quamdiu Christus in cruce pependit; Judæi cæci vero ad hoc et alia omnia tunc etiam facta miracula, volebant, ut descenderet de cruce: *descendat nunc de cruce, et credimus ei a*); dum contra fides redemptionis nostræ nos doceret, oportere exaltari Christum in cruce, *ut omnis, qui credit in illum, non pereat, sed habeat vitam æternam.*

\*) *Matth. XXVII. 42.*

## CAPUT XXVII.

CAPUT  
XXVII.


## SPONSUS, ET AMICUS SPONSI.

*Qui habet sponsam, sponsus est: amicus autem sponsi, qui stat, et audit eum, gaudio gaudet propter vocem sponsi. Hoc ergo gaudium meum impletum est.\* Joan. III. 29.*

**D**iscipuli S. Joannis studio magistri et Christus sponsus:  
 æmulatione quadam abrepti ei denuntiant: *Rabbi, qui erat tecum trans Jordanem, cui tu testimonium perhibuisti, ecce hic baptizat, et omnes veniunt ad eum.* Jesum insimulare videntur, ac si ingratum se exhiberet erga Joannem; qui tam præclarum ei testimonium dedisset. At Joannes hoc ipso suo testimonio eos revincit, melioremque mentem indit ac existimationem erga Christum allegoria, qua nihil tenerius, suaviusque excogitari queat, nihilque accomodatius Christo Filio Dei, fese unione hypostatica, qua nihil coniunctius, intimiusque esse possit, cum natura humana copulanti: tum vero ex genere humano sponsam *tanquam sponsus procedens de thalamo suo a)* sibi coniunxit Ecclesiam fide data et recepta, prout

a) *Psalm. XVIII. 6.*



CAPUT per prophetam Oseam prænuntiavit: *Sponsa* XXVII. *sabo te mihi in fide a)*: præfiguravitque in  *Sephora uxore Moysi b)*; multo quippe maiori iure, congruentiusque Ecclesia sponsa sponso Christo dicere potest: *Sponsus sanguinum tu mihi es, utpotè quam acquisivit sanguine suo. Dilexit Ecclesiam, et se ipsum tradidit pro ea, ut illam sanctificaret, mundans lavacro aquæ in verbo vitæ, ut exhiberet ipse sibi gloriosam Ecclesiam non habentem maculam c)*. Prout est in Jerusalem præfigurata apud Ezechielem d): *Et iuravi tibi, et ingressus sum pactum tecum (ait Dominus Deus) et facta es mihi. Et lavi te aqua, et emundavi sanguinem tuum ex te: et unxi te oleo etc.*

S. Joani.  
Baptista  
amicus  
sponsi.

Pronubus igitur huius sancti coniugii fuit S. Joannes præcursor Domini. Dicit hic se iam amicum sponsi, cuius prius dixerat se non esse dignum, ut solvat corrigiam calceamenti eius. „Non ut extollat et laudet se, hæc dicit, sunt verba S. Jo. Chrysostomi e), sed ut ostendat, id se maxime curare, neque se invito, vel nolente, hæc fieri, sed admodum cupiente et promoven- te, et hac de causa se omnia fecisse; quod admodum prudenter amici nomine significavit. Non enim ita servi sponsi ut

a) Osee II. 20.

b) Exod. IV. 25.

c) Ephes. V. 25.

d) Ezech. XVI. 8. 9.

e) Hom. XXIX. ad. XXVIII. T. VIII. p. 167.

amici gaudent, atque his rebus lætantur. **CAPUT XXVII.**  
 Non ergo se honore æqualem dicit, ab-  
 sit; sed ut gaudii sui magnitudinem decla-  
 ret, atque ut se eorum infirmitati attem-  
 peret, amicum se dicit. Ministerium  
 quippe subindicavit, cum dixit, se missum  
 fuisse ante illum. Idcirco quod putaret  
 illos hæc ægre ferre, se amicum sponsi di-  
 cit esse, ostendens se non modo non ægre  
 ferre, sed admodum gaudere. " Legatur  
 S. Laurentius Justinianus *de Casto connubio*  
*verbi et animæ.* Cap. 9. T. I. oper. p. 192,  
 etc. Ed. Venetæ An. 1751.

Sunt, quæ præ oculis habemus S. Joan. **Sponsa Ecclesiæ.**  
 nis præcursoris Domini verba, veluti cla-  
 vis divini illius Cantici Canticorum Salomo-  
 nis, cuius prima statim verba: *Osculetur me*  
*osculo oris sui*, ardentissimum illud Patrum  
 V. T. ineffabili elegantia exprimunt vo-  
 tum, ut tandem Verbum illud divinum ex  
 ore æterni Patris procedens sese per incar-  
 nationem in unione hypostatica humanæ  
 naturæ velut oris osculo iungat, humanum-  
 que genus complectatur: ut loquebatur  
 olim per patriarchas et prophetas synago-  
 ga in Ecclesia sponsa futura sponsi ubera  
 petens, *fragrantia unguentis optimis* in Chris-  
 to uncto Domini: de quo *oleum*, pergit,  
*effusum nomen tuum*; ideo *adolescentula dilexe-*  
*runt te pronubæ* in V. T. sponsæ in N. ac-

**CAPUT** clamando: *Trahe me post te! curremus in odorem unguentorum tuorum. Introduxit me rex in cellaria sua: exultabimus, et letabimur in te, memores uberum tuorum.* Hic cum sponsa simul pronubæ loquuntur, cum synagoga sorore sponsæ, de qua infra (VIII. 8.) sponsus: *Soror nostra parva est, et ubera exuberantis gratiæ N. T. non habet. Quid faciemus sorori nostræ in die, quando alloquenda est?* Quam nempe allocutionem iam David Ps. XLIV. 2. prælibans: *Audi filia, et vide, et inclina aurem tuam, ait, et obliviscere populum tuum, et domum patris tui.* Ubra SS. Patres vetus et novum testamentum interpretantur, de quo Prov. V. 19.: *Ubra eius inebrient te in omni tempore; in amore eius delectare iugiter.* Ad hoc quod Salomon promittit, vult David ut inclinet filia Jerusalem aurem suam: *Et concupiscet rex decorem tuum, quoniam ipse est Dominus Deus tuus, et adorabunt eum, Christum sponsum Ecclesiæ.*

Passim sponsa filias Jerusalem velut pronubas novi coniugii compellat; sponsus etiam easdem filias Jerusalem ter adiurat his verbis: *Ne suscitetis, neque evigilare faciatis dilectam, quoadusque ipsa velit a),* nova nimirum sponsa Ecclesia, sua sponte per prædicationem Evangelii evigilatura ad vocem sponsi, de qua Joannes de se præcur-

a) Cant. Cant. II. 7. III. 5. VIII. 4.

sore amico sponsi, qui stat, inquit a), et audit, gaudio gaudet propter vocem sponsi; quasi dicat: *Vox dilecti mei; ecce! iste venit saliens in montibus, transiliens colles; dum nimirum sponso Christo, adhuc in utero matris, abeuntis in montana, latente, exultavit infans (Joannes hic) in utero matris Elisabeth: prout, similis est, pergit in Cantico sponsa (cuius sponsum Christum vox Joannis clamantis in deserto prænuntiat) dilectus meus caprea hinnuloque cervorum: en! ipse stat post parietem nostrum, respiciens per fenestram, prospiciens per cancellos veteris scilicet testamenti,*

Jam prorumpit vox sponsi Verbi incarnati ad novam futuram sponsam ex ipsius sponsæ ore b): *En! dilectus meus loquitur mihi: Surge propera amica mea, columba mea, formosa mea, et veni. Jam enim hyems transiit, imber abiit, et recessit. Flores apparuerunt in terra nostra, tempus putationis advenit, et quæ sequuntur, quæ explicatione non indigent ad felicem veteris in testamentum novum tam vivis coloribus demonstrandum transitum, de quo sermonem sponsa præsecuta, dilectus meus mihi, inquit c), et ego illi, qui pascitur inter lilia (virginæ matris) donec aspiret dies, et inclinentur umbræ veteris testamenti. Prænuntiavit aspirantem iam*

a) Jo. III. 29.    b) Cant. C. II. 10.    c) Ib. 16.

**CAPUT** diem hanc præcursor Domini a): *Hinc ve-*  
**XXVII.** *nit in testimonium, ut testimonium perhiberet*  
*de lumine.*

Frustra in lectulo suo dilectum quæsit  
 synagoga, dum is se nascens custodienti-  
 bus vigilas suas pastoribus per angelos de-  
 nuntiat. Frustra pastores indignata, cir-  
 cuiens civitatem per vicos et plateas quæ-  
 rit dilectum synagoga: *Quasivi illum, et non*  
*inveni b).* Celebrat quidem pulchritudinem  
 sponsæ synagoga soror sponsæ per prophe-  
 tas et apparatus totius V. T. *Donec aspi-*  
*ret dies, et inclinentur umbræ, vadam ad men-*  
*tem myrrhæ, et ad collem thuris c)* calvariæ  
 scilicet, ubi crucifixus synagoga Filium  
 Dei. *Erat autem in loco ubi crucifixus est hor-*  
*tus d).* Ibi positum in monumento iacere  
 adhuc, resurrectionem non credens per-  
 suasa synagoga acclamans sponsæ soror  
*hortus conclusus soror mea sponsa* ingeminat, *hor-*  
*tus conclusus, fons signatus* baptismi nimirum.  
 Synagoga vero sponsum in hortum suum  
 invitat: *Veniat dilectus meus in hortum suum,*  
*et comedat fructum pomorum suorum e).* Mes-  
 siam nimirum synagoga apud se mansurum  
 sperabat hortum suum Messię hortum fu-  
 turum; sponsamque iavitans, *veni, inquit,*  
*in hortum meum soror mea sponsa, messui myr-*

a) Jo. I. 7.    b) Cmt. C. III. I.    c) Ib. IV. 6.  
 d) Jo. XIX.    e) Cmt. C. V. I.

*rrham meam*, quam equidem synagoga Messisæ suo paravit cum aromatibus pro futura sponsa sponsi passionibus particeps: dumque dormit, cor tamen vigilat ad vocem dilecti pulsantis: *Aperi mihi soror mea etc. a)*; mittitque sponsus manum suam omnipotentis suæ per patrata in synagoga miracula per foramen *b)* portæ, veteris nimirum testamenti unde Christus prodiit, infremuerunt viscera eius, ut habet textus hebraicus originalis. *Surrexi*, pergit *c)*, ut *aperirem dilecto meo*; ardentem Messiam efflagitans *manus meæ stillaverunt myrrham*, et *digiti pleni myrrha probatissima* quod scilicet sponsa patienti amarior. Dum iam morituro in cruce Christo pessulum ostii sui aperire videtur dilecto clamans *d)*: *Si filius Dei est, descendat nunc de cruce et credimus ei. At ille declinaverat*, atque transierat. *Anima mea liquefacta est*, ut locutus est; dum *e)* omnis turba eorum, qui simul aderant ad spectaculum istud, et videbant, quæ fiebant, percutientes pectora sua revertebantur. *Quasivi*, pergit, et non inveni eum: *vocavi et non respondit amplius synagogæ frustra adiaranti filias Jerusalem, si inveneritis dilectum meum, ut nuncietis ei, quia amore lanqueo f)*, Messiam nempe suspirans ignara simul sponsam allocuta: *Qualis est dilectus tuus ex dilecto, o pulcherrima mulie-*

*a)* Cant. C. V. 2.    *b)* Ib. 4.    *c)* Ib. 5.    *d)* Matth. XXVII.    *e)* Luc. XXIII. 48.    *f)* C. C. V. 8.

**GABUT** *rum, Ecclesia Christi sponsa? qualis est di-*  
**XXVII.** *lectus ex dilecto, quia sic adiurasti nos, filias*  
 ~~~~~ *nimirum Jerusalem, quæ Christo fideles*  
*adhæserunt, aut in synagoga apostolos,*  
*primamque Ecclesiam genuerunt, atque*  
*agnoscere meruerunt ac dicere de Chris-*  
*to a): Dilectus meus candidus et rubicundus ex*  
*profuso sanguine, electus ex millibus.*

Habent hactenus præ oculis fuis Judæi sponsum, sed non agnoscunt electum præ millibus, desideranter quærunť dispersi per orbem christianum Ecclesiam, et adhuc quærunť b): *Quo abiit dilectus tuus, o pulcherrima mulierum? quo declinavit dilectus tuus? et quæremus eum tecum.* Quod adhuc speratur de convertendis ad Christum Judæis, ad quos clamat sponsa c): *Dilectus meus descendit in hortum suum* de quo mox initio c. I. 12. sponsa, fasciculus, ait, *myrrha dilectus meus mihi descendisse dicitur in hortum suum, ut pascatur in hortis, et lilia colligat* virginitalis, cuius ignara fuit synagoga, estque propria sponsi et sponsæ Ecclesiæ novi testamenti, ut iam dixerat, iterumque hic repetit sponsa d): *Ego dilecto meo, et dilectus meus mihi, qui pascitur inter lilia.*

a) Cant. C. V. 10.

b) Ib. 17.

c) Ib. VI. 1.

d) Ib. 2.

Alloquitur postea sponsus pronubas filias Jerusalem, synagogam, quæ ipsa patriarcharum et prophetarum vota pandit; sed iterum adiurantur filiæ Jerusalem a), ne suscitent, neque evigilare faciant dilectam, donec ipsa velit; quamque egressam dum vident, miratæ quidem clamant: *Quæ est ista, quæ ascendit de deserto deliciis affluens, innixa super dilectum suum?* Sub arbore malo suscitavi te: ibi corrupta est mater tua, ibi violata est genitrix tua, Eva nimirum esu pomi corruptionis nostræ mater concupiscendo fructum arboris a conditoris sui aversa dilectione; quam vero unice Christus reposcit in nova sua sponsa Ecclesia, nil in sua lege, novo testamento, nisi dilectionem flagitans, sponsam allocutus b): *Pone me ut signaculum super cor tuum; ut signaculum super brachium tuum: quia fortis est ut mors dilectio, dura sicut infernus amulatio: lampades eius, lampades ignis atque flammarum* (æterni scilicet, in inferno eis parati, qui a charitate deficiunt) beata vero fors eorum, quorum aquæ multæ non potuerunt extinguere charitatem, nec flumina obruent illam: *si dederit homo omnem substantiam domus sue pro dilectione, quasi nihil despiciet eam.* Novo testamento propria est hæc dilectio: quare de synagoga sorore sponsæ, soror nostra, pergit c), parva et ubera, ut iam de V. T. gratia va-

a) Cant. C. VIII. 4. b) Ib. 6. etc. c) Ib. 8.



**CAPUT** **XXVII.** **cuo** exposuimus, *non habet*; sponsa autem, ego, ait, *murus, et ubera mea sicut turris*. Jam bis supra c. IV, 4. VII. 4. collum, nasus quoque sponsæ turri comparatur: *Sicut turris David collum tuum, quæ edificata est cum propugnaculis; mille clypei pendent ex ea, omnis armatura fortium, sponsam nimirum Ecclesiam invictam deprædicans; unde etiam his c. VIII. 10. murum se sponsa nominat, quo tutam se præstet, ac pacis securam: ut paulo ante contestabatur: Ex quo facta sum coram eo, quasi pacem reprensens; quam nempe nato Christo sponso angeli denuntiarent hominibus in terra, quæ deinceps vinea fuit pacifico (cuius figura erat Salomon rex pacificus) in ea, quæ habet populos a), quibus Christus vineam suam, quam iuxta parabolam evangelicam Matth. XXI. 33. cœlestis Paterfamilias plantavit, et sepem circumdedit ei, et fodit in ea torcular, et edificavit turrin, ablatam parricidis sponsi Judæis locavit aliis agricolis, qui reddant ei fructum temporibus suis. Nempe tradidit eam custodibus: vir affert pro fructu eius mille argenteos. Vineam meam coram me est. Mille tui pacifici, et ducenti his, qui custodiunt fructus eius b); Demum sponsus in conclusione Cantici in sponsa Ecclesia militante in terris desiderium regnantis cum sponso in cœlis inflammans, Quæ habitas in hortis, ait c), amici auscultant*

a) Cant. C. VIII. 11. b) Ib. 12. c) Ib. 13. et 14.

*te: fac me audire vocem tuam.* Sponsa vero **CAPUT**  
 post fata illuc avolanti sponso acclamat: **XXVIII.**  
*Fuge dilecte mi, et assimilaré capræ hinnuloque*  
*cervorum super montes aromatum in cœlis.*

## C A P U T XXVIII.

### INCREMENTUM ECCLESIAE CHRISTI; DIMINUTIO SYNAGOGÆ.

*Illum oportet crescere, me autem minui.*

Qui de sursum venit, super omnes est.

Qui est de terra, de terra est, et de  
 terra loquitur. Qui de cœlo venit,  
 super omnes est. Joan. III. 30. 31.

**O**bserva bis repeti *super omnes est; et de* Christus  
*terra est*, illud de Christo (quem Pater cœ- cum Ec-  
 lestis unigenitum Filium suum misit in ter- clesia sua  
 ram) hoc de se, dicit Joannes Baptista: crevit,  
 qui iam testatus fuerat se homuncionem ve- exaltatus  
 luti non esse dignum solvere corrigiam cal- in cruce,  
 ceamentorum eius. Sic etiam hic dicit, se Joannes  
 adhuc minui oportere, Christum autem capite di-  
 crescere sponsum illum, cui repudiata sy- minutus  
 nagoga, genteque Judaica, Ecclesia per cum sy-  
 orbem terrarum erat coniungenda. Hoc bre- nagoga.  
 vissime sub synagogæ nomine expressit S.  
 Joann. Chrysostomus a): „*Illum oportet*

a) *Hom. XXIX. n. 3. T. VIII. p. 168.*

**CAPUT** crescere, me autem minui. Hoc est nostra  
 XXVIII, cessaverunt, quæ vero illius sunt augen-  
 tur.“ Et Theophanes a): „Incrementum  
 scilicet Evangelii, et legis diminutionem  
 indicans.“

Ubi Joan- Joannes desiit vivere, cum vix esset  
 nis vox cœptum prædicari Evangelium a Christo,  
 desiit, cāpite diminutus? Vox tunc clamantis de-  
 Christi siit, cum verbum divinum incarnatum in-  
 Verbi di- sonare cœpit. „Ergo attendite iam, cum  
 vini præ- S. Augustino loquor b), quo pertineat,  
 dicatio cœpit. *illum oportet crescere, me autem minui.* At-  
 tendite, si possim eloqui; si, non dicam  
 insinuare, sed saltem cogitare sufficiam,  
 quo modò, qua ratione, qua intentione,  
 qua causa, secundum distinctionem, quam  
 locutus sum *vocis*, et *verbi*, dixerit ipsa *vox*  
 ipse Joannes: *illum oportet crescere, me au-*  
*tem minui.* O magnum et mirabile sacra-  
 mentum! Attendite personam *vocis*, in qua  
 persona erant sacramenta omnium *vocum*,  
 dicentem de persona *Verbi*: *illum oportet cres-*  
*cere, me autem minui.*“ Explicat deinde sub-  
 limiter admodum, quomodo *vocis* ministe-  
 rium minuitur crescente profectu mentis ad  
 verbum, usque ad fruitionem in cœlis,  
 dum Deum videbimus, sicuti est. „Cum  
 eum, concludit, videbimus sicuti est, nun-

a) *Hom. L. p. 345.* b) *Serm. in Nativ. Joan. Bapt. CCLXXXIX n. 5. T. V. p. 1156.*

quid ibi recitabitur Evangelium? Nunquid CAPUT XXVIII.  
 prophetias audituri fumus? Nunquid epis-  
 tolas Apostolorum lecturi fumus? Quare?

Quia deficiunt voces, crescente verbo: quia *illum oportet crescere, me autem minui*. Et verbum quidem per se ipsum nec crescit, nec deficit in se. In nobis autem crescere dicitur, cum proficiendo in illum crescimus: sicut crescit in oculis lux, cum acie convalescente videtur amplius, quæ acie languente minus utique videbatur. Quæ minor erat oculis ægris, maior est oculis fanis: cum ipsa per se ipsam nec ante imminuta fit, ne postmodum creverit. Minuitur ergo ministerium vocis, cum fit mentis profectus ad Verbum. Ita oportet Christum crescere, Joannem autem minui. Hoc eorum indicant passionēs. Nam Joannes minutus est, cæsus capite; Christus exaltatus est, crevit tanquam in cruce. Hoc eorum indicant natales dies. Nam a Natali Joannis incipiunt dierum detrimenta; a Christi autem renovantur augmenta. "Postremum hoc iam S. Doctor ferm. XI. a) in Natali Domini notaverat; revocatque in memoriam: quod etiam S. Bernardus ferm. de S. Joanne Bapt. in eadem præcursoris verba perorat: „Quomodo, inquit b), minui? Splendore utique, non fervore. Retraxit radios, recollegit se, ne fieret,


a) *Serm. CXCIV. n. 1. p. 399.*    b) *Tom. III. p. 987.*

**CAPUT XXVIII.** sicut is, qui totum profert Spiritum suum. *Illum*, inquit, *oportet crescere*, qui exhauriri non potest, de cuius plenitudine omnes accipiunt: *me autem minui*, cui datus est spiritus ad mensuram: et danda magis opera, ut ardere semper valeam, quam lucere. Præcessi solem tanquam fidus matutinum: abscondi necesse est; orto iam sole.“ Eadem comparatione Luciferi usus S. Thomas in h. l.: „Sicut, ait a), in cælo Lucifer præcedit solem ad illuminandum, quo veniente cessat eius lux; ita Joannes præcessit Christum: unde Lucifero comparatur. *Nunquid produces Luciferum b)* ? Significatur hoc etiam in nativitate Joannis, et in morte eius. In nativitate quidem, quia natus est Joannes eo tempore, quo dies decrescere incipiunt, scilicet octavo Kalendas Januarii. Quantum ad mortem vero, quia Joannes mortuus minoratus per capitis abscissionem; Christus vero sublimatus per crucis exaltationem.“ Quis vero nobis sensus esse debet in comparatione S. Jo. Baptistæ, quo non surrexit maior inter natos mulierum, ut illud semper propositum nobis habeamus in corde, ore, et opere, omnibus studiis et actionibus nostris, gloriam Dei unice quærendam. Sic quisque semper apud se cogitet, in humilitate humiliationeque sua: *illum oportet crescere, me autem minui*.

a) *Lect. V. in cap. III. Jo. p. 492.*

b) *Job XXXVIII. 32.*

**TOMI PRIMI FINIS.**













[illegible][illegible][illegible]



